

# FAAMAONI I LE FAATUATUA



O SE TUSITAIALA O LE  
TALALELEI

# FAAMAONI I LE FAATUATUA

O SE TUSITAIALA O LE  
TALALELEI

Lolomi ma Faasalalauina e le  
Ekalesia a Iesu Keriso o le Au Paia o Aso e Gata Ai  
Aai Sate Leki, Iuta

Faavaa: *Light and Truth, [Malamalama ma le Upumoni]* saunia e Simon Dewey  
© puletaofia e Simon Dewey

© 2004 Puletaofia e le Intellectual Reserve, Inc.  
Taofia aia tatau uma  
Lolomiina i le Iunaita Setete o Amerika

Faamaonia le faaPeretania: 7/04  
Faamaonia le Faaliliuga: 7/04  
Faaliliuga o le *True to the Faith*  
Samoan

# SAVALI MAI LE AU PERESITENE SILI

O lenei tusi ua fuafuaina o se soa i au suesuega o tusitusiga paia ma aoaoga a perofeta o aso e gata ai. Matou te fautuaina outou ina ia faaaoga lenei tusi ao outou suesue ma faaaoga mataupu faavae o le talalelei. Ia faaaoga o se punaoa po o se risosi pe a saunia ni tautalaga, aoaoina vasega, ma tali fesili e faatatau i le Ekalesia.

Ao e aoaoina upu moni o le talalelei, o le a faateleina lou malamalama i le fuafuaga e faavavau a le Tama Faalelagi. O le i ai o lenei malamalamaaga e fai ma faavae o lou olaga, o le a mafai ai ona e faia faaiuga poto, ola e tusa ai ma le finagalo o le Atua, ma maua le olioli i le ola ai. O le a faamalosisia atili lau molimau. O le a e tumau faamaoni i le faatuatua.

O loo faapitoa lo matou manatua o talavou laiti, o talavou matutua nofofua, ma tagata faatoa liliu mai. Matou te folafola atu ia te outou e ala i tatalo faifai pea a le tagata lava ia ma le suesueina o tusitusiga paia ma mataupu faavae autu o le talalelei, o le a mafai ai ona outou saunia e tali atu i faatosinaga a le tiapolo ia e faasese ma faaleaga ai outou.

Ia faamalolosisia outou e lenei tusi i a outou taumafaiga e faalatalata atu i le Faaola ma mulimuli i Ana faaitaiga.

O Le Au Peresitene Sili



# AUTU FAALE-TALALELEI

## UA FAATULAGAINA FAAALAFAPETA

### **Afiafi Faaleaiga**

O le aiga o le nofoaga sili ona taua mo le aoaoina o le talalelei. E leai se isi faalapopotoga e mafai ona suia le tulaga o le aiga. O loo saga valaau mai pea lava pea Perofeta o Aso e Gata Ai i matua, ina ia faafaileleina a latou fanau ma le alofa ma le aoaoina o le talalelei.

O le 1915 na amata ai e Peresitene Iosefa F. Samita ma ona fesoasoani i le Au Peresitene Sili se taumafaiga i le Ekalesia aoao e faamalosi ai le aiga. Sa latou valaau atu i matua i totonu o le Ekalesia e faapotopoto ma a latou fanau taitasi i le vaiaso mo se "Afiafi Faaleaiga." E tatau i aiga ona faaavanoa se taimi e tatalo ma pepese faatasi ai, faitau tusitusiga paia, aoao le talalelei i isi, ma auai i gaioiga e mafai ona fausia ai le lotogatasi o le aiga.

O le 1970 na tonu ai ia Peresitene Iosefa Filitia Samita ma ona fesoasoani i le Au Peresitene Sili e filifilia le po o le Aso Gafua e avea ma taimi mo afiafi faaleaiga. Talu mai lena faasilasilaga, ua faaavanoa pea lava e le Ekalesia le afiafi o le Aso Gafua mai gaioiga faale-Ekalesia ina ia mafai ai e aiga ona mafuta faatasi.

O loo faaauau pea ona augani mai Perofeta o Aso e Gata Ai i tagata o le Ekalesia ina ia tuu atu le faamuamua sili i afiafi faaleaiga. Ua latou folafola mai o lo tatou faamaoni i lenei polokalama, o le a fesoasoani e puipuia ai o tatou aiga mai mealeaga i ona po nei, ma o le a aumaia ai ia i tatou le olioli tele i le taimi nei ma le faavavau atoa.

O tagata uma o le Ekalesia e ao ona avea afiafi o Aso Gafua ma se taimi paia, ia faaavanoa mo afiafi faaleaiga. Afai ua e faaipopo, ia faia a oulua afiafi faaleaiga faatasi ma lou toalua i vaiaso taitasi. A maua se fanau, ia faaauai i latou i le

afiafi faaleaiga. Ia faafetaui le polokalama i o latou manaoga ma mea e fiafia i ai, ma ia tuu atu le avanoa ia i latou e auai ai i le faatinoina. A oo ina matutua lau fanau ma tuua le aiga, ia faaaauu pea ona faia afiafi faaleaiga ma lou toalua.

Afai e na o oe pe le'i faia foi sou aiga, mafaufau e fesili atu i le epikopo po o le peresitene o le paranesi e faatulaga se afiafi faaleaiga mo oe ma isi tagata nofotoatasi o le uarota po o le paranesi. E mafai ona ia tofia se taitai o le afiafi faaleaiga, o ia lea e nafa ma le faatulagaina o le polokalama ma mautinoa o lo o faia pea afiafi faaleaiga.

O se auivi fautuaina mo le afiafi faaleaiga e i ai se:

- Pese amata
- Tatalo amata
- Mau faitau
- Lesona
- Gaoioiga
- Pese faaiu
- Tatalo faaiu
- Taumafa mama

Ao e saunia lesona mo le afiafi faaleaiga, ia manatua e faaaoga tusitusiga paia, aoaoga a Perofeta o aso e gata ai, ma potu masani faaletagata ma molimau. O lenei tusi e mafai ona fesoasoani i le filifilia o autu e aoaoina. Ma le isi, e mafai ona e tagai i isi lomiga a le Ekalesia, e pei o le *Tusi Faavae o Afiafi Faaleaiga* (aitema numera 31106), *Aoaoga Faavae o le Talalelei* (31110), o le *Tusitaiala mo le Aiga* (31180), ma mekasini a le Ekalesia.

*Tagai foi Aiga*

## **Afio Mai Faalua o Iesu Keriso**

Ina ua afio ae Iesu Keriso i le lagi i le faaiuga o Lana galuega i le lalolagi, na folafola atu ai e ni agelu se toalua i

Ona Aposetolo, “O Iesu lena, ua aveina ae nai ia te outou i le lagi, e faapea ona toe afio mai o ia, e pei o lona afio atu i le lagi na outou vaavaai i ai” (Galuega 1:11). Pe a toe afio mai le Faaola, o le a afio mai o Ia i le mana ma le mamalu e avea le lalolagi ma Ona malo. O Lona Afio Mai Faalua o le a faailo-gaina ai le amataga o le Meleniuma.

O le a avea le Afio Mai Faalua ma se taimi e fefefe ma tagiaue ai tagata amioleaga, ae o le a avea ma aso o le filemu ma manumalo mo e amiotonu. Na folafola mai e le Alii:

“Aua o e popoto ma sa talia le upu moni, ma avea le agaga Paia mo latou taitai, a e lei faaseseina—e moni ou te fai atu ia te outou, e le taia latou i lalo ma lafoina i le afi, a e tumau pea i latou i lea aso.

“E tuuina atu foi le lalolagi e fai mo latou tofi; e faatoateleina ma faamalosia foi i latou, ma a latou fanau e ola ae i le faaolataga e aunoa ma le agasala.

“Aua o le a faatasi le Alii ma i latou, e i o latou luga foi lona mamalu, e fai foi o ia mo latou tupu ma o latou faitulafono” (MFF 45:57–59).

E le i faailoa tonu mai e le Alii pe o afea o le a Ia afio mai ai: “A o le ituaso ma le aso e le iloa lava e se tasi, po o agelu foi i le lagi” (MFF 49:7). Ae na Ia faaali atu i Ana perofeta mea o le a tutupu ma faailoga o le a muamua mai i Lona Afio Mai Faalua. O nisi nei o mea ma faailoga ua valoia o le a tutupu:

- Liliuese mai upumoni o le talalelei (tagai Mataio 24:9–12; 2 Tesalonia 2:1–3).
- O le Toefuataiina o le talalelei, e aofia ai le Toefuataiina o le Ekalesia a Iesu Keriso (tagai Galuega 3:19–21; Faaaliga 14:6–7; MFF 45:28; 133:36).
- O le Toefuataiina mai o ki o le perisitua (tagai Malaki 4:5–6; MFF 110:11–16).
- O le oo mai o le Tusi a Mamona (tagai Isaia 29:4–18; 3 Nifae 21:1–11).
- O le talaiina atu o le talalelei i le lalolagi (tagai Mataio 24:14).



## Agaga

- O se taimi o le amioleaga, o taua, ma le le mautonu (tagai Mataio 24:6–7; 2 Timoteo 3:1–7; MFF 29:17; 45:26–33; 88:91).
- Faailoga i le lagi ma luga o le fogaeleele (tagai Ioelu 2:30–31; Mataio 24:29–30; MFF 29:14–16; 45:39–42; 49:23; 88:87–90).

Aua e te popole i le taimi tonu e Afio Mai Faalua ai le Faaola. Ae ia ola ina ia e saunia i soo se taimi lava e afio mai ai o Ia. Ao e matauina ia faafatiatamai o nei aso mulimuli, ia manatua o tagata amiotonu e le tatau ona fefefe i le Afio Mai Faalua po o faailoga foi e muamua mai ai. O afioga a le Faaola i Ona Aposetolo ua faatatau foi ia te oe: “Aua le atu-atuvale, aua pe a oo mai nei mea uma lava, tou te iloa ai ua faataunuaina folafolaga na faia ia te outou” (MFF 45:35).

Faamatalaga Faaopoopo: Luka 21:34–36; 2 Peteru 3:10–14; MFF 133:42–52; Iosefa Samita—Mataio

*Tagai foi i le Meleniuma; Ata o le Faaolataga; Faailoga*

## Agaga

O oe o se fanau agaga a le Tama Faalelagi, ma sa e ola ai o se agaga ae e te lei fanau mai i le lalolagi. I le taimi o lou olaga i le lalolagi, ua nofo ai lou agaga i totonu o lou tino faitino, lea na fanau mai i matua faaletino.

Ua tatou aoao mai tusitusiga paia e uiga i le natura o agaga. Ua tatou aoaoina e faapea “o agaga uma o mea tino lava ia, a e sili ona lelei ma mama, e na o mata mama foi e mafai ona iloa ai” (MFF 131:7). Ua tatou faitau e faapea “o le agaga o le tagata e foliga lava i lona tino, faapea foi le agaga o le manu, ma isi mea ola uma lava na foafoaina e le Atua” (MFF 77:2; Tagai foi i le Eteru 3:7–16).

O loo aoao mai foi tusitusiga paia e faapea i le taimi o le oti faaletino, e le oti le agaga. E tuueseaa mai le tino ma ola ai i le lalolagi o agaga. I le taimi o le toetutu, e toe faatasia le

agaga ma le tino, “e le toe vavaeeseina ai; ma ua faapea ona aveva ma faaleagaga uma ma le le toe oti lava” (Alema 11:45).

Faamatalaga Faaopoopo: Roma 8:16–17; 2 Nifae 9:10–13; MFF 93:29, 33

*Tagai foi* Ata o le Faaolataga; Toetu; Ola

**Agaga o le Alii** (*Tagai* Agaga Paia; Malamalama o Keriso)

## Agaga Paia

O le Agaga Paia o le tagata lona tolu lea o le Aiga Atua. O Ia o se peresona agaga, e leai se tino o aano ma ivi (tagai MFF 130:22). E masani lava ona ta’ua o Ia o le Agaga, o le Agaga Paia, o le Agaga o le Atua, o le Agaga o le Alii, po o le Fesoasoani.

Matafaioi a le Agaga Paia

O le Agaga Paia e galulue i le lotogatasi atoatoa ma le Tama Faalelagi ma Iesu Keriso, i le faataunuaina o matafaioi e tele e fesoasoani ai ia te oe ia ola amiotonu ma maua faamanuiaga o le talalelei.

Na te “molimau i le Tama ma le Alo” (2 Nifae 31:18) ma faaalua ma aoaoina “le tonu o mea uma lava” (Moronae 10:5). Ua na o le Agaga Paia lava e mafai ona e maua ai se molimau maumaututu e uiga i le Tama Faalelagi ma Iesu Keriso. O Lana fesootaiga i lou agaga e avatu ai se faamautinoaga e sili atu nai lo se isi lava fesootaiga e mafai ona e maua e ala i ou sane [senses] faanatura.

A o e taumafai e tumau i luga o le ala e tau atu i le ola e faavavau, o le Agaga Paia “na te faaali ia te [oe] mea uma e tatau ona [e] faia” (tagai 2 Nifae 32:1–5). E mafai ona Ia taitaiina oe i au filifiliga ma puipuaia oe mai tulaga matautia faaletino ma le faaleagaga.

O Ia, e mafai ai ona e maua meaalofoa a le Agaga mo lou lelei ma le lelei o ē e te alofa ma auauna i ai (tagai MFF 46:9–11).

## *Agaga Paia*

O Ia o le Fesoasoani (Ioane 14:26). E pei lava o se leo malu o se matua alofa e mafai ona faanaina ai se tagi a se tamaitiiti, o le musumusua a le Agaga e mafai ona faatoamalie ai lou fefe, e faafilemu ai le lē mautonu o popolega o lou olaga, ma faamafanafana oe pe a e faanoanoa. E mafai e le Agaga Paia ona faatumuina oe “i le faamoemoe ma le alofa atoatoa” ma “aoaoina oe i mataupu tau le filemu o le malo” (Moronae 8:26; MFF 36:2).

O Lona mana, e faapaiaina ai oe pe a e salamo ma maua sauniga o le papatisoga ma le faamauga, ma tumau i le faamaoni i au feagaiga (tagai Mosaea 5:1–6; 3 Nifae 27:20; Mose 6:64–68).

O Ia o le Agaga Paia o le Folafolaga (tagai Efeso 1:13; MFF 132:7, 18–19, 26). I le tulaga lea, Na te faamautuina sauniga o le Perisitua ua e maua ma feagaiga ua uma ona e osia e talia e le Atua. O lenei faamaoniga e faalagolago i lou tumau ai pea i le faamaoni.

### O Le Meaalofa a le Agaga Paia

O tagata sailiili faamaoni i le upu moni, e mafai ona latou lagona uunaiga a le Agaga Paia, e taitaiina atu ai i latou ia Iesu Keriso ma Lana talalelei. Ae peitai, o le atoatoaga o faamanuiaga e tuuina atu e ala i le Agaga Paia, e avanoa mo na o i latou o e ua maua le meaalofa a le Agaga Paia ma tumau i le agavaa.

Ina ua uma ona e papatiso i totonu o le Ekalesia a Iesu Keriso o le Au Paia o Aso e Gata Ai, e toatasi pe sili atu nisi e umia le Perisitua Mekisateko na faaee o latou lima i luga o lou ulu ma, i se sauniga paia o le perisitua, na faamauina ai oe o se tagata o le Ekalesia. O se vaega o lenei sauniga, ua ta’ua o le faamauga, na tuuina atu ai ia te oe le meaalofa a le Agaga Paia.

O le meaalofa a le Agaga Paia e ese mai aafiaga a le Agaga Paia. Ae le i faia lou papatisoga, na mafai ona e lagoina uunaiga a le Agaga Paia mai lea taimi i lea taimi, ma e ala i lena uunaiga e mafai ai ona e maua se molimau o le upu

moni. O le taimi nei ua e maua le meaalofo a le Agaga Paia, ua e maua le aia tatau mo le mafutaga faifai pea a lea sui lona tolu o le Aiga Atua pe afai e te tausia poloaiga.

O le atoatoaga o le olioli i le meaalofo a le Agaga Paia e aofia ai le mauaina o faaaliga ma faamafanafanaga, auauna ma faamanuia isi e ala i meaalofo faaleagaga, ma faamama-ina mai agasala ma faaagavaa mo le faaeaga i le malo selesitila. O nei faamanuiaga e faalagolago i lou agavaa; e auauai mai i lea taimi ma lea taimi a o e sauniuni mo ia faamanuiaga. Ao taitaiina mai lou olaga ia o gatasi ma le finagalo o le Atua, o le a e maua malie le Agaga Paia i se laasaga sili. Na faailoa mai e le Perofeta o Iosefa Samita o mea lilo o le malo o le Atua “na ona vaايا ma malamalama i ai i le mana o le Agaga Paia, e tuuina atu e le Atua i e alolofa ia te ia, ma faamamaina i latou lava i ona luma” (tagai MFF 76:114–116).

Ia manatua “e le afio le Agaga o le Atua i malumalu e le paia ” (Helamana 4:24). E ui lava ua e mauaina le meaalofo a le Agaga Paia, ae o le a mafuta pea le Agaga ma oe pe afai e te tausia poloaiga. O le a alu ese mai o Ia pe afai e te faamaina o ia e ala i gagana masoa ma le palauvale, o mea eleelea, lē usiusitai, tetee, po o isi agasala. Ia tausia oe ia mama. Ia faatumuina lou olaga i le lelei ina ia mafai ona e agavaa mo le mafutaga faifai pea ma le Agaga Paia.

Mau Faaopoopo: Mataio 3:11; Ioane 15:26; 16:13; Galuega 2:38; 8:12–17; 19:1–6; 1 Korinito 2:9–14; 12:3; Kalatia 5:22–23; 1 Nifae 10:17–19; 2 Nifae 31:17; MFF 8:2–3; 39:20–24; 68:25–28; 121:46; Mataupu Faavae o le Faatuatua 1:4

*Tagai foi* Papatísoga; Aiga Atua; Faaee atu o Lima; Faaaliga; Meaalofo Faaleagaga

## **Agaga o le Upumoni** (*Tagai Agaga Paia*)

### **Agasala**

Pe a tatou le usiusitai ma le loto i ai i poloaiga a le Atua, ua tatou faia le agasala. Ua tatou faia foi le agasala pe a tatou

## Aiga

le faia le amiotonu e ui lava o loo tatou iloa le upumoni (tagai lakopo 4:17).

Na fetalai le Alii e faapea o “[Ia] e le mafai ona vaai atu i le agasala ma faatagaina ai sina mea itiiti lava” (MFF 1:31). O le taunuuga o le agasala o le alu ese mai lea o le Agaga Paia ma, i le faavavau foi, o le a le mafai ona mau faatasi ma le Tama Faalelagi i Lona afioaga, aua “e le mafai ona nofo se mea eleelea faatasi ma le Atua” (1 Nifae 10:21).

O i tatou uma lava taitoatasi ua solia poloaiga pe ua toilalo foi e faia le mea e tusa ai ma lo tatou malamalamaaga i le upumoni. Na aoao mai le Aposetolo o Ioane: “Afaai tatou te faapea, E leai sa tatou agasala, ua sese ai i tatou ia i tatou, e le o i totonu ia te i tatou le upu moni; a e afaai tatou te faaali a tatou agasala, e faamaoni [Iesu Keriso], ma le amiotonu e faamagalalo ai a tatou agasala, ma faamama mai ia i tatou i amioletonu uma lava” (1 Ioane 1:8–9). O le Togiola a Iesu Keriso, e mafai ai ona tatou salamo ma faamagaloina mai ia tatou agasala.

Faamatalaga Faaopoopo: Roma 3:23; 6:23; Alema 5:41–42; 11:37; Helamana 5:10–11; MFF 82:1–3; 88:34–35

*Tagai foi* Togiola a Iesu Keriso; Oti, Faaleagaga; Faamagaloga; Faamasinoga Tonu; Alofa Mutimutivale; Usiusitai; Salamo; Faasoosoga

## Aiga

I le aso 23 o Setema, 1995, na fofogaina mai ai e Peresitene Gordon B. Hinckley, le Peresitene lona 15 o le Ekalesia, le folafolaga lenei i se sauniga aofai a le Aualofa. O lenei faasilasilaga musuia, ua faaulutalaina “O Le Aiga: O Se Folafolaga i le Lalolagi,” ua avea ma tautinoga aloaia a le Ekalesia e uiga i le aiga:

“O i matou o le Au Peresitene Sili ma le Aufono a le Au Aposetolo e Toasefululua o le Ekalesia a Iesu Keriso o le Au Paia o Aso e Gata ai, matou te tautino atu ma le faamaoni o le faaipopoga i le va o se alii ma se tamaitai ua faauuina e le

Atua ma o le aiga o le totonugalemu lea o fuafuaga a le Foafoga mo le taunuuga e faavavau o Lana fanau.

“O tagata soifua uma - tane ma le fafine ua foafoaina i le faatusa o le Atua. O i latou taitoatasi o se atalii po o se afafine faaleagaga faapelepele a ni matua faalelagi ma o lea ua tofu ai i latou taitoatasi ma se natura ma se taunuuga paia. O le tulaga tane po o le fafine (o le tagata) o se vaega taua lea o le muai olaga, olaga faitino ma lona faamoemoe e faavavau.

“I le muai olaga, sa iloa ma tapuai atalii ma afafine faaleagaga i le Atua o lo latou Tama e Faavavau ma sa [latou] talia Lana fuafuaga e mafai ai e Lana fanau ona maua ni tino faaletino ma le tomai faalelalogi latou te maua ai le atoatoaga ma iloa tino ai lona taunuuga paia o se suli o le ola e faavavau. O le fuafuaga paia o le fiafia ua mafai ai ona faauau fegalegaleaiga faaleaiga i tala atu o le tuugamau. Ua mafai i sauniga paia ma feagaiga ua maua i malumalu paia ona toe foi atu ai tagata taitoatasi i le afioaga o le Atua ma toe faatasia aiga e faavavau.

“O le uluai poloaiga na tuuina e le Atua ia Atamu ma Eva, e faatatau i lo la agavaa mo tulaga faamātua o se tane ma se ava. Matou te tautino atu o le poloaiga a le Atua i Lana fanau ia fanafanau ma uluuluola ai le lalolagi ua faamalositia ma faatumauina. Matou te toe tautino atu foi ua poloai mai le Atua o mana paia o le foafoaina o fanau ua na o le va lava o le alii ma le tamaitai ua faaipoipoina faaletulafono, o se tane ma le ava e tatau ona faaaogina ai.

“Matou te tautino atu o le ala ua foafoaina ai le ola faitino ua faatuina i le finagalo paia. Matou te faamaonia le paia o le ola ma lona taua i le fuafuaga e faavavau a le Atua.

“O le tane ma le ava ua i ai le tiutetauave paia e alofa ma tausie e le tasi le isi ma a la fanau. O fanau o le tofi lea mai le Alii’ (Salamo 127:3). Ua i ai i matua se tiute paia e tausie a latou fanau i le alofa ma le amiotonu, ia tuuina atu i ai mea e manaomia i le faaleagaga ma le faaletino, ia aoao i latou e alolofa ma feauaunaa’i, ia tausie poloaiga a le Atua ma avea ma tagatanuu usiusitai i tulafono i soo se mea e nonofo ai. O

## *Aiga Atua*

tane ma ava – tina ma tamā - o le a latou tali atu i le Atua mo le faataunuaina o nei mea e ao ona faia.

“O le aiga ua faauuina e le Atua. O le faaipoipoga i le va o le alii ma le tamaitai e taua i Lana fuafuaga e faavavau. E tatau ona fanauina fanau i totonu o feagaiga o le faaipoipoga ma ia tausia e se tamā se tina o ē ua faamamaluina ma le faatuatua atoatoa feagaiga faaleulugalii. E maua le fiafia i le olaga faaleaiga pe a faavae i aooga a le Alii o Iesu Keriso. O faaipoipoga ma aiga manuia e faavae ma tumau i mataupu faavae o le faatuatua, tatalo, salamo, faamagaloga, faaaloalo, alofa, agalelei, galuega, ma gaoioiga faafiafia tuufaatasi. I le fuafuaga paia e tatau ona pulefaamalumu tamā i o latou aiga i le alofa ma le amiotonu ma o i latou e tuuina atu mea e manaomia o le olaga ma le puipuiga mo lo latou aiga. O le uluai matafaioi a tina o le faafaileleina lea o a latou fanau. O nei matafaioi paia, e ao i tamā ma tina ona fesoasoani le tasi i le isi o se paaga tutusa. O mea e faaletonu, oti, po o nisi mea e tulai mai, e alagatatau ai ona fetuutuunai tagata taitoatasi. E tatau i aiga lautele ona tuuina atu le lagolago pe a manaomia.

“Matou te lapatai atu o tagata taitoatasi o ē ua solia feagaiga o le ola mama, o ē faasaunoa i taitoalua po o fanau, o ē ua faatalale i le faataunuaina o tiutetauave faaleaiga, o le a i ai se aso tou te tutu atu ai e tali atu i luma o le Atua. E le gata i lea, matou te lapata’i atu foi, o le faamalepeina o le aiga o le a aumai ai faafanoga ia na uluai ta’u mai e perofeta anamua ma aso nei.

“Matou te valaau atu i tamalii ma failauga ma taitai o malo i soo se mea ina ia faalauiloa atu na fua faatatau ua fuafuaina ina ia faatumauina ma faamalosia le aiga, o se iunite faavae o malo” (*Liahona*, Oke. 1998, 24).

*Tagai foi Afiafi Faaleaiga; Faaipoipoga; Malumu*

## **Aiga Atua**

O le mataupu faavae o le faatuatua muamua e faapea, “Matou te talitonu i le Atua le Tama Faavavau, ma Lona Alo

o Iesu Keriso, ma le Agaga Paia.” O nei tagata e toatolu e fausia ai le Aiga Atua. Latou te pulefaamalumu i le lalolagi ma isi foafoaga uma a lo tatou Tama i le Lagi.

O le aoaoga faavae moni e uiga i le Aiga Atua na leiloa i le liliuese lea na tupu ina ua mavae le misiona a le Faaola i le olaga nei, ma le maliliu o Ana Aposetolo. O lenei aoaoga faavae na amata ona toefuataiina mai ina ua maua e Iosefa Samita i le 14 o ona tausaga le Uluai Faaaliga (tagai Iosefa Samita—Talafaasolopito 2:17). Mai le faamatalaga o le Uluai Faaaliga e le Perofeta ma isi ana aoaoga, ua tatou iloa ai o sui o le Aiga Atua e tolu tagata mavaevae. O le Tama ma le Alo e i ai tino o aano ma ivi, ae o le Agaga Paia o se peresona o agaga (tagai MFF 130:22).

E ui lava o sui o le Aiga Atua o ni tagata mavaevae, ma mavaevae foi a latou matafaioi, ae e tasi i latou i le faamoe-moe ma le mataupu. E atoatoa lo latou lotogatasi i le faatau-nuina o le ata o le faaolataga paia a le Tama Faalelagi.

Mau Faaopoopo: Mataio 3:13–17; Ioane 14:6–10; 17:6–23; Galuega 7:55–56; 2 Nifai 31:18; Mamona 7:5–7; MFF 76:20–24

*Tagai foi* Atua le Tama; Agaga Paia; Iesu Keriso

## **Aitalafu**

Na ala mai i le Perofeta o Iosefa Samita, ona ta’u mai e le Alii i se vaega o le Au Paia, “O lo’u loto ia outou totogi a outou aitalafu uma” (MFF 104:78). Talu mai uluai aso o le Ekalesia, ua lapatai soo mai perofeta a le Alii ia i tatou e aloese mai le nofopologa i aitalafu.

O se tasi o tulaga matautia tele o le aitalafu o le tului lea e faaopoopo i ai. O nisi o faiga faaaitalafu, e pei o kata aitalafu, e sili atu ona maualuluga pasene o tului. O le taimi lava e te nofo aitalafu ai, o le a e iloa ai o le tului e leai se alofa. E faaauau pea ona faaopoopoina, e tusa lava pe o le a le ituaiga tulaga o loo e i ai—pe o e faigaluega pe leai se galuega, maloloina pe ma’i. E le mafai lava ona toe alu ese seiloga ua toto-giina le aitalafu. Aua nei faaseseina oe i faatosinaga a



## *Alofa*

aitalafu, e tusa lava pe foliga manaia e ala i le folafola mai o se tului laitiiti pe leai foi se tului mo sina vaitaimi.

Vaai le tulaga o au tupe. Ia pulea lelei oe lava ma au faatau, ia aloese mai le aitalafu i le mea sili e te mafai ai. O le tele o mea e tutupu, e mafai ona e aloese mai le aitalafu e ala i le pulea ma le atamai o au risosi. Afai e te faia se aitalafu, e faapei o se aofaiga talafeagai ina ia mafai ona faatau ai se fale lelei pe faaaau ai au aoaoga, ia galue e toe totogi i le vave e mafai ai ma faasaoloto oe mai le nofo pologa. Pe a uma ona e totogiina au aitalafu ma faaputuputu ni tupe teu, o le a e saunia mo afā po o faigata tautupe e ono oo mai ia te oe. O le a i ai se sulufaiga mo lou aiga ma le filemu i lou loto.

Mau Faaopopo: Luka 16:10–11; MFF 19:35

## **Alofa**

O le alofa o se lagona loloto o le gauai faamaoni, popolega, ma le mataalofa. O le alofa mo le Atua ma uso a tagata o se uiga lelei o soo o Iesu Keriso (tagai Mataio 22:35–40; Ioane 13:34–35; 2 Nifae 31:20). Tatou te faailoa atu lo tatou alofa mo le Tama Faalelagi e ala i le tausia o Ana poloaiga ma auauna atu i Lana fanau. O le faailoa atu o lo tatou alofa mo isi e mafai ona aofia ai le agalelei atu ia i latou, faalogo atu ia i latou, faanoanoa faatasi ma i latou, faamafanafana atu ia i latou, auauna atu ia te i latou, tatalo mo i latou, fetufaai faatasi ma i latou i le talalelei, ma avea ma ni uo ia i latou.

O lo tatou alofa mo i latou o loo siosiomia i tatou, o le a faateleina pe a tatou manatua o i tatou uma lava o fanau a le Atua—o i tatou o ni uso ma ni tuagane po o tuafafine faaleagaga. O le alofa e maua mai i lea malamalama, o loo i ai le mana e oo atu i tuaoi uma o malo, ituaiga, ma lanu.

Faamatalaga Faaopopo: Levitiko 19:18, 34; Teuteronome 6:5; Luka 6:31–36; Ioane 15:9–15; 1 Ioane 4:7–21; Mosaea 4:14–15; MFF 4:5; 12:8; 112:11; 121:41–45

*Tagai foi i le Alofa Mama; Alofa Mutimutivale; Usiusitai; Auaunaga*

## **Alofa moni**

O le alofa moni o le “alofa mama o Keriso,” po o le “alofa faavavau” (Moronae 7:47; 8:17). Na aoao mai le perofeta o Mamona: “E onosai le alofa, e agamalu, e le losilososi, e le faafefeteina, e le saili e ia ana lava mea, e le faaitaitagofie, e le mafaufau i le leaga, e le fiafia i le amioleaga, a e fiafia i le faamaoni, e faatoatoa i mea uma, e talitonu i mea uma e faamoemoe i mea uma e onosai i mea uma” (Moronae 7:45; tagai foi 1 Korinito 13:4–7).

O Iesu Keriso o le faaitaitaiga sili lea o le alofa. I Lana misiona i le olaga nei, sa masani ona Ia “femaliuai ma agalelei,” i le aoaoina o le talalelei ma faaali atu le alofa mutimutivale mo e matitiva, mamai, ma lotovaivai (tagai Mataio 4:23; Mareko 6:6; Galuega 10:38). O Lana faaaliga maualuga o le alofa, o Lana Togiola le iu lea. Na Ia fetalai, “E le sili lava le alofa o se tasi i lenei alofa, ia tuuina atu e se tasi lona ola e sui ai ana uo” (Ioane 15:13). O le faaaliga silisili lea o le onosai, agalelei, ma le le manatu faapito ua tatou iloa. Faatasi ai ma se malamalamaaga i le alofa le uma o le Faola, e mafai ona e faaalua le faatuatua ma le salamo i au agasala, ma le mautinoa o le a Ia faamagaloina oe ma faamalosia oe i au taumafaiga e ola i le talalelei.

E finagalo le Faola e te mauaina Lona alofa, ma e finagalo foi o Ia ina ia e faasoa atu i isi. Sa Ia faaali i Ona soo: “O le poloaiga fou ou te tuu atu ai ia te outou, ia outou fealofani faapei ona ou alofa atu ia te outou. O le mea lea e iloa ai e tagata uma lava o ou soo outou pe afai ua outou fealofani” (Ioane 13:34–35). I a outou fegalegaleaiga ma tagata o le aiga ma isi, ia e tepa taula’i atu i le Faola o lou faaitaitaiga. Taumafai e alofa e faapei ona Ia alofa, faatasi ai ma le agaga e tumu i le alofa faifai pea, onosai, ma le alofa mutimutivale.

A o faaauau ona e mauaina le alofa atoatoa o le Faola ma a o e faaalua uiga faaKeriso mo isi, o le a e iloa ai o le a faateleina lou alofa. O le a e lagonaina le olioli o le i ai i le galuega a le Alii. O le a avea le Agaga Paia ma au soa tumau, e

taitaiina oe i au auaunaga ma au fesootaiga ma isi. O le a e saunia e fetai ai ma le Alii i le Faamasinoga, pe a Ia tauia oe e tusa ma lou maelega i Lana galuega. Sa aoao mai Mamona:

“Afai e leai se alofa ia te outou, e lē aoga lava outou, aua e lē uma le alofa. O le mea lea ia outou uumau ai le alofa, ua silisili i mea uma, auā e faaleaogaina mea uma —

“A o le alofa moni, o le alofa mama lea o Keriso, e tumau ia e faavavau; o i latou uma foi ua maua ua i ai lea alofa i le aso gataaga, e lelei ia te i latou.

“O le mea lea ou uso pele e, ia outou tatalo atu ai i le Tama ma le malosi uma o le loto, ina ia faatumuina outou i lenei alofa ua foaiina mai ia te i latou uma o e ua fai ma soo faamaoni o lona Alo o Iesu Keriso, ina ia avea outou ma atalii o le Atua, ina ia foliga i tatou ia te ia pe a faaalua mai o ia, auā tatou te iloa atu ia te ia e pei lava ona i ai nei o ia, ina ia ia te i tatou lenei faamoemoe, ina ia faamamaina i tatou, e pei ona mama o ia” (Moronae 7:46–48).

Mau faaopoopo: Mataio 25:31–46; 1 Ioane 4:18; Eteru 12:33–34; MFF 12:8; 34:3; 121:45

*Tagai foi Alofa; Auaunaga*

## **Alofa Mutimutivale**

E silafia e lo tatou Tama Faalelagi o tatou vaivaiga ma agasala. E faaalua e ia le alofa mutimutivale pe a Ia faamagaloina a tatou agasala ma fesoasoani ina ia tatou toe foi atu e nonofo faatasi ma Ia.

O lena alofa e foliga e feteenai ma le tulafono o le faamasinoga tonu, lea e le faatagaina ai se mea e le mama ona nonofo faatasi ma le Atua (tagai 1 Nifae 10:21). Peitai o le Togiola a Iesu Keriso ua mafai ai foi ona avea le Atua ma se tasi e “sao ona lelei, o le Atua amiotonu, o le Atua foi ua finagalo alofa” (Alema 42:15).

## Mauaina o le Alofa Mutimutivale o le Atua

Sa faamalieina e le Faaola manaoga o le faamasinoga tonu ina ua tulai o Ia i o tatou tulaga ma puapuagatia i le faasalalaga mo a tatou agasala. Ona o lenei gaoioiga e lē manatu faapito, e mafai ai e le Tama ona finagalo alofa e taofi le faasalalaga mai ia i tatou ma faaulufale atu i tatou i Lona afioaga. Ina ia maua le faamagaloga a le Alii, e tataua ona tatou matuai salamo faamaoni i a tatou agasala. E faapei ona aoao mai le perofeta o Alema, “Ua faaaogaina e le faamasinoga lana pule uma; ua pule foi le alofa i ana lava mea uma, o lea ua na o e salamo faamaoni e faaolaina ai” (Alema 42:24; Tagai foi i fuaiupu 22–23, 25).

O le faamagaloga o agasala e le na o le pau lea o le mea alofa o le alofa mutimutivale mai le Tama Faalelagi ma Iesu Keriso. O faamanuiaga uma ua e maua o ni faatinoga ia o le alofa mutimutivale, e sili atu nai lo mea e mafai ona e mauaina e oe lava ia. Sa aoao mai Mamona, “O mea uma ua lelei, e mai ia Keriso ia; a le o lea, ua pauu tagata, ma ua le mafai ona oo mai ia te i latou se mea lelei e tasi” (Moronaē 7:24). Mo se faataitaiga, o oe o se tasi ua mauaina le alofa mutimutivale paia i le taimi e faafofoga ma tali mai ai le Tama Faalelagi i au tatalo, i le taimi e te mauaina ai le taitaiga mai le Agaga Paia, ma le taimi foi e te manuia ai mai se ma’i e ala mai i le mana o le perisitua. E ui lava o na faamanuiaga uma e oo mai o se taunuuga o lou usiusitai, e le mafai lava ona e mauaina mai i au lava taumafaiaga na o oe. O ni meaalofo o le alofa mutimutivale mai se Tama alofa ma agalelei.

## Faali atu o le Alofa Mutimutivale mo Isi

I Lana fetalaiga i Ona soo, na poloai atu ai le Faaola: “Ia mutimutivale lo outou alofa, pei ona alofa mutimutivale o lo outou Tama” (Luka 6:36). E mafai ona e mulimuli i le faataitaiga a lou Tama Faalelagi o le alofa tunoa i au sootaga ma isi. Ia taumafai malosi e aveesea mai ia te oe le faasausili, faamaualuga, ma le manatu faapito. Saili i auala e faali atu ai lou

## *Alofa Tunoa*

alofa, faaaloalo, loto faamagalalo, filemu, ma le onosai, e tusa lava pe ua e iloa vaivaiga o isi tagata. A e faia lena mea, o le a avea au faataitaiga ma ala e taitai ai isi ina ia alofa muti-mutivale, ma o le a silisili ai ona e mauaina le alofa tunoa o le Atua.

Faamatalaga Faaopoopo: Mataio 5:7; Luka 10:25–37; Alema 34:14–16

*Tagai foi i le Alofa Mama; Faamagaloga; Alofa Tunoa; Faamasinoga Tonu*

### **Alofa Tunoa**

O le upu *alofa tunoa*, e pei ona faaaogaina i totonu o tusi-tusiga paia e faasino tonu lava i le fesoasoaniga faalelagi ma le malosi tatou te maua e ala i le Togiola a le Alii o Iesu Keriso. Na aoao mai le Aposetolo o Paulo e ao ona tatou “tuputupu i le alofa tunoa ma le poto i lo tatou Alii o lo tatou Faaola lea o Iesu Keriso” (2 Peteru 3:18).

Faaolataga e ala i le Alofa Tunoa

Ona o le Pau, o tagata uma lava o le a oo i ai le oti faaletino. O le alofa tunoa, e ala i le taulaga togiola a le Faaola, o le a toetutu ai tagata uma ma maua le tino ola pea (tagai 2 Nifae 9:6–13). Ae peitai a na o le toetu lava ia, e le mafai ona faaagavaa ai i tatou mo le ola faavavau i le afioaga o le Atua. O a tatou agasala ua lē mama ai i tatou ma lē mafai ai ona tatou mau i le afioaga o le Atua, ma e tatou te manaomia Lona alofa tunoa e faamama ma faaatoatoa ai i tatou “pe a uma ona faia mea uma tatou te mafaia” (2 Nifae 25:23).

O le fasi fuaitau o “mea uma tatou te mafaia” o loo aoao mai ai, e manaomia i la tatou vaega le taumafai, ina ia maua ai le atoatoaga o le alofa tunoa o le Alii ma maua ai le agavaa e mau faatasi ma Ia. Na poloai mai le Alii ia i tatou e usiusitai i Lana talalelei, e aofia ai le faatuatua ia te Ia, salamo i a tatou agasala, papatiso, mauaina o le meaalofa a le Agaga Paia, ma tumau e oo i le iuga (tagai Ioane 3:3–5; 3 Nifae 27:16–20; Mataupu Faavae o le Faatuatua 1:3–4). Na tusia e le

perofeta o Moronae e uiga i le alofa tunoa tatou te mauaina pe a tatou o mai i le Faaola ma usitai i Ana aoaoga:

“Ioe, o mai ia ia Keriso, ina ia faaatoatoaina outou e ia, ma ia teena e outou le amioletonu uma, ma alolofa atu i le Atua ma o outou loto atoa, ma o outou manatu ma lo outou malosi uma, ona lava ai lea o lona alofa tunoa mo outou, ina ia atoatoa ai outou ia Keriso i lona alofa tunoa; afai foi ua atoatoa outou ia Keriso i le alofa tunoa o le Atua, tou te le mafai lava ona faafitia le mana o le Atua

“Ma le tasi, afai ua atoatoa outou ia Keriso i le alofa o le Atua, ae le faafitia lona mana, ona faapaiaina ai lea outou ia Keriso i le alofa tunoa o le Atua ona o le faamaligiina o le toto o Keriso, o lo le feagaiga lea a le Tama, e iu i le faamagaloina o a outou agasala, ina ia liua outou ina ia paia ma le lē pona” (Moronae 10:32–33).

### Mauaina o le Alofa Tunoa i Lou Olaga Atoa

E faaopoopo atu i le manaomia o le alofa tunoa mo lou faaolataga tupito, e te manaomia foi lenei mana faaola i aso uma o lou olaga. A e faalatalata atili atu i lou Tama Faalelagi i le maelega, faamaualalo, ma le agamalu, o le a Ia faagaetia ma faamalosia oe e ala i Lona alofa tunoa (tagai Faataoto 3:34; 1 Peteru 5:5; MFF 88:78; 106:7–8). O le faalagolago i Lona alofa tunoa e faatagaina ai oe e te alualu i luma ma tuputupu ae i le amiotonu. O Iesu Lava Ia “na le maua i le atoatoaga muamua, a e na faia pea lea amioga mama i lea amioga mama, seia maua e ia le atoatoaga” (MFF 93:13). O le alofa tunoa e mafai ai e oe ona e fesoasoani i le atiinaeina o le malo o le Atua, o se auaunaga e le mafai ona e tuuina atu e ala i lou malosi po o isi gaoioiga e aunoa ma le alofa tunoa (tagai Ioane 15:5; Filipi 4:13; Eperu 12:28; Iakopo 4:6–7).

Pe afai ae oo ia te oe le faavaivai pe lagona le matuai vai-vai e faaauau ona ola i le talalelei, ia manatua le malosi e mafai ona e mauaina e ala i le mana faaola o le alofa tunoa. E mafai ona e maua le faamafanafanaga ma le faamautinoaga i afioga nei a le Alii: “Ma ua lava lo’u alofa tunoa i tagata uma

## *Anapogi ma Taulaga Anapogi*

o e faamaualaloina i latou lava i o’u luma; aua afai latou te faamaualaloina i latou lava i o’u luma ma faatuatua ia te au, ona ou faia lea o mea vaivai ma mea malolosi ia te i latou” (Eteru 12:27).

Mau Faaopoopo: Galuega 15:11; Roma 5:2; 2 Nifae 10:24; 11:5

*Tagai foi* Togiola a Iesu Keriso; Toetu; Faaolataga

## **Anapogi ma Taulaga Anapogi**

O le anapogi o le ofo atu lea e lē ‘ai ma lē inu mo se taimi. O le tuufaatasi o le anapogi ma le tatalo faamaoni e mafai ai ona fesoasoani e saunia oe ma isi mo le mauaina o faamanuiaga a le Atua.

### Faamoemoega o le Anapogi

I se tasi mea na tupu, na tulia ai e le Faola se agaga leaga i fafo mai se tamaitiiti ma sa faaoga ai lenei mea na tupu e aoao ai Lona au soo e uiga i le mana o le tatalo ma le anapogi. Na fesili atu i ai Ona soo, “Se a le mea na le mafai ai ona matou tulia o ia?” Na tali atu Iesu: “Ona o lo outou le faatuatua: aua e moni ou te fai atu ia te outou, afai e tusa lo outou faatuatua ma le fua o le sinapi, e fai atu outou i lenei mauga, Alu atu ia oe i le la mea, ona alu atu ai lea; e leai foi se mea tou te le mafaia. A ua na o le tatalo ma le anapogi e o ese ai mea faapena” (Tagai Mataio 17:14–21.)

Ua aoao mai i lenei tala, o le tatalo ma le anapogi e mafai ona faaopoopo atu ai le malosi i e tuuina atu ma mauaina faamanuiaga o le perisitua. E mafai foi ona faatatau lenei tala i au taumafaiga faaletagata e ola i le talalelei. Afai e i ai ni ou vaivaiga po o agasala o loo faafaigata ona faatoilaloina, e mafai ona e anapogi ma tatalo ina ia maua le fesoasoani po o le faamagaloga o loo e manaomia. E faapei o le temoni lea na tulia e Iesu, o lou faafitauli atonu e pei o lene ituaiga ua na o le tatalo lava ma le anapogi e alu ai i fafo.

E mafai ona e anapogi mo le tele o faamoemoega. O le anapogi o se tasi lea o ala e tapuai ai i le Atua ma faaali atu le agaga faafetai ia te Ia (tagai Luka 2:37; Alema 45:1). E mafai ona e anapogi ao e fesili atu i le Tama Faalelagi e faamanuia e mamai ma mafatia (tagai Mataio 17:14–21). O le anapogi e mafai ona fesoasoani ia te oe ma i latou e te alofa i ai ia maua faaaliga patino ma liua i le upu moni (tagai Alema 5:46; 6:6). O le anapogi e mafai ai ona e maua le malosi e tetee ai faaosoosoga (tagai Isaia 58:6). E mafai ona e anapogi ao e tau-mafai e faamaualaloina oe lava i luma o le Atua ma faaoga le faatuatua ia Iesu Keriso (tagai Ominae 1:26; Helamana 3:35). E mafai ona e anapogi ia maua taitaiga i le talaiina atu o le talalelei ma faalateleina valaauga i le Ekalesia (tagai Galuega 13:2–3; Alema 17:3, 9; 3 Nifae 27:1–2). O le anapogi e mafai ona o faatasi ma le faanoanoa po o le loto nutimomoia (tagai Alema 28:4–6; 30:1–2).

### Aso Sa Anapogi

Ua atofaina e le Ekalesia le Aso Sa e tasi i masina taitasi, e masani lava o le Aso Sa muamua, o se aso o le Anapogi. O le faamamaluina o lenei Aso Sa anapogi e aofia ai le lē 'ai ma le lē inu mo ni taumafataga sosoo se lua, auai i le sauniga anapogi ma molimau, ma le tuuina atu o se taulaga anapogi e fesoasoani ai i le tausiga o ē o loo manaomia le fesoasoani.

O lau taulaga anapogi e tatau ona lē itiiti ifo ma le tau o aiga e lua e te le'i taumafaina. Afai e mafai, ia e limafoai ma tuuina atu ia sili atu nai lo le tau.

E le gata i le faamamaluina o aso anapogi ua faatulagaina e taitai o le Ekalesia, ae e mafai foi ona e anapogi i soo se aso lava, e tusa ma ou manaoga ma manaoga o isi. Ae peitai, e le tatau ona e anapogi faalausosoo pe [anapogi] foi mo ni vaitaimi uumi.



## O Le Anapogi Moni

I le Lauga i luga o le Mauga, na aoao atu ai e Iesu le foliga o le anapogi moni. Sa ia talanoa tetee i tagata pepelo o ē, a anapopogi, “ua latou faaleaga o latou mata, ina ia iloa e tagata ua latou anapopogi.” Nai lo le faaalii o se vaaiga mai fafo o le amiotonu, e tatau ona e anapogi i “lou Tama o i le mea lilo: o lou Tama foi o loo silasila i le mea lilo, na te avatu faaaliali se tau i te oe” (Mataio 6:16–18).

Na aoao mai foi le perofeta o Isaia e uiga i le agaga moni o le anapogi: “E le o leni ea le anapogi ou te loto i ai? Ma ia tatalaina fusi na faia i le amio leaga, e tatala fusi o le amo, e tuuina atu ia saoloto e ua faasauaina, ma ia outou gausia amo uma lava. E le o leni ea? Ona ia tofitofi au mea e ai i lē ua fia ai, ia aumai i lou fale ē ua matitiva ma faasauaina; a e iloa lē ua le lavalava e te faaofuina o ia, aua foi e te lafi ia i latou o lou lava aiga?” (Isaia 58:6–7).

Na molimau mai foi Isaia i faamanuiaga e oo mai pe a tatou usitai i le tulafono o le anapogi. “Ona gafoa mai ai lea o lou malamalama e pei o le tafa o ata, e taalise ona tupu mai foi o lou malolo; e alu atu foi lau amiotonu i ou luma, e muliau mai le pupula o leova ia te oe. Ona e valaaui lea, ae tali mai ai leova; e te alaga atu ae fetalai mai o ia, O au leni. . . . Afai foi e te alofa atu i lē ua fiaai, ma e fafaga ia maona lē ua tiga, ona alu ae lea o lou malamalama i le pouliuli, ma lou pogisa e pei o le aoauli ia: E taitaiina foi oe e le aunoa e leova; e faamalie foi o ia ia te oe pe a oge vai, ma faamalosi ou ivi; e avea foi oe e pei se fanua ua faasusuina, e pei o le puna vai foi e le mate ona suavai” (Isaia 58:8–11).

Mau Faaopopo: 3 Nifae 13:16–18; MFF 59:12–14; 88:76, 119

*Tagai foi Tatalo*

## **A'oga**

Na poloai mai le Alii, “Ia saili i le aoao, e faapea foi i le suesue ma le faatuatua” (MFF 88:118). Ua Ia apoapoi mai ia

i tatou e aoao le talalelei ma ia maua se malamalama “i mea o i le lagi atoa ma le lalolagi, ma lalo ifo o le lalolagi, o mea sa i ai, o mea o i ai, o mea e ao ina vave oo mai, o mea i le atunuu, o mea o i atunuu mamao, o taua ma mea faafatiatamai a atunuu, atoa ma faamasinoga o loo i luga o le laueleele o le malamalama foi i atunuu ma malo—ina ia [tatou] saunia i mea uma” (MFF 88:78–80).

### A'oga ma Aoaoga Faapolofesa

E ao ona e galue atili e aoaoina lou mafaufau ma ou lima ina ia mafai ona faaeaina oe i lau galuega filifilia. Ia faaaoga lou aoaoina e avea ai ma aafiaga mo le lelei. Ao e faia faapea, o le a iloa oe o se tagata faamaoni. O le a e saunia mo avanoa a o auauai mai, ma o le a avea oe ma se aseta i lou aiga, Ekalesia, ma lou nuu.

Ia saili aoga silisili e maua ai avanoa. O nisi o avanoa o kolisi ma iunivesite, aoga o matata eseese, mataupu e aoao i le fale, aoga faaitumalo, ma aoaoga tumaoti.

### Seminare ma Inisititiuti

I le lalolagi atoa, e auai le au paia o aso e gata ai mai le 14 i le 18 tausaga le matutua i le seminare, lea e maua ai aoaoga mai tusitusiga paia i aso o le vaiaso. O le inisititiuti o mataupu faalelotu e maua ai aoaoga i aso o le vaiaso e uiga i mataupu eseese o le talalelei mo le au paia o aso e gata ai e 18 i le 30 tausaga le matutua.

O nei polokalama e maua ai le faaleagaga ma se siosiomaga faamasani e mafai ai e tamaiti ona fegalegaleai ma isi ao aoao atili e uiga i le talalelei.

Mo faamatalaga e uiga i le seminare ma le inisititiuti, faafesooteai se taitai perisitua o le uarota.

### Aoaoga Faifaipea i le Olaga

Faaauau ona sailia avanoa mo aoaoga i lou olaga atoa. O le a fesoasoani lea ia te oe e te maua ai le malamalama fou i

lau galuega filifilia ma isi tomai ma poto masani. I suiga televave o lenei lalolagi, e tatau ona e faaavanoaina ni taimi e aoaoina ai oe lava mo le taimi nei ma le lumanai.

E le gata i le faalateleina o au aoaoga e ala i a’oga, ae e mafai foi ona faaauau pea ona e aoao e ala i le faitau, auai i gaoioiga faaleaganuu, asiassi i fale maimoa ma nofoaga o tala faasolopito, ma matau le lalolagi o loo siomia ai oe..

Mau Faaopopo: Faataoto 1:5; MFF 130:18—19

## **Aoaoina Atu o le Talalelei**

Ua fetalai mai le Alii: “Ou te tuuina atu foi ia te outou le poloaiga ia outou aoao le tasi i le tasi i mataupu o le malo. Ia outou aoao atu ma le filifiliga, ma o lo’u alofa tunoa o le a mafuta ma outou, ina ia aoaoina atoatoa lelei outou i teori, mataupu autu, mataupu faavae, i le tulafono o le talalelei, ma mea uma lava tau le malo o le Atua, e tatau mo outou ona malamalama ai” (MFF 88:77–78).

I le tuuina mai o lenei poloaiga, ua tuuina mai ai e le Alii ia i tatou se tiutetauave paia. Ua faapea foi ona ia taitaiina i tatou i avanoa e le mafaitaulia mo auaunaga. E itiiti lava aafiga e faatusatusa atu i le olioli e maua i le fesoasoani atu i isi e aoao ma ola i le talalelei.

O lenei poloaiga e aoao atu ua faatatau ia te oe, e tusa lava pe le o ia te oe se valaauga patino o se faiaoga. O loo ia te oe avanoa faafaiaoga i le aveai ai ma se tagata o lou aiga, o se faiaoga o aiga poo se faiaoga asiassi, ma e tusa foi pe o se isi tagata faigaluega, tuaoi, ma se uo. O nisi taimi e te aoao atu ai e ala i upu ua e saunia e tuuina atu. O nisi taimi e mafai ona e faaogaina ni taimi pupuu e le tau fuafuaina e mafai ai ona e fetufaai atu upumoni o le talalelei. Ae o le mea masani lava o lou aoao atu lea e ala i faaitaiga.

Aoao atu e Faapei ona Aoao le Faaola

I au taumafaiga e aoao atu le talalelei, ia vaai atu ia Iesu Keriso o sou faaitaiga. Suesue i tala o Lana galuega i le lalo-

lagi, ma vaavaai mo auala e aoao atu ai e pei ona Ia aoao atu. Sa Ia faailoa atu le alofa moni ma le popole mo i latou na Ia auauna atu i ai. Sa ia faamalosiau atu i tagata taitoatasi, i le aoaoina atu o mataupu faavae i se auala na fesoasoani atu ai ia i latou i o latou manaoga patino. Na ia faaosofia le manao o nisi ia malamalama ma ola i le talalelei. E i ai taimi na Ia fesili atu ai fesili na mafai ona fesoasoani ia i latou ia faaao-gaina mea na latou aoaoina. Sa Ia aoao atu upu moni faaola o le talalelei, ma Ia fesoasoani atu i e na faalogologo ina ia malamalama i mea na latou manaomia ona iloa, faia, ma avea ai i latou, ina ia latou maua ai le ola e faavavau.

A e mulimuli i le faaitaitaiga a le Faaola, o le a mafai e au aoaoga ona fafagaina ma siitia, fausia lo latou faatuatua, ma tuuina atu ai ia te i latou le loto mautinoa e faafetaiaia ai luitau o le olaga. O le a uunaia ai i latou e lafoai agasala ma usi-usitai i poloaiga. O le a fesoasoani ia i latou e o mai ia Keriso ma tumau ai i Lona alofa.

### Aoao atu e ala i le Agaga

Na fetalai mai le Alii, “O le a tuuina atu foi le Agaga ia te outou i le tatalo i le faatuatua; a e afai tou te le maua le Agaga aua tou te aoao atu” (MFF 42:14). O le Agaga, po o le Agaga Paia, o se tasi o le Aiga Atua. O le isi faamoemoe o le Agaga o le a “iloa ai le tonu i mea uma lava” (Moronae 10:4–5). E na o le uunaiga lava a le Agaga o le a mafai ai ona malamalama ma musuia aoaoga a le talalelei.

O lou avanoa i le avea ai ma se faiaoga o le talalelei o le avea lea ma se meafaigaluega e mafai ai e le Agaga Paia ona aoao atu, molimau, faamafanafana, ma musuia. E pei ona aoao mai le perofeta o Nifae, “Pe a tautala atu le tagata i le mana o le Agaga Paia, e moliooina ai i le mana o le Agaga Paia i loto o le fanauga a tagata” (2 Nifae 33:1).

Afai e te saunia faaleagaga, o le a fesoasoani le Agaga Paia e te iloa ai le mea e fai ma talanoa atu ai i lau aoaoga. E mafai ona e saunia e ala i le tatalo soo, suesue i tusitusiga paia, ola i le talalelei, ma ia lotomauualalo.

## Auala e Aoao atu Ai

O le a matua sili ona lelei ona e aoao atu pe a faaaogaina metotia eseese talafeagai e aoao atu ai. Mo se faataitaiga, e mafai ona e faamatala tala ma tuuina atu faataitaiga e aumaia ai lagona o tagata ma faailoa atu ai pe faapefea ona faaaoga mataupu faavae o le talalelei i le olaga i aso uma. E mafai ona e faaaogaina ata ma meafaitino e faamalosia ai le malamalama o isi i tala i tusitusiga paia ma mataupu faavae. E mafai e oe ma i latou o loo e aoaoina ona valaauliaina le uunaiga a le Agaga Paia e ala i musika ma faailoa atu ai lagona ia atonu e faigata ona faailoa atu i isi auala. E mafai ona e fesili atu i fesili e uunaia ai le aoaoina o manatu ma talanoaga lena e taitaiina atu ai i le fetufaai o aafiaga faaletagata lava ia. Faatasi ai ma gaoioiga faigofie, e mafai ona e fesoasoani atu i e o loo aoao ina ia gauai mai o latou mafaufau.

Pe a e mafaufau e faaaoga se metotia faapitoe e aoao atu ai, ia fesili ifo ia te oe i fesili nei: Pe o lenei metotia e valaaulia ai uunaiga a le Agaga? Pe e talafeagai ma le paia o mataupu faavae o loo ou aoaoina atu? Pe o le a siitia ma faamalosia ai i latou o loo ou aoaoina?

Ia manatua o le avea ai ma se faiaoga o le talalelei, ua avea oe ma sui o le Alii. Ia mautinoa o mea uma e te faia ma tautala atu ai e faaaloalo ma ogatasi ma Lona finagalo.

Mo manatu faaopoopo i le aoaoina atu o le talalelei, tagai *O Le Aoao Atu, E Lei se Isi Vaalauga e Sili Ai* (36123 890); o le *Tusitaiala Faafaioga* (34595 890); ma le "Aoaoina Atu o le Talalelei ma le Taitaiga," vaega 16 o le *Tusitaulima o Faatonuga a le Ekalesia, Tusi 2: Taitai o le Perisitua ma Ausilali* (35903 890).

Faamatalaga Faaopoopo: Mosaea 18:19; Alema 1:26; 17:2-3; 31:5; MFF 11:21

**Aposetolo** (*Tagai Taitaiga o le Ekalesia; Perofeta*)

**Aso Sa** (*Tagai Sapati; Tapuai*)

## **Ata o le Faaolataga**

I le muai olaga, sa saunia ai e le Tama Faalelagi se fuafuaga e mafai ai ona avea i tatou faapei o Ia ma maua ai le atoatoa o le fiafia. O loo taua i tusitusiga paia lenei fuafuaga o le “ala o le olataga” (Alema 24:14; Mose 6:62), “le ala sili o le fiafia” (Alema 42:8), “le ala sili o le togiola” (Iakopo 6:8; Alema 12:30), ma “le ala o le alofa” (Alema 42:15).

O le ata o le faaolataga o le atoatoaga o le talalelei. E aofia ai le Foafoaga, le Pau, le Togiola a Iesu Keriso, ma tulafono uma, sauniga, ma aoaoga faavae o le talalelei. O le saolotoga lelei, lea e mafai ai ona tatou filifili mo i tatou lava e taua foi i le fuafuaga a le Tama Faalelagi. Ona o lenei fuafuaga, ua mafai ai ona faaatoatoaina i tatou e ala i le Togiola, mauaina le atoatoa o le fiafia, ma nofo e faavavau ai i le afioaga o le Atua. E mafai e o tatou sootaga faaleaiga ona oo atu lona malosi i le faavavau.

O oe o se tasi o loo auai i le fuafuaga a le Tama Faalelagi, ma o lou aafiaga e faavavau e mafai ona vaevaeina i ni vaega autu se tolu: muai olaga, olaga faitino, ma le olaga pe a mavae le oti. Pe a oo ina e malamalama i le fuafuaga, o le a e maua ai tali o fesili o loo fesiligia pea e le toatele o tagata: O fea na tatou o mai ai? Aisea ua tatou i ai iinei? O fea tatou te o i ai pe a mavae lenei olaga?

### **Muai Olaga**

Ae e te le i fanau mai i luga o le fogaeleele, sa e nofo ai i le afioaga o lou Tama Faalelagi o se tasi o Ana fanau agaga. I lea muai olaga, sa e auai i se fono sili faatasi ma nisi o fanau agaga a le Tama Faalelagi. I lena fono sili, sa faailoa atu ai e le Tama Faalelagi Lana fuafuaga sili o le fiafia (tagai Aperaamo 3:22–26).

Ina ia o gatasi ma le fuafuaga o le fiafia, o lea na osi feagaiga ai Iesu Keriso, le Uluai Atalii o le Tama i le agaga, e avea ma Faaola (tagai Mose 4:2; Aperaamo 3:27). O i latou na mulimuli i le Tama Faalelagi ma Iesu Keriso na faatagaina ina

ia o mai i le lalolagi ina ia ola ai i le olaga faitino ma aga'iga-  
'i atu ai i luma seia oo atu i le ola e faavavau. O Lusifelo, o le  
isi atalii agaga o le Atua, sa tetee i le fuafuaga ma sa "saili e  
faaumatia le saolotoga o le tagata" (Mose 4:3). Sa avea ai o ia  
o Satani, ma tulieseina ai faatasi ma i latou sa mulimuli ia te  
ia, mai le lagi ma lē maua ai e i latou le avanoa e maua ai tino  
faitino ma ola ai i le olaga faitino (tagai Mose 4:4; Aperaamo  
3:27–28).

I le gasologa o lou i ai i le muai olaga, sa atiina ae ai lou  
faasinomaga ma faateleina ai lou malosi faaleagaga. I le faa-  
manuiaina ai o oe i le meaalofo o le saolotoga e filifili ai, sa e  
faia ai ni filifiliga taua, e pei o le filifiliga e mulimuli i le fua-  
fuaga a le Tama Faalelagi. O nei filifiliga e i ai sona aafiaga i  
lou olaga i na taimi ma le taimi nei. Sa e tupu ae i le mala-  
malama ma e aoao e te alofa ma fiafia i le upumoni, ma sa e  
saunia ai e te sau i le fogaeleele, lea e mafai ai ona faaauau  
pea ona e agai i luma.

### Olaga Faitino

Ua e maua nei aafiaga o le olaga faitino. Ua tuu faatasia  
lou agaga ma lou tino, lea ua tuuina atu ai ia te oe avanoa e  
te ola ai ma atiina ae ai oe i ala sa le mafai ona faia i le muai  
olaga. O lenei vaega o lou olaga o se taimi o le aoaoina lea e  
mafai ai ona e faamaoniaina oe lava, filifili ai e sau ia Keriso,  
ma saunia ai ina ia agavaa mo le olaga e faavavau. O se taimi  
foi e mafai ai ona e fesoasoani atu i isi ina ia latou mauaina le  
upumoni ma mauaina se molimau i le ata o le faaolataga.

### Olaga pe a Mavae le Oti

Pe a e oti, o le a alu atu lou agaga i le lalolagi o agaga ma  
faatali ai le toetu. I le taimi o le toetu, o le a toe tuufaatasia  
lou agaga ma lou tino, ma o le a faamasinoina oe ma tuuina  
atu ai i se malo o le mamalu. O le mamalu o le a e ulu atu i ai  
o le a faalagolago lea i le loloto o lou liua ma lou usiusitai i  
poloaiiga a le Alii (tagai "Malo o le Mamalu," itulau 102–104).

E faalagolago i le ala na e “talia [ai] le mau ia Iesu” (MFF 76:51; Tagai foi i le fuaiupu 74, 79, 101).

Faamanuiaga e ala mai i le Malamalama i le Fuafuaga

O se molimau i le ata o le faaolataga, e mafai ona avatua ia te oe le faamoemoe ma le mafuaaga a o e tauivi ma lu’itua o le olaga. E mafai ona e maua le faamautinoaga, i lou malamalama o oe o se atalii/afafine o le Atua ma sa e ola ai i Lona afioaga ae e te lei fanau mai i le fogaeleele. E mafai ona e iloa le taua o lou olaga iinei, i lou iloaina lea o au galuega i le olaga faitino e i ai se aafiaga i lou taunuuga e faavavau. O lenei malamalama, e mafai ai ona faavae filifiliga taua i luga o upumoni e faavavau nai lo tulaga fesuisuia i le olaga. E mafai ona faaauau pea ona faaleleia au sootaga ma tagata o lou aiga, i lou fiafia lea i le folafolaga e mafai ona faavavau lou aiga. E mafai ona e mauaina le fiafia i lau molimau i le Togiola ma poloaiga, sauniga, feagaiga ma mataupu faavae a le Alii, pe a e iloa “o lē faia galuega o le amiotonu o le a maua ai lona tau, o le filemu lea i lenei lalolagi, ma le olaga faavavau i le lalolagi a sau (MFF 59:23).

Faamatalaga Faapoopo: 2 Nifae 2:5–30; 10:23–25; Alema 12:24–37; 22:12–14; 42; Mose 6:47–62

*Tagai foi i le Saolotoga; Togiola a Iesu Keriso; Foafoga; Oti, Faaletino; Oti, Faaleagaga; Pau; Le Atua le Tama; Talalelei; Lagi; Seoli; Iesu Keriso; Malo o le Mamalu; Parataiso; Toetu*

**Au Peresitene Sili** (*Tagai Taitaiga o le Ekalesia; Perofeta*)

## Aualofa

O le Aualofa na faavaeina e le perofeta o Iosefa Samita i le aso 17 Mati 1842, i Navu, Ilinoi. E lua faamoemoega na i ai i le Aualofa i le taimi na faavaeina ai: mo le tuuina atu o fesoasoani i e matitiva ma e le tagolima ma le faaolaina o agaga. O loo faaauau pea le faalapotopotoga i le taimi nei, o



## *Aualofa*

loo tumau pea ma le faamaoni i na uluai mataupu faavae o le taitaiga. I le salafa o le lalolagi, e galulue faatasi tuafafine o loo i le Aualofa ma ē o umia le perisitua e tauaveina le misi-ona a le Ekalesia. E lagolagoina e le tasi le isi a o latou:

- Faateleina a latou molimau ia Iesu Keriso e ala i le tatalo ma le suesue i tusitusiga paia.
- Sailia le malosi faaleagaga e ala i le mulimuli i uuna-iga a le Agaga Paia.
- Gaua'i atu i latou lava i le faamallosia o ulugalii, o fanau, ma aiga.
- Iloa le tamalii o le tulaga faatina ma olioli i le tulaga faatama'ita'i.
- Fiafia e auauna atu ma faia galuega lelei.
- Fiafia i le olaga ma le aoaoina.
- Tu atu mo le upu moni ma le amiotonu.
- Lagolago le perisitua o le pule a le Atua i le fogaeleele.
- Olioli i faamanuiaga o le malumalu.
- Malamalama i lo latou taunuuga paia, ma taumafai ina ia faaeaina.

Afai o e i ai i le Aualofa, o se tasi o auala e mafai ai ona tuuina atu sou sao i le misiona a le faalapotopotoga, o le talia-ina lea o se matafaioi o le avea ai ma se faiaoga asiasi. A o e asiasi ma auauna atu i uso ua tofia oe i ai, ia faaaluina se taimi e aoao atu ai le talalelei ma atiina ae ni uiga faauo. E le gata i le auauna atu i tagata taitoatasi, ae e mafai ona e faia se vaega taua o le faamallosia lea o aiga.

E tatau i taitai i totonu o uarota ma paranesi ona mauti- noa ua tofia ni faiaoga asiasi i tuafafine uma o e ua 18 tausaga pe sili atu foi lo latou matutua. O taitai perisitua ma taitai o le Aualofa e tatau ona tultulitatao pea faiaoga asiasi, ina ia fesoasoani e faataunuuina manaoga faaleagaga ma le faale- tino o tuafafine taitasi.

I le avea ai o oe ma se tamaitai o le Aualofa, o oe o se tasi o le usoga a tamaitai o le lalolagi atoa, ua faatasia i le loto faamaoni ia Iesu Keriso. Ua soofaatasi oe ma isi afafine o le Atua o ni tamaitai o le faatuatua, e amioatua, e silasila mamao, ma alofa mama, faatasi ai ma le malamalama ua mautu lelei, e i ai se uiga, faamoemoega, ma se faasinomaga o lou olaga. O lou auai i le Aualofa, e te maua ai avanoa e te olioli ai i le mafutaga faaleusoga ma paaga, tuuina atu auaunaga manao-mia, fetufaai atu lau molimau ma au taleni, ma tuputupu ae ai faaleagaga.

## **Auaunaga**

O soo moni o Iesu Keriso e ia i latou le manao e auauna atu i e o siomia i latou. Na fetalai mai le Faaola, “O le mea lea e iloa ai e tagata uma lava o ou soo outou, pe afai ua outou fealofani” (Ioane 13:35).

Ina ua papatisoina oe, sa e osifeagaiga e ave i ou luga le suafa o Iesu Keriso. Na faamatala atu e le perofeta o Alema lenei feagaiga i se vaega o tagata fou liliu mai o e na manao e papatisoina. Na ia matauina o lo latou manao e “o mai i le lafu mamoe a le Atua” e aofia ai lo latou manao e tuuina atu auaunaga aoga—e “fesui a outou avega e ave ina ia mama ai,” e “faanoanoa faatasi ma e faanoanoa,” ma “faamafanafana i e ua tataui i ai le faamafanafanaga” (Mosaea 18:8–9).

Ao e taumafai malosi e auauna atu i isi, ia e tepa taula’i atu i le Faaola o sou faataitaiga. E ui lava na afio mai o Ia i le lalolagi o se Alo o le Atua, sa auauna atu o Ia lava ma le lotomaulalo ia i latou na siomia o Ia. Na Ia fetalai mai, “A o au nei, o loo ia te outou pei o le auauna lava” (Luka 22:27).

Na faaogaina e le Faaola se faataoto e aoao mai ai le taua o le auaunaga. I le faataoto, ua Ia toe foi mai i le lalolagi i Lona mamalu ma tuueseeseina ia tagata amiotonu mai e amioleaga. Na Ia fetalai atu i e amiotonu: “O mai ia, o outou ua faamanuiaina e lo’u Tama, ia fai mo outou tofi le malo ua

## *Epikopo*

saunia mo outou a o lei faavaeina le lalolagi: Aua na ou fia ai, ona outou avane ai lea ni mea ou te ai ai; na ou fia inu, ona outou avane ai lea ni vai ou te inu ai; sa fai a'u ma tagata ese, ona outou talia lea o a'u; na ou le lavalava, ona outou faaofuina lea o a'u; na ou ma'i, ona outou asiasia mai lea o a'u; na ou i le falepuipui, ona outou o ane ai lea Ia te au" (Mataio 25:34–36).

O e amiotonu, o e na le malamalama i lea savali, na fesili: "Le Alii e, o anafea na matou iloa ai oe ua fia ai, ma matou fa-gaina oe? po o fia inu, ma matou avane e te inu ai? O anafea foi na matou iloa ai oe o le tagata ese, ma matou talia oe? po o le le lavalava, ma matou faaofuina oe? O anafea foi na matou iloa ai oe ua ma'i, po o i le falepuipui, ma matou o atu ai ia te oe?" (Mataio 25:37–39).

Ona tali atu ai lea o le Alii, "Aua na faia e outou i le tasi o e aupito itiiti o ou uso nei, o au lea na outou faia i ai" (Mataio 25:40).

Ua valaau mai le Faaola ia te oe ina ia e tuuina atu oe lava e te auauna atu i isi. O ou avanoa e faia ai, e leai se tapu-laa. Ia saili i aso uma mo auala e faafiafia ai se loto, e tuuina atu ai upu alofa, e faia galuega mo isi e le mafai ona latou faia mo i latou, ma fetufaai atu le talalelei. Ia faalogo atu i musu-musuga a le Agaga, o loo musuia oe e te auauna atu. O le a e iloa ai o le ki moni lava i le fiafia o le galue lea ina ia faafia-fiaina isi tagata.

Faamatalaga Faaopopo: Mataio 22:35–40; 25:41–46; Luka 10:25–37; Kalatia 5:13–14; Mosaea 2:17

*Tagai foi Alofa Mama; Alofa*

## **Epikopo** (*Tagai* Taitaiga o le Ekalesia)

### **Faaaliga**

O faaaliga, o fesootaiga mai le Atua i Lana fanau. O lenei taitaiga e ala mai i ni auala eseese e tusa ma manaoga ma tulaga o i ai i tagata taitoatasi ma le Ekalesia atoa.

Pe a faaali mai e le Alii Lona finagalo i le Ekalesia, e fetalai mai o Ia e ala mai i Ana perofeta. O loo i tusitusiga paia le tele o na ituaiga faaaliga —o afioga a le Alii e ala mai i perofeta anamua ma aso e gata ai. O loo faaauau pea e le Alii i le taimi nei ona taitaiina le Ekalesia e ala i le faaali mai o Lona finagalo i Ana auauna filifilia

E le na o perofeta latou te mauaina faaaliga. Pe a tusa ai ma lou faatuatua, e mafai ona e mauaina faaaliga e fesoasoani ia te oe i ou manaoga faapitoa, o tiutetauave, o fesili, ma fesoasoani foi e faamalosia ai lau molimau.

Saunia ia Maua Faaaliga e ala mai i le Agaga Paia

O loo faamatala mai e tusitusiga paia ituaiga faaaliga eseese, e pei o faalepo, miti, ma asiasiga a agelu. O auala na, ua toefuataiina mai ai e le Alii Lana talalelei i aso e gata ai ma faaali mai ai upumoni e faatatau i na mataupu faavae e pei o le muai olaga, o le faaolaina o e ua maliliu, ma malo e tolu o le mamalu. Peitai, o le tele o faaaliga i taitai ma tagata o le Ekalesia e auala mai i musumusuga a le Agaga Paia.

O uunaiga filemu faaleagaga e foliga mai e le ofoofogia e pei o faaaliga ma asiasiga a agelu, ae e sili atu lo latou malosiaga ma umi ma suia ai foi le olaga. O le molimau a le Agaga Paia e na te faia se uunaiga i le agaga e sili atu ona taua nai lo se isi lava mea e te vaai pe faalogo i ai. O na faaaliga, o le a e mauaina ai le malosi e te tumau ai ma le faamaoni i le talalelei ma fesoasoani ai i isi e faia lea lava mea e tasi.

O le fautuaga o loo mulimuli mai o le a fesoasoani e saunia ai oe mo le mauaina o uunaiga mai le Agaga Paia:

*Tatalo mo le Taitaiga.* Na fetalai mai le Alii, “Ia outou ole atu, ona foaiina mai ai lea ia te outou; ia outou saili, ona outou maua ai lea; ia outou tu’itu’i atu, ona toina mai ai lea ia te outou: Aua ai se ole atu, e maua e ia; o lē saili foi, e iloa e ia; e toina foi i lē tu’itu’i atu” (Mataio 7:7–8). Ina ia iloa ma maua, e tatau ona e saili ma ole atu. Afai e te lē tu’itu’i—tatalo atu i lou Tama Faalelagi mo le taitaiga—o le a lē tatalaina faitotoa o faaaliga ia te oe. Peitai afai e te faalatalata atu i

lou Tama i le tatalo ma le lotomauualalo, o le a oo lava ina e “maua lea faaaliga ma lea faaaliga, o lea poto ma lea poto, ina ia e iloa mea lilo atoa ma mataupu tau le filemu—e aumaia le olioli, e aumaia foi le ola faavavau” (MFF 42:61).

*Ia Migao.* O le migao o se uiga loloto o le faaaloalo ma le alofa. Pe a e migao ma filemu, ua e valaauliaina faaaliga. E tusa lava pe pisapisao mea uma lava o loo siomia ai oe, e mafai lava ona ia te oe se uiga migao ma saunia ai mo le mauaina o taitaiga mai le Alii.

*Ia Lotomauualalo.* O le lotomauualalo e vavalalata lava lona fesoootaiga ma le migao. Pe a e lotomauualalo, o le a e iloaina lou faalagolago atu i le Alii. Na aoao mai le perofeta o Mamona, “ona o le agamalu foi ma le lotomaulalo e oo mai ai le asiasiga o le Agaga Paia; o lea Fesoasoani e oo mai ai le faa-moemoe ma le alofa atoatoa” (Moronae 8:26).

*Tausia Poloaiga.* Pe a e tausia poloaiga, ua e saunia e mauaina, iloa, ma mulimuli i uunaiga a le Agaga Paia. Na folafola mai e le Alii, “A o lē tausia a’u poloaiga ou te tuuina atu i ai mea lilo o lo’u malo, o ia lava mea o le a ia te ia e pei o se punavai ola, e puna ae i le olaga faavavau” (MFF 63:23).

*Agavaa e taumafa i le faamanatuga.* O tatalo o le faamanatuga o loo aoaoina ai i tatou i le ala tatou te maua ai pea le mafutaga ma le Agaga Paia. Pe a e taumafa i le faamanatuga, ua e molimau atu i le Atua ua e loto e ave i ou luga le suafa o Lona Alo ma o le a e manatua pea o Ia ma tausia Ana polo-aiga. Pe a tatou tausia nei feagaiga, ua folafola mai e le Tama Faalelagi o le a mafuta pea le Agaga ma i tatou (Tagai MFF 20:77, 79.)

*Suesueina tusitusiga paia i aso uma.* A e suesue ma le filiga i tusitusiga paia, e te aoao mai i faataitaiga a alii ma tamaitai o e na faamanuiaina o latou olaga a o latou mulimuli atu i le finagalo faaaliga o le Alii. O le a sili atu foi ona e gauai atu i le Agaga Paia i lou lava olaga. A e faitau ma manatunatu loloto, e mafai ona e mauaina faaaliga e uiga i le ala e faatatau ai se mau faapitoa ia te oe po o se isi lava mea e finagalo le Alii e faailoa mai ia te oe. Talu ai o le faitauina o tusitusiga paia e

fesoasoani ia te oe e maua ai faaaliga tau ia te oe lava ia, ua tatau ai ona e suesueina tusitusiga paia i aso uma.

*Faaalu se taimi e mafaufau loloto ai.* Pe a e faaaluina se taimi e mafaufau loloto ai i upumoni o le talalelei, ua e tatalaina lou mafaufau ma lou loto i le taitaiga ma uunaiga a le Agaga Paia (tagai 1 Nifae 11:1; MFF 76:19; 138:1–11). O le mafaufau loloto e aveesea ai ou mafaufauga mai mea lē aoga o le lalolagi ma e latalata atu ai i le Agaga.

*Pe a e sailia se taitaiga faapitoa, ia e muai suesueina le mataupu i lou mafaufau.* E i ai taimi e faatoa talanoa mai ai le Alii pe a maea ona e suesueina le mataupu i lou mafaufau. Sa faamatala e le Alii lenei faagasologa ia Oliva Kaotui, o le na galue o se tusiupu ia Iosefa Samita mo le tele o le galuega faaliliu o le Tusi a Mamona. E ala mai i le perofeta o Iosefa Samita, na fetalai mai ai le Alii ia Oliva Kaotui, ma faamalamalama mai ai le mafuaaga na le mafai ai e Oliva ona faaliliuina le Tusi a Mamona e ui lava na tuuina atu ia te ia le meaalofo e faaliliu ai: “Faauta, e te le i malamalama; fa te oe ou te tuuina atu ia te oe, i le na o lou ole mai a e te le i mafaufau i ai. A e peitai, faauta, ou te fai atu ia te oe, e ao ina e filifili maea ai i lou mafaufau; ona e ole mai lea ia te au po ua sa’o, afai ua sa’o ou te faia ia mu lou loto i totonu ia te oe; o lea la, o le a e lagona ai ua tonu” (MFF 9:7–8).

*Ia saili ma le onosai le finagalo o le Atua.* E faaali mai le Atua “i lona lava aso tatau, ma i lona lava ala, e tusa ma lona lava finagalo” (tagai MFF 88:63–68). E ono oo mai faaaliga ia te oe i le “upu ma le upu, o le fuaiupu ma le fuaiupu, o sina mea itiiti iinei ma sina mea itiiti iina” (2 Nifae 28:30; Tagai foi i le Isaia 28:10; MFF 98:12). Aua nei e taumafai e faia i se auala faamalosi le faia o mea faaleagaga. E lē oo mai faaaliga i le ala lena. Ia onosai ma faalagolago i le taimi a le Alii.

Iloaina o Uunaiga a le Agaga Paia

Mai le tele o leo ma avefeau o loo i le lalolagi i le taimi nei, e tatau ona e aoao e iloa musumusuga a le Agaga Paia. O nisi nei o auala faavae e fesootai mai ai le Agaga Paia ia i tatou:

*E talanoa mai o Ia i le mafaufau ma le loto i se leo filemu ma le itiiti.* Na aoao mai le Alii: “O le a ou faaali atu ia te oe i lou mafaufau ma lou loto i le Agaga Paia e oo atu ia te oe ma o le a tumau i lou loto. O lenei, faauta, o le agaga lenei o faaaliga” (MFF 8:2–3). O nisi taimi o le a fesoasoani ai le Agaga Paia ia te oe ina ia e malamalama i upumoni o le talalelei pe tuuina atu foi ia te oe se uunaiga e “peiseai ua i ai pea i [lou] mafaufau, ma ua sili lona uunaiga i [lou] manatu” (MFF 128:1). E ui lava o lona faaaliga e mafai ona i ai se aafiaga malosi ia te oe, e toeitiiti lava a oo mai ma le filemu, e pei o se “leo filemu ma le itiiti” (tagai 1 Tupu 19:9–12; Helamana 5:30; MFF 85:6).

*E uunaia i tatou e Ia e ala i o tatou lagona.* E ui ua masani ona tatou faamatalaina fesoootaiga mai le Agaga e faapea, o se leo, o lona leo o se mea e tele ina tatou lagonaina [i o tatou tino] nai lo le faalogoina [i taliga]. Ma a o tatou talanoa e uiga i le “faalogo” i musumusuga a le Agaga Paia, e masani ona tatou faamatalaina se uunaiga faaleagaga e ala i le faapea mai, “Sa i ai lava lo’u lagona . . .” O le apoapoiga a le Alii ia Oliva Kaotui o loo i le vaega e 9 o le Mataupu Faavae ma Feagaiga, lea o loo talanoaina i le itulau 109 o loo aoaoina mai ai lenei mataupu faavae. Ae ui i lea, o nisi taimi e faauiga sese ai lea apoapoiga. O nisi tagata o le Ekalesia e oo i ai le lē mautonu pe a faitau i lea fuaitau, e popole ona e faapea e latou te le i mauaina lava se uunaiga mai le Agaga Paia ona latou te le i lagonaina lava se mu o le loto i totonu o i latou. Tagai foi i upu mulimuli a le Alii o loo i le Mataupu Faavae ma Feagaiga 9:8: “O lea Ia, o le a e lagona ai ua tonu.” O le mumu o loo faamatalaina mai i lenei mau ua faailoa ai se lagona mafanafana ma le toafilemu, ae le o se faalogona o le vevela. A faauau pea ona e mulimuli i le finagalo o le Alii i lou olaga, o le a oo ina e iloa pe faapefea ona suia oe e le Agaga Paia.

*E aumaia e Ia le filemu.* E masani ona ta’ua le Agaga Paia o le Fesoasoani (tagai Ioane 14:26; MFF 39:6). Ao Ia faaali mai le finagalo o le Alii ia te oe, o le a Ia “avatua...le toafilemu i lou mafaufau” (MFF 6:23). O le filemu na te aumaia e le mafai

ona faaseseina i uunaiga a le lalolagi po o aoaoga sese. O le filemu lea na folafola atu e le Faaola ina ua Ia faamautinoa atu i Ona soo o le a Ia auina mai le Fesoasoani: “Ou te avatu ia te outou le manuia; o lo’u manuia ou te avatu ai ia te outou; ou te le avatu ia te outou faapei ona avatu e le lalolagi. Aua le atuatuvaale o outou loto, aua foi tou te matatau” (Ioane 14:27).

Faamatalaga Faaopoopo: Aмоса 3:7; Mataio 16:13–18; 1 Korinito 2:9–14; 12:3; Faaaliga 19:10; Alema 5:43–48; 17:2–3; MFF 76:5–10; 121:26–33; Mataupu Faavae o le Faatuatua 1:7, 9.

*Tagai foi i le Faatuatua; Agaga Paia; Tatalo; Migao; Tusitusiga Paia; Meaalofa Faaleagaga*

## **Faaaliga Tau i le Tagata Lava Ia** (*Tagai Faaaliga*)

**Faaeaga** (*Tagai Ola Faavavau*)

**Faaeega Paia** (*Tagai Malumalu*)

## **Faaeina Atu o Lima**

O le faaeina atu o lima o le faatulagaga lea na faaalua mai e le Alii mo le faataunuaina o le tele o sauniga o le perisitua, e i ai faamauga, faauuga, o le faamanuiaina o tagata o le ekalesia e galulue i tofiga, faamanuiaina o ma’i, ma le tuuina atu i isi o faamanuiaga o le perisitua (tagai MFF 42:44; Mataupu Faavae o le Faatuatua 1:4–5). O i latou o loo i ai le pule o le perisitua e faaee atu o latou lima i luga o le ulu o le tagata o loo tuuina atu i ai le sauniga. O le faia o lena mea, ua latou auauna ai o ni meafaigaluega e faamanuia atu ai le Alii i Lana fanau (tagai MFF 36:2).

O lena faatulagaga o loo faaaogaina pea e le aunoa e i latou o loo umia le perisitua. Sa faauuina e Atamu alii amiotonu na tupuga mai ia te ia e ala i le faaee atu o lima (tagai MFF 107:40–50). Ina ua tuuina atu e Iakopo faamanuiaga i luga o Efaraima ma Manase, sa faaee atu ona lima i luga o o



## *Faailoga*

la'ua ulu (tagai Kenese 48:14–19). O Alema na ia “tofia fai-  
taulaga ma toeaina i le faaee atu o ona lima, e tusa ma le  
tofiga paia mai le Atua” (Alema 6:1). Sa tuuina atu e  
Aposetolo o Peteru ma Ioane le meaalofa a le Agaga Paia e  
ala i le faaee atu o lima (tagai Galuega 8:14–17). I lenei tisipe-  
nisione, sa faaee atu e Ioane le Papatiso ia le Perisitua Arona  
i luga o Iosefa Samita ma Oliva Kaotui e ala i le faaee atu o  
lima (tagai Iosefa Samita—Talafaasolopito 2:68–69).

Faamatalaga Faaopoopo: Numera 27:18–23; Galuega 19:1–6; 1 Timoteo  
4:14; MFF 33:15; 35:6

*Tagai foi* Agaga Paia; Perisitua

## **Faailoga**

O faailoga o ni tulaga na tutupu po o aafiaga ua faaalua  
ai le mana o le Atua. E masani lava o ni tulaga faavavega.  
Latou te faailogaina ma faailoaina ni tulaga silisili, e pei o le  
fanau mai, maliu, ma le Afio Mai Faalua o le Faaola. Latou te  
faamanatu mai ia i tatou ia feagaiga ua tatou osia ma le Alii.  
O faailoga foi e mafai ona faaalua ai le faamaoniga o le vala-  
auga paia pe faaalua ai foi le le faamaoniaina e le Alii.

O nisi tagata ua faapea mai o le a latou talitonu i le Atua  
po o Lana galuega pe a latou maua se faailoga. Ae na fetalai  
le Alii, “E le oo mai le faatuatua i faailoga, a e mulimuli atu  
faailoga i e talitonu” (MFF 63:9). O na faailoga e tuuina atu ia  
i latou o e faatuatua ma usiusitai ina ia faamalosia ai i latou i  
lo latou faatuatua.

Faamatalaga Faaopoopo: Mataio 12:38–39; Mareko 13:22–27; Luka  
2:8–17; Alema 30:43–52; Helamana 14; 3 Nifae 1:13–21; 8:2–25; Eteru 12:6;  
MFF 63:7–12

*Tagai foi* Faatuatua; Usiusitai; Afio Mai Faalua o Iesu Keriso

## **Faaiipoipoga**

I le lalolagi i aso nei, ua toatele tagata ua latou lē faata-  
uaina ma ua ulagia le faaiipoipoga ma le aiga. I le lotolotoi o

lenei lē malamalama ma nei faaupuga matautia, ua tuuina mai ai pea e le aunoa e le Au Peresitene Sili ma le Korama a le Toasefululua le leo o le upumoni. Ua latou “tautino atu ma le faamaoni, o le faaipoipoga i le va o se alii ma se tamaitai, ua faauuina e le Atua, ma o le aiga o le totonugalemu lea o fuafuaga a Lē Fofoa mo le taunuuga e faavavau o Lana fanau” (tagai “O Le Aiga: O se Folafolaga i le Lalolagi,” itu-lau 10–12 o le tusi lenei).

O fiafiaga silisili o le olaga e maua i totonu o le aiga. O sootaga malolosi faaleaiga e manaomia ai ni taumafaiga, ma o na taumafaiga e aumaia ai le olioli sili i lenei olaga ma oo atu ai lava i le faavavau. E tusa lava pe e te lei maua se olaga o se aiga fiafia i le taimi ua tuanai, ae e mafai lava ona e saili e te maua se faaipoipoga fiafia e faavavau, ma se sootaga alofa ma tagata o lou aiga.

### O Le Feagaiga Fou ma le Faavavau o le Faaipoipoga

I le fuafuaga mo le fiafia a lo tatou Tama Faalelagi, e mafai ona faamauina se alii ma se tamaitai mo le olaga nei ma le faavavau. O i latou ua maea ona faamauina i totonu o le malumalu, ua latou mautinoa o la latou sootaga o le a faa-auau pea e faavavau, pe afai latou te faamaoni i a latou feagaiga. Ua latou iloa e leai se mea, e oo lava i le oti, e mafai ona tuueseeseina i latou.

O le feagaiga o le faaipoipoga e faavavau e manaomia mo le faaeaga. Na faaali mai e le Alii e ala mai ia Iosefa Samita: “I le Mamalu Selesitila e i ai lagi po o tikeri e tolu; e ao foi i se tagata ina ulu i lenei faatulagaga o le perisituta (o lona uiga o le feagaiga fou faavavau o le faaipoipoga) ina ia na maua le tulaga aupito i luga; afai foi na te le faia faapea na te le mafai ona maua” (MFF 131:1–4).

Pe a maea ona mauaina sauniga o le faamauga ma osia feagaiga paia i totonu o le malumalu, e tatau i le ulugalii ona faaauau pea i le faatuatua ina ia mafai ai ona maua faamanu-iaga o le faaipoipoga e faavavau ma le faaeaga. Na fetalai mai le Alii:

## *Faaipoipoga*

“Afai e faaipoipo le tane i lana ava i la’u upu, o la’u tula-fono lea, ma i le feagaiga fou faavavau, ma faamaufaaailoga-ina ai ia i laua e le Agaga Paia o le folafolaga, e lē ua faauuina, ua ou tofia i lenei mana ma ki o lenei perisitua; . . . ma afai [la] te tumau i la’u feagaiga, . . . o le a faia ia te i laua mea uma ua tuuina atu e la’u auauna i o laua luga, i lenei olaga, e oo lava i le faavavau; o le a faatumauiina atoatoa foi pe a o ese atu i laua mai le lalolagi” (MFF 132:19; mo se faamatalaga o le Agaga Paia o le Folafolaga, tagai itulau 7–9).

### Sauniuni mo le Faaipoipoga

Afai o e nofo toatasi, ia e sauniuni ma le faaeteete mo se faaipoipoga. Manatua e leai se mea e mafai ona suitulaga i le faaipoipoga i totonu o le malumalu. Saunia e faaipoipo i le tagata sa’o i totonu o le nofoaga sa’o i le taimi sa’o. Ia ola agavaa nei mo le ituaiga tagata o loo e faamoemoe e te faaipoipo atu i ai.

Tafafao faamasani ma na o i latou e maualuluga o latou tulaga faatonuina, ma i latou e mafai ai ona e faatumauiina ou tulaga faatonuina a o outou mafuta. Ia fuafuaina gaoioiga lelei ma aoga ina ia le mafai ai ona tuua na o oulua e leai ni mea e faia. Ia i ai i nofoaga o le saogalemu e faigofie ai ona e puipuia oe lava. Ia aua nei auai i ni talanoaga ma ni gaoioiga e faaosofia ai lagona feusuai.

Ia saili mo se soa e tutusa o oulua talitonuga. Ia saili atu i se tasi e mafai ona e faamamaluina pea ma faaaloalo i ai, se tasi o le a fesoasoani malosi i lou olaga. Ae e te lei faaipoipo, ia mautinoa ua e mauaina se tasi e mafai ona e avatu atoa i ai lou loto, lou alofa atoa, lou faatuatuga atoa, ma lau faaaloaloga atoa.

### Fautuaga mo i Latou e Lē Faaipoipo

O nisi tagata o le Ekalesia o le a nofo toatasi pea e aunoa ma se mea e sese ai i latou, e ui lava latou te mananao e faaipoipo. Afai o i ai oe i lea tulaga, ia mautinoa e “galulue faa-

tasi mea uma e lelei ai i latou o e ua alofa atu i le Atua” (Roma 8:28). A tumau pea ona e agavaa, o le a i ai se aso, i lenei olaga po o le olaga a sau, o le a tuuina atu ai ia te oe faamanuiaga uma o se sootaga o se aiga e faavavau. Ua tuuina mai e le aunoa e le Alii lenei folafolaga e ala mai i Ana perofeta o aso e gata ai.

Afai o loo e nofo toatasi ma i ai le manao e faaipoipo, aua nei aveesea lou faamoemoe. I le taimi foi lea, aua e te faata-gaina ia oe e popole e uiga i au sini. Nai lo le lena, ia matuai auai ma le filiga i gaoioiga aoga. Ia saili ni auala e te auauna atu ai i lou aiga lautele ma lou nuu. Talia ma faalateleina valaauga i le Ekalesia. Ia tausia oe lava ia mama, i le faaletino ma le faaleagaga. Ia faaauau pea ona aoao ma atiina ae ma agai pea i luma i lou olaga.

#### Ausiaina o se Faaipoipoga Fiafia

Afai ua e faaipoipo, manatua o le uiga faauo ma le alofa i le va o oe ma lou toalua e tatau ona avea ma sootaga faale-lalolagi e sili ona pele. Ua na o lou toalua lava le tagata e ese mai le Alii ua poloaiina oe e te alofa atu i ai ma lou loto atoa (tagai MFF 42:22).

Manatua o le faaipoipoga, i lona uiga moni, o se paaga e tutusa, e aunoa ma le puleaina o le tasi e le isi, ae peitai e tau-fai faamalosi, faamafanafana, ma fesoasoani le tasi i le isi.

E talu ai o le faaipoipoga o se mafutaga e sili ona taua i le olaga, o lea ua tatau i ai ma manaomia le taimi. Aua nei avea le faamuamua i tautinoga e itiiti lo latou taua. Ia faaalui-na se taimi e talanoa faatasi ai ma faalogo le tasi i le isi. Ia manatunatu lelei ma faaaloalo. Ia faaali atu e lē aunoa lagona filemu ma le alofa.

Vaai ia aua nei i ai se mea e oo mai i lo oulua va ma lou toalua e faalavelave ai i la oulua ulugalii. Ia fai nei se faaiuga ina ia faamanuiaina la oulua faaipoipoga, e tusa lava pe o a luitau e ono tulai mai.

Ia faamaoni le tasi i le isi. Ia faamaoni i au feagaiga o le faaipoipoga i mafaufauga, upu, ma galuega. Ia manatua na

## *Faamagaloga*

fetalai mai le Alii, “Ia e alofa atu i lau ava ma lou loto atoa, ma pipi’i atu ia te ia ae le o se isi” (MFF 42:22). O le fuaitau “le o se isi” o loo aoao mai ai e leai se tagata, gaoioiga, po o se isi lava meatotino e tataua ona ave i ai le faamuamua nai lo o le lua mafutaga ma lou toalua.

Ia aloese mai soo se mea lava e te ono lē faamaoni ai i soo se itu. O tusi ma ata mataga, o tuinauga lē lelei, ma uiga faatautala o le a faaleagaina ai lou tagata lelei ma osofaia ai le faavae o la oulua faaiipoipoga.

Ia galulue faatasi e taulimaina a oulua tupe. Galulue faatasi i le faatulagaina o se paketi. Ia pulea lelei lou faaaluina o tupe, ma aloese mai le nofopologa i aitalafu. O le pulea ma le atamai o tupe ma le saoloto mai le nofo aitalafu, e fesoasoani atu e maua ai le filemu i le aiga.

Ia taulai atu o oulua olaga i le talalelei a Iesu Keriso. Ia fesoasoani le tasi i le isi e tausia feagaiga ua oulua osia. Ia auai atu faatasi i sauniga ma le malumalu. Suesue faatasi tusitusiga paia. Ia tootutuli faatasi i le tatalo i le amataga ma le faaiuga o aso taitasi e faafetai atu i lo oulua Tama Faalelagi mo le tasi ma ia aufaatasi e ole atu mo Ana faamanuiaga i o oulua olaga, lo oulua aiga, ma e pele ia te oulua, ma o oulua manaoga amiotonu. O le a faapea ona taitaiina oulua e le Atua, ma o a oulua talanoaga ma Ia i aso uma o le a aumaia ai le filemu ma le fiafia e le mafai ona maua mai i se isi lava ala. O le a faaleleia la oulua mafutaga i le gasologa o tausaga; o le a faamalosia lo oulua fealofani. O le a faateleina le agaga faafetai o le tasi mo le isi.

Faamatalaga Faapoopo: Kenese 1:27–28; 2:18, 21–24; 1 Korinito 11:11; Efeso 5:22–33; Mose 2:27–28; 3:18, 21–24

*Tagai foi* Legavia; Ulugalii Tetea; Aiga; Malumalu; Lotogatasi

## **Faamagaloga**

O loo talanoa tusitusiga paia i le faamagaloga i ni vaega se lua. Ua poloaiina i tatou e le Alii ia salamo i a tatou agasala ma saili atu mo Lana faamagaloga. Na Ia poloai mai foi

ia i tatou e faamagalogo atu i latou o e ua agaleaga mai ma faatiga ia i tatou. I le tatalo a le Alii, na fautuaina ai i tatou e Iesu e tatalo atu i le Tama Faalelagi e “faamagalogo mai ia te i matou i a matou agasala, e pei o i matou foi ona matou faamagaloina atu i e ua agaleaga mai ia te i matou” (Mataio 6:12).

Sailia o le Faamagaloga mai le Alii

O le agasala o se avega mamafa. Na te aumaia le luluti o le nofosala ma le lilivau ina ua tatou iloa ua tatou lē faia le finagalo o lo tatou Tama i le Lagi. Na te aumaia le faanoanoa tumau pe a tatou iloa o a tatou amioga ma mea e fai, atonu ua tatou faatiga ai i isi ma ua tatou lē maua ai faamanuiaga ua sauni lo tatou Tama e tuuina mai ia i tatou.

Ona o le Togiola a Iesu Keriso, e mafai ona tatou maua ai le faamagaloga mo a tatou agasala e ala i le salamo faamaoni atoatoa. O le agasala e aumaia ai le puapuaga ma le tiga, ae o le faamagaloga a le Alii e aumaia ai lagona lelei, mafanafana, ma le olioli. Ua folafola mai e le Alii:

“Faauta o lē ua salamo i ana agasala, e faamagaloina o ia, ma o au le Alii, ou te le toe manatua lava” (MFF 58:42).

“E ui lava ina pei o ofu mumu a outou agasala, e sisina ia e pei o le kiona; e ui lava ina mumu ia e pei o le ie ulaula, e avega e pei o fulufulu mamoe” (Isaia 1:18).

E mafai ona tupu ia te oe se vavega, pe e te manaomia le salamo i se agasala mamafa po o se vaivaiga o aso fai soo. E pei lava ona augani atu le Faaola i tagata anamua, ua faapena foi ona Ia augani mai ia te oe i le aso nei:

“Ia outou o mai ia te au o outou uma o e tigaina ma mafatia i avega, o au foi e malolo ai outou.

“Ia outou amoina la’u amo, ma ia outou faaaoao ia te au, aua o au le agamalu ma le loto maulalo; ona maua lea e outou le malologa mo o outou agaga.

“Aua e avegofie la’u amo, o la’u avega foi e mama ia” (Mataio 11:28–30).

“Pe tou te le foi mai nei ea ia te au, ma salamo i a outou agasala, ma faaliliuina, ina ia ou faamaloloina outou?”

## *Faamagaloga*

“Ioe, e moni, ou te fai atu ia te outou, afai tou te o mai ia te au, e maua e outou le ola faavavau. Faauta, ua faaloaloa atu lo’u lima alofa ia te outou, ai se sau, ou te talia o ia. Amuia i latou o e o mai ia te au” (3 Nifae 9:13–14).

Mo se faamalamalamaga o le salamo, tagai “Salamo,” itulau 146–150.

### Faamagalo Atu i Isi

E le gata i le sailia o le faamagaloga o a tatou lava agasala, ae e tatau ona tatou naunau e faamagalo atu i isi. Na fetalai mai le Alii: “O le mea lea, ou te fai atu ai ia te outou, e tatau ona outou faamagalo atu le tasi i le tasi; aua o lē lē faamaglo atu i lona uso i ana solitulafono, ua ta’usalaina i luma o le Alii; aua e i ai pea ia te ia le agasala sili ona mamafa. O a’u le Alii, e faamagalo atu i e ou te loto ia faamagaloina, a o outou e ao ina outou faamagaloina atu i tagata uma” (MFF 64:9–10).

I tulaga o le olaga i aso fai pea, o le a mautinoa lava le faaleaga o oe e isi tagata—o nisi taimi e lē mafaufauina, ae o nisi taimi e fai ma le loto i ai. E faigofie tele ona tupu ai le ita pe fia tauai atu i tulaga faapea, ae e lē o le ala lea a le Alii. Na apoapoai mai le Alii, “Ia outou alolofa atu i e ua ita mai ia te outou, ia outou faamanuia atu i e ua fetuu mai ia te outou, ia outou agalelei atu i e ua inoino mai ia te outou, ia outou tatalo foi mo e ua tuuaifua mai ma faasaua mai ia te outou” (Mataio 5:44). Ua ia faia le faataitaiga sili o le faamagalo atu, ina ua i ai o Ia i luga o le satauro. Na faatatau i fitafita Roma o ē sa faasatauroina o Ia, na Ia tatalo atu ai, “Lo’u Tama e, ia e faamagaloina atu ia te i latou, aua ua latou le iloa le mea ua latou faia” (Luka 23:34; tagai Faaliliuga Iosefa Samita, Luka 23:35.)

Ia tatalo mo le malosi e faamagalo atu ai i ē ua agaleaga mai ia te oe. Ia faate’a lagona ita, inoino, po o le fia tauimaisui. Ia vaai atu mo mea e lelei ai isi, ae lē o le tulaui atu i o latou masei ma faalauteleina o latou vaivaiga. Ia tuu pea i le Atua e ave a ma faamasino o amioga faatiga a isi. E ono fai-

gata tele ona faagalo lagona tiga, ae e mafai ona e faia i le fesoasoani mai o le Alii. O le a e iloa ai o le faamagaloga e mafai ai ona faamaloloina manua ogaoga, e suia le oona o le feitagā'i ma le inoino, i le filemu ma le alofa lea e na o le Atua e mafai ona aumaia.

Mau Faaopoopo: Mataio 6:14–15; 18:21–22; 1 Nifae 7:16–21

*Tagai foi* Togiola a Iesu Keriso; Faamasinoina o Isi; Salamo

## **Faamanatuga**

I le po a o lumanai ai Lona Faasatauroga, na faapotopoto ai Iesu ma Ana Aposetolo ma faia le faamanatuga. “Ona tago ai lea o Ia i le areto, ua faafetai, ua tofitofi, ma avatu ia te i latou, ua faapea atu, O lo’u tino lenei, ua foaiina atu mo outou; tou te faia le mea nei e fai ma faamanatuga ia te au. Sa faapea foi ona tago i le ipu, ina ua uma ona talisua, ua faapea atu, O lenei ipu o le feagaiga fou lea i lo’u toto, ua faamaligiina mo outou” (Luka 22:19–20). Ina ua mavae Lona Toetu mai, sa Ia faia foi le faamanatuga i tagata o Sa Nifae (tagai 3 Nifae 18:1–11).

O aso nei ua tatou aai i le areto [falaoa] ma feinu i le vai e fai ma faamanatuga o le taulaga togiola a Iesu Keriso. O lenei sauniga o se vaega taua o la tatou tapuaiga ma lo tatou atiinaega faaleagaga. O le faateleina ona tatou manatunatu loloto i ai i lona taua, o le faateleina foi lena ona avea o se mea e paia ia i tatou.

Faamanatuina o le Faola ma Lana Togiola

O le faamanatuga e maua ai se avanoa mo oe e manatua ai ma le agaga faafetai le soifua, auaunaga, ma le Togiola a le Alo o le Atua.

O le areto po o le falaoa ua tofitofi, e te manatua ai Lona tino. E mafai ona e mafaufau i ai i Ona tiga faaletino—ae-maise ai Lona mafatiaga i luga o le satauro. E mafai ona e manatua ai, ona o Lona alofa mutimutivale ma lona alofa



tunoa, o le a toe tutu mai ai tagata uma ma maua ai le avanoa mo le ola e faavavau faatasi ma le Atua.

Faatasi ma sina ipu itiiti o le vai, e mafai ona e manatua ina ai sa faamaligiina e le Alii Lona toto i le tiga ma puapuaga matuia faaleagaga, e amata mai i le Faatoaga o Ketesemane. O iina na ia fetalai ai, “Ua matua tiga lo’u loto e oo i le oti” (Mataio 26:38). I le tuuina atu o Ia i le finagalo o le Tama, na matua tigaina ai o Ia e sili i mea e mafai ona tatou manatu i ai: “[na sau] le toto ai mea uma e afu ai, e faapea ona tele lona puapuaga ona o le amioleaga ma mea inosia a lona nuu” (Mosaea 3:7). E mafai ona e manatua ona o le faamaligiina o Lona toto, ua faasaoina ai oe ma isi tagata uma e Iesu Keriso mai le mea ua taua i tusitusiga paia o le “uluai sala” o le solitulafono a Atamu (Mose 6:54). E mafai foi ona e manatua na puapuagatia o Ia i agasala, faanoanoaga, ma tiga a fanau uma lava a le Tama Faalelagi, lea ua maua ai le faamagaloina o agasala mo i latou o e salamo ma ola i le talalelei (tagai 2 Nifae 9:21–23).

### Faafouina o Feagaiga ma Faamanuiaga Folafolaina

Ao e taumafa i le faamanatuga, ua e molimau atu i le Atua o le a faateleina lou manatuaina o Lona Alo e sili atu i lo o le taimi puupuu o lona sauniga paia. Ua e folafola atu o le a e manatua pea o Ia. Ua e molimau atu ua e lotomalie e ave i ou luga le suafa o Iesu Keriso ma o le a e tausia Ana poloaiga. O le aai ma le feinu i le faamanatuga ma faia nei tautinoga, ua faafouina ai au feagaiga o le papatisoga (tagai Mosaea 18:8–10; MFF 20:37).

O le a e mauaina na faamanuiaga silisili pe a e tausia feagaiga o le papatisoga. A o e faafouina na feagaiga, o le a faafouina foi e le Alii folafolaga o le faamagaloina o au agasala. O le mama mai agasala, o le a mafai ai ona e “maua pea lona Agaga e faatasi ma [oe]” (MFF 20:77). O le mafutaga faifai pea ma le Agaga o se tasi lea o meaalofa silisili e mafai ona e mauaina i le olaga faaletino. O le a taitaiina oe e le Agaga i ala

o le amiotonu ma le filemu, e taitaiina atu ai oe i le ola e faavavau faatasi ma lou Tama oi le Lagi ma Iesu Keriso.

### Taumafa ma le Tatau

I le saunia ai mo le faamanatuga i vaiaso taitasi, ia faaalua se taimi e suesueina ai lou olaga ma salamo mai au agasala. E le manaomia ona e matuai atoatoa ina ia mafai ai ona e 'ai ma inu i le faamanatuga, ae e tatau ona ia te oe se agaga o le lotomauualalo ma le salamo i totonu o lou loto. E tatau ona e saunia i vaiaso uma lava mo lena sauniga paia faatasi ma se loto momomo ma le agaga salamo (tagai 3 Nifae 9:20).

Afai e te auai atu i le faamanatuga ma le migao ma le paia e pei ona tatau ai, o le a avea ma se avanoa o le vaiaso e toe iloiloina ai oe lava, salamo, ma toe faapaiaina—o se pogai o le malosi ma se faamanatu faifai pea o le Togiola a le Faaola.

Faamatalaga Faaopoopo: 1 Korinito 11:23–29; Moronae 4–5; MFF 20:75–79; 27:2

*Tagai foi i le Togiola a Iesu Keriso; Feagaiga*

## **Faamanuiaga Faapeteriaka**

O faamanuiaga faapeteriaka e tuuina atu i tagata agavaa o le Ekalesia e peteriaka ua faauuina. O lou faamanuiaga faapeteriaka e faailoa atu ai lou tupuaga i le aiga o Isaraelu ma o loo i ai foi fautuaga patino mai le Alii ia te oe.

Ao e suesue i lou faamanuiaga faapeteriaka ma mulimuli i fautuaga o loo i ai, o le a tuuina mai ai le taitaiga, faamafanafanaga, ma le puipuiga. Ina ia e iloa pe faapefea ona maua se faamanuiaga faapeteriaka, talanoa i lou epikopo po o lou peresitene o le paranesi.

### Faailoaina mai o le Tupuaga

O lou faamanuiaga faapeteriaka e aofia ai le faailoaina mai o lou tupuaga, e ta'u mai ai o oe o se tasi o le aiga o Isaraelu—o se suli o Aperaamo, e te sau mai se ituaiga o

Iakopo. O le toatele o le Au Paia o Aso e Gata Ai, o le ituaiga o Efaraima, le ituaiga na tuuina atu i ai le uluai tiutetauave e taitaiina le galuega a le Alii i aso e gata ai.

E talu ai ona o i tatou taitoatasi e tele ituaiga alatoto o loo i totonu o i tatou, o le mafuaaga lena e ono mafai ai ona i ai ni tagata se toalua mai le aiga e tasi e eseese ituaiga o Isaraelu e tupuga mai ai.

E le afaina pe o lou tupuaga i le aiga o Isaraelu e ala mai i le toto pe o se tamafai. I le avea ai ma se tagata o le Ekalesia, ua faitauina oe o se tasi e tupuga mai ia Aperaaamo ma o se suli foi mo folafolaga ma faamanuiaga uma o loo i ai i le feagaiga FaaAperaaamo (tagai “Feagaiga FaaAperaaamo,” itulau 68–69).

### Aoao mai i Lou Faamanuiaga Faapeteriaka

A maua lou faamanuiaga faapeteriaka, e tatau ona e faitauina e le aunoa ma le agaga maulalo, ma le agaga tatalo. O se faaaliga patino mai lou Tama Faalelagi, o lē ua silafia ou malosiaga, vaivaiga, ma agavaa e faavavau. O lou faamanuiaga faapeteriaka, o le a la fesoasoani ai ia te oe e aoaoina mea o loo Ia faamoemoeina mai ia te oe. O lou faamanuiaga e mafai ona aofia ai folafolaga, fautuaga, ma lapataiga. Ao faagasolo pea taimi, o le a e iloaina ai le mana o faaaliga o loo i ai.

Ao e mulimuli i fautuaga o loo i lou faamanuiaga, o le a itiiti lava se avanoa e faaono pau ma taitaiseseina ai. Afai e te le mulimuli i fautuaga, o le a le mafai ona e mauaina faamanuiaga ua folafolaina.

E ui o lou faamanuiaga faapeteriaka o loo i ai fautuaga ma folafolaga musuia, e le tatau ona e manatu o le a taliina ai au fesili uma, pe auiliiliina mai ai foi mea uma o le a tutupu i lou olaga. Afai e le o ta’uina mai e lou faamanuiaga se vaega taua, e pei o se misiona po o le faaipoipoga, aua nei e manatu ai o le a e le maua lena avanoa.

Aua foi nei e manatu o mea uma o loo ta’uina mai i lou faamanuiaga faapeteriaka o le a faataunuaina uma i lenei olaga. O se faamanuiaga faapeteriaka e faavavau, ma o ona

folafolaga e mafai ona oo atu i le faavavau. Ia mautinoa pe a e agavaa, o le a faataunuuina folafolaga uma i le taimi ua tatau ai i le Alii. O folafolaga o le a le taunuu i lenei olaga, o le a faataunuuina i le isi olaga.

O lou faamanuiaga faapeteriaka e paia ma e mo oe lava ia. E mafai ona e fetufaai atu i tagata o lou lava aiga, peitai e le tatau ona e faitauina atu leotele i luma o se faalapotopotoga pe faatagaina foi isi latou te faitauina ma faamatala lona uiga. E oo lava i lou peteriaka po o lou epikopo po o le perezitene o le paranesi, e lē tatau ona faamatalaina lona uiga.

Ia teu i lou loto upu taua o loo i totonu o lou faamanuiaga faapeteriaka. Manatunatu loloto e uiga i ai ma ola ai ina ia e agavaa mo le mauaina o faamanuiaga folafolaina i lenei olaga ma le olaga a sau.

## **Faamaoni**

Ua ta'ua i le Mataupu Faavae o le Faatuatua e sefulutolu, “Matou te talitonu i le faamaoni.” Ia faamaoni o lona uiga ia moni, amiosa’o, ma ia leai se taufaasese i taimi uma.

Pe afai e te faamaoni i ala uma lava, o le a mafai ona e mauaina le filemu o le mafaufau ma faatumauina le faaaloalo mo oe lava. E te faatupuina le malosi o uiga lelei, lea e mafai ai ona e auauna atu i isi. E faatuatuaina oe i fofoga o le Atua ma i latou o loo siomia oe.

I se isi itu, afai e te le faamaoni i au upu ma au gaioiga, ua e faatiga ia te oe lava ma e masani lava ona faatiga ai foi i isi. Afai e te pepelo, gaioi, kopi, pe le popole i le tuuina atu o le galuega atoa mo lou totogi, ua e aveesea lou faaaloalo mo oe lava. Ua e le maua taitaiga a le Agaga Paia. O le a e iloa ai ua e faaleagaina fesootaiga ma tagata o lou aiga ma uo, ma o na tagata o le a le toe faatuatuaina oe.

O le faamaoni e masani ona manaomia ai le loto tele ma le ositaulaga, aemaise lava pe afai e taumafai isi e tauanau oe e faamaonia se amioga lē tonu. Pe a maua oe i lea tulaga, ia manatua o le filemu tumau e maua mai le faamaoni, e sili atu

## *Faamasinoga Tonu*

le taua nai lo le faamalieina i tupe, i le faia o le mea o loo faia foi e isi tagata.

Mau Faaopoopo: Esoto 20:16; 2 Nifae 9:34; MFF 97:8

## **Faamasinoga Tonu**

O le faamasinoga tonu o le tulafono e le suia ma e aumaia ai le faaiuga mo amioga. Ona o le tulafono o le faamasinoga tonu, e te maua ai faamanuiaga pe a e usitai i poloaiga a le Atua (tagai MFF 130:21–22). O le tulafono foi o le faamasinoga tonu e faamalosia ai foi le totogiina atu o se faasalaga i agasala uma e te faia. E manaomia ai le le faatagaina o se mea le mama e nonofo faatasi ma le Atua (tagai 1 Nifae 10:21).

Ina ua faataunuuina e le Faola le Togiola, sa Ia tauaveina i Ona luga a tatou agasala. Sa mafai ai e Ia ona “faaatoatoa ai iuga o le tulafono” (2 Nifae 2:7) aua na Ia tuuina atu o Ia lava i le faasalaga na manaomia e le tulafono mo a tatou agasala. I le faia o lene mea, Na Ia “faamalie ai poloaiga a le faamasinoga” ma faaoo atu ai le alofa tunoa i a i latou uma o e salamo ma mulimuli ia te Ia (tagai Mosaea 15:9; Alema 34:14–16). Talu ai ona ua Ia totogiina le tau mo au agasala, o lea e te lē pagatia ai i lene faasalaga pe afai e te salamo (tagai MFF 19:15–20).

Faamatalaga Faaopoopo: 2 Nifae 9:26; Alema 42

*Tagai foi* Togiola a Iesu Keriso; Alofa Mutimutivale; Salamo

## **Faamasinoina o Isi**

O nisi taimi e manatu ai nisi tagata e sese le faamasino atu i isi i soo se ala lava. E ui e moni e le tatau ona e ta’usalaina isi pe faamasinoina foi i latou ma le lē tonu, ae o le a manaomia lava lou faamasinoina o manatu, tulaga, ma tagata i le gasologa o lou olaga. Ua tuuina mai e le Alii le tele o poloaiga e faapea e le mafai ona e nofonofo e aunoa ma le

faia o se faamasinoga. Mo se faaitaiga, Na Ia fetalai mai: “Ia outou ma perofeta pepelo. . . . Tou te iloa i latou i o latou fua” (Mataio 7:15–16) ma “Ia outou o ese mai tagata amioleaga” (MFF 38:42). E manaomia ona e faia ni faamasinoga o tagata i le tele o au filifiliga taua, e pei o le filifilia o uo, palota mo taitai faalemalo, ma le filifiliaina o se soa e faavavau.

O le faamasinoga o se faaogaina taua lea o lou saolotoga, ma e manaomia ai le faaeteetega sili, aemaise lava pe a e faia faamasinoga e uiga i isi tagata. O au faamasinoga uma e tataua ona taitaia e tulaga faatonuina o le amiotonu. Ia manatua e na o le Atua, o lē silafia loto o tagata taitoatasi, e mafai ona faia faamasinoga mulimuli o tagata taitoatasi (tagai Faaaliga 20:12; 3 Nifae 27:14; MFF 137:9).

Na tuuina mai e le Alii se lapataiga e taitaiina ai i tatou i la tatou faamasinoga o isi: “Aua o le faamasinoga tou te faamasinoina atu ai, e faamasinoina ai outou; o le fua foi tou te fuaina atu ai, e toe fuaina mai ai ia te outou. Se a le mea e te vaai atu ai i si fasi laau i le mata o lou uso, a e le iloa e oe le utupoto i lou lava mata? Pe faapefea foi ona e fai atu i lou uso: Tuu mai ia, so’u eu ese le fasi laau i lou mata; faauta foi, o i lou lava mata le utupoto? O oe na le pepelo, ia e muai tiai le utupoto i lou lava mata; ona e iloa lelei ai lea e eueseina atu le fasi laau i le mata o lou uso.” (3 Nifae 14:2–5).

O lenei mau o loo aoao mai ai le Alii e faapea, o se sese tatou te vaai i ai i le isi, e masani lava o sina tamai mea itiiti i le mata o lena tagata, pe a faatusatusa i o tatou lava sese, lea ua pei o se utupoto tele i totonu o o tatou mata. O nisi taimi tatou te taulai atu ai i sese o isi ae sa tataua ona tatou galulue e faaleleia i tatou lava.

O au faamasinoga tonu e uiga i isi e mafai ona tuuina atu ai taitaiga manaomia mo i latou, o nisi foi tulaga, o se puipufiga mo oe ma lou aiga. Ia faia nei ituaiga faamasinoga ma le faaeteete ma le alofa. Ia e taumafai i le mea sili e te mafaia, e faamasino ai le tulaga ua i ai le tagata nai lo o le faamasinoina o tagata. I soo se taimi e mafai ai, ia aloese mai le faia o faamasinoga seia oo ina ua lava lelei lou malamalama i mea

## Faamauga

moni na tutupu. Ia faalogo i taimi uma i le Agaga Paia, o le e taialaina au faaiuga. Ia manatua le fautuuga a Alema i lona atalii o Korianetona: “Ia oe ia e loto alofa i ou uso, ia e fai mea tonu, ia faamasino ma le tonu, ma ia faia mea lelei e le aunoa” (Alema 41:14).

Faamatalaga Faaopoopo: 1 Samuelu 16:7; Moronae 7:14–19; MFF 11:12

*Tagai foi Alofa Mama; Faamagaloga; Alofa; Alofa Mutimutivale*

**Faamauga** (*Tagai Agaga Paia; Faaee Atu o Lima*)

## Faamoemoe

O le upu *faamoemoe* i nisi taimi e le malamalama. I la tatou gagana o aso uma, o le upu e masani lava ona faaiteite mai ai le le mautonu. Mo se faataitaiga, e mafai ona tatou faapea o loo tatou faamoemoe mo se suiga o le tau pe o se asi-asi mai o se uo. I le gagana a le Talalelei, o le upu *faamoemoe* o le mautinoa, lē maluelue, ma le olaola. Ua talanoa Perofeta e uiga i le i ai o se “faamoemoe mausali” (Alema 34:41) ma se “faamoemoe ua ola” (1 Peteru 1:3). Na aoao mai le perofeta o Moronae, “O lea, ai se faatuatua i le Atua, e mafai o ia ona faamoemoe ma le faamaoni i se lalolagi e sili ona lelei, ioe, o se tofi i le itu taumatau o le Atua; e mai le faatuatua lea faamoemoe, e fai ai foi ma taula i agaga o tagata faamaoni ma faamausali ai i latou e alualu i luma ma le le aunoa i galuega lelei, e ala mai ai foi le viiga i le Atua” (Eteru 12:4).

Pe a maua e i tatou le faamoemoe, tatou te faatuatua ina folafolaga a le Atua. Ua maua e i tatou se faamautinoaga lē leoa pe afai tatou te faia “galuega o le amiotonu,” tatou te “maua ai [lo tatou] tau, o le filemu lea i lenei lalolagi, ma le olaga faavavau i le lalolagi a sau” (MFF 59:23). Na aoao mai e Mamona o lea faamoemoe e maua e ala i le Togiola a Iesu Keriso: “Po o le a lea mea tou te faamoemoe i ai? Faauta, ou te fai atu ia te outou, e ia te outou le faamoemoe ona o le togiola a Keriso, ma le mana o lona toe tu mai, ina ia faatuina

i le ola faavavau; o lenei foi ona o lo outou faatuatua ia te ia e tusa ma le mea ua folafolaina" (Moronae 7:41).

Ao e taumafai e ola i le talalelei, e te tuputupu ae i lou malosi "ina ia tele lava lo outou faamoemoe ona o le mana o le Agaga Paia" (Roma 15:13). E faateleina lou faamoemoe pe a e tatalo ma saili le faamagaloga a le Atua. I le Tusi a Mamona, o se faifeautalai e igoa i a Arona na faamautinoa atu i se tupu Sa Lamana, "Afai e te salamo i au agasala, ma faasifo atu i luma o le Atua, ma valaau atu i lona suafa ma le faatuatua, o loo talitonu o le a e maua ai, ona e maua lea le mea ua e manao i ai" (Alema 22:16). E te maua foi le faamoemoe a o e suesue i tusitusiga paia ma mulimuli i a latou aoaoga. Na aoao mai le Aposetolo o Paulo, "O mea uma foi na tusia anamua, na tusia ia e aoao mai ai ia te i tatou; ina ia tatou maua le faamoemoe e tupu mai i le onosai, ma le faafanafana mai o tusi" (Roma 15:4).

O le mataupu faavae o le faamoemoe e oo atu i le faavavau, ae e mafai foi ona lagolagoina oe e ala i luitau o aso fai soo o le olaga. "Amuia le tagata," le tala a le Faisalamo, "o i ai le Atua o Iakopo e fai mona fesoasoani; o i ai lona faamoemoe ia Ieova lona Atua" (Salamo 146:5). Faatasi ai ma lea faamoemoe, e mafai ona e maua le olioli i le olaga. E mafai ona e maua le "onosai, ma ia faatoatoa i na puapuaga ma le faamoemoe mausali, e oo i le aso e malolo ai outou ai o outou puapuaga uma lava" (Alema 34:41). E mafai ona e "fetaomi atu i luma ma le faamaoni ia Keriso, ina ua i ai le faamoemoe atoatoa lelei, i le ma le alofa atu i le Atua atoa ma tagata uma. O lea, afai tou te fetaomi atu i luma, o fiafia i le afioga a Keriso, ma tumau lava e oo i le iuga, faauta, o loo faapea ona fetalai mai le Tama: Tou te maua le ola faavavau" (2 Nifae 31:20).

Mau Faaopopo: Failauga 3:25–26; 1 Korinito 15:19–22; 1 Peteru 3:15; 1 Ioane 3:2–3; Iakopo 4:4–6; Alema 13:28–29; 27:28; Eteru 12:32; Moronae 8:26; 9:25; 10:22

*Tagai foi* Fili; Togiola a Iesu Keriso; Alofa; Faatuatua



## Faaolaina (Tagai Faaolataga)

### Faaolataga

I a outou talanoaga ma nisi tagata Kerisiano, e ono fesiligia ai oe, “Pe ua faaolaina ea oe?” O i latou e fesili i lenefesili, e masani ona faatatau i le faatinoga ma le faamaoni o le ta’uta’u atu, po o le tautino atu ua e taliaina Iesu Keriso e avea ma ou Alii ma Faaola patino. O le faia o lene fesili, latou te faaalua ai lo latou faatuatua i upu nei, na tusia e le Aposetolo o Paulo:

“Afai e te tautino i lou gutu i le Alii o Iesu, ma talitonu i lou loto ua toe faatuina mai o ia e le Atua nai e ua oti, e faaolaina oe; aua o le loto e talitonu ai, e oo mai ai le amiotonu; a o le gutu e tautino ai, e oo mai ai le ola” (Roma 10:9–10).

Taliina o le Fesili “Pe ua Faaolaina ea Oe?”

I le Roma 10:9–10, o le upu *faaolaina* ma le *faaolataga* o loo faaalua ai se sootaga faafeagaiga ma Iesu Keriso. O lea sootaga faafeagaiga, ua mautinoa ai lo tatou faaolataga mai tau-nuuga e faavavau o le agasala pe afai tatou te usiusitai. O tagata faamaoni uma o le Au Paia o Aso e Gata Ai, ua faaolaina e tusa ai ma lea faauigaga. Ua liua i tatou i le talalelei toefuataiina. O le sauniga o le papatisoga, tatou te ulu atu ai i se sootaga faafeagaiga ma le Faaola, ma tauave ai Lona suafa i o tatou luga. Tatou te faafouina a tatou feagaiga o le papatisoga pe a tatou aai ma feinu i le faamanatuga.

Uiga Eeseese o le Upu *Faaolataga*

I totonu o aoaoga faavae o le Ekalesia a Iesu Keriso o le Au Paia o Aso e Gata Ai, o upu *faaolaina* ma le *faaolataga* e tele ni ona uiga. O lau tali i le fesili “Pe ua Faaolaina ea Oe?” e tusa ai ma nei uiga, a lē o le “Ioe” po o le “Ioe, ae e i ai ma ni tuutuuga.” O faamatalaga o loo i lalo, o loo ootoo atu ai uiga eeseese e ono o le upu *faaolataga*.

*Faaolataga mai le Oti Faaletino.* O tagata uma lava o le a oo i ai le oti. Peitai e ala mai i le Togiola ma le Toetu o Iesu Keriso, o le a toe tutu uma mai ai tagata uma—faasaoina mai le oti faaletino. Na molimau Paulo, “Aua faapei ona oti uma ia Atamu, e faapea foi ona faaolaina uma ia Keriso” (1 Korinito 15:22).

*Faaolataga mai le Agasala.* Ina ia faamamaina mai agasala e ala i le Togiola a le Faaola, e tatau ona e faatuatua ia Iesu Keriso, salamo, papatiso, ma mauaina le meaalofa o le Agaga Paia (tagai Galuega 2:37–38). Pe afai ua maea ona e papatiso ma mauaina le Agaga Paia e ala mai i le pule tatau o le perisitua, ua maea ona faasaoina ai oe iina mai le agasala i se tuutuuga. O le a le faasaoina atoatoa oe mai le agasala seiloga ua muta lou soifuuga i luga o le fogaeleele, ma sa e tumau ai ma le faamaoni e oo i le iuga.

Ia manatua e le mafai ona faasaoina oe *i au agasala*; e le mafai ona e mauaina le faaolataga atoatoa i le na o lou faailoa atu o lou talitonuga ia Keriso ma le malamalama o le a e toe faia le agasala i le gasologa o lou olaga (tagai Alema 11:36–37). O le alofa tunoa o le Atua e mafai ai ona faasaoina oe *mai au agasala* (tagai Helamana 5:10–11). Ina ia mauaina leni faamanuiaga, e tatau ona e faailoa lou faatuatua ia Iesu Keriso, taumafai e tausia poloaiga, tuuese agasala, ma toe faafouina lou salamo ma le faamamaina e ala i le sauniga o le faamanatuga.

*Toe Fanaufouina.* E i ai nisi taimi e fesiligia ai oe pe ua e toe fanaufouina. O le aoaoga faavae o le toe fanaufouina faaleagaga o loo faailoa mai pea e le aunoa i tusitusiga paia. O le Feagaiga Fou o loo i ai le aoaoga a Iesu e tatau ona “toe fanaufouina” ma a tatou lē “fanau i le vai ma le Agaga, e le mafai ona [tatou] sao i le malo o le Atua” (Ioane 3:3, 5). O leni aoaoga o loo ua toe faamautu mai i totonu o le Tusi a Mamona: “Aua e ao ina toe fanauina tagata uma lava, ioe, o tane atoa ma fafine, o atunuu uma, ituaiga, ma gagana eseese, ma nuu; ioe, ina ia fanauina i la le Atua, ma ia liua mai le

faaletino ma le pau i le amiotonu, ona ua togiolaina e le Atua, ma ua avea mona atalii ma afafine; ua faapea foi ona avea i latou ma tagata fou; a latou le faia lenei mea, e le mafai ona fai mo latou tofi le malo o le Atua” (Mosaea 27:25–26).

O lenei toe fanaufouina o se gasologa e tupu pe a maea ona tatou papatiso ma mauaina le meaalofo o le Agaga Paia. E oo mai o se taunuuga o lo tatou lotomalie e “osi le feagaiga ma lo tatou Atua e fai lona finagalo, ma usiusitai i ana poloaiga i mea uma na te poloaiina ai i matou, i o matou aso uma ua totoe” (Mosaea 5:5). Ona faapea lea ona “liua o [tatou] loto ona o le faatuatua i lona suafa, o le mea lea ua fanauina ai [tatou] ia te ia ” (Mosaea 5:7). Afai ua papatisoina oe ma ua e mauaina le meaalofo o le Agaga Paia, ma se feagaiga e ave i ou luga le suafa o Iesu Keriso, ua mafai loa ona e faapea mai ua toe fanaufouina oe. Ma e mafai ona e toe faafouina lena toe fanaufouina i Sapati taitasi i le taimi e te taumafa ai le faamanatuga.

*Faaolataga mai le Valea.* E toatele tagata o loo ola i se tulaga o le pogisa, latou te le iloaina le malamalama o le tala-lelei toefuataiina. Ua na ona “taofia mai le upu moni ona ua latou le iloa le mea e maua mai ai” (MFF 123:12). I le avea ai ma se tagata o le Ekalesia a le Alii, ua faaolaina oe mai lea tulaga. Ua ia te oe le malamalama o le Atua le Tama, o Iesu Keriso, le faamoemoeaga o le olaga, le ata o le faaolataga, ma lou taunuuga e faavavau. E mafai ona e ola o se soo o le Faaola, o le na folafola mai, “O au nei o le malamalama o le lalolagi; o le mulimuli mai ia te au, e le savali o ia i le pouliuli, ae ia te ia le malamalama o le ola” (Ioane 8:12).

*Faaolataga mai le Oti Faalua.* O nisi taimi e talanoa mai tusinga paia i le faaolataga mai le oti faalua. O le oti faalua o le oti faaleagaga mulimuli—o le vavaeeseina mai le amiotonu ma lē maua ai se nofoaga i soo se malo lava o le mamalu (tagai Alema 12:32; MFF 88:24). E le oo mai lea oti faalua seia oo i le Faamasinoga Mulimuli, ma o le a oo mai i nai tagata toaitiiti (tagai MFF 76:31–37). E toetiiti lava o tagata uma e ola i luga o lenei fogaeleele e mautinoa le faaolaina mai le oti faalua (tagai MFF 76:40–45).

*Ola e Faavavau, po o le Faaeaina.* I tusitusiga paia, o le upu *faaolaina* ma le *faaolataga* e masani ona faatatau i le ola e faavavau, po o le faaeaga (tagai Aperaamo 2:11). O le ola e favavau o le iloaina lea o le Tama Faalelagi ma Iesu Keriso ma nonofo faatasi ma i laua e faavavau—o le ulu atu lea i se nofoaga i le tikeri maualuga o le malo selesitila (tagai Ioane 17:3; MFF 131:1–4; 132:21–24). Ina ia mauaina lenei meaalofo silisili, e tatau ona tatou faia mea e sili atu i le na o le salamo mai a tatou agasala, papatiso ma faamauina e le pule tatau o le perisitua. E tatau i alii ona mauaina le Perisitua Mekisateko, ma e tatau foi i tagata uma o le Ekalesia ona tausia feagaiga paia i totonu o le malumalu, e aofia ai faaipopoga e faavavau.

Pe a tatou faaaogaina le upu *faaolataga* e faatatau i le ola e faavavau, e leai se isi o i tatou e mafai ona faapea ua tatou faaolaina i le olaga faitino. O lena meaalofo mamalu faatoa oo mai lava pe a maea le Faamasinoga Mulimuli.

Faamatalaga Faapoopo: Mataio 10:22; Mareko 16:16; Efeso 2:8–10; Iakopo 2:14–18; 2 Nifae 25:23, 26; Mosaea 5:8–15; 3 Nifae 9:21–22; Moronae 10:32–33; Mataupu Faavae o le Faatuatua 1:3

*Tagai foi i le Togiola a Iesu Keriso; Papatisoga; Ola e Faavavau; Alofa tunoa; Malo o le Mamalu; Ata o le Faaolataga*

## Faosoosoga

E faapei ona vavalalo le Aposetolo o Paulo, o aso mulimuli o “aso faigata” (2 Timoteo 3:1). O faatosinaga a le fili ua matua sosolo atu ma ua taufaasese. Peitai e mafai ona e teena Satani ma manumalo mai ana faosoosoga. Ua tuuina mai ia te oe e le Tama Faalelagi le meaalofo o le saolotoga e filifili ai—le mana e filifili ai le lelei mai le leaga. E mafai ona “faamaulalo [oe lava] i luma o le Atua, ma ia valaau atu i lona sua fa paia, ma ia mataala ma tatalo e le aunoa ina ia le tofofoina [oe] e sili i mea e mafai ona [e] onosai ai” (Alema 13:28). A e loto e usiusitai i poloaiga, o le a tuuina atu e lou Tama Faalelagi ia te oe le malosi e tetee atu ai i faosoosoga.

O lenei fautuaga o le a fesoasoani ia te oe e manumalo ai i faaosoosoga:

*Ia faatotonugalemu lou olaga i le Faaola.* Na apoapoai atu le perofeta o Helamana i ona atalii, “Ia manatua, ia manatua lava, e ao ina oulua atiina ae lo oulua faavae i luga o le papa o lo tatou togiola, o le Keriso lea, o le Alo o le Atua. Pe a faao mai e le tiapolo ana matagi tetele, ioe, o ana u fanafana i le asiosio, ioe, pe a pesi mai ia te oulua lana uatoa uma lava ma ana afa, e le malo ai ia te oulua, e toso ifo ai oulua i le vanu o le puapuaga, ma le auega e le gata, ona o le Papa ua atiina ae ai oulua, o le Faavae mau lea, o le Faavae foi lea, afai e ati ae tagata i ona luga, e le mafai lava ona pauu i latou” (Helamana 5:12).

*Tatalo mo le malosiaga.* Ina ua asiasi atu le Faaola toetu i tagata o Sa Nifae, sa Ia aoao atu i le motu o tagata: “E tatau ona outou mataala ma tatalo e le aunoa, nei oo mai le faaosoosoga ia te outou; aua e manao Satani ia te outou, ina ia lulu o ia ia te outou e pei o le saito. O le mea lea e tatau ai ona outou tatalo e le aunoa i le Tama i lo’u igoa” (3 Nifae 18:18–19). I aso e gata ai ua Ia tuuina mai ai foi lea lava aoaoga e tasi: “Ia tatalo pea, ina ia mafai ona e manumalo, ioe, ina ia mafai ona e manumalo ia Satani, ina ia mafai ona e sao mai lima o auauna a Satani o e fesoasoani i lana galuega” (MFF 10:5).

*Ia suesue i tusitusiga paia i aso uma.* Ao e suesue i upumoni o le talalelei ma faaaogaina i lou olaga, o le a faamanuiaina oe e le Alii i le mana e tetele atu ai i faaosoosoga. Na aoao mai Nifae, “O i latou uma o e faalogo foi i le afioga a le Atua, ma taofi mau i ai, e le fano i latou e faavavau, e le mafai foi tofotofoga ma u fanafana mu a le ita mai ona manumalo ia te i latou e oo i le tauaso e taitaieseina ai i latou i le malaia” (1 Nifae 15:24; Tagai foi i le Helamana 3:29–30).

*Ia faatumuina lou olaga i le lelei.* E tele mea lelei e mafai ona e filifili mai ai e le manaomia ai ona e tofo atu i le leaga. Pe a e faatumuina lou olaga i le lelei, o le a leai ai se avanoa mo se isi lava mea.

*Aloese mai nofoaga ma tulaga e faaosoosoina ai oe.* E le mafai ona e matua aloese mai faaosoosoga, peitai e mafai ona e aloese mai nofoaga ma tulaga e ono faaosoosoina ai oe. E mafai foi ona e aloese mai mea e le talafeagai o i totonu o tusiata, tusi faitau, televise, ata tifaga, ma musika ma luga o le Initoneti.

*Taumafai malosi ina ia faaosofia isi e fai mea e lelei.* A o latalata i Ona puapuaga i le Faatoaga o Ketesemane, na tatalo ai le Faaola mo Ona soo: “Aua e le ni o le lalolagi i latou, faapei o a’u, ou te le so le lalolagi. Ou te le ole atu ina e aveese ia te i latou i le lalolagi, a ia e tausii ia te i latou ina nei leaga. E le ni o le lalolagi i latou, faapei o a’u foi, ou te le so le lalolagi a’u. Ia e faapaiaina i latou i lau upu moni; o lau afioga o le upu moni lea. Faapei ona e auina mai au i le lalolagi, ua faapea foi a’u ona auina atu i latou i le lalolagi” (Ioane 17:14–18). I le avea ai ma se soo o Iesu Keriso i aso e gata ai, e mafai ona e i ai i le lalolagi ae “le so le lalolagi.” I le faaopoopo atu i le aloese o oe lava mai faaosoosoga, e mafai ona e uunaiina isi e ola i ni olaga lelei ma atoatoa. E mafai ona e faia se faataitaiga amiotonu, avea ma se uo lelei, auai i auaunaga fesoasoani i le nuu, ma, pe a talafeagai ai, ia faailoa atu ina ia lagona ou manatu i le puipuia o tulaga faatauaina o uiga mama.

*Aua nei faalotolotolua i au faaiuga e tetee atu i faaosoosoga.* Ia taumafai malosi e mulimuli i faataitaiga a le Faaola, o le na “oo foi ia te ia tofotofoga ae peitai na te lei gauai ai” (MFF 20:22). Ina ua faaosoosoina e Satani Iesu i le vao, e lei vaivai ai le Alii. O Lana tali sa vave ma mausali: “Satani e, ina alu ese ia oe i o’u tua” (Luka 4:8). E ala mai i ou mafaufauga, upu, amioga amiotonu, ona mafai ona e tali atu i faaosoosoga a le fili i le lagona lava lena e tasi. “Ia outou tetee atu i le tia-polo, ona sola ese ai lea o ia ia te outou. Ia outou faalatalata atu i le Atua, ona faalatalata mai lea o ia ia te outou” (Iakopo 4:7–8).

Faamatalaga Faaopoopo: Roma 12:21; Efeso 6:11–17; Iakopo 1:12, MFF 23:1; 31:12; Mose 1:12–22

## *Faapau Pepe*

*Tagai foi Saolotoga; Lotofuatiaifo; Anapogi ma Taulaga Anapogi; Agaga Paia; Malamalama o Keriso; Salamo; Satani*

### **Faapau Pepe**

I sosaiete o ona po nei, ua avea le faapau pepe ma faiga ua masani ai, ua puipuia e ala i finauga taufaasese. Afai e te lua fetaiai ma ni fesili e uiga i lenei mataupu, e mafai ona e saogalemu e ala i le mulimuli i le finagalo faaalua lenei o le Alii. Na tausalaina e Perofeta o Aso e Gata Ai le faapau pepe, ma faasino atu i le tautinoga a le Alii, “Aua e te . . . fasioti tagata pe faia foi soo se mea faapena” (MFF 59:6). O loo manino la latou fautuaga i lenei mataupu: O tagata o le Ekalesia a Iesu Keriso o le Au Paia o Aso e Gata Ai e le tatau ona gauai atu, faatino, faamalositia, totogi pe faia ni fetuuniga e faapau ai pepe. Afai e te fautuaina se faapau pepe i soo se ala, ua ono tatau ona faia sou aoaiga faale-Ekalesia.

Na saunoa mai taitai o le Ekalesia, e i ai nisi tulaga lē maalofia e mafai ona faatagaina ai se faapau pepe, e pei o le maitaga na mafua ona ua toso faamalosi le tamaitai, po o le mata’ifale ma toe ui i fanau, pe na iloiloaina foi e se fomai atamai ua lamatia le ola po o le soifua maloloina o le tina, pe ua iloiloaina foi e se fomai atamai faapea ua i ai ni faaletonu matuia i le pepe o le a le ola ai pe a fanau mai. Ae oo lava i nei tulaga e le mafai ona otometi ai se faatagaga mo se faapau pepe. O i latou e fetaiai ma nei tulaga, e ao ona mafaufau i le faapau pepe pe a mavae ona talanoa i taitai o le Ekalesia i le lotoifale ma maua se faamaoniga e ala i le tatalo faatauana.

Pe a toifale se tamaitai, o le mea sili e ao ona fai o le faaiipoipo o le tina ma le tama o le tamaitiiti ma galulue agai i le faatuina o se fesootaiga faaleaiga e faavavau. Afai e foliga mai e le manuia se faaiipoipoga, e tatau ona la tuuina atu le pepe mo le liliuina, ae fautuaina le faia e ala i le LDS Family Services (Auaunaga a le AAG mo Aiga) (tagai “Liliuina Faaletulafono o se Tamaitiiti,” itualu 93–94).

## **Faapupuina o le Tino**

Ua matuai lē fautuaina lava e perofeta o aso e gata ai le tatui o le tino vagana ai mo faamoemoega faafomai. Afai e mananao teine po o fafine e tatui taliga, ua fautuaina i latou e tau lava o le tasi le pea tautaliga talafeagai.

O i latou e filifili e lē amanaiaina lenei fautuaga, o lo latou lē faaaloalo lea mo i latou lava ma le Atua. O le a i ai se aso latou te salamo ai i a latou faaiuga.

Na aoa mai le Aposetolo o Paulo i le taua o o tatou tino ma le matautia o le faaleagaina o le tino ma le iloa lelei: “Tou te le o iloa ea o le malumalu outou o le Atua, o loo nofo foi le agaga o le Atua i totonu ia te outou? Afai e faaleaga e se tasi le malumalu o le Atua, e faaleagaina lena tagata e le Atua; aua e paia le malumalu o le Atua, o outou lava ia” (1 Korinito 3:16–17).

*Tagai foi Tausaafia; Faapupuina o le Tino*

## **Faasaunoa/Faatautala ma le Saua**

O le faasaunoa o le sauaina lea o isi po o oe lava ia i se ala e faamanu’alia ai po o le faamaina foi. E na te faaleagaina le mafaufau ma le agaga ma e masani lava ona faamanu’a ai foi ma le tino. E mafai ona faatupuina le fenumiai, masalosalalo, lē faatuatuaina, ma le fefe. O se solia lea o tulafono a le atunuu ma e matuai feteenai lava ma aoaoga a le Faaola. Ua tausalaina e le Alii soo se foliga lava o le faasaunoa po o le faasaua—faaletino, feusuaiga, upu, po o lagona. O amioga faasaua e mafai ona oo atu ai i se aoaiga faale-Ekalesia.

Fautuaga mo e Faasaunoa

Afai na e faasaunoa i soo se isi, e tatau ona e salamo i lau agasala. Aioi atu i le Alii e faamagalo mai oe. Fesili atu mo le faamagaloga a i latou sa e faatiga i ai. Talanoa i lau epikopo po o le peresitene o le paranesi ina ia mafai ona ia fesoasoani



ia te oe i laasaga o le salamo ma, pe a tatau ai, ia fesoasoani ina ia e maua nisi fautuaga faaopoopo po o fesoasoaniga.

Afai e faatupuina tele e ou lagona ita lau amio faasaua, ia e aoao e pulea lou loto ita. Alu i le Alii i le tatalo, ma fesili atu ia te Ia e fesoasoani mai ia te oe. O lou tulimata'i atu i le faavavau, o le a e iloa ai o lou ita e toetoe lava a oo mai i taimi uma, o se tali i mea e lē taua tele.

Afai o e lagona le ta'usalaina i faiga faalefeusuai, ia e saili e pulea lou mafaufau. Manatua o ou mafaufauga e malosi tele ona aafiaga i lou olaga— “aua e pei ona manatu [se tasi] i lona loto, ua faapea lava o ia” (Faataoto 23:7). Aloese mai ata mataga ma soo se isi lava mea e ono mafai ona faatupuina manaoga lē mama faalefeusuaiga. Tatalo mo le malosi e “teuteuina [ai] ou manatu i le mama e le aunoa” (MFF 121:45).

#### Fesoasoani mo i Latou na Aafia Fua i Faiga Saa

Afai o oe o se tasi na sauaina, saili nei loa se fesoasoani. Talanoa i ou taitai o le perisitua, e masani lava o lou epikopo po o le peresitene o le paranesi ae o nisi taimi o se tasi o le au peresitene o le siteki po o le itu. E mafai ona fesoasoani ia e iloa le mea e fai.

Ia mautinoa e le tuuaiina oe mo le amio faataumaoui a isi. E le tatau ona e lagonaina le ta'usalaina. Afai na aafia fua oe i faiga faiaiga faamalosi po o isi faiga faatautala faalefeusu-aiga, pe sa sauaina oe e se tasi lua te masani, po o se tagata ese, e oo lava i se tasi o le aiga, e le ta'usalaina oe i le agasala faalefeusuaiga. Ia e iloa o loo e mama, ma e alofa le Tama Faalelagi ia te oe.

Ia tatalo mo le filemu lea e na o Iesu Keriso ma Lana Togiola e maua mai ai (tagai Ioane 14:27; 16:33). Na oo le Faaola i ou tiga uma ma sauaga, e oo lava i tiga na mafua mai i isi, ma e Na te silafia foi le ala e fesoasoani ai ia te oe (tagai Alema 7:11–12). Nai lo lou saili e tauu atu i ai, ia e taulai atu i mea e mafai ona e pulea, e pei o ou lava uiga faaalua i le olaga. Tatalo mo le malosi e faamagalo atu ai i e ua faatiga ia te oe.

Faaauau pea ona saili le fesoasoani mai lou taitai perisi-  
tua ina ia mafai ona ia taitaiina oe i le faagasologa o le faa-  
malologa o lagona. O faamanuiaga o le talalelei, e mafai ai  
ona e taofia faiga tuputupu pea o le faasaua ma faasaoloto ai  
oe mai mafatiaga sa oo ia te oe..

Mau faaopoopo: Mataio 18:1–6; MFF 121:34–46

*Tagai foi* Faamagaloga; Salamo

**Faasatauroga** (*Tagai* Togiola a Iesu Keriso; Satauro)

**Faatauatane ma le Faatauafafine** (*Tagai* Legavia)

## Faatuatua

Sa aoao mai le Aposetolo o Paulo “A o le faatuatua o le  
faalagolago lea i mea ua faamoemoe i ai, o le mautinoa lea o  
mea e le o vaaia” (Eperu 11:1; tagai Faaliliuga a Iosefa Samita,  
Eperu 11:1). Na tauina mai foi e Alema se faamatalaga faa-  
pea: “afai ua ia te outou le faatuatua, tou te faamoemoe i mea  
e le o vaaia, a ua moni ia” (Alema 32:21).

O le faatuatua o se mataupu faavae o galuega ma le  
mana. Soo se taimi e te galue agai ai i se sini taua, e te faaao-  
gaina le faatuatua. E te faaalua lou faamoemoe mo se mea e le  
mafai ona e vaai i ai.

Faatuatua i le Alii o Iesu Keriso

Ina ia mafai e lou faatuatua ona taitai atu oe i le faaola-  
taga, e tatau ona taulai atu i le Alii o Iesu Keriso (tagai  
Galuega 4:10–12; Mosaea 3:17; Moronae 7:24–26; Mataupu  
Faavae o le Faatuatua 1:4). E mafai ona e faaogaina le faa-  
tuatua ia Keriso pe a maua le faamautinoaga o loo i ai o Ia, o  
se manatu sa’o o Lona uiga, ma se malamalamaaga o loo e  
taumafai e ola e tusa ai ma Lona finagalo.

O le i ai o le faatuatua i a Iesu Keriso o lona uiga o le faa-  
lagolago atoa lea ia te Ia—faatuatua i Lona mana e lē i’u, ata-

## *Faatuatua*

mai, ma le alofa. E aofia ai le talitonu i Ana aoaoga. O lona uiga o le talitonu e ui lava e te le malamalama i mea uma, Na te silafia. Ia manatua ona sa Ia tauaveina ou tiga uma, pua-puaga, ma vaivaiga, Na te silafia le ala e fesoasoani ai ia te oe ina ia e manumalo mai ou faafitauli i aso taitasi (tagai Alema 7:11–12; MFF 122:8). Ua Ia “manumalo i le lalolagi” (Ioane 16:33) ma saunia le ala mo oe e maua ai le ola faavavau. E saunia o Ia i soo se taimi e fesoasoani mai ia te oe e pei ona e manatuaina lana olega: “Ia faalagolago ia te au i manatunatuga uma; aua le masalosalo, aua le fefe” (MFF 6:36).

### Ola i le Faatuatua

O le faatuatua e sili atu nai lo na o se talitonuga e aunoa ma galuega. E te faaalua lou faatuatua e ala i au taga—i le ala e te soifua ai.

Na folafola mai e le Faaola, “Afai tou te faatuatua ia te au, e ia te outou le mana e fai mea uma e tatau ia te au” (Moronae 7:33). O le faatuatua ia Iesu Keriso e mafai ona faa-osoifiaina ai oe e te mulimuli atu i Ana faaitaiga atoatoa (tagai Ioane 14:12). O lou faatuatua e mafai ona taitaiina atu ai oe i le faia o galuega lelei, usiusitai i poloaiga, ma salamo mai au agasala (tagai Iakopo 2:18; 1 Nifae 3:7; Alema 34:17). O lou faatuatua e mafai ona fesoasoani ia te oe e faatoilaloina tofotofoga. Na apoapoai atu Alema i lona atalii o Helamana, “Ia aoao atu ia te i latou e tetele atu i tofotofoga uma a le tiapolo, i le faatuatua i le Alii o Iesu Keriso” (Alema 37:33).

O le a galueaiina e le Alii ni vavega tetele i lou olaga e tusa ai ma lou faatuatua (tagai 2 Nifae 26:13). O le faatuatua ia Iesu Keriso e fesoasoani ia te oe ia maua faamalologa faaleagaga ma le faaletino e ala i Lana Togiola (tagai 3 Nifae 9:13–14). Pe a oo mai taimi o tofotofoga, e mafai e le faatuatua ona tuuina atu ia te oe le malosi e fetaomi ai i luma ma faafetaiaia ma le lototoa ou faigata. E tusa lava pe foliga nenefu mai le lumanai, o lou faatuatua i le Faaola e mafai ona tuuina atu ia te oe le filemu (tagai Roma 5:1; Helamana 5:47).

Faateleina Lou Faatuatua

O le faatuatua o se meaalofo mai le Atua, ae e tatau ona faafaileleina lou faatuatua ina ia faamalosia ai pea. O le faatuatua e faatusaina i le musele o lou lima. Afai e faaaoaga pe faia foi faamalositino, o le a tupu le malosi. Afai e asoa pe sisi lou lima, o le a vaivai.

E mafai ona e faafaileleina le meaalofo o le faatuatua e ala i le tatalo i le Tama Faalelagi i le suafa o Iesu Keriso. Ao e faaali atu lou agaga faafetai i lou Tama, ma a o e aioi atu ia te Ia mo faamanuiaga o loo e manaomia ma manaomia foi e isi, o le a e latalata atu ia te Ia. O le a e latalata atu i le Faaola, o lana Togiola ua mafai ai ona e aioi atu mo le alofa tunoa (tagai Alema 33:11). O le a e talisapaia foi le taitaiga filemu a le Agaga Paia.

E mafai ona e faamalosia lou faatuatua e ala i le tausia o poloaiga. E pei lava o faamanuiaga uma mai le Atua, o le faatuatua e maua mai ma faateleina e ala i le usiusitai patino ma galuega amiotonu. Afai e te manao e faatamaoigaina lou faatuatua i le tulaga e aupito sili ona maua, e tatau ona e tausia feagaiga ua e osia.

E mafai foi ona e atiina ae lou faatuatua e ala i le suesueina o tusitusiga paia ma saunoaga a Perofeta o aso e gata ai. Na aoao mai le perofeta o Alema o le upu a le Atua e fesoa-soani e faamalosia le faatuatua. I le faatusatusaina o le faatuatua i le fatu, na ia faapea mai ai o le “manao i le fia faatuatua” e mafai ai ona e “tuu i lenei manao” mo le upu ina ia “galue i totonu ia te [oe].” Ma o le a e lagona o le upu e lelei, aua o le a amata ona faateleina ai lou loto; ma faamalamalamaina ai lou mafaufau. O lenei mea o le a faamalosia ai lou faatuatua. Ao e faaauau pea ona faafaileleina le upu i lou loto i le “filiga foi, ma lo outou faatuatua, ma lo outou onosai e tausai ai le upu, ina ia mau aa i totonu ia te outou, faauta, e avea ai ma laau e tupu ae i le ola faavavau” (Tagai Alema 32:26–43.)

## *Faiaoga Asiasi*

Mau Faaopoopo: Eperu 11; Iakopo 1:5–6; 2:14–26; Eteru 12:4–27; Moronae 7:20–48; MFF 63:7–11; 90:24

*Tagai foi* Papatisoga; Le Atua le Tama; Iesu Keriso; Salamo

### **Faiaoga Asiasi** (*Tagai Aualofa*)

### **Faiaoga o Aiga** (*Tagai Perisitua*)

### **Faigamalo a le Malo ma Tulafono**

O le vaega 134 o le Mataupu Faavae ma Feagaiga o loo ootooina ai “talitonuga e uiga i malo ma tulafono lautele” o le au paia o aso e gata ai. (MFF 134, ulutala o le vaega). O loo aofia i lea vaega faamatalaga nei:

“Matou te talitonu ua faatuina malo e le Atua mo le lelei o tagata; ma o loo na faia tagata e tali atu mo a latou faiga e uiga i ia malo, i le faia o tulafono atoa ma le faaaogaina, mo le lelei ma le saogalemu o tagata uma. . . .

“Matou te talitonu, e ao i tagata uma ina lagolagoina ma faamalosi malo o loo latou nononfo ai ao puipuia i latou i a latou aia faaletagata e le mafesuiaina e tulafono a ia malo, ma o solitulafono ma fouvalega e le tatau ai lava mo tagata uma ua faapea ona puipuia, ma e ao ina faasalaina tatau; o malo uma foi e i ai le aia e faatuina tulafono e tatau ai e tusa ma lo latou malamalama ina ia faamautu fuafuaga faamoemoeina a tagata uma; ae ui i lea, e faamamalu pea le saolotoga o le loto fuatiaifo

“Matou te talitonu e ao ina faaaloologia tagata uma i lona tulaga e pei o pule ma faipule ua tofia mo le puipuiga o e mama, ma le faasalaina o e solitulafono, o tulafono foi e tatau ona faaaloalo ma ava i ai tagata uma, aua a aunoa ma ia tulafono o le a suia le filemu ma le lotogatasi i le pule faamalosi ma le matata’u, o tulafono tau tagata ua faatuina mo le aoga o le faatulagaina o o tatou faamoemoe o tagata taitoatasi ma atunuu ma le va o le tagata ma le tagata; ma tulafono paia ua tuuina mai mai le lagi, ua faavae ai tulafono i mea faaleagaga

mo le faatuatua ma le tapuaiga, o ia mea e lua e tali atu ai e le tagata i Lē na faia o ia” (MFF 134:1, 5–6).

E tasi le elemene autu o le tuueseeseina o le ekalesia ma le malo, o le matafaioi lea a le malo e tuuina atu le saolotoga e tapuai ai. E lagolagoina e perofeta o Aso e Gata Ai lenei mataupu faavae, o pei ona tusia i le mataupu faavae lona sefulutasi o le faatuatua: “Matou te tautino atu e ia i matou le aia matou te tapuai atu ai i le Atua Silisili e tusa ai ma o matou loto fuatiaifo, ma matou te tuuina atu foi lenei aia tatau i tagata uma e faitalia i latou pe faapefea, po o fea, po o le a foi latou te auauna i ai.” E o gatasi ma le tuueseeseina o le Ekalesia ma le malo, e le saina faamaonia e le Ekalesia se pati faaupufai po o se sui tauva. E le faatagaina foi le faaagaina o ona fale ma fanua mo faamoemoega faapolokiki. E le auai le Ekalesia i faiga faapolokiki sei vagana ua i ai se fesili e aafia ai le mea sao ua avea ma se faafitauli, lea e masani lava ona faailoa faalauaitete atu ai se manatu o le Ekalesia.

E ui lava ina leai se vaega faapolokiki e faapito i ai le Ekalesia, ae ua uunaia tagata taitoatasi o le Ekalesia e auai o ni tagatanuu. I le avea ai o oe ma se au paia o aso e gata ai, e ao ona e malamalama i lou nofoaga ma lou tulaga i le atunuu o loo e nofo ai. Aoao i le talafaasolopito, ma tulafono a le atunuu. Afai e te maua le avanoa e palota ai ma e auai i mataupu faalemalo, ia auai ma le malosi i le lagolagoina ma le puipuia o mataupu faavae o le mea moni, amiotonu, ma le saolotoga.

Mau Faapoopo: MFF 98:10; Mataupu Faavae o le Faatuatua 1:12

**Faitaaga** (*Tagai Legavia*)

**Falepuipui o Agaga** (*Tagai Oti, Faaletino; Seoli; Parataiso*)

**Feagaiga**

O se feagaiga o se maliliega paia i le va o le Atua ma se tagata po o se vaega o tagata. E faia e le Atua ni tuutuuga patino, ma la folafola mai e faamanuia i tatou pe afai tatou te

usiisitai i na tuutuuga. Pe a tatou filifili e le tausia ia feagaiga, e le mafai ona tatou maua faamanuiaga, ma o nisi taimi tatou te puapuagatia ai i se faasalaga e tusa ai o se taunuuga o lo tatou lē usiisitai.

O sauniga faaola uma o le Perisitua e o faatasi ma ni feagaiga. Mo se faataitaiga, e te osia se feagaiga pe a papatiso, ma e te faafouina lena feagaiga i taimi taitasi uma e te tau-mafa ai i le faamanatuga (tagai Mosaea 18:8–10; MFF 20:37, 77, 79). Afai ua e mauaina le Perisitua Mekisateko, ua e ulu atu i le tautoga ma le feagaiga o le Perisitua (tagai MFF 84:33–44). O faaeega paia ma sauniga o le faamauga e aofia ai foi feagaiga paia.

Ia manatua pea ma faamamalu feagaiga ua osia ma le Alii. Ona le manaomia lea ona poloaiina oe i mea uma e te faia (tagai MFF 58:26–28). O le a musuia oe e le Agaga Paia, ma o le a avea uiga faaKeriso ma vaega o lou natura. E pei ona folafola mai e le Alii, o le a e “maua lea faaaliga ma lea faaaliga, o lea poto ma lea poto ina ia e iloa mea lilo atoa ma mataupu tau le filemu—e aumaia le olioli, e aumaia foi le ola faavavau” (MFF 42:61). E tatau ona avea ma ou faamoemoga silisili le olioli i le faapaiaga e sau mai le taitaiga faalelagi; a o lou popolega silisili o le lē mauaina lea o ia faamanuiaga.

Mau Faaopoopo: Ieremia 31:31–34; Mosaea 5; Moronae 10:33; MFF 82:10; 97:8; 98:13–15

*Tagai foi* Feagaiga Faa-Aperaamo; Papatisoga; Faaipoipoga; Sauniga; Perisitua; Faamanatuga; Malumalu

## **Feagaiga Faa-Aperaamo**

Sa maua e Aperaamo le talalelei ma sa faauuina o se faitaulaga sili (tagai MFF 84:14; Aperaamo 1:2). Mulimuli ane ona ia ulu atu ai lea i le faaipoipoga e faavavau, o le feagaiga lea o le faaeega (tagai MFF 131:1–4; 132:19, 29). I fesootaiga

ma feagaiga na ia osia, na ia maua folafolaga sili mai le Alii e faatatau i lona aiga. E aofia ai folafolaga i vaega nei:

- O lana fanau o le a faatoateleina (tagai Kenese 17:5–6; Aperaamo 2:9; 3:14).
- O lana fanau, po o suli, o le a talia le talalelei ma maua le perisitua (Tagai Aperaamo 2:9).
- O le talaiga a ana fanau, e “manuia [ai] aiga uma o le lalolagi i faamanuiaga o le Talalelei, o faamanuiaga lava ia o le olataga ma le ola e faavavau” (Aperaamo 2:11).

I le tuufaatasiga, o feagaiga ma folafolaga uma na maua e Aperaamo mai le Alii ua ta’ua o feagaiga FaaAperaamo. O se feagaiga faavavau lea e oo atu i fanau uma a Aperaamo (tagai Kenese 17:7). Ina ia faitauina o se suli o Aperaamo, e tatau i lea tagata ona usiusitai i tulafono ma sauniga o le talalelei. Ona mafai lea ona maua e le tagata o faamanuiaga o le feagaiga FaaAperaamo, e tusa lava pe lē o se suli moni o ia o Aperaamo (tagai Kalatia 3:26–29; 4:1–7; MFF 84:33–40).

O le avea ma se tagata o le Ekalesia a Iesu Keriso o le Au Paia o Aso e Gata Ai, o oe o se atalii/afafine o le feagaiga (tagai 3 Nifae 20:25–26). Ua e maua le talalelei faavavau ma agavaa mo faamanuiaga lava ia e tasi sa tuuina atu ia Aperaamo, Isaako, ma Iakopo. Ua ia te oe le aia tatau i faamanuiaga o le perisitua ma le ola faavavau, e tusa ma lou faamaoni i le mauaina o sauniga o le faaolataga ma le tausaiaina o feagaiga o loo aofia ai. O le a faamanuiaina atunuu o le lalolagi e ala i au taumafaiga ma galuega a au fanau.

*Tagai foi* Feagaiga; Ola Faavavau; Sauniga; Faamanuiaga Faapeteriaka; Perisitua

**Fesoasoani** (*Tagai* Agaga Paia)

**Feusuaiga Le Mama** (*Tagai* Legavia)



## **Fiafia**

I le molimauiina o “faamoemoega e faavavau” o le Atua, na aoao mai ai le perofeta o Liae, “Ua ola tagata ina ia latou maua le olioli” (2 Nifae 2:15, 25).

E finagalo le Tama Faalelagi ina ia tatou maua le fiafia moni tumau. O lo tatou fiafia o le ata o faamanuiaga uma ua Ia tuuina mai ia te i tatou—aoaoga o le talalelei, poloaiga, sauniga o le Perisitua, sootaga faaleaiga, Perofeta, malumalu, matagofie o le foafoaga, ma e oo lava i avanoa e tofotofoina ai e le fili. O Lana fuafuaga mo lo tatou faaolataga ua ta’ua “o le ala sili o le fiafia” (Alema 42:8). Na Ia auina mai Lona Alo Pele e faia le Togiola ina ia mafai ona tatou maua le fiafia i lenei olaga ma maua se atoatoaga o le olioli i le faavavau.

E toatele tagata ua latou taumafai e saili le fiafia ma le faamalieina i gaoioiga e le tusa ai ma poloaiga a le Atua. O le le amanaiaina o le fuafuaga a le Atua mo i latou, ua latou teena ai le punavai o le fiafia moni. Ua latou gauai atu i le tiapolo, o lē “saili ina ia malaia tagata uma e pei o ia lava” (2 Nifae 2:27). E le pine ae latou iloa le moni o le lapataiga a Alema i lona atalii o Korianetona: “O le amioleaga e lē o le fiafia lea” (Alema 41:10).

O isi ua na ona saili lava e maua le fiafia i le olaga. O le aveva o lenei mea ma a latou sini autu, ua latou faatagaina ai faafiafiaga lē tumau e faasalaveia i latou mai le fiafia tumau. Ua latou taofia mai ia i latou lava le olioli tumau o le tuputupu ae faaleagaga, auauna atu, ma le galue malosi.

A o e saili ia e fiafia, ia manatua ua na o le pau lava le ala i le fiafia moni o le ola i le talalelei. O le a e maua le fiafia faavavau filemu a o e taumafai e tausi poloaiga, tatalo mo le malosi, salamo i au agasala, auai i gaoioiga lelei, ma tuuina atu auaunaga aoga. O le a e iloa ai e maua le fiafia i totonu o tuaoi ua uma ona faatulagaina e se Tama alofa i le Lagi.

E mafai ona sosolo lou fiafia. Ao matauina oe e isi, latou te ono mananao e fia iloa le faapogai o lou olioli. E mafai foi

e isi ona lagona le fiafia lea e oo mai e ala i le ola ai i le talalelei a Iesu Keriso.

Mau Faaopoopo: Salamo 35:9; 2 Nifae 5:27; Mosaea 2:41; 3 Nifae 17:18–20; 4 Nifae 1:15–16; MFF 18:10–16

*Tagai foi* Galuega Faafaifeautalai; Ata o le Faaolataga; Auaunaga

## Filemu

E toatele tagata e manatu o le filemu o le leai lea o ni taua. Peitai e mafai lava ona tatou lagonaina le filemu i taimi o taua, ma e mafai foi ona tatou le mauaina le filemu e tusa lava pe leai se taua o faia. O le leai o ni feteenaiga, e lē lava lena e aumaia ai le filemu i o tatou loto. O le filemu e ala mai i le talalelei—e ala mai i le Togiola a Iesu Keriso, o le faamafanafanaga a le Agaga Paia, ma lo tatou lava ola amiotonu, salamo faamaoni, ma galulue ma le filiga.

E tusa lava pe o vevesi i ou autafa le lalolagi, e mafai lava ona e mauaina le faamanuiaga o le filemu i totonu. O lenei faamanuiaga o le a faaauau pea ona ia te oe pe a e tumau ai ma le faamaoni i lau molimau o le talalelei ma pe a e manatuaina foi e alolofa le Tama Faalelagi ma Iesu Keriso ia te oe ma o loo puipua foi oe e i la’ua.

E le gata i lou lagonaina o le filemu, ae e mafai foi ona avea oe ma se aafiaga o le filemu i totonu o lou aiga, lou nuu, ma le lalolagi. E te galue mo le filemu pe a e tausia poloaiga, tuuina atu auaunaga fesoasoani, tausia tagata o lou aiga ma tuaoi, ma fetufaai atu le talalelei. E te galue mo le filemu i soo se taimi lava e te fesoasoani atu ai e aveesea le mafatiaga o se isi tagata.

O upu nei a le Faaola ua aoao mai ai i tatou i le ala tatou te mauaina ai aafiaga o le filemu lea e aumaia e le talalelei:

“A o le Fesoasoani, o le Agaga Paia lea, e auina mai e le Tama i lo’u igoa, o ia lava na te a’oa’o ia te outou i mea uma lava; e faamanatu mai foi o ia ia te outou i mea uma ua ou fai atu ai ia te outou.

## *Fitugafulu*

“Ou te tuuina atu ia te outou le manuia; o lo’u manuia ou te avatu ai ia te outou; ou te le avatu ia te outou faapei ona avatu e le lalolagi. Aua le atuatuvaale o outou loto, aua foi tou te matatau” (Ioane 14:26–27).

“Ou atalii e, aua le fefefe e fai mea lelei, aua o le mea lua te lulu, o le mea lava lea lua te seleseleina; o le mea lea, afai lua te lulu le lelei o le a oulua selesele foi le lelei mo lo oulua tau.

“O le mea lea, aua le matatau, le lafu mamoe itiiti e; ia faia mea lelei; ia tuu i le lalolagi ma seoli e autasia oulua, aua afai ua faavaeina oulua i luga o lau papa, latou te le mafai ona manumalo.

“Faauta, ou te le tausalaina oulua; o ia i o oulua ala ma aua le toe agasala; ia fai ma le faautauta le galuega na ou poloaiina ai oulua.

“Ia faalagolago ia te au i manatunatuga uma; aua le masalosalo, aua le fefe.

“Ia matau lelei i manu’a na tuia ai lo’u itu, ma tulaga fao foi na tutui ai o’u lima ma o’u vae; ia faamaoni, tausii i a’u poloaiga, ma o le a mau tofi oulua i le malo o le lagi” (MFF 6:33–37).

“Ua ou fai atu nei mea ia te outou, ina ia outou maua le manuia ia te au; e maua foi outou e le puapuaga i le lalolagi, a ia outou loto tetele, ua ou manumalo i le lalolagi” (Ioane 16:33).

A e manatua le Faaola ma mulimuli atu ia te Ia, e mafai moni lava ona e lototele. E mafai ona e mauaina aafiaga moni ma tumau o le filemu i taimi uma. E mafai ona e mauaina le faamoemoe i upu muamua a le Faaola i Lona au soo ina ua mavae Lona Toetu mai: “Ia outou manuia” (Ioane 20:19).

Faamatalaga Faaopoopo: MFF 59:23

*Tagai foi i le Alofa Mama; Agaga Paia; Faamoemoe; Iesu Keriso; Alofa; Auaunaga; Taua*

**Fitugafulu** (*Tagai Taitaiga o le Ekalesia*)

## Fitugafulu Pule Eria (Tagai Taitaiga o le Ekalesia)

### Fofoaga

I lalo o le taitaiga a le Tama Faalelagi, na fofoa ai e Iesu Keriso le lagi ma le lalolagi (tagai Mosaea 3:8; Mose 2:1). Mai tusinga paia na faaalai mai ai e ala i le Perofeta o Iosefa Samita, ua tatou iloa ai i le galuega o le Fofoaga, na faatula-gaina e le Alii elemene ua uma ona i ai (tagai Aperaaamo 3:24). Na te le i fofoaina le lalolagi “mai le leai o se mea” e pei ona talitonu ai nisi tagata.

Ua aoa mai foi tusinga paia o Atamu o le “uluai tagata o tagata uma” (Mose 1:34). Na fausia e le Atua Atamu ma Eva i Lona faatusa ma le faatusa o Lona Atalii e Toatasi na Fanau (tagai Mose 2:26–27).

O le fofoaga o se vaega autu o le ata o le faaolataga a le Tama Faalelagi. Ua tuuina mai ai ia i tatou uma taitoatasi le avanoa e o mai ai i le lalolagi, e maua ai o tatou tino faaletino ma faaaogaina ai lo tatou saolotoga. I le Fono a Atua i le muai olaga, sa faia ai le faasilasilaga lenei: “Ina tatou o ifo ia i lalo, aua o loo avanoa lava, ma tatou ave nei mea ma tatou faia ai se lalolagi e nonofo ai i latou nei; ma o le a tatou faaitai ai i latou, ia iloa ai, pe latou te faia mea uma e poloaiina ai i latou e le Alii lo latou Atua” (Aperaaamo 3:24–25).

O oe o se atalii agaga o le Atua, ma o lou tino na fausia i Lona faatusa. Ina ia faaali atu lou agaga faafetai mo nei faamanuiaga, e mafai ona e tausia lou tino e ala i le usiusitai i le Upu o le Poto ma isi poloaiga e faatatau i lou soifua maloloina faaleagaga ma le faaletino (tagai MFF 89; tagai foi MFF 88:124). E mafai foi ona e faaloalo i isi tagata o ni fanau a le Atua.

I le ave ai ma tagata faamanuiaina i matagofie uma o le fofoaga, e mafai ona e tausia lelei le lalolagi ma fesoasoani e puipuia mo tupulaga o le lumanai.

Mau Faaopoopo: Kenese 1–2; Eperu 1:1–2; 1 Nifae 17:36; MFF 38:1–3; 59:16–20; Mose 1–3; Aperaaamo 4–5

*Tagai foi* Le Atua le Tama; Iesu Keriso; Ata o le Faaolataga

**Foai** (*Tagai* Anapogi ma Taulaga Anapogi; Sefuluai)

## **Fono Aoai Faale-Ekalesia**

O Epikopo ma peresitene o paranesi ma siteki, misiona, ma peresitene o itu ua i ai se matafaioi e fesoasoani i tagata e faatoilalo ai soligatulafono e ala i le salamo. O soligatulafono sili ona ogaoga, e pei o le solia o tulafono a le malo, o le faasaunoa i taitoalua, faasaunoa i tamaiti, mulilua, faitaaga, toso teine, ma le mata'ifale po o le toe ui i fanau, e masani ona manaomia ai aoaiga aloa'ia faale-Ekalesia. O aoaiga aloa'ia faale-Ekalesia e aofia ai le taofia o avanoa o se tagata auai o le Ekalesia, po o le tapē o le igoa mai faamaumauga a le Ekalesia.

O le faagasologa o le aoaiga aloa'ia e amata pe a tuvao e se taitai perisitua pulefaamalumu se fonu aoa'i. O faamoe-moega o fonu aoa'i o le laveaiina o agaga o e ua solitulafono, puipuia o ē ua ta'umamaina, malupuipuia o le mama atoatoa, amiotonu, ma le igoa ta'ulelei o le Ekalesia.

O aoa'iga faale-Ekalesia o se faagasologa musuia lea e faataunuaina mo se vaitaimi. O lenei faagasologa ma le Togiola a Iesu Keriso, e mafai ai ona maua e se tagata o le ekalesia le faamagaloga o agasala, toe maua le filemu i le mafau-fau, ma maua le malosi e aloese mai ai i le solitulafono i le humanai. O le faaiuga o le fonu aoa'i e lē o faamoemoe e muta ai le faagasologa. Ua faatulagaina e fesoasoani ai i fanau a le Tama Faalelagi e faaauau pea a latou taumafaiga e toe foi mai ai i le atoatoa ma faamanuiaga uma o le Ekalesia. O taunuuga moomia o le faia lea e le tagata o suiga ia e manaomia e salamo ai ma le atoatoa.

*Tagai foi* Faamagaloga; Salamo

**Fono i le Lagi** (*Tagai* Ata o le Faaolataga)

**Fualaa u oona** (*Tagai* Upu o le Poto)

## **Gagana Masoā**

O le palauvale o le le faaaloalo lea po o le tetee atu lea i mea paia. E aofia ai le ta'ū fua po o le lē migao i le faaaogaina o suafa o se tasi o le Aiga Atua. E aofia ai foi soo se itu-aiga lava o talanoaga po o amioga lē mama ma lē talafeagai.

Ia faaaogaina ma le migao ma le faaaloalo i taimi uma suafa o le Tama Faalelagi, Iesu Keriso, ma le Agaga Paia. O le faaaoga ma le lē tatau o o latou suafa o se agasala lea. O le palauvale, upu masoa, po o gagana ma taga e le tusa ai ma le vafealoai, faapea foi ma tala tausua i mea valea po o mea leaga, e faatiga ai i le finagalo o le Alii faapea foi ma isi.

O upusa e faatamaia ai lou agaga ma tauvlea ai oe. Aua nei faatosinaina oe e isi e te faaaogaina upusa. Ae ia faaaoga gagana mama e siitia ma faaleleia ai isi. Filifili uo e faaaogaina gagana lelei. Faia se faaitaiga e faamalosia ai i latou o loo siomia oe ina ia faaaogaina gagana mama. Pe a faaaogaina e uo ma i latou tou te faatasi ia gagana eleelea, ia fautua-lelei ma le alofa i latou e filifili nisi upu e faaaoga. Afai e faaauau pea ona latou faia, ia e savali ese ma le faaaloalo pe sui foi le mataupu e talanoaina.

Afai ua e amatalia le amio masani o le fai upusa, e mafai ona e taofia. Ia amata i le faia lea o se faaiuga o le a suia. Tatalo mo se fesoasoani. Afai e faaosoosoina oe e faaaoga upu masoa, aua e te tautala, po o le fai atu foi o le mea lena e te fia fai atu ai i se isi faaupuga ese.

Faamatalaga Faaopoopo: Levitiko 19:12; MFF 63:60–64

*Tagai foi* Tauagafau/ Tausaafia; Faaosoosoga

## **Galuega Faafaifeautalai**

Pe a tatou mauaina faamanuiaga o le ola ai i le talalelei, tatou te mananao e fetufaai atu na faamanuiaga mo isi. Na fetalai le Alii e uiga i le olioli e oo mai i o tatou olaga pe a tatou fetufaai atu Lana talalelei:

“Afaí foi e faapea ona oulua galulue i o oulua aso uma i le alagaina o le salamo i lenei nuu, ma aumaia, tau lava o se agaga e toatasi ia te au, faauta i le tele o lo outou olioli faatasi ma ia i le malo o lo’u Tama.

“Ma o lenei, afaí o le a tele lo outou olioli faatasi ma se agaga e toatasi ua oulua aumaia ia te au i le malo o lou Tama, faauta i le sili atu o lo outou olioli pe afaí lua te aumaia ni agaga e toatele ia te au!” (MFF 18:15–16).

### O Le Tiute Faafaifeautalai a Tagata Taitoatasi o le Ekalesia

Na folafola mai e le Alii e faapea o le galuega faafaifeautalai o le tiutetauave o tagata uma o le Au Paia o Aso e Gata Ai (tagai MFF 88:81). I le avea ai ma tagata o le Ekalesia a le Alii, e te mafaia, e ala mai lou ola i se olaga lelei ma le malosi o lau molimau, ona fesoasoani e saunia tagata o lou aiga, uo, ma nisi tou te fegalegaleai faatasi ina ia feiloai atu i faifeautalai.

O le savali faafaifeautalai e aupito sili ona mamana e mafai ona e tuuina atu, o au lava faataitaiga i le ola ai i se olaga fiafia o se Au Paia o Aso e Gata Ai. Ia manatua e lē auai mai tagata i le Ekalesia ona na o mataupu faavae o le talalelei ua latou aoaoina. Latou te auai mai ona latou te lagonaina se mea ua amata ona faamalieina ai o latou manaoga faaleagaga. Afaí e te faamaoni i lau faauooga ma i latou, o le a mafai ona latou lagona le agaga o lau molimau ma lou fiafia.

I le faaopoopo atu i se faataitaiga lelei, e mafai ona e “saunia e tali atu ia i latou uma o e fesili mai ia te outou i le uiga o le faamoemoe o loo ia te outou” (1 Peteru 3:15). E mafai ona e tatalo mo avanoa e talanoa atu ai i isi e uiga i le talalelei toefuataiina. Ma o le a mafai ona e nofo saunia, aua e toatele tagata ua latou manaomia le upumoni.

### Auauna Atu i se Misiona Tala’i

Ina ua mavae Lona Toetu mai, sa poloaiina ai e le Alii Lona au soo e “o . . . ma fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le

Agaga Paia” (Mataio 28:19). I le faataunuuina o lea poloaiga, o alii talavou agavaa uma i le Ekalesia o loo i ai le tiutetauave e saunia ai i latou i la le agaga, o la le tino, ma lagona e au-auna atu o ni faifeautalai faamisiona. O tamaitai nofofua ma ulugalii matutua e mafai foi ona maua le avanoa e galulue auauna ai i se misiona. Afai e te manao e auauna atu o se faifeautalai faamisiona, talanoa i lou epikopo po o lou peresitene o le paranesi.

Auauna atu i Tagata Faatoa Auai i le Ekalesia

O le galuega faafaifeautalai e aofia ai le fesoasoani atu ma lagolagoina i latou o e ua auai i le Ekalesia. A o e manatunatu loloto i lenei matafaioi, ia manatua e ono feagai tagata fou ma tofotofoga i le taimi latou te auai mai ai i le Ekalesia. O a latou tautinoga fou ua manaomia ai e i latou ona tuueseina uiga tuai, o uo ma ē na masani ona latou fegalegaleai. E le gata i lea, ae e faailoa atu foi e le Ekalesia se ituaiga o olaga fou e ono foliga mai e ese ma faigata.

O tagata taitoatasi faatoa auai mai i le Ekalesia, e manao-mia e i latou mea e tolu: o se uo, o se tiutetauave, ma le faa-faileleina pea o i latou i “le afioga lelei a le Atua” (Moronaē 6:4). E mafai ona aveā oe ma se vaega o lenei taumafaiga e tuuina atu lea fesoasoani. E mafai ona aveā pea oe ma se uo. E tusa lava pe e te le o i ai i le tulaga e tuuina atu ai se tofiga aloaia po o ni matafaioi i totonu o le Ekalesia, ae e mafai lava ona e galue i tafatafa o tagata fou i galuega auauna atu. Ma e mafai foi ona e saili i avanoa e fetufaa i atu ai le afioga a le Atua ma tagata faatoa auai mai.

Faamatalaga Faaopoopo: Mareko 16:15; Alema 26:1–16; MFF 4; 60:2; 84:88; 123:12

## **Galuega o Talafaasolopito o Aiga ma Gafa**

I le aso 3 o Aperila, 1836, na asiasi mai ai le perofeta o Elia ia Iosefa Samita ma Oliva Kaotui i totonu o le Malumalu i Katelani. Na ia tuuina atu ia te i laua le mana faamau o le



Perisitua, ina ia mafai ai e aiga ona faamauina mo augatupu-laga uma. I le tuuina atu o lenei mana, ua faataunuuiuina ai le valoaga o le a auina mai e le Alii o ia “e faaliliu loto o matua i fanau ma loto o fanau i o latou matua” (tagai MFF 110:14–16; tagai foi Malaki 4:5–6).

O galuega o talafaasolopito o aiga, e mafai ai ona e auai i le faaauauina o le faataunuuiuina o lenei valoaga. E mafai ona e aoao e uiga i ou tuua ma faateleina lou alofa ia i latou. E mafai ona musuia oe i tala e uiga i lo latou lotototoa ma le faatuatua. E mafai ona e tuufaasolo atu lena measina i au fanau.

O faamanuiaga tumau nei e maua mai galuega o talafaasolopito o aiga, ae e le o mafuaaga autu ia mo taumafaiga e tele a le Ekalesia e faaputuputu mai faamaumauga tau gafa. O taumafaiga uma a talafaasolopito o aiga a le Ekalesia e tau-lai atu i le faia o se “sootaga . . . i le va o tama ma fanau” (MFF 128:18). O lenei sootaga o loo fausia e ala i le mana o le Perisitua, e ala i sauniga paia o le malumalu ua tatou maua e fai ma sui o o tatou augatama.

### Faoolaina o e Maliliu

O le toatele o fanau a le Tama Faalelagi ua maliliu e au-noa ma le mauaina o le avanoa e maua ai le atoatoa o le talalelei. I Lona alofa mutimutivale ma le lē i’u, na saunia ai e le Alii se ala mo i tatou e maua ai se molimau o le talalelei ma maua ai sauniga faaola o le perisitua.

I le lalolagi o agaga, o loo “talai atu ai le talalelei ia i latou o e na oti i le solitulafono, e aunoa ma se malamalama i le upu moni, pe ona o agasala, na latou teena ai perofeta. Sa aoaoina i latou ia i le faatuatua i le Atua, o le salamo mai agasala, o le faia o papatisoga sui mo e ua oti mo le faamagaloina o agasala, o le mea foai fua o le Agaga Paia i le faaee atu o lima, faapea ma isi mataupu faavae uma o le talalelei sa tatau ona latou iloa ina ia agavaa ai i latou ma faamasinoina ai le tino i la tagata, ae ola ai i le agaga i la le Atua” (MFF 138:32–34).

O le toatele i le lalolagi o agaga ua talia le talalelei. Ae peitai, e le mafai ona latou maua sauniga o le Perisitua mo i latou lava aua e leai ni o latou tino faitino. I totonu o malumu paia, ua tatou maua ai le faamanuiaga o le taliaina lea o sauniga e fai ma sui mo i latou. O nei sauniga e aofia ai le papatisoga, faamauga, faauuina i le Perisitua Mekisateko (mo alii), o faaeega paia, o le faamauiina o faaipoipoga, ma le faamauiina o fanau i matua. Na faaalua e le Alii lenei galuega i le Perofeta o Iosefa Samita, i le toefuataiina o se faiga sa faaali atu i le au Kerisiano i sina taimi puupuu talu ona mavae le Toetu o Iesu Keriso (tagai 1 Korinito 15:29).

A o e mauaina sauniga o le Perisitua e fai ma sui o e ua maliliu, ua avea oe ma faaola i luga o le Mauga o Siona mo i latou (tagai Opetai 1:21). O au taumafaiga ua faapei lava o le agaga o le taulaga togioala a le Faaola—ua e faataunuuna se galuega mo isi ia e lē mafai ona latou faia mo i latou lava.

### O Ou Tiutetauave i Galuega o Talafaasolopito o Aiga

I galuega o talafaasolopito o aiga, e tolu ou tiutetauave autu:

1. Ia e mauaina sauniga o le malumu mo oe lava ma fesoasoani i tagata o lou aiga patino ia latou maua foi ia sauniga.
2. Ia e umia se pepa faataga aoga o le malumu ma alu soo i le malumu e tusa ma avanoa uma e maua.
3. Ia faaputupu faamatalaga o talafaasolopito o aiga ina ia mafai ona maua e ou augatuaa faamanuiaga o le malumu.

E mafai ona e auai i le malumu ma le faatinoina o galuega o talafaasolopito o aiga, i se vaega, e le afaina po o fea e te nofo ai ae po o le a foi lou tulaga. Atonu e le mafai ona e faia mea uma, ae e mafai ona e faia se vaega. E mafai ona fesoasoani manatu nei ia te oe e amata ai:

- Tusi faamaumau faamatalaga taua e uiga i lou lava olaga. Faamau lou aso fanau ma le nofoaga na e fanau ai ma le aso na papatiso ma faamauina ai oe. Tausia se talaaga o lou olaga e faamaumau ai mea taua o lou olaga, e aofia ai pototo masani patino e mafai ona faamalolosia ai lau fanau ma isi tupulaga i le lumanai.
- Aoao e uiga i ou augatama. Ia amata i le tusitusia o faamatalaga o loo e manatua ma mai risosi e mafai ona e faitau ai i le aiga. Ia tusitusia faamatalaga taua e te manatua lelei pe mafai foi ona e maua e uiga i fanau, matua, tuagane o tina po o uso o tama, tuafafine o tama po o uso o tina, matua o matua, ma matua o matua o matua. Afai e mafai, ia fai ni kopi o aso fanau po o isi faamaumauga e maua mai ai nei faamatalaga. A’o e aoina faamatalaga e tele, atonu e mafai ona e sailia isi nofoaga e pei o faamaumauga faalemalo. I uarota ma paranesi e i ai se sui faufautua o talafaasolopito o aiga e mafai ona fesoasoani ia te oe. Atonu e te mana’o foi e asia le tuatusi faavaomalo i le Initoneti o talafaasolopito o aiga, [www.familysearch.org](http://www.familysearch.org).
- A’o e mauaina ou augatuaa, faaaoga pepa o faasologa o gafa ma pepa o faamatalaga o aiga e faamaumau ai faamatalaga ua e maua. O loo maua ni kopi o nei pepa o faamatalaga ma o loo i ai foi i polokalama faakomepiuta a le Ekalesia, e pei o le Personal Ancestral File.

Pe a e aoina faamatalaga talafeagai e uiga i ou augatuaa o ē ua maliliu ae latou te le’i taliaina le Talalelei, ia mautinoa ua faia galuega faalemalumalu sa mo i latou. E tusa lava pe e te le nofo latalata i se malumalu e mafai ai e oe ma tagata o lou aiga ona faia sauniga, e mafai ona e tuuina atu igoa o ou augatuaa i se malumalu ina ia mafai ai e isi ona faia ia galuega mo i latou. E mafai ona e asiasi i se ofisa o talafaasolopito o aiga pe fesootai i se faatonu o mataupu tau talafaasolopito o aiga o le uarota po o le paranesi e iloa ai le mea e tataua ona fai.

Na faaali mai e le Perofeta o Iosefa Samita o “mataupu faavae e uiga i e ua oti ma e o ola e le mafai lava ona ta’u faatauvaaina, e tusa ma lo latou faaolataga. Aua o lo latou faaolataga e tatau ma aoga i lo tatou faaolataga, e pei. . . a aunoa ma i tatou e le mafai ona faaatoatoaina lelei i latou—e faapea foi i tatou pe a aunoa ma o tatou tagata oti, e le faaatoatoaina” (MFF 128:15). O lou auai e faatino galuega o talafaasolopito o aiga, e mafai ai e oe ma ou augatuaa ona agai atu i luma i le faaolataga.

*Tagai foi Malumalu*

## **Iesu Keriso**

O Ianuari 1, 2000, na tuuina mai ai e le Au Peresitene Sili ma le Korama a Aposetolo e Toasefululua le tautinoga lenei. Ua faaulutalaina “O Le Keriso Soifua,” o lenei tautinoga ua tuuina mai ai le molimau e uiga i le Alii o Iesu Keriso ma aoteleina ai Lona faasinomaga ma le misiona paia:

“A o tatou faamanatuina le soifua mai o Iesu Keriso i le lua afe tausaga talu ai, matou te tuuina atu la matou molimau i le moni o Lona soifua lē mafaatusalia ma le aoga e lē gata mai o Lana taulaga togiola sili. E leai lava se isi ua i ai se aafiaga matua loloto na’uā o i latou uma na soifua ma o le a soifua ai i luga o le fogaeleele.

“O Ia o le Ieova Silisili o le Feagaiga Tuai, o le Mesia o le Feagaiga Fou. O Ia o lē na foafoaina le lalolagi, i lalo o le taitaiga a Lona Tama. “Na ia faia mea uma lava; e leai foi se mea e tasi na faia e le i faia e ia” (Ioane 1:3). E ui ina leai se agasala, ae na papatisoina o Ia ina ia faataunuu ai le amiotonu uma. Sa “femaliuai o ia ma agalelei” (Galuega 10:38), ae na le amanaiaina o ia. O Lana talalelei o se savali o le filemu ma agalelei. Na ia augani mai i tagata uma ina ia mulimuli atu i Lana faataitaiga. Na ia femaliuai i auala o Palesitina, e faamalolo i e mamai, faapupula i e tauaso, ma faatutu mai e na oti. Na ia aoao atu upumoni o le faavavau, o le tulaga moni sa tatou i ai i le muai olaga, o le faamoemoega o lo tatou ola

ai i le fogaeleele, ma le tulaga e mafai ona ausia e atalii ma afafine o le Atua i le olaga a sau.

“Na Ia faatuina le faamanatuga e avea ma faamanatu o Lana taulaga togiola sili. Na pue faapagotaina o Ia ma faasalaina i ni tuua’iga sese, na ta’usalaina ina ia faamalie ai le motu o tagata, ma faasalaina i le oti i luga o le satauro i Kalevario. Na Ia tuuina atu Lona soifua e togiola ai agasala a tagata uma. O Lana [taulaga] o se meaalofo sili foaifua mo i latou uma e soifua mai i luga o le fogaeleele.

“Matou te ta’utino atu i upu ma le faamaoni a’ia’i, o Lona soifua, lea e totonugalemu i le talafaasolopito o tagata uma, e le’i amataina mai i Peteleema pe faaiuina foi i luga o Kalevario. O Ia o le Ulumatua a le Tama, o le Alo Pele e Toatasi i la le tino, o le Faaola ia o le lalolagi.

“Na toe tu mai o Ia mai le tuugamau e “avea ma faapolopolo o e ua momoe” (1 Korinito 15:20). I Lona tulaga o se Alii Toetu, na Ia asiasi atu ai ia i latou na alofagia e ia i le olaga nei. Na ia asiasi atu foi i isi o Ana “mamoe” (Ioane 10:16) i Amerika anamua. I le lalolagi i nei ona po, na faali atu ai o Ia ma Lona Tama i le taulealea o Iosefa Samita, i le amataga o le oo mai o le “sauniga i le faaatoaga o tausaga” (Efeso 1:10).

“Na tusia e le Perofeta o Iosefa e faatatau i le Keriso Soifua, “O ona fofoga e pei o le afi mumu; o lauao o lona ao e sinasina e pei o le kiona mama; a e sili le pupula o ona fofoga i lo le pupula o le la; ma o lona siufofoga e pei o le taalili o vai tetele, o le siufofoga lava o Ieova, ua faapea mai:

“ ‘O a’u lē muamua ma lē mulimuli; o a’u o lē o loo ola, o a’u o lē na fasiotia; o a’u o lo outou fautua i le Tama’ (MFF 110:3–4).

“Na folafola mai foi e le Perofeta e uiga ia te Ia; “O lenei, ina ua uma ona faia molimau e tele e uiga ia te ia, o le moli-mau tupito mulimuli lenei i mau uma lava, mā te faia ia te ia: O loo soifua o ia!

“ ‘Aua na ma vaaia o ia, i le itu taumatau lava o le Atua; na ma faalogoina foi le siufofoga o molimau mai o ia lava lea o le Toatasi na Fanaua e le Tama —

“ ‘E mai ia te ia, ma ui mai ia te ia, ma o ia, na foafoaina ai lalolagi uma, o e nonofo ai foi o atalii ma afafine na fanaua e le Atua.” (MFF 76:22–24).

“Matou te folafola atu i upu ma le faamaoni a’ia’i, ua toe-fuataiina mai i le fogaeleele Lana perisitua ma Lana Ekalesia —’ua atinae i luga o le faavae o au aposetolo, atoa ma le au perofeta, o le maa tulimanu o Iesu Keriso lava lea’ (Efeso 2:20).

“Matou te tautino atu o le a i ai se aso e toe afio mai ai o Ia i le lalolagi. “Ona faaalua mai ai lea o le pupula o Ieova, e vaaia lava e tagata uma faatasi” (Isaia 40:5). O le a pule o Ia o le Tupu o Tupu ma nofotupu foi o le Alii o Alii, ma o le a tootutuli tulivae uma ma tapuai laulaufaiva uma ia te Ia. O le a tatou tutu atu taitoatasi ina ia faamasinoina e Ia e tusa ma a tatou galuega ma manaoga o o tatou loto.

“Matou te molimau atu, i le avea ai ma Ana Aposetolo ua faauuina i le ala e tatau ai—o Iesu o le Keriso Soifua, o le alo tino ola pea o le Atua. O Ia o le Tupu silisili o Emanuelu, o loo afio i le taimi nei i le itu taumatau o Lona Tama. O Ia o le malamalama, o le ola , ma le faamoemoega o le lalolagi. Ia faafetaia le Atua mo le meaalofo lē mafaatusalia o Lona Alo paia lea” (*Liahona*, Ape. 2000, 2–3).

*Tagai foi* Togiola a Iesu Keriso

## Iosefa Samita

I le tautotogo o le 1820, sa suesue ai Iosefa Samita e 14-tausaga le matua mo le Ekalesia moni a Iesu Keriso ina ua i faitau i se mau i totonu o le Tusi Paia: “A e afai ua leai se poto i so outou, ina ole atu ia i le Atua, o lē foai tele mai i tagata uma ma le lē toe ta’uta’ua; ona foaiina mai ai lea ia te ia” (Iakopo 1:5; tagai foi Iosefa Samita—Talafaasolopito 2:11–12). I se faatuatua lē maluelue ma le faigofie, na mulimuli ai Iosefa talavou i le fautuaga a le mau. Na ia alu atu na o ia i le

togalaau, lea na ia tatalo atu ai ina ia iloa po o fea le Ekalesia e ao ona auai. O le tali mai i lana tatalo, na faaali mai ai le Atua le Tama ma Iesu Keriso ia te ia. O se tasi nei o mea, sa faatonuina ai e i La’ua o ia, e aua nei auai i se tasi o Ekalesia na i ai i lena taimi. (Tagai Iosefa Samita—Talafaasolopito 2:13–20.)

Ina ua faamaonia le agavaa o Iosefa Samita, sa tuuina atu loa ia te ia lana misiona paia o se perofeta a le Atua. Na ala mai ia te ia ona faataunuuna e le Alii se galuega sili ma le ofoofogia e aofia ai le aumaia o le Tusi a Mamona, toefuataiina mai o le perisitua, faaalua mai o upumoni taua o le talalelei, faatulagaina o le Ekalesia moni a Iesu Keriso, ma le faatulagaina o galuega faalemalumalu. I le aso 27 o Iuni, 1844, na fasiotia ai Iosefa ma lona uso o Ailama i se osofaiga a ni tagata faaaupegaina. Sa faamaufaailogaina ai a la’ua molimau i o la’ua toto.

Ina ia atoatoa lau molimau o le talalelei Toefuataiina, e tatau ona aofia ai se molimau i le misiona paia a Iosefa Samita. O le moni o le Ekalesia a Iesu Keriso o le Au Paia o Aso e Gata Ai e faalagolago lea i le moni o le Uluai Faaaliga ma isi faaaliga na tuuina atu e le Alii i le perofeta o Iosefa. Sa tusia e Peresitene Ioane Teila, le Peresitene lona tolu o le Ekalesia, “O Iosefa Samita, le perofeta ma le Tagata Vaai a le Alii, e sili atu ana mea ua faia, vagana o Iesu lava, mo le faaolataga o tagata i lenei lalolagi, i lo soo se isi lava tagata ola na ola ai” (MFF 135:3).

Faamatalaga Faaopoopo: Isaia 29:13–14; 2 Nifae 3:3–15; MFF 5:9–10; 135; Iosefa Samita—Talafaasolopito

*Tagai foi* Perofeta; Toefuataiina o le Talalelei

**Ki o le Perisitua** (*Tagai Perisitua*)

**Kofe** (*Tagai Upu o le Poto*)

**Korama** (*Tagai Perisitua*)

**Korama a le Au Fitugafulu** (*Tagai* Taitaiga o le Ekalesia)

**Korama a le Toasefululua** (*Tagai* Taitaiga o le Ekalesia)

## **Lagi**

I totonu o tusitusiga paia, o le upu *lagi* o loo faaaogaina i ni ala se lua. Muamua, o loo faasino i le nofoaga e afio ai le Atua, o le aiga tupito lava lea o ē faamaoni (tagai Mosaea 2:41). Lona Lua, e faasino i le vanimonimo o loo siomia ai le lalolagi (tagai Kenese 1:1).

Mau Faaopoopo: Salamo 11:4; Mataio 6:9; 1 Nifae 1:8; Mosaea 3:8; MFF 20:17

*Tagai foi* Malo o Mamalu

**Lauti** (*Tagai* Upu o le Poto)

## **Le Atua le Tama**

O le Atua le Tama o Le Silisili Ese o Ia ua tatou talitonu i ai ma tatou tapuai i ai. O Ia o le Foafoa Sili, o le Taitaiau, ma le Faaola o mea uma. O Ia e atoatoa, e i ai le mana uma, ma silafia mea uma. E ia te Ia “le tino o aano ma ivi e pei lava o le tagata” (MFF 130:22).

O lo tatou Tama Faalelagi o se Atua o le faamasinoga ma le malosi ma le potu ma le mana, ae o Ia foi o se Atua o le alofa mutimutivale atoatoa, agalelei, ma le alofa. E ui lava ina tatou “le iloa le uiga o mea uma,” e mafai ona tatou maua le filemu i le iloa moni e alofa o Ia ia i tatou (tagai 1 Nifae 11:17).

## **O Le Tama o o Tatou Agaga**

O se tasi o fesili taua o le olaga o le “O ai Au?” O se pese matagofie a le Peraimeri e fesoasoani e oo lava i tamaiti e tali lenei fesili. Tatou te pepese, “O au o se atalii o le Atua, ua na auina mai au nei.” O le iloa o i tatou o fanau a le Atua e au-maia le malosi, faamafanafanaga, ma le faamoemoe.



## *Le Atua le Tama*

O oe o se atalii/afafine moni o le Atua, na fanauina faaleagaga i le muai olaga. I le avea ai ma Ona atalii/afafine, e mafai ona faamautinoaina o loo ia te oe ni mana paia faavavau ma o le a Ia fesoasoani ia te oe i au taumafaiga faamaoni e ausia na mana.

### O Le Fofofa Silisiliese

O le Tama Faalelagi o le Fofofa Silisiliese. E ala ia Iesu Keriso, na Ia fofofaina ai le lagi ma le lalolagi ma mea uma o i ai (tagai Mose 2:1). Na faapea mai Alema, “Ua faailoaina mai i mea uma e i ai le Atua; ioe, o le lalolagi, ma mea uma i luga o le fogaeleele, ioe, ma lona faataamilomilo, atoa ma fetu o loo taamilo i o latou ala, ua molimau e i ai le Fofofa Silisiliese na faia mea uma” (Alema 30:44).

Mai lea taimi i lea taimi, manatunatu loloto i le matagofie o le fofoaga: laau, fugalaau, manu, mauga, galu o le sami, o se tamaititi faatoa fanau mai. Ia faaavano se taimi e mata’i ai le lagi, lea e i ai taamilosaga a fetu ma paneta o ni faamaoniga ia “o le Atua o loo galue i lona mamalu sili ma le mana” (tagai MFF 88:41–47).

### O Le Mataisau o le Ata o le Faolataga

E finagalo lo Tatou Tama i le Lagi ia i tatou e mau faatasi ma Ia e faavavau. O Lana galuega ma le mamalu “ia faatau-nuina le faaofuina o le tagata i le tino ola pea ma le ola faavavau” (Mose 1:39). Ina ia faatau-nuina lenei mea, na Ia saunia ai le ata o le faolataga. Na Ia auina mai Lona Alo Pele, o Iesu Keriso, e tatalaina fusi o le oti ma faaola mo agasala a le lalolagi: “Aua ua faapea lava ona alofa mai o le Atua i le lalolagi, ua ia au mai ai lona Atalii e toatasi, ina ia le fano se tasi e faatuatua ia te ia, a ia maua e ia le ola e faavavau” (Ioane 3:16). O lenei osigataulaga o se faaaliga silisili lea o le alofa o lo tatou Tama mo i tatou.

## O Le Iloaina o le Atua le Tama

I le avea ai ma fanau a le Atua, ua i ai so tatou sootaga faapitoa ma Ia, ua tulaga ese ai i tatou mai isi Ana foafoaga uma. Ia saili ia iloa lou Tama i le Lagi. E alofa o Ia ia te oe, ma ua Ia tuuina atu le avanoa taua e faalatalata atu ai ia te Ia pe a e tatalo. O au tatalo, ao ofoina atu i le faamaualalo ma le faamaoni, e faafogogaina ma tali mai i ai.

E mafai foi ona e iloa lou Tama e ala i lou aoao e uiga i Lona Atalii Pele ma faatatau le talalelei i lou olaga. Na aooina e le Faola Ona soo: “Ana iloa e outou o au, po ua iloa foi e outou lo’u Tama. . . . O le ua vaai mai ia te au, ua vaai o ia i le Tama” (Ioane 14:7, 9).

E te faalatalata atu i le Atua le Tama ao e suesue i tusitusiga paia ma saunoaga a perofeta o aso e gata ai, ma a o e faia le faiva o le tautua. Pe a e mulimuli i le finagalo o le Atua ma ola e tusa ma le ala ua Ia finagalo e te ola ai, o le a avea oe e faapei o Ia ma Lona Alo. Ua e saunia oe lava e toe foi atu e mau faatasi ma Ia i lo Laua afioaga.

Mau Faaopoopo: Ioane 14:6, 21–24; 17:3; Mosaea 4:9; MFF 132:22–24; Mataupu Faavae o le Faatuatua 1:1

*Tagai foi Foafoaga; Aiga Atua; Ata o le Faaolataga*

## Legavia

O le legavia o le mama mai feusuaiga, o se tulaga e “fiafia mai ai le Atua” (Iakopo 2:7). Ina ia ola mama, e ao ona e mama i ou mafaufauga, upu, ma gaoioiga. E le tatau ona e faia ni sootaga tau feusuaiga ae e te le i faaipoipo faaletulafono. Pe a uma ona e faaipoipo, e tatau ona e faamaoni atoatoa i lau tane po o lau ava.

O feusuaiga faaletino i le va o le tane ma le ava e matagofie ma paia. Ua faauuina e le Atua mo le foafoaina o fanau ma le faaalua o le alofa i totonu o le faaipoipoga.

I le lalolagi i aso nei, ua taitaiina e Satani le toatele o tagata e talitonu o faiga faalefeusuaiga i fafo o le faaipoipoga,

e talia. Ae peitai i fofoga o le Atua, o se agasala matautia. O se faatautala lena i le mana sa Ia aumaia ia te i tatou e foafoa ai ola. Sa aoao mai le perofeta o Alema o le agasala tau feusuaiga e sili atu ona matautia nai lo isi lava agasala vagana ai le fasioti tagata ma le faafitia o le Agaga Paia (tagai Alema 39:3–5).

O nisi tagata e taumafai e faatalitonuina i latou lava o feusuaiga i fafo atu o le faaipoipoga e talia pe afai o i la'ua o loo faia, ua alofa le tasi i le isi. E lē moni lea mea. O le solia o le tulafono o le legavia, ma uunaia o se tasi tagata e faia, e lē o se faaaliga lea o le alofa. O tagata e alofa le tasi i le isi, e lē mafai lava ona faalamatiaina e le tasi le fiafia ma le saogalemu o le isi e faataunuu ai ni tuinanauga e lē tumau faaletagata.

Pe a taufai manatu tagata uma i le tausia o le tulafono o le legavia, o le a faateleina lo latou alolofa, faatuatuaina, ma tautinoga, ma maua ai le fiafia e sili atu ma le lotogatasi. Pe a faatusatusa le eseesea, o sootaga e fausia i luga o feusuaiga lē mama e vave ona motusia. O i latou e auai i ni feusuaiga lē mama e masani ona lagona le fefe, ta'usalaina ma le mata-muli. O le oona matuitui, fuā, ma le ita e masani lava ona suia lagona lelei sa i ai i a latou fegalegaleaiga.

Ua tuuina mai e lo Tatou Tama Faalelagi ia i tatou le tulafono o le legavia mo lo tatou puipuiga. O le usiuitai i lenei tulafono e taua tele mo le filemu patino ma le malosi o uiga, atoa ai ma le fiafia i totonu o le aiga. A e tausisia lou lava mama atoatoa mai feusuaiga, o le a e aloese mai le faaleagaina i la le agaga ma lagona, lea e masani ona tupu mai le faia o faigā aiga ma se tasi ae le i faaipoipo. O le a e nofouta i taitaiga, malosi, faamafanafanaga, ma puipuiga a le Agaga Paia, ma o le a e faataunuuna se tulaga manaomia taua mo le mauaina o se pepa faataga o le malumalu ma auai i sauniga o le malumalu.

### Agasala Faalefeusuaiga

E tausialaina e le Alii ma Ana Perofeta feusuaiga e lē mama. O faiga faalefeusuaiga uma i fafo o le faaipoipoga ua

solia ai le tulafono o le legavia ma e matautia i le faaletino ma le faaleagaga mo i latou o ē faia.

O Tulafono e Sefulu e aofia ai le tulafono e aua le mulilua, o le feusuaiga lea i le va o se tamaloa ua faaipoipo ma se tasi e ese mai lana ava po o le va o le fafine ua faaipoipo ma se tasi e ese mai lana tane (tagai Esoto 20:14). Na faapea mai le Aposetolo o Paulo “o le finagalo o le Atua” ina ia tatou “faamamao mai le faitaaga,” po o le feusuai o le tagata e lei faaipoipo ma soo se isi lava (1 Tesalonia 4:3). O loo tumau pea ona saunoa tetee atu Perofeta o aso e gata ai i nei agasala ma tetee atu i faiga faatiapolo o feusuaiga faatautala.

E faapei o isi soliga o le tulafono o le legavia, o faiga faatautane po o le faatauāfafine, o se agasala mamafa. E faafeagai ma faamoemoega o feusuaiga a tagata (tagai Roma 1:24–32). E na te faaleagaina sootaga lelei ma taofia ai tagata mai le mauaina o faamanuiaga ia e mafai ona maua i le olaga faaleaiga ma sauniga faaola o le talalelei.

O le na o le aloese mai feusuaiga i fafo atu o le faaipoipoga e lē lava mo le tulaga faatonuina a le Alii mo le mama atoatoa o le tagata. E manaomia e le Alii se tulaga maualuga o le mama mai Ona soo, e aofia ai le faamaoni atoatoa i lou toalua i mafaufauga ma amioga. I le Lauga i luga o le Mauga, na Ia fetalai ai: “Ua outou faalogo na fai mai e anamua, Aua e te mulilua, A ou te fai atu au ia te outou, ai se vaai atu i le fafine ina ia manao i ai, ua uma ona mulilua ma ia i lona loto” (Mataio 5:27–28). I aso e gata ai na Ia fetalai mai, “Aua e te. . . mulilua, . . . pe faia soo se mea faapena” (MFF 59:6). Ma sa Ia toe faamamafaina le mataupu faavae na Ia aoaoina i le Lauga i luga o le Mauga: “Ai se vaai i se fafine ina ia manao i ai, po o le, afai e mulilua nisi i o latou loto, o le a lē ia te i latou le Agaga, a o le a faafitia le faatuatua ma matatau” (MFF 63:16). O le lapataiga e mo tagata uma, pe ua faaipoipo pe o nofofua foi.

Afai ua e agasala i le faia o feusuaiga, ia talanoa i lou epikopo po o le peresitene o le paranesi ina ia mafai ona ia fesoa-

soani ia te oe i le faagasologa o le salamo (tagai “Salamo,” itulau 146–150).

Afai o loo e tauivi ma faaosoosoga tau le feusuaiga, e aofia ai le i ai o lagona e tosina atu ai i lou lava itupa, ia aua lava nei e gauai atu i na faaosoosoga. Ia e mautinoa e mafai ona e filifili e aloese mai amioga faapea. E mafai ona e maua le fesoasoaniga a le Alii pe a e tatalo atu mo le malosi ma galuega e faatoilalo ai faafitauli. O se vaega o lenei faiga, ia e fesili atu mo fautuaga mai lou epikopo po o le peresitene o le paranesi. O le a fesoasoani o Ia ia te oe.

### Tausia o le Tulafono o le Legavia

E tusa lava pe o le a le malolosi o faaosoosoga, ae o le a fesoasoani le Alii ia te oe e teena pe afai e te filifili e mulimuli atu ia te Ia. Na tautino mai e le Aposetolo o Paulo, “Ua le maua e outou se tofotofoga e ese i lo tagata; a ua faamaoni le Atua, o lē na te le tuuina atu outou i le tofotofoga e sili i se mea ua outou lavatia, a e sauni foi faatasi ma le tofotofoga se mea e sao ai, ina ia outou lava oono” (1 Korinito 10:13). E mafai ona fesoasoani lenei fautuaga ia te oe e faatoilalo ai faaosoosoga faifai pea i le lalolagi ma le lē ma i aso nei:

*Filifili nei e ola mama.* E manaomia le na o le tasi ona e faia o lenei faaiuga. Ia faia nei loa lenei faaiuga, ae lei oo mai le tofotofoga, ma ia faamautuina lau faaiuga faatasi ai ma se tautinoga loloto ia le toe mafai ona maluelue. Ia fai nei loa lau tonu e te lē faia lava se mea i fafo atu o le faaipopoga e faa-osophia ai lagona malolosi ia e na o totonu lava o le faaipopoga e faaali ai. Ia aua nei e faaosophiaina na lagona i le tino o se tasi tagata po o lou lava tino. Fai nei lau tonu o le a e faamaoni atoatoa i lou toalua.

*Pulea ou mafaufauga.* E leai se tasi na te faia le agasala tau-feusuaiga i se taimi faafuasei. O gaoioiga lē mama e masani lava ona amata i mafaufauga lē mama. Afai e te faatagaina ou mafaufauga e manatu ai i mea leaga ma le lē mama, o lona uiga o lena ua e laa i le sitepu muamua e agai atu ai i le ola le mama. Sola ese faavave mai tulaga e taitaiina atu ai i le aga-

sala. Tatalo e le aunoa mo le malosi e tete e ai faaosoosoga ma pulea ai ou mafaufauga. Ia avea lenei mea ma vaega o lau tatalo i aso taitasi.

*Aloese mai tusi ma ata mataga.* Aua nei matamata, faitau, pe faalogologo i soo se mea e faatupu ai pe faamatalaina ai le tino o le tagata po o se faiga faalefeusuaiga i se auala e faatupuina ai lagona. O ata ma tusi leaga e faigata ona toe alu ese ma e faataumaioia ai. E mafai ona ia faoina mai ia te oe le loto pulea ma le malosiaga e te iloa ai le matagofie o le olaga. E mafai ona tosoina ai oe i lalo ma taitaiina atu ai oe i mafaufauga faatiapolo ma amioga faasaua ma le faatautala.

*Afai e le i faia sou aiga ma o loo e tafao faamasani [ma se uo], ia e faaaloalo i lē lua te tafafao faamasani.* Aua lava nei e faaalogaina o ia o se mea e faamalie ai ou tuinanau. Ia fuafua ma le faaeteete gaioioiga lelei ma le malie ina ia le mafai ona tuua na o oulua ma lau uo e aunoa ma se mea e faia. Ia tafafao i nofoaga e malu puipuia e faigofie ona e pulea ai oe lava. Aua nei auai i ni talanoaga po o ni gaioioiga e faatupuina ai lagona feusuai. Aua nei faia ni kisikisiga, taotootoga faatasi pe taotooto foi i luga o le tasi tagata, pe tago i itutino sa o le tasi, pe o fai ni lavalava pe leai foi. Aua lava nei faatagaina se tasi e faia na mea ia te oe.

*Afai ua e faaiipoipo, ia faamaoni i lou toalua i ou mafaufauga, upu, ma taga.* Na fetalai mai le Alii: “Ia e alofa atu i lau ava ma lou loto atoa, ma pipii atu ia te ia a e le o se isi. O le vaai atu foi i se fafine ina ia manao i ai o le a faafitia le faatuatua, ma o le a le maua le Agaga, ma afai na te le salamo o le a lafoaiina o ia i fafo” (MFF 42:22–23). Aua lava nei fai amio i soo se auala. I le mea sili e te mafaia, ia e taumamao mai le i ai na o oulua ma se tasi o le isi itupa. Ia e fesili ifo ia te oe lava, pe mata e fiafia lou toalua pe afai na te iloa au upu ma au taga. Ia manatua le fautuaga a le Aposetolo o Paulo ia “mamao outou ma mea leaga eseese uma lava” (1 Tesalonia 5:22). Afai e te aloese mai ia tulaga, o le a leai se avanoa mo se tofotofo e amata ai.

## Faamagaloga mo le Tagata Salamo

O le ala sili lava o le mama atoatoa o le amio. O se mea sese le faia o agasala feusuai ma le mafaufau e na o ona e salamo mai ai lava i se taimi mulimuli. O lena ituaiga uiga, o se agasala lava lea, e faailoa ai le le migao i le Alii ma feagai-na e osia ma Ia. Ae ui o lea, afai e te faia agasala feusuai, ua ofo mai e le Alii le faamagaloga pe afai e te salamo.

E faigata le salamo, ae e mafai. E mafai ona e toe mama (tagai Isaia 1:18). O le atuatuvaale ona o le agasala, e mafai ona suia i le filemu lelei o le faamagaloga. Ina ia e iloa le mea e tatau ona faia e salamo ai, tagai “Salamo,” itulau 146–150.

Ia e galue agai atu i le aso e te agavaa ai e ulu atu i le malumalu, ia taialaina i upu a le Faisalamo:

“O ai ea se alu ae i le mauga o Ieova? O ai se tumau i lona afioaga paia?”

“O le ua i ai lima mama ma le loto mama” (Salamo 24:3–4).

Mau faaopoopo: Esoto 20:14; 1 Korinito 6:18–20; Alema 38:12; 3 Nifae 12:27–30

*Tagai foi* Faaipoipoga; Tusi ma Ata Mataga

## Liliuese

Pe a fulitua ni tagata po o se vaega o tagata mai mataupu faavae o le talalelei, ua latou i ai i se tulaga o le liliuese.

O vaitau o le liliuese lautele na tutupu i le gasologa o le talafaasolopito o le lalolagi. A mavae taimi o le amiotonu, e masani ona liliu atu tagata i le amioleaga. O se tasi o faataitaga o le Liliuese Tele, lea na tupu ina ua mavae ona faatutaina e le Faaola Lana Ekalesia. Ina ua mavae le maliu o le Faaola ma Lona Au Aposetolo, sa faasese e tagata ia mataupu faavae o le talalelei ma faia ni fesuaiga e aunoa ma le faataigaina i le faatulagaga o le Ekalesia ma sauniga o le perisitua. Talu ai ona ua salalau lenei amioleaga, o lea na aveesea ai e le Alii le pule o le perisitua mai le lalolagi.

I le taimi o le Liliuese Tele, sa leai ni taitaiga faalelagi mai perofeta soifua mo tagata. E tele ekalesia na faatutuina, ae sa lē ia i latou le mana o le perisitua e taitai ai tagata i le malamalama moni o le Atua le Tama ma Iesu Keriso. Sa i ai vaega o tusitusiga paia na faaseseina pe leiloloa, ma sa leai se tasi na i ai le pule e faaee ai le meaalofo o le Agaga Paia pe faatino ai isi sauniga o le perisitua. Sa i ai pea lenei liliuese seia oo ina faaali le Tama Faalelagi ma Lona Alo Pele ia Iosefa Samita i le 1820 ma amataina ai le toefuataiga mai o le atoatoaga o le talalelei.

Ua tatou ola nei i se taimi ua toefuatai mai ai le talalelei a Iesu Keriso. Ae peitai e le faapei o le Ekalesia i taimi ua tuana'i, O Le Ekalesia a Iesu Keriso o le Au Paia o Aso e Gata Ai o le a le toe faatoilaloina i se liliuese lautele. Ua aoao mai tusitusiga paia o le a le mafai lava ona toe faatoilaloina le Ekalesia (tagai MFF 138:44; tagai foi Tanielu 2:44).

E ui lava o le a leai se isi liliuese āoāo mai le upu moni, ae e tatau lava ia i tatou taitoatasi ona puipuia mai i le liliuese faaletagata. E mafai ona e puipuia oe mai le liliuese faaletagata e ala i le tausia o au feagaiga, usiusitai i poloaiga, mulimuli i taitai o le Ekalesia, taumafa i le faamanatuga, ma faaaauu pea ona faamalositia lau molimau e ala i le susesueina o tusitusiga paia i aso taitasi, tatalo, ma auauna atu.

Mau faaopoopo: Isaia 24:5; Amosa 8:11–12; Mataio 24:4–14; Galuega 20:28–30; 2 Timoteo 3:1–5, 14–15; 4:3–4; 1 Nifae 13:24–29; Mamona 1:13–14; MFF 1:15–17; Iosefa Samita—Talafaasolopito 2:17–19

*Tagai foi* Taitaiga o le Ekalesia; Perisitua; Toefuataiga o le Talalelei

## **Liliuina Faaletulafono o se Tamaitiiti**

Ua i ai i fanau le aia tatau e tausia ai e ni matua ua faamamaluina noataga po o feagaiga o le faaipoipoga, ma tuuina atu le alofa ma le lagolago. O le liliuina o le pepe i se tasi e tausia ai e mafai ona avea ma se faamanuiaga sili mo le toatele o tamaiti o e ua fananau mai e aunoa ma lenei avanoa.



## *Liua*

Pe afai e fanauina se tamaitiiti i fafo o le faaiipoipoga, o le faaiuga sili lava e mo le tama ma le tina o le tamaitiiti ina ia faaiipoipo ma galulue agai i se fesootaiga faaleaiga e faavavau. Afai e foliga mai e le faamanuiaina se faaiipoipoga, e ao ona la tuuina atu le tamaitiiti mo le vaetamaina, ma e fautuaina atu le taulimaina e le ofisa o Auaunaga a le AAG mo Aiga. O le tuuina atu o le tamaitiiti mo le liliuina e ala i le Auaunaga a le AAG mo Aiga, e fesoasoani ai i matua e lei faaiipoipo ia faia le mea silisili mo le tamaitiiti. E faamautinoa ai o le a faamauiina le tamaitiiti i se tina ma se tama i totonu o le malumalu, ma faalauteleina ai le avanoa mo faamanuiaga o le Talalelei i soifuaga o i latou o loo aafia ai. O le liliuina faaletulafono o se tamaitiiti, o se faaiuga alofa ma le lē faapito e faamanuia ai matua moni, o le tamaitiiti, ma le aiga fou o le tamaitiiti.

Afai ua e faaiipoipo ma ua lua mananao faatasi ma lou toalua e vaetama se tamaitiiti, ia mautinoa ua e iloa tuutuuga manaomia uma faaletulafono o atunuu ma ofisa o le malo e aofia ai. Ia talatalanoa faatasi ma ou taitai o le perisitua ma, pe a mafai, talanoa i sui o lo o faigaluega i le ofisa o Auaunaga a le AAG mo Aiga. Afai e le o i ai se ofisa o Auaunaga a le AAG mo Aiga i lo outou faaitu, ona galulue faatasi lea ma ou taitai perisitua e saili faalapotopotoga aloaia ua laiseneina e puipuia fanau ma matua o fanau ua liliuina faaletulafono.

## **Liua**

“Aua o le loto i la le tino o le oti lea,” o le tala lea a le Aposetolo o Paulo, “ae o le loto i la le agaga o le ola lea ma le manuia” (Roma 8:6; tagai foi 2 Nifae 9:39). I lo tatou tulaga pau, e masani ona tatou fetaiiai ma tofotofoga, ma o nisi taimi tatou te gauai atu ai i le “loto o le tino ma le leaga o i ai” (2 Nifae 2:29; tagai foi “Pau,” itulau 130–133 i le tusi lenei). Ina ia mafai ona maua faamanuiaga o le ola e faavavau, e ao ona maua e i tatou le “loto i la le agaga” ma faatoilalo o tatou

manaoga lē tonu. E manaomia ona suia i tatou. I se faaupuga sili atu ona sa’o, e ao ona tatou *suia*, pe liua, e ala i le mana o le Togiola a le Faaola ma e ala i le mana o le Agaga Paia. O lenei gasologa e ta’ua o le liua.

O le liua e aofia ai se suiga o le amio, ae e mamao atu nai lo le amio; o se suiga i o tatou lava natura. O se suiga matagofie lea e ta’ua e le Alii ma Ana perofeta o se toe fanauina, o se suiga o le loto, ma o se papatisoga i le afi. Na fetalai mai le Alii:

“Aua e te ofo, aua e ao ina toe fanauina tagata uma lava, ioe, o tane atoa ma fafine, o atunuu uma, ituaiga, ma gagana eseese, ma nuu, ioe, ia fanauina i la le Atua, ma ia liua mai le faaletino ma le pau i le amiotonu ona ua togiolaina e le Atua, ma ua avea mona atalii ma afafine;

“Ua faapea foi ona avea i latou ma tagata fou, a latou le faia lenei mea, e le mafai ona fai mo latou tofi le malo o le Atua ” (Mosaea 27:25–26).

## O Le Faagasologa o le Liua

O le liua o se faagasologa; e lē o se mea e tupu i se taimi e tasi. E te liua ona o se taunuuga o au taumafaiga amiotonu e mulimuli i le Faaola. O nei taumafaiga e aofia ai le faaagaina o le faatuatua i a Iesu Keriso, salamo i agasala, papatiso, mauaina o le meaalofa a le Agaga Paia, ma le tumau i le faatuatua e oo i le iuga.

E ui lava o le liliuga e ofoofogia ma suia ai olaga, ae o se vavega e lē leoa. O asiasiga a agelu ma isi mea matautia e tutupu, e lē aumaia ai le liliuga. E oo lava i a Alema na vaai i se agelu, na liliu ina ua uma ona faia “anapogi ma tatalo i aso e tele” mo se molimau o le mea moni (Alema 5:46). Ma o Paulo, o lē na vaai i le Faaola toetu, na aoao mai “e leai foi se tasi na te mafaia ona ta’ua o Iesu o le Alii, ua na o le Agaga Paia” (1 Korinito 12:3).

Talu ai ona o le liliuga o se faagasologa faifai pea e lē leoa, e ono mafai ona e liua nei e aunoa ma lou iloaina. E mafai ona pei oe o Sa Lamana “ona o lo latou faatuatua ia [Keriso] i le aso o lo latou liliu mai, sa papatisoina i latou i le

afi ma le Agaga Paia, a ua latou le iloa ai” (3 Nifae 9:20). O au taumafaiga faaaauau pea e faaaogaina le faatuatua ma mulimuli i le Faaola, o le a taitai atu ai i le liliuga e sili atu.

### O Foliga Vaaia o Tagata Ua Liua

Ua tuuina mai e le Tusi a Mamona faamatalaga o tagata o e ua liliu i le Alii:

*Ua latou fia faia pea le amio lelei.* Na alagaina e le nuu o le Tupu o Peniamina, “Ona o le Agaga o le Atua pule aoao na ia faaliliuina a matou amio ma o matou loto ua le toe ai so matou manatu e fai amio leaga, ae fai pea lava le amio lelei” (Mosaea 5:2). Na tautala Alema e uiga i tagata o e “ua le mafai ona vaai i le agasala, sei iloga ua inoino i ai” (Alema 13:12).

*Latou te le tetee i le Alii.* Sa faamatalaina e Mamona se vaega o Sa Lamana o e na amioleaga ma fiainu i le toto ae sa “faaliliuina [i latou] i le Atua” (Alema 23:6). Na suia e nei tagata o latou igoa i a Aneti-Nifae-Liae ma “ua avea i latou ma nuu amiotonu, ua latou lafoai la latou auupega o lo latou fouvale, ua le toe tau ai ma le Atua, po o se tasi o latou uso” (Alema 23:7).

*Ua latou fetufaai atu leTalalelei.* O Enosa, Alema le Matua, Alema le Itiiti, o atalii o Mosaea, Amoleka, ma Sesoroma na ofoina atu i latou lava e talai le talalelei ina ua mavae ona latou liliu i le Alii (tagai Enosa 1:26; Mosaea 18:1; Mosaea 27:32–37; Alema 10:1–12; 15:12).

*Ua faatumuina i latou i le alofa.* Ina ua mavae ona asiasi atu le Faaola Toetu i tagata i Amerika, “ona faaliliu mai ai lea i le Atua le nuu atoa i luga o le fogaeleele uma o sa Nifae atoa ma sa Lamana ua leai foi ni fefinauaiga po o feupuuga ia te i latou a ua faamaoni tagata uma o le tasi i le tasi. . . .

“Ua oo foi ina leai ni finauga i le nuu, ona o le alofa o le Atua ua mau i loto o le nuu.

“Ua leai foi se matau’a, po o se finauvale, po o faanununu po o faitaaga, po o pepelo, po o fasioti tagata, po o se

mea faamataitu e tasi; e moni lava, e le mafai ona sili i ai le fiafia o se tasi nuu o nuu uma lava ua faia e le aao o le Atua.

“Ua lei fo'i ni tagata faomea, po o ni tagata fasioti tagata, ua lei fo'i ni sa Lamana po o se tasi ituuiga, a ua tasi lava i latou, o fanau i latou a Keriso, o suli fo'i o le malo o le Atua” (4 Nifae 1:2, 15–17).

Taumafaiga mo se Liua e Sili Atu

O loo ia te oe le matafaioi patino mo lou lava liliuga. E lei se tasi e mafai ona liua mo oe, ma e lei fo'i se tasi e faa-malositia oe e te liliu. Ae peitai, e mafai e isi ona fesoasoani ia te oe i le faagasologa o le liua. Aoa ma faataitaiga amiotonu a tagata o le aiga, o taitai ma faiaoga o le Ekalesia, ma alii ma tamaitai i totonu o tusitusiga paia.

O lou malosi e faatupuina ai se liliuga tele o le loto o le a faateleina pe a e taumafai e mulimuli i faataitaiga atoatoa a le Faaola. Suesue i tusitusiga paia, tatalo i le faatuatua, tausia poloaiga, ma saili le mafutaga faifai pea ma le Agaga Paia. Ao e faaauau pea i le faagasologa o le liua, o le a e maua ai le “olioli ma le fiafia e faapea ona matua tele,” e pei ona maua e le nuu o le Tupu o Peniamina ina ua “faaliliuina [e le Agaga] , , , o [latou] loto” (tagai Mosaea 5:2, 4). O le a mafai ona e mulimuli i le fautuaga a le Tupu o Peniamina e “tutu-mau ma le le mafaagaetia, ia fua mai pea i galuega lelei, ina ia faamaufaaailogaina outou mona e Keriso le Alii le Atua pule aao, ina ia outou maua le olataga e tumau ma le ola e faavavau” (Mosaea 5:15).

Mau Faapoopo: Mataio 18:3; Luka 22:32; Alema 5:7–14

*Tagai fo'i* Togiola a Iesu Keriso; Papatitoga; Agaga Paia; Faalataga

## Loto Faafetai

Na folafola mai e le Alii, “O lē talia fo'i mea uma ma le faafetai o le a faamamaluina” (MFF 78:19). O le loto faafetai o se uiga faagaetia ma le faaeaina. Atonu e mafai ona e faapea

## *Lotofuatiaifo*

ifo mai mea na tutupu ia te oe e sili atu lou fiafia pe afai e ia te oe le loto faafetai. E le mafai ona e ita, lē fiafia, pe leaga le loto pe a e faafetai.

Ia faafetai mo ou faamanuiaga matagofie. Ia faafetai mo avanoa e tele ua e maua. Ia faafetai atu i ou matua. Ia faailoa atu ia te i la'ua lou loto faafetai. Ia faafetai atu i au uo ma ou faiaoga. Ia faailoa atu lou agaga faafetai i tagata uma o ē na faia se mea lelei mo oe pe fesoasoani ia te oe i soo se itu.

Ia faafetai i lou Tama Faalelagi mo Lona agalelei ia te oe. E mafai ona e faaali atu lou loto faafetai i le Atua e ala i le faailoa o Lona aao i mea uma, faafetai atu ia te Ia mo mea uma ua Ia tuuina mai ia te oe, tausi Ana poloaiga, ma auauna atu i isi. Faafetai atu ia te Ia mo Lona Alo Pele, o Iesu Keriso. Faaali atu le faafetai mo faataitaiga sili a le Faaola, mo Ana aoaoga, mo Lona aao mafola e siitia ma fesoasoani, mo Lana Togiola lē i'u.

Faafetai atu i le Alii mo Lana Ekalesia toefuataiina. Faafetai ia te Ia mo mea uma ua ofoina mai mo oe. Faafetai ia te Ia mo uo ma aiga. Ia avea se agaga o le faafetai e taitai ma faamanuia ai ou aso ma po. Ia galue e atiina ae le loto faafetai. O le a e iloa e aumaia ai ni taunuuga matagofie.

Mau Faaopoopo: Salamo 100:3–4; Luka 17:11–19; Mosaea 2:19–22; Alema 34:38; MFF 59:7

## **Lotofuatiaifo**

O tagata uma ua fananau mai ma le mana e iloa ai le ese-esea i le va o le lelei ma le leaga. O lenei malosiaga, ua ta'ua o le lotofuatiaifo, o se faaaliga o le Malamalama o Keriso (tagai Moronae 7:15–19).

O lou lotofuatiaifo o se puipuiga e fesoasoani ia te oe e aloese ai mai tulaga matautia faaleagaga. Pe a e ususitai i poloaiga ma faia filifiliga amiotonu, o le a e maua lagona filemu.

Pe a e agasala, e te lagona le faanoanoa ma le ta'usalaina, e pei lava ona e lagona le tiga faaletino pe a e manua. O se tali

atu faanatura lea o lou lotofuatiaifo i le agasala, ma e mafai ona taitaiina atu ai oe i le salamo.

O le salamo ma le faamagaloga e faafouina ai ou lagona filemu. I se isi itu, afai e te le amanaiaina ou faalogona ma e lē salamo, o le a faaleagaina lou loto fuatiaifo e pei lava ua “faamuina i se uamea aasa ” (1 Timoteo 4:2).

Aoao e mulimuli i lou lotofuatiaifo. O se vaega taua tele lenei o le faaaogaina o lou saolotoga. O le tele ona e mulimuli i lou lotofuatiaifo, o le faateleina foi lea o lona malosi. O se lotofuatiaifo ola o se faailoga lea o se agaga maloloina.

Mau Faaopoopo: Mosaea 4:1–3; MFF 84:45–47

*Tagai foi Saolotoga; Malamalama o Keriso; Usiusitai; Tofotofoga*

## Lotogatasi

A o le i faataunuuna e le Faaola le Togiola, sa Ia tatalo mo Ona soo, o e na Ia auina atu i le lalolagi e aoao atu le talalelei. Na Ia tatalo foi mo i latou o e o le a talitonu ia te Ia ona o upu a Ona soo. Sa Ia aioi atu mo le lotogatasi: “Ina ia tasi i latou uma, faapei o oe le Tama o i totonu ia te au, o au foi o i totonu ia te oe, ina ia tasi i latou i totonu ia te i taua; ina ia talitonu le lalolagi ua e auina mai au” (Ioane 17:21).

E ala mai i lenei tatalo ua tatou aoao ai i le ala e tuufaataisia ai e le talalelei i tatou ma le Tama Faalelagi ma Iesu Keriso ma isi. Pe a tatou ola i le talalelei, maua sauniga faaola ma tausia a tatou feagaiga, o le a suia o tatou natura. Ua faamamaina i tatou i le Togiola a le Faaola, ma ua mafai ai ona tatou ola i le lotogatasi, fiafia i le filemu i le olaga ma sauniuni e nonofo faatasi ma le Tama ma Lona Alo e faavavau.

Na fetalai mai le Alii, “Afai e le tasi outou e le a’u outou ” (MFF 38:27). E mafai ona e sailia ma faaleleia lenei tulaga o le lotogatasi i totonu o lou aiga ma totonu o le Ekalesia. Pe afai ua e faaipoipo, e mafai e oe ma lou toalua ona tasi i faamoemoega ma mea e fai. E mafai ona e faatagaina o oulua uiga tutusa e galulue faatasi ai ma le isi ao oulua feagai ma luitau ma tutupu ae ai i le alofa ma le malamalama. E mafai

foi ona lotogatasi ma isi tagata o le aiga ma tagata o le Ekalesia e ala i le galulue faatasi, aoaoina le tasi, ma faama-losiau atu i le tasi. E mafai ona tasi oe ma le Peresitene o le Ekalesia ma isi taitai o le Ekalesia ao e suesueina a latou ao-aoga ma mulimuli ia latou fautuaga.

Ao faatupulaia le Ekalesia i le lalolagi atoa, o tagata uma o le Au Paia o Aso e Gata Ai e mafai ona lotogatasi. E mafai ona “fusifusia faatasi o latou loto i le lotogatasi ma le fealofani” (Mosaea 18:21). E tatou te talisapaia le eseesea i aganuu ma le eseesea i tagata taitoatasi, ae e tatou te saili foi le “tasi le faatuatuaga” lea e maua pe a tatou mulimuli i taitai musuia ma manatua o i tatou uma lava o fanau a le Tama e tasi (tagai Efeso 4:3–6, 11–13).

*Tagai foi Alofa; Faaipoipoga; Usiusitai; Auaunaga; Siona*

## **Lotomauualalo**

O le lotomauualalo o le iloa lea ma le agaga faafetai lou faalagolago i le Alii—o le malamalama lea o loo i ai ia te oe se tulaga manaomia faifai pea o Lana fesoasoani. O le lotomauualalo o le iloa lea o au taleni ma tomai o ni meaalofo mai le Atua. E le o se faailoga o le vaivai, palaai, po o le fefe; o se faailoga o lou iloa o le mea e taoto ai lou malosiaga atoa. E mafai ona e lotomauualalo ma lē fefe. E mafai ona e lotomauualalo ma lototele.

O Iesu Keriso lo tatou faataitaiga sili o le lotomauualalo. I le taimi o Lana misiona i le olaga nei, e masani lava ona Ia faailoa o Lona malosi e maua mai ona o Lona faalagolago i Lona Tama. Na ia fetalai: “Ou te le mafaia ona fai o se mea e tasi, na o au. . . . aua ou te le usiusitai i lo’u lava loto, a o le finagalo o le Tama, o lē na auina mai au” (Ioane 5:30).

O le a faamalosia oe e le Alii pe a e faamauualaloina oe lava i ona Luma. Na aoao mai Iakopo: “E tetee atu le Atua i e faamauualuga, ae foai mai le alofa tunoa i e faamauualalo. . . ina faamauualo ia i luma o le Alii, ona faamauualugaina lea o outou e Ia” (Iakopo 4:6, 10).

Mau Faaopoopo: Mataio 18:4; 23:12; 26:39; Luka 22:42; 1 Peteru 5:5–6; Mosaea 4:11–12; 15:6–7; Alema 5:27–28; Helamana 3:33–35; Eteru 12:27; MFF 12:8; 67:10; 112:10; 136:32–33

## **Malamalama o Keriso**

O le Malamalama o Keriso e “susulu atu mai le afioaga o le Atua e faatumulia mea uma i le vavaloloa.” O le “malamalama lea o loo i mea uma, e faaola i mea uma, o le tulafono lea e pulea mea uma” (MFF 88:12–13; Tagai foi i fuaiupu 6–11). O lenei mana o se uunaiga mo le lelei i olaga o tagata uma lava (tagai Ioane 1:9; MFF 93:2). I tusitusiga paia, o le Malamalama o Keriso e masani ona taua i nisi taimi o le Agaga o le Alii, o le Agaga o le Atua, o le Agaga o Keriso, po o le Malamalama o le Ola.

O le Malamalama o Keriso e le tatau ona fenumiaia ma le Agaga Paia. E le o se peresona, e pei o le Agaga Paia. O lana uunaiga e taitaiina atu ai tagata ina ia latou maua le talalelei moni, papatiso, ma mauaina le meaalofo o le Agaga Paia (tagai Ioane 12:46; Alema 26:14–15).

O le lotofuatiaifo o se faailoga o le Malamalama o Keriso, ua mafai ai e i tatou ona iloa le lelei mai le leaga. Ua aoao mai le perofeta o Mamona: “Ua foaiina mai le Agaga o Keriso i tagata uma lava, ina ia iloa ai e i latou le lelei ma le leaga; o lea ua ou faailoa atu ai ia te outou le ala e faamasino ai; aua o mea uma ua valaau atu ia faia le lelei, ma ua faaoleole atu ia faatuatua ia Keriso, ua aauina atu ai i le mana ma le mea foaifuaia mai a Keriso, o lea tou te iloa ai ma le malamalama atoatoa e mai le Atua ia. . . . O lenei foi, ou uso e, ona ua outou iloa le malamalama tou te faamasino atu ai, o lea malamalama foi o le malamalama o Keriso, ia outou nei outou faamasino atu ma le sese, aua o le faamasinoga tou te faamasino atu ai, e faamasinoina ai outou” (Moronae 7:16, 18).

Faamatalaga Faaopoopo: Ioane 8:12; Alema 28:14

*Tagai foi Lotofuatiaifo; Agaga Paia*



**Malo** (*Tagai Faiga Malo Lautele ma Tulafono*)

## **Malo o le Mamalu**

E ala mai i le Togiola a Iesu Keriso, o le a toetutu ai tagata uma (tagai Alema 11:42–45). Pe a mavae ona tatou toetutu, o le a tatou laulaututu i luma o le Alii ina ia faamasinoina (tagai Faaaliga 20:12; 3 Nifae 27:14). O i tatou uma taitoatasi o le a tofia i se nofoaga e faavavau i se malo faapitoa o le mamalu. Na aoao mai e le Alii lenei mataupu faavae ina ua Ia fetalai, “E tele mea e nonofo ai i le maota o lo’u Tama” (Ioane 14:2).

E tolu malo o le mamalu: o le malo selesitila, o le malo terasitila, ma le malo telesitila. O le mamalu o le a e nofo ai e faalagolago lea i le loloto o lou liua, e faaalua lea i lou usiustai i poloaiga a le Alii. O le a faalagolago i le tulaga na e “talia ai le mau ia Iesu” (MFF 76:51; Tagai foi i fuaiupu 74, 79, 101).

### **Malo Selesitila**

O le malo selesitila o le malo maualuga lea o malo e tolu o le mamalu. O tagata o lea malo o le a nonofo e faavavau i totonu o le afioaga o le Atua le Tama ma Lona Alo o Iesu Keriso. E tatau ona avea lea ma au sini: ia ulu atu i le mamalu selesitila ma fesoasoani atu i isi ina ia latou mauaina foi lena faamanuiaga sili. O lena sini e le mafai ona ausia i le na o se taumafaiga se tasi, o se taunuuga o se olaga amiotonu ma se faamoemoega mausali.

O le malo selesitila o le nofoaga ua saunia mo i latou ua “talia le mau ia Iesu” ma ua “faaatoatoaina ia Iesu le puluvaga o le feagaiga fou, o le na faia lenei togiola atoatoa i le faamaliigiina o lona lava toto” (MFF 76:51, 69). Ina ia maua lenei meaalofo, e tatau ona tatou mauaina sauniga o le faaolataga, tausia poloaiga, ma salamo i a tatou agasala. Mo se faamatalaga auiliili o i latou o e o le a nonofo i le mamalu selesitila, tagai Mataupu Faavae ma Feagaiga 76:50–70, 92–96.

Ia Ianuari 1836 na maua ai e le perofeta o Iosefa Samita se faaaliga na faalateleina ai lona malamalama i mea e manaomia ina ia ulu atu ai i le mamalu selesitila. Na tatalaina le lagi ia te ia, ma sa ia vaaia le malo selesitila. Na ofo o ia ina ua ia vaaia lona uso matua o Alavini iina, e ui ina sa maliu Alavini e le i mauaina e ia sauniga o le papatisoga. (tagai MFF 137:1–6.) Ma na oo mai le siufofoga o le Alii i le perofeta o Iosefa:

“O i latou uma o e oti e aunoa ma le malamalama i lenei talalelei, o e semanu latou te talia pe ana faatagaina e ola pea i le lalolagi, e avea i latou ma suli o le malo selesitila o le Atua;

“O i latou uma lava o le a oti e amata atu i le taimi nei e aunoa ma se malamalama e uiga i le talalelei, o e semanu latou te talia ma o latou loto atoa, o le a avea ma suli o lona malo;

“Aua o Au, le Alii, o le a faamasinoina tagata uma e tusa ma a latou galuega, e tusa ma manaoga o latou loto” (MFF 137:7–9).

I sana faamatalaga i lenei faaaliga, na faapea mai ai le perofeta o Iosefa, “Sa ou vaaia foi, o tamaiti uma lava o e oti a o lei taunuu atu i tausaga e malamalama ai, e faaolaina i le malo selesitila i le lagi” (MFF 137:10).

Mai le isi faaaliga i le perofeta o Iosefa, ua tatou aoaoina ai e tolu tikeri i le malo selesitila. Ina ia faaeaina i le tikeri maualuga ma faaauau ai pea e faavavau i sootaga faaleaiga, e ao ona tatou ulu atu “i le feagaiga fou faavavau o le faaipoipoga” ma faamaoni ai i lona feagaiga. I se isi faaupuga, o le faaipoipoga i le malumalu o se tulaga manaomia lea mo le mauaina o le tikeri aupito i luga o le mamalu selesitila. (Tagai MFF 131:1–4.) O i latou uma o e ua agavaa e ulu atu i lona feagaiga fou ma le faavavau o le faaipoipoga, o le a maua lona avanoa, a lē o le olaga nei o le olaga a sau.

### Malo Terasitila

O i latou e ulu atu i le mamalu terasitila o le a “maua le mafutaga faatasi ma le Alo, a e le o le atoatoa o le Tama. O lea, o i latou ia o tino terasitila, a e le o tino selesitila, e esese foi

## *Malo Selesitila*

i mamalu e pei ona ese le masina mai le la (MFF 76:77–78). I se faamatalaga lautele, o tagata i le malo terasitila o ni tagata faamamaluina “o e na faatauasoina i faiga faaoleole a tagata” (MFF 76:75). O lenei vaega o le a aofia ai tagata o le Ekalesia o e na “le loto toa i le molimau ia Iesu” (MFF 76:79). O le a i ai foi i latou o e na teena le avanoa e maua ai le talalelei i le olaga faitino peitai na latou taliaina mulimuli ane i le lalolagi o agaga (tagai MFF 76:73–74). Ina ia aoao atili e uiga ia i latou e ulu atu i le mamalu terasitila, tagai Mataupu Faavae ma Feagaiga 76:71–80, 91, 97.

## Malo Telesitila

O le mamalu Telesitila o le a faaagaga mo tagata o e “na le taliaina le talalelei a Keriso, po o le molimau ia Iesu” (MFF 76:82). O nei tagata o le a mauaina lo latou mamalu pe a maea ona faaolaina mai i latou mai le falepuipui o agaga, lea e ta’ua i nisi taimi o seoli (tagai MFF 76:84, 106). O se faamatalaga auiliili o i latou e ulufale atu i le malo telesitila o loo maua i le Mataupu Faavae ma Feagaiga 76:81–90, 98–106, 109–112.

## Malaia

O nisi tagata o le a lē agavaa e nonofo i isi malo o le mamalu. O le a ta’ua i latou o “atalii o le malaia” ma o le a “nofo o ia i se malo e le o se malo o le mamalu” (MFF 76:32; 88:24). O le tulaga lea o i latou “uma ua iloa le mana [le Atua], ma ua tofusia ai, a ua tuuina atu ai i latou lava ia manumalo ai le mana o le tiapolo, ma faafitia le upu moni ma teena le mana [o le Atua]” (MFF 76:31; Tagai foi i fuaiupu 30, 32–49).

Faamatalaga Faaopoopo: 1 Korinito 15:40–42, MFF 88:20–39; 130:18–19

*Tagai foi* Togiola a Iesu Keriso; Ola Faavavau; Lagi; Seoli; Ata o le Faaolataga

## **Malo Selesitila** (*Tagai* Malo o Mamalu)

**Malo Telesitila** (*Tagai Malo o le Mamalu*)

**Malo Terasitila** (*Tagai Malo o le Mamalu*)

## Malumalu

O malumalu o maota moni ia o le Alii. O ni nofoaga paia ia e tapuai ai lea e mafai ona asiasi mai ai le Alii. E na o le aiga e mafai ona faatusatusa atu lona paia i le malumalu.

I le talafaasolopito, sa poloaiina e le Alii Ona tagata ina ia fausia malumalu. Ua gauai atu le Ekalesia i aso nei i le valaau a le Alii e fausia malumalu i le lalolagi atoa, ina ia avanoa ai faamanuiaga o le malumalu i le toatele o fanau a lo tatou Tama Faalelagi.

Sauniga mo e o Ola

O le faamoemoega autu lava o malumalu o le mauaina ai lea o sauniga manaomia mo lo tatou faaeega i le malo selesitila. O sauniga o le malumalu e tau atu i faamanuiaga silisili lea e maua e ala i le Togiola a Iesu Keriso. O mea uma lava o loo tatou faia i totonu o le Ekalesia—o a tatou sauniga ma gaoioiga, o a tatou taumafaiga faafaifeautalai, o lesona o loo aoao atu ma viiga o loo tatou peseina—e tataua ona faasino atu ai i tatou i le Faaola ma galuega o loo tatou faia i totonu o malumalu paia.

O se tasi o sauniga tatou te maua i totonu o le malumalu o le faaeega paia. O le upu *faaeega paia* o lona uiga o le “meaalofa,” ma o le faaeega paia i le malumalu o se meaalofa moni lava mai le Atua. O le sauniga e aofia ai le faasologa o faatonuga ma e aofia ai ma feagaiga tatou te osia ina ia ola amio-tonu ma ola ai e tusa ma mea e manaomia i le talalelei. E fesoasoani le faaeega paia e tatou te tepa taulai atu ai i le Faaola, Lana vaega i le fuafuaga a lo tatou Tama Faalelagi, ma la tatou tautinoga e mulimuli ia te Ia.

O le isi sauniga tatou te maua i le malumalu o le faaipopoga selesitila, lea e faamauina ai tane ma ava mo le faava-

## *Malumalu*

vau. O se faamauga e faia i totonu o le malumalu e faaauau lava e oo i le faavavau pe afai e faamaoni le tane ma le ava i feagaiga na la osia.

O fanau e fananau mai i matua ua faamauina i totonu o le malumalu ua fananau mai i totonu o le feagaiga. O nei fanau e otometi lava ona avea ma vaega o se aiga e faavavau. O fanau e le fananau mai i totonu o le feagaiga e mafai foi ona avea ma vaega o se aiga e faavavau i le taimi lava e faamauina ai i o latou matua moni po o matua fai. O le sauniga o le faamauina o fanau i matua e faia i totonu o le malumalu.

Pe afai ua e mauaina sauniga o le malumalu, ia manatua e le aunoa feagaiga ua e faia. Ia foi atu e le aunoa i le malumalu. Afai o oe o se tama po o se tina, aoao lau fanau i le taua o le malumalu. Fesoasoani atu ia i latou ina ia latou saunia ina ia agavaa e ulu atu i le malumalu.

Afai e te le i mauaina sauniga o le malumalu, ia amata nei loa ona e sauniuni. Pe a talafeagai ai ma maua se avanoa, ia ulufale atu i le malumalu e auai i le faatinoina o papatisoga ma faamauga mo e ua maliliu.

### Sauniga mo e ua Maliliu

O tagata ua maliliu e aunoa ma nei sauniga manaomia o le talalelei, e mafai ona latou mauaina na sauniga e ala i galuega e faia i totonu o malumalu. E mafai ona e faia lenei galuega e avea ai ma sui o ou tuua ma isi ua maliliu. I le avea ai ma sui mo i latou, e mafai ona papatisoina ma faamauina oe, mauaina faaeega paia, ma auai i le faamauga o le tane i le ava ma fanau i matua.

E tatau ona e matua auai i le sailia o talafaamaumau o ou tuua ua maliliu ina ia mafai ona faia galuega o le malumalu mo i latou.

Mo nisi faamatalaga e uiga i galuega faalemalumalu mo e maliliu ma galuega o talafaasolopito o aiga, tagai "Galuega o Talafaasolopito o Aiga ma Gafa," itulau 77–80.

## Agavaa e Ulu atu i le Malumalu

Ina ia ulu atu i le malumalu, e tatau ona e agavaa. E te faamaonia lou agavaa i faatalanoaga e lua—o le tasi e faia e se tasi o le au epikopo po o le peresitene o lau paranesi ma le isi e faia e se tasi o le au peresitene o lau siteki po o le peresitene o le misiona. O le a tausia e ou taitai perisitua nei faatalanoaga i se auala patino ma le le faalauaitelina. I nei faatalanoaga taitasi, o le a fesiligia ai oe e taitai perisitua e uiga i ou tulaga patino ma lou agavaa. O le a fesiligia foi oe i lau molimau i le Tama Faalelagi ma le Togiola a Iesu Keriso, ma o le a fesiligia oe pe e te lagolagoina le au taitai aoao ma taitai o le Ekalesia i le lotoifale. O le a fesiligia oe e faamautino ma o loo e ola mama ma o loo e tausia le Upu o le Poto, totogiina atoa le sefuluai, ma ola ai i aoaoga a le Ekalesia, ma e te lē o auai pe lagolagoina ni vaega faatuiese i le ekalesia.

Afai o le a lelei ona e tali atu i fesili i nei faatalanoaga ma afai ua faamalieina oe ma ou taitai perisitua ua e agavaa e ulu atu i le malumalu, o le a e mauaina se pepa faataga o le malumalu. O le a oulua sainia ma ou taitai perisitua le pepa faataga, lea o le a faatagaina ai oe e te ulu atu i le malumalu mo le isi lua tausaga, pe afai lava o le a tumau ai lou agavaa.

O faatalanoaga mo se pepa faataga o le malumalu e tuuina atu ai ia te oe se avanoa silisili e suesueina ai lou agavaa ma le gasologa o lou olaga. Pe afai e i ai se mea e le o sa’o o lou olaga, ia vave talanoa atu i lou epikopo po o lou peresitene o le paranesi a o le’i oo i lou faatalanoaga mo se pepa faataga. O le a mafai ona ia fesoasoani ia te oe e te saunia ina ia agavaa mo se pepa faataga.

## Laei o le Malumalu

Pe a e alu atu i le malumalu, e tatau ona e laeiina ou laei sili ona lelei, e pei ona e faia pe a e auai atu i le lotu. Pe a e i ai i totonu o le malumalu, e sui ou laei i laei papae o le malumalu. O lenei suiga o laei e faia i totonu o potu e sui ai laei, lea e te faaogaina ai se loka ma se potu faapitoa e sui ai. Ia

## *Malumalu*

faatumauiua ma le faaeteete uiga tausaaafia i totonu o le malumalu.

Ao tuu ou laei i totonu o loka, e mafai foi ona e tuuina ese ou faalavelave uma faalelalogagi. O lou laeiina o laei papae, e mafai ona e lagonaina ai le lagona e tasi ma se faalogona o le tutusa lelei ma isi tagata i totonu o le malumalu, aua o tagata uma o loo i ou autafa ua tutusa uma o latou laei.

### Laeiina o Ofusa

O le taimi lava e maua ai ou faaeega paia, ua e mauaina ai faamanuiaga o le laeiina o ofusa i lou olaga atoa. Ua manaomia ai ona e laeiina e tusa ai ma faatonuga e tuuina mai i le faaeega paia. Ia manatua o faamanuiaga e o faatasi ma lenei avanoa paia e faalagolago i lou agavaa ma lou faamaoni i le tausiga o feagaiga o le malumalu.

O le ofusa e faamanatu mai ai pea ia feagaiga ua e faia i totonu o le malumalu. E ao ona e tausia ma le faaloalo i taimi uma. E le tatau ona e faaalua atu ia i latou e lē malamalama i lona taua, ma e le tatau foi ona e fetuuna'ia ina ia mafai ai ona faaaoga isi ituaiga o laei. Pe a e laeiina ma le tatau, o le a aumaia ai le puipuiga e tetee atu ai i faaosoosoga ma le leaga. O le laeiina o ofusa o le faailoga vaaia lea i fafo o se tautinoga i totonu e mulimuli atu i le Faaola.

### Faamanuiaga e maua mai le ulufale i le Malumalu

E le gata o se nofoaga e faataunuua ai sauniga o le perisitua paia, ae o le malumalu o se nofoaga foi o le filemu ma faaaliga. Pe a o faapopoleina oe pe o mamafa foi i lou mafaufau ni filifiliga, e mafai ona e alu atu ma ou popolega i le malumalu. O iina e mafai ai ona e maua taitaiga faaleagaga.

O nisi taimi atonu e te lagona ai ua le mafai ona e manatunatu lelei ona ua lofituina lou mafaufau i faafitauli ma le tele o mea ua alu i ai lou mafaufau. I totonu o le malumalu, e mafai ona aveeseina ai aafiaga o nei lagona, ma aveeseina ai le le malamalama ma le le mautonu, ma mafai ai ona e mala-

malama i mea e te lei malamalama ai muamua. E mafai ai ona e maua auala fou e faafetauia ai luitau o loo oulua faafeagai.

O le a faamanuiaina oe e le Alii ao e auai atu i galuega o sauniga paia i totonu o le malumalu. Ma o faamanuiaga e tuuina mai e Ia ia te oe o le a le gata ai i totonu o le malumalu. O le a Ia faamanuiaina oe i vaega uma lava o lou olaga. O au galuega i totonu o le malumalu o le a faamalosia ma faamaina ai oe faaleagaga.

Faamatalaga Faaopoopo: Isaia 2:1–3; MFF 88:119; 109–110; 124:39–41

*Tagai foi* Feagaiga; Galuega o Talafaasolopito o Aiga ma Gafa; Faaipoipoga; Sauniga; Ata o le Faaolataga

## **Mataupu Faavae ma Feagaiga** (*Tagai* Tusitusiga paia)

### **Mataupu Faavae o le Faatuatua**

O Mataupu Faavae o le Faatuatua ua otooto mai ai ni manatu faavae e 13 o talitonuga o tagata o le Ekalesia a Iesu Keriso o le Au Paia o Aso e Gata Ai. Sa muai tusia e le Perofeta o Iosefa Samita i se tusi i a Ioane Wentworth, o se faatonu o se nusipepa, i le tali atu i se talosaga a Mr. Wentworth e fia iloa po o a talitonuga o tagata o le Ekalesia. Na mulimuli ane lomina ma faasalalauina i lomiga a le Ekalesia. Ua faaaogaina nei o ni tusitusiga paia ma ua aofia ai i totonu o le Penina Tau Tele.

### **Meaalofa a le Agaga** (*Tagai* Meaalofa Faaleagaga)

### **Meaalofa o le Agaga Paia** (*Tagai* Agaga Paia)

### **Meaalofa Faaleagaga**

O meaalofa faaleagaga o faamanuiaga po o tomai e tuuina mai e le mana o le Agaga Paia. E tuuina mai e le Atua a itiiti lava o le tasi o nei meaalofa i tagata faamaoni uma o le Ekalesia. A e mauaina nei meaalofa, o le a latou faamalosia



ma faamanuiaina oe lava ia ma fesoasoani ai ia te oe e te au-  
auna atu ai i isi. (Tagai MFF 46:8–12.) O loo aoao mai tusitu-  
siga paia i le tele o meaalofa a le Agaga:

- Malamalama “O Iesu Keriso o le Atalii o le Atua, ma sa faasatauroina o ia mo agasala a le lalolagi” (MFF 46:13).
- O le mana e talitonu ai i upu a i latou e molimau mai ia Iesu Keriso (tagai MFF 46:14).
- Malamalama i “le eseeseega o pulega” (MFF 46:15; tagai foi i le 1 Korinito 12:5). O lenei meaalofa e faa-aogaina i le pulea ma le taitaiina o le Ekalesia.
- Malamalama i “eseeseega o galuega,” e fesoasoani ia i tatou e iloa ai pe o se aoaoga po o se uunaiga e sau mai le Atua pe mai se isi auala (MFF 46:16; tagai foi i le 1 Korinito 12:6–7).
- O le meaalofa “o le Upu o le Poto” (1 Korinito 12:8; MFF 46:17). E le o faatatau i le tulafono lea ua tatou iloa o le Upu o le Poto. Ae, o le meaalofa o le atamai— o le iloa lea ona faaaogaina o le malamalama i auala amiotonu.
- O le meaalofa “o le upu o le malamalama” (1 Korinito 12:8; MFF 46:18).
- O le mafai lea ona e aoao atu e ala i le mana o le Agaga Paia (tagai Moronae 10:9–10; tagai foi i le MFF 46:18).
- O le meaalofa o le faatuatua (tagai 1 Korinito 12:9; Moronae 10:11).
- O le meaalofa “ia maua le faatuatua e faamaloloina ai” (MFF 46:19).
- O le meaalofa “ia maua le faatuatua e faamalolo atu ai” (MFF 46:20; tagai foi i le 1 Korinito 12:9; Moronae 10:11).
- “O le faia o vavega” (1 Korinito 12:10; MFF 46:21; tagai foi i le Moronae 10:12).

- O le meaalofo o valoaga (tagai 1 Korinito 12:10; Moronae 10:13; MFF 46:22). Na aoao mai e Ioane le Soo Pele e faapea “o agaga o valoaga o le mau lea ia Iesu” (Faaaliga 19:10).
- “Iloa agelu ma agaga e auauna mai” (Moronae 10:14).
- “Iloatino le eseese o Agaga” (1 Korinito 12:10; MFF 46:23).
- O le meaalofo o le tautala i gagana eseese (tagai 1 Korinito 12:10; Moronae 10:15; MFF 46:24).
- O le meaalofo o le “faamatalaga o gagana” (1 Korinito 12:10; MFF 46:25; tagai foi i le Moronae 10:16).

O nei meaalofo faaleagaga ma isi o loo i totonu o tusitusiga paia ua na o ni nai faataitaiga o le tele o meaalofo a le Agaga. E ono faamanuiaina e le Alii oe i nisi auala e faalagolago i luga o lou faatuatua ma ou manaoga faapea foi ma manaoga o i latou o loo e auauna atu i ai. Ua Ia poloaia i tatou ina ia tatou galulue ma le filiga ina ia tatou mauaina faamanuiaga faaleagaga:

“Ia faaeteete ai ne’i olegia outou; ma ia matua saili atu i meaalofo sili ina ia le olegia outou, a ia manatua pea lava pe na tuuina atu i se a ia mea;

“Aua e moni, ou te fai atu ia te outou, ua tuuina atu ia mea mo le lelei o e alofofa mai ia te au ma tausii au poloaiga uma, ma le tausisi e faia faapea; ina ia faamanuiaina i latou uma o e saili ma ole mai ia te au” (MFF 46:8–9; Tagai foi i le fuaiupu e 26).

Faamatalaga Faaopoopo: 1 Korinito 13; 14:1–33; Moronae 10:17–25; MFF 46:27–33; Mataupu Faavae o le Faatuatua 1:7

*Tagai foi Agaga Paia; Faaaliga*

**Meainu Malolosi** (*Tagai Upu o le Poto*)

**Meainu Vevela** (*Tagai Upu o le Poto*)

## **Meleniuma**

O le Meleniuma o se vaitau e 1,000 tausaga. Pe a tatou talanoa e uiga i le “Meleniuma,” tatou te talanoa agai i le 1,000 tausaga e mulimuli mai i le Afio Faalua mai o le Alii (tagai Faaaliga 20:4; MFF 29:11). I le taimi o le Meleniuma, “o le a nofo tupu lava Keriso i le lalolagi” (Mataupu Faavae o le Faatuatua 1:10).

O le Meleniuma o le a avea ma se taimi o le amiotonu ma le filemu i luga o le fogaeleele. Ua faaali mai e le Alii e faapea “O lena foi aso o le a faaiuina ai le feitagai o tagata ma le feitagai o manu, ioe le feitagai o tino aano uma” (MFF 101:26; Tagai foi i le Isaia 11:6–9). O Satani o le a “fusifusia ina ia le toe avanoa ia te ia loto o le fanau a tagata” (MFF 45:55; Tagai foi i le Faaaliga 20:1–3).

I le taimi o le Meleniuma, o tagata uma i luga o le fogaeleele o le a lelei ma amiotonu, peitai e toatele o le a le mauaina le atoatoa o le talalelei. O le mea lea, o le a auai ai tagata o le Ekalesia i le galuega faafaifeautalai.

O le a auai foi tagata o le Ekalesia i galuega faalemalumalusa i le taimi o le Meleniuma. O le a faaauau pea ona fausia e le Au Paia malumalu ma maua sauniga mo o latou tuua ua maliliu. A o ta’ita’i i latou i faaaliga, o le a latou saunia faaumauga o o latou tuua e tau lava i tua ia Atamu ma Eva.

O le a faaauau ai pea le amiotonu atoatoa ma le filemu seia oo i le faaiuga o le 1,000 tausaga, i le taimi o le a toe “tatalaina ai [Satani] mo ni nai aso puupuu, ina ia faapotopoto faatasi e ia ana au.” O le a tau le au a Satani ma le au sili i le lagi, lea o le a taitaiina e Mekaeli, po o Atamu. O le a faatolaloina Satani ma i latou e mulimuli ia te ia ma o le a lafoaiina i latou e faavavau. (Tagai MFF 88:111–115.)

Faamatalaga Faaopoopo: MFF 45:55–59; 101:22–34; 133:25

*Tagai foi Afio Mai Faalua o Iesu Keriso*

## Migao

O le migao o se uiga loloto o le faaaloalo ma le alofa. Pe a i ai ia te oe uiga migao i le Atua, ua e faamamaluina o Ia, faailoa atu lou agaga faafetai ia te Ia, ma tausia Ana poloaiga.

E tatau ona e migao i lau amio faapea foi ma ou uiga vaaia. O amio migao e aofia ai le tatalo, suesueina o tusitusiga paia, anapogi, ma le totoigiina o sefuluai ma taulaga. E aofia ai le ofuina o ofu talafeagai e te tauagafau ma tausaaia ai, ma le faaaogaina o gagana mama ma lelei. O le loloto o lou migao e faailoa lea i au filifiliga o musika ma isi mea faafiafia, o le ala e te talanoa ai i mataupu paia, ma le faiga o ou laei pe a e alu i le lotu ma le malumalu. E te faaali atu lou migao mo le Alii pe a e auuina atu i isi tagata ma tausia i latou ma le alofa ma le faaaloalo.

A o faateleina lou migao, o le a e matauina se suiga malie i lou olaga. O le a faateleina ona sasaa mai e le Alii Lona Agaga i ou luga. O le a faaitiitia ou popolega ma lou le mauttonu. O le a mafai ona e mauaina faaaliga e fesoasoani ia te oe e foia ai faafitauli tau ia te oe lava ia faapea le aiga.

E faapei ona e latalata atu i le Atua pe a e migao, o le a faapena foi e le lē migao ona faataunuuna ai faamoemoega o le fili. O le a faaosoosoina oe e Satani e te mulimuli i tulaga o le lalolagi e faateleina ai le pisapisao, o faafiafiaga, ma finauga seia oo ina faaitiitia le amio pulea ma le tauagafau. E faapei o se taitai ua fuafuaina se osofaiga o le taua, o le a tau-mafai malosi o ia [Satani] e punitia le alāleo o fesoootaiga i le va o oe ma le Alii. Ia faaeteete i na taumafaiga ma ia taumafai malosi ina ia migao i mea uma e te faia.

Faamatalaga Faaopoopo: Levitiko 26:2; Salamo 89:5–7; Eperu 12:28; MFF 59:21; 63:61–62, 64; 109:21

*Tagai foi i le Faatuatua; Faafetai; Tausaaia; Tatalo; Faaaliga; Tapuai*

## Molimau

O se molimau o se faamautinoaga faaleagaga e aumaia e le Agaga Paia. O le faavae o se molimau o le malamalamaaga lea o loo soifua le Tama Faalelagi ma e alofa ia i tatou; o loo

soifua Iesu Keriso, o Ia o le Alo o le Atua, ma sa Ia faia le Togiola e le iu; o Iosefa Samita o se perofeta a le Atua o le na valaauiina e toefuatai mai le talalelei; o loo taitaiina i tatou e se perofeta soifua i aso nei; o le Ekalesia a Iesu Keriso o le Au Paia o Aso e Gata Ai o se Ekalesia moni a le Faaola i luga o le fogaeleele. Faatasi ai ma lenei faavae, o le a tupu ai se molimau ma aofia uma ai mataupu faavae o le talalelei.

Mauaina ma le Faamalosiaina o se Molimau

I le avea ai ma se tagata o le Ekalesia a Iesu Keriso o le Au Paia o Aso e Gata Ai, o loo ia te oe se avanoa ma se tiute-tauave paia e mauaina ai sau lava molimau. Pe a mauaina se molimau, ua ia te oe le tiute e galueaiina ai i le gasologa o lou olaga. O lou fiafia i lenei olaga ma le olaga e tau atu i le faavavau e faalagolago lea pe e te “toa i le molimau ia Iesu” (MFF 76:79; Tagai foi i le fuaiupu 51, 74, 101). Ao e galue ai i lenei faagasologa, ia manatua mataupu faavae nei:

*O le sailiga mo se molimau e amata i se manaoga faamaoni amiotonu.* O le a faamanuiaina oe e lou Tama Faalelagi e tusa ai ma manaoga amiotonu o lou loto ma au taumafaiga e faia Lona finagalo. Ao ia talanoa atu i se vaega o tagata e lei mauaina ni molimau o le talalelei, na aoao atu ai Alema: “Afai tou te ala mai, ma fagua o outou mafaufau e oo i le tofotofu i a’u upu, ma faaaoga sina faatuatua itiiti lava; ioe, afai tou te le mafaia se mea e sili i le manao i le fia faatuatua, ina tuu ia lenei manao e galue i totonu ia te outou, seia lava lo outou faatuatua e talia ai nisi o a’u upu” (Alema 32:27).

*O le molimau e oo mai e ala i uunaiga filemu a le Agaga Paia.* O taunuuga o se molimau e mafai ona avea o se vavega ma suia ai le olaga, peitai o le meaalofa o se molimau e masani lava ona oo mai o se faamautinoaga filemu, e aunoa ma le faaaliga ofoofogia o le mana o le Atua. E oo lava ia Alema, o le na asi mai i ai se agelu ma vaai foi i le Atua o nofo i lona nofoalii, na manaomia foi ona anapogi ma tatalo ina ia mafai ona ia mauaina se molimau e ala mai le mana o le Agaga Paia (tagai Alema 5:45–46; 36:8, 22).

*O lau molimau o le a faasolosolo lava ona tupu e ala mai i ou aafiaga. E leai se tasi e na te mauaina se molimau atoatoa i se taimi se tasi. O le a tupu ma malosi lau molimau e ala mai i ou aafiaga. O le a faalateleina a o e faaalua le naunautai e au-auna i totonu o le Ekalesia, i soo se mea lava e valaauina ai oe. O le a faateleina a o e faia filifiliga ina ia tausia poloaiga. A o e siitia ma faamalosiau atu i isi, o le a e vaia lau molimau ua faaaau pe a ona tupu. A o e tatalo ma anapogi, sue-sue i tusitusiga paia, auai i sauniga a le Ekalesia, ma faalogo atu i isi o fetufaa mai a latou molimau, o le a faamanuiaina oe i taimi o musumusuga lea o le a faamausaliina ai lau molimau. O na taimi o le a oo mai i lou olaga a o e tauivi e ola i le talalelei.*

*O le a faatupuina lau molimau pe a e fetufaa atu. Aua e te faatali mo lau molimau sei atoatoa ona atiina ae ona faatoa e faasoaina atu lea. O le vaega o le atiina ae o se molimau e maua pe a fetufaa atu. O le mea moni, o le a e iloaina pe a e tufaina atu le vaega ua ia te oe o lau molimau, o le a toe foi mai ia te oe—faatasi ai ma se faaopoopoga.*

### Fetufaiina atu o le Molimau

I Aso Sa anapogi ma sauniga molimau ma taimi o talanoaga e te faia ma tagata o lou aiga ma uo, e ono uunaia ai oe e fetufaa atu lau molimau. I lena taimi, ia manatua e te le tau manaomia ona e tau fai atu se lauga musuia. O le a matua sili ona i ai le mana i lau molimau pe a e tuuina atu i se tulaga puupuu, faamaoni, ma mautinoa e uiga i le Faaola, o Ana aoga, ma le Toefuataiina. Tatalo mo le taitaiga, ma o le a fesoasoani le Agaga ia te oe e te iloa ai pe faapefea ona faailoa atu lagona i totonu o lou loto. O le a e maua le fiafia sili a o e fesoasoani atu i isi e fetufaa le faamoemoe ma le mautinoa ua tuuina mai ia te oe e le Alii.

Faamatalaga Faaopoopo: Ioane 7:17; 1 Korinito 2:9–14; Iakopo 1:5–6; Moronae 10:3–5; MFF 6:22–23; 62:3; 88:81

*Tagai foi* Togiola a Iesu Keriso; Anapogi ma Taulaga Anapogi; Le Atua le Tama; Agaga Paia; Tatalo; Faaaliga; Meaalofa Faaleagaga

## **Muai Faauuina**

I le muai olaga o agaga, sa tofia ai e le Atua ni agaga e faataunuaina ni misiona patino i le taimi e soifua ai i le olaga nei. O lenei mea ua taua o le muai faauuina.

O le muai faauuina e le faapea ua mautinoa ai o ia tagata o le a maua ni valaauga po o ni tiutetauave faapitoa. O nei avanoa e oo mai i lenei olaga o se taunuuga o le faaaogaina ma le amiotonu o le saolotoga, e pei lava o le oo mai o le muai faauuina o se taunuuga o le amiotonu i le muai olaga.

Sa muai faauuina Iesu Keriso e faia le Togiola, e avea ma “Tamai mamoe na fasia talu ona faavaeina le lalolagi,” (Faaaliga 13:8; tagai foi 1 Peteru 1:19–21). Ua ta’ua mai e tusitusiga paia nisi o e na muai faauuina. Na aoaoina Aperaamo e uiga i lona muai faauuina ina ua ia vaai i se faaaliga lea na ia vaai ai i agaga o i “latou uma e toatele o e tautaua ma maoae” i le muai olaga i le lalolagi o agaga. Na ia faapea mai: “Ma sa silasila atu le Atua i ia agaga ua lelei, ma sa ia tu i lo latou lotolotoi ma faapea atu: O le a ou faia ia avea i latou nei ma au faipule; aua sa ia tu i le lotolotoi o i latou o e o ni agaga, ma sa ia silasila atu ua lelei i latou; ona ia fetalai mai lea ia te au: Aperaamo e, o oe lava o se tasi o i latou ia; na fili-filia lava oe ae e te le i fanau mai” (Aperaamo 3:22–23). Na ta’u atu e le Alii i a Jeremia, “Na au iloa oe a o le i faia oe e au i le manava; na au faapaiaina oe a o le i fanau mai oe, na au tofia oe e fai ma perofeta i nuu” (Jeremia 1:5). O Ioane le Papatiso na muai faauuina e saunia tagata mo le misiona a le Faaola i le olaga nei (tagai Isaia 40:3; Luka 1:13–17; 1 Nifae 10:7–10).

O le mataupu autu o le muai faauuina e faatatau i tagata uma o le Ekalesia, e le na o le Faaola, ma Ana perofeta. Ao lei foafoaina le lalolagi, sa tuuina atu ni tiutetauave faapitoa i ni tamaitai faamaoni ma sa muai faauuina foi ni alii i ni tiute

faapitoa o le Perisitua. E ui lava e te le o manatuaina lena taimi, ae e mautinoa lava na e malie atoatoa e faataunuuina feau faapitoa i le galuega a lou Tama. A e faailoa atu lou lava agavaa, o le a tuuina atu ia te oe avanoa e faataunuuina ai tofiga na e mauaina i lea taimi.

Mau Faaopoopo: Alema 13:1–9; MFF 138:53–56

*Tagai foi* Saolotoga, Ata o le Faaolataga

## **Mulilua (*Tagai Legavia*)**

**O Mea ua Amioa’i** (*Tagai* Taaloga Tupe; Tusi ma Ata Mataga;

Upu o le Poto)

### **Ola**

O le upu *ola* o loo faaaogaina i ni auala se lua i totonu o tusitusiga paia. Muamua, o le agaga ua tuufaatasia ma le tino faitino, e tusa pe i le olaga faitino po o le mae’a foi o le toetutu, ua ta’ua o le ola (*tagai* MFF 88:15–16). Lua, o o tatou agaga e ta’ua i nisi taimi o ola (*tagai* Alema 40:15–18; *Aperaamo* 3:23).

*Tagai foi i le* Ata o le Faaolataga; Toetutu; Agaga

### **Ola Faavavau**

Na faaali mai e le Alii, “O la’u galuega ma lo’u mamalu lenei—o le faaofuina o le tagata i le tino ola pea ma le ola e faavavau” (*Mose* 1:39). O le tino ola pea, o le ola lea e faavavau o se tagata toetu. E ala i le Togiola a Iesu Keriso, o le a maua ai e tagata uma lenei meaalofa. O le ola faavavau, po o le faaeaga, o le mauaina lea o se nofoaga i le tikeri pito i maualuga o le malo selesitila, lea o le a tatou mau faatasi ai i le afioaga o le Atua ma faaauau pea o ni aiga (*tagai* MFF 131:1–4). E pei lava o le tino ola pea, o lenei meaalofa ua mafai ona maua ona o le Togiola a Iesu Keriso. Ae ui i lea, e



manaomia lo tatou “usiusitai i tulafono ma sauniga o le tala-lelei” (Mataupu Faavae o le Faatuatua 1:3).

Tumau i le Ala i le Ola Faavavau

Ina ua papatisoina oe ma maua le meaalofo a le Agaga Paia, ua e ulu atu i le ala lea e tau atu i le ola faavavau. Na aoao mai le Perofeta o Nifae:

“Aua o le faitotoa tou te ulu atu ai, o le salamo lea ma le papatisoga i le vai, ona oo mai ai lea o le faamagaloina o a outou agasala i le afi ma le Agaga Paia.

“Ona i ai lea o outou i lenei ala sao ma le lauitiiti e tau atu i le ola faavavau, ioe, ua ulu atu ai outou i le faitotoa, ua faia e outou e tusa ma poloaiga a le Tama ma le Alo, ua maua foi e outou le Agaga Paia, e molimau o ia i le Tama ma le Alo, e oo i le faataunuaina o le folafolaga ua na faia, ua faapea mai: Afai ua outou ui atu i le ala ona maua lea e outou” (2 Nifae 31:17–18).

Na faamamafa mai e Nifae pe a mavae ona tatou ulu atu i lenei “ala sao ma le lauitiiti,” e tataua ona tatou tumau i le faatuatua e oo i le iuga:

“Ona ua maua e outou lenei ala sao ma le lauitiiti, ou te fesili atu: Po ua faia mea uma ea? Faauta, ou te fai atu ia te outou, e leai, aua ana le seanoa le afioga lava a Keriso, ma le faatuatua e le mafaagaetia ia te ia, o loo faalagolago lava outou i le galuega a Lē malosi i faaola, po ua outou le o mai i nei mea.

“O le mea lea e tataua ai ona outou fetaomi atu i luma ma le faamaoni ia Keriso, ina ua i ai le faamoemoe atoatoa lelei, i le ma le alofa atu i le Atua atoa ma tagata uma. O lea afai tou te fetaomi atu i luma, o fiafia i le afioga a Keriso, ma tumau lava e oo i le iuga, faauta, o loo faapea ona fetalai mai leTama: Tou te maua le ola faavavau” (2 Nifae 31:19–20).

O lenei la ua uma ona papatisoina oe ma faamauina, o le tele o lou alualu i luma agai atu i le ola faavavau e faalagolago i lou mauaina o isi sauniga o le faaolataga: mo alii, o le faauuina i le Perisitua Mekisateko; mo alii ma tamaitai, o faa-

eega paia o le malumalu ma faamauga i faaipoipoga. Pe a maua nei sauniga ma tausia feagaiga e o faatasi ma ia sauniga, o le a e saunia oe lava e maua le tikeri pito sili ona maua i le malo selesitila.

### E Mafai ona E Ausia

Ao e manatunatu i lou alualu i luma i le “ala sao ma le lauitiiti,” ia mautinoa e mafai ona e ausia le ola faavavau. E finagalo le Alii ina ia e toe foi atu ia te Ia, ma e le mafai ona Ia manaomia mai se mea ia te oe e lē mafai ona e faataunuuina. O Ana poloaiga uma ua fuafuaina e faateleina ai lou fiafia. Pe a e faaaogaina le faatuatua ma auauna ia te Ia ma lou manatu atoa, Na te tuuina atu ia te oe le malosi ma saunia se ala mo oe e faia ai soo se mea ua Ia poloaiina ai oe (tagai 1 Nifae 3:7). Ia manatua ao e tuuina atu lau taumafaiga sili-sili ma salamo i au agasala, o le a faatumuina e le Togiola a Iesu Keriso ou vaivaiga ma mea e le o paleni, o ou manu’anu’a, ma tiga o loo feagai ma oe i lenei olaga: “Aua ua tatou iloa e faolaina i tatou i le alofa tunoa pe a uma ona faia mea uma tatou te mafaia” (2 Nifae 25:23).

Mau Faaopoopo: Ioane 3:16; 17:3; 2 Nifae 9:39; Moronae 7:41; MFF 14:7; 50:5

*Tagai foi* Togiola a Iesu Keriso; Alofa tunoa; Malo o Mamalu

### **Olaga i le Muai Olaga** (*Tagai* Ata o le Faaolataga)

### **Ofu Malumalu** (*Tagai* Malumalu)

### **Osigataulaga**

O le osigataulaga o le ofoina atu lea o se mea e taua ia i tatou mo le lelei o se isi mea e sili atu lona taua. I le avea ai ma Au Paia o Aso e Gata Ai, ua ia i tatou le avanoa o le osigataulagaina lea o mea o le lalolagi mo le Alii ma Lona malo. E tatau ona lotomalilie tagata o le Ekalesia a Iesu Keriso o le Au Paia o Aso e Gata Ai e faia soo se osigataulaga e manaomia e

le Alii. Pe ana le manaomia ona tatou faia ni osigataulaga, o le a le mafai lava ona tatou atiina ae le faatuatua lea e manaomia mo lo tatou faaolataga e faavavau.

O le Togiola a Iesu Keriso o le osigataulaga sili ma faavavau lea o loo i le ogatotonugalemu o le talalelei (tagai Alema 34:8–16). Ao le i faataunuaina e le Faola le Togiola, sa taulagaina e Lona nuu o le feagaiga ia manu, o se faatusa o Lana taulaga. O lea masani na fesoasoani latou te tepa taulai atu ai i luma i le Togiola. (tagai Mose 5:4–8). O le poloaiga i le taulagaina o manu na faaiuina i le maliu o Iesu Keriso. I le Ekalesia i le taimi nei, ua tatou aai ma feinu i le faamanatuga e faamanatu ai le taulaga togiola a le Faola.

E le gata i le manatuaina o le taulaga togiola a Iesu Keriso, ae tatou te tuuina atu foi la tatou lava osigataulaga: o se loto momomo ma le agaga salamo. Na fetalai le Faola: “Tou te le toe osia mai ia te au le taulaga o le faamaligiina o le toto, ioe, e mavae atu a outou taulaga . . . Ia outou fai ma taulaga ia te au le loto momomo ma le agaga salamo. Ai se sau foi ia te au ma le loto momomo ma le agaga salamo, ou te papatisoina i latou i le afi ma le Agaga Paia” (3 Nifae 9:19–20).

O le mauaina o le loto momomo ma le agaga salamo, o le lotomauualalo lea ma gauai atu i le finagalo o le Atua ma fautuaga a i latou ua Ia valaauina e taitaiina Lana Ekalesia. O le isi foi ona uiga o le mauaina lea o se lagona loloto o le faanoanoa mo agasala ma se manao faamaoni e salamo. Na toe faamanatu mai e le perofeta o Liae le taua o le tuuina atu o lea osigataulaga: “Faauta, e avae e [Keriso] o ia lava e fai ma taulaga ona o agasala, e faaatoatoa ai iuga o le tulafono ia te i latou uma o e o i ai le loto momomo ma le agaga salamo, a e leai se tasi e mafaia ona faaatoatoaina ai iuga o le tulafono” (2 Nifae 2:7). Afai tatou te le avae le osigataulaga o se loto momomo ma se agaga salamo, e le mafai ona tatou maua le atoatoa o faamanuiaga e maua e ala mai i le Togiola.

Pe afai e te lotomalie e ositaulaga e pei ona poloai mai ai le Alii, o le a taliaina oe e Ia. Na ia aoao mai: “O i latou uma

. . . o e iloa ua faamaoni o latou loto ma faamomomoina, ma ua salamo o latou agaga, ma ua loto malilie e tausia a latou feagaiga i le taulaga—ioe, o taulaga, uma lava o le a poloai-ina e au, le Alii—e talia i latou e au” (MFF 97:8). O le i ai o se vaaiga mo le faavavau, e mafai ai ona e iloa o le lafoai o mea o le lalolagi, e lē o se osigataulaga . O faamanuiaga e te maua, e sili atu nai lo se isi lava mea e te lafoa’ia.

Faamatalaga Faaopoopo: Mataio 19:16–22; MFF 59:8

*Tagai foi i le* Togiola a Iesu Keriso; Alofa; Usiusitai; Salamo; Faamanatuga; Auaunaga

**Ositaulaga** (*Tagai* Perisitua Arona; Taitaiga o le Ekalesia; Perisitua)

**Oti Faaleagaga** (*Tagai* Oti, Faaleagaga)

## Oti, Faaleagaga

O le oti faaleagaga o le tulieseā lea mai le afioaga o le Atua. Ua aoao mai e tusitusiga paia ni faapogai o oti faaleagaga e lua. O le faapogai muamua o le Pau, ma le lona lua o lo tatou lava lē usiusitai.

Na aoao mai le perofeta o le Tusi a Mamona o Samuelu e faapea, “Aua ua pei ua oti tagata uma lava i mea faalelalolagi atoa ma mea faalelagi” (Helamana 14:16). I le taimi o lo tatou olaga i lenei fogaeleele, ua tuueseina i tatou mai le afioaga o le Atua. O le Togiola, ua faaolaina ai e Iesu Keriso tagata uma mai le oti faaleagaga. Na molimau mai Samuelu e ala i le Toetu o le Faaola, “e togiolaina tagata uma lava ai le uluai oti—o le oti faaleagaga lea—e togiolaina tagata uma i le toe tu mai o Keriso, ioe, o tagata uma lava, ma toe aumaia i latou i luma o le Atua” (Helamana 14:16–17). Na aoao mai le perofeta o Liae ona o le Togiola, “e o mai tagata uma i le Atua, o lea latou te tutu mai ai i ona luma e faamasinoina e ia e tusa ma le upu moni ma le paia e i ai ia te ia” (2 Nifae 2:10).

O le isi oti faaleagaga e oo mai ona o lo tatou lava le usi-usitai. O a tatou agasala ua le mama ai i tatou ma lē mafai ai ona mau i le afioaga o le Atua (tagai Roma 3:23; Alema 12:12–16, 32; Helamana 14:18; Mose 6:57). O le Togiola, ua ofoina mai ai e Iesu Keriso le faaolataga mai le oti faaleagaga, ae seiloga lava tatou te faaaogaina le faatuatua ia te Ia, salamo i a tatou agasala, ma usi-usitai i mataupu faavae ma sauniga o le Talalelei (tagai Alema 13:27–30; Helamana 14:19; Mataupu Faavae o le Faatuatua 1:3).

Mau Faaopopo: 1 Nifae 15:33–35; Alema 40:26; 42:23

*Tagai foi* Togiola a Iesu Keriso; Faatuatua; Pau; Usi-usitai; Salamo; Agasala

## **Oti, Faaletino**

O le oti faaletino o le tuueseeseina lea o le agaga ma le tino faaleolaga nei. O le Pau o Atamu na oo mai ai le oti faaletino i le lalolagi (tagai Mose 6:48).

O le oti o se vaega taua o le ata o le faaolataga a le Tama Faalelagi (tagai 2 Nifae 9:6). Ina ia avea e faapei o le Tama Faavavau, e tatau ona tatou oti ma mulimuli ane maua ni tino toetutu atoatoa.

Pe a oti le tino faaletino, e faaauau pea ona ola le agaga. I le lalolagi o agaga, o agaga o e amiotonu “e nonofo. . . i le mea e fiafia ai, ua ta’ua o le parataiso, o le mea lea e mapu ai, o le mea e filemu ai, latou te malolo ai i o latou tiga uma, ma le popole uma, ma le faanoanoa” (Alema 40:12). O se nofoaga ua ta’ua o le falepuipui o agaga ua atofaina mo “i latou o e na oti i le solitulafono, e aunoa ma se malamalama i le upu moni, pe ona o agasala, na latou teena ai perofeta.” (MFF 138:32). O agaga i le falepuipui o loo aoaoina “i le faatuatua i le Atua, le salamo mai agasala, le faia o papatisoga sui mo e ua oti mo le faamagaloina o agasala, le mea foai fua o le Agaga i le faaee atu o lima, ma isi mataupu faavae uma o le talalelei sa tataua ona latou iloa” (MFF 138:33–34). Afai latou te taliaina mataupu faavae o le talalelei, salamo i a latou aga-

sala, ma talia sauniga na faia mo i latou i malumalu, o le a taliaina i latou i le parataiso.

Talu ai ona o le Togiola ma le Toetu o Iesu Keriso, o le oti faaletino ua na o sina taimi e lē tumau: “Aua faapei ona oti uma ia Atamu, e faapea foi ona faaolaina uma ia Keriso” (1 Korinito 15:22). O tagata uma o le a toetutu, o lona uiga o agaga o tagata uma o le a toe faatasia ma o latou tino— “e tuuina mea uma i lo latou tino e tatau ai ma le atoatoa” ma lē toe oo i ai le oti (Alema 40:23; tagai foi Alema 11:44–45).

Atonu ua e lagonaina le tiga ona o le oti o se tasi o le aiga po o se uo. O se vaega o le natura le lagona o le faanoanoa i taimi faapenei. O le mea moni, o le faavauvau o se faaaliga loloto lea o le alofa. Na fetalai mai le Alii, “Ia outou nonofo faatasi i le fealofani, ina ia outou fetagisi ai mo e ua oti” (MFF 42:45). Na pau lava le ala e leai ai se faanoanoa pe a oti, o le leai lea o se alofa i lenei olaga.

E tusa lava pe e te faanoanoa i le maliliu o ni tagata o le aiga, e mafai lava ona e maua le faamafanafanaga i le folafolaga o le toetu ma le faamautinoaga e mafai ona faavavau aiga. E mafai ona outou “iloa le ala i le faanoanoa tele atoa foi ma le olioli; o le faanoanoa ona o le oti ma le faafanoga i tagata, ma le olioli ona o le malamalama o Keriso e oo mai ai le ola” (Alema 28:14; tagai foi fuaiupu 9–13).

E faaopoopo atu i le mauaina o le faamafanafanaga pe a maliliu i latou e pele, e mafai ona e maua le filemu i lou malamalama o le a oo mai le taimi e te oti ai. Ao e ola i le talalelei, e mafai ona e manatuaina le folafolaga a le Alii: “O e ua oti ia te au, o le a le tofo i le oti, aua e suamalie ia i latou” (MFF 42:46).

Mau Faaopoopo: Isaia 25:8; 1 Korinito 15:51–58; 2 Nifae 9:6–15; Mosaea 16:6–8  
*Tagai foi Togiola a Iesu Keriso; Parataiso; Ata o le Faaolataga; Toetu*

## **Papatisoga**

Ua ta’u mai e le Tusi a Mamona se vaega o tagata o e na aoaoina le talalelei ma sa papatisoina i se nofoaga na ta’ua o

Mamona. Mai le taimi o lo latou papatisoga, sa latou mafau-fau i a Mamona o se nofoaga o le matagofie aua, ao i ai i latou iina, sa latou “maua i lea mea le iloa lelei o lo latou Togiola” (Mosaea 18:30). Sa faamalolosia i a latou molimau ma a latou feagaiga o le papatisoga, ma sa latou tumau i le faatuatua i le Alii, e oo lava i taimi o le tetele o tofotofoga (tagai Mosaea 23–24).

E faapei o tagata i totonu o lenei faamaumauga a le Tusi a Mamona, e mafai ona e alaga fiafia pe a e manatua au feagaiga o le papatisoga ma folafolaga a le Alii ia te oe. E mafai ona e maua le malosia i sauniga o le papatisoga, tusa lava pe na papatiso talu ai nei po o tausaga e tele ua mavae.

#### Ulufale i le Ala i le Ola Faavavau

O le Papatisoga o le sauniga faaola muamua o le talalelei (tagai Sauniga o le Faatuatua 1:4). O le papatisoga ma le faamauga e ala i le pule o le Perisitua, e avea ai oe ma uso o le Ekalesia a Iesu Keriso o le Au Paia o Aso e Gata Ai.

Ina ua papatisoina oe, na e faailoa atu lou naunautai e mulimuli i faataitaiga a le Faaola. Sa papatisoina foi o Ia, e ui lava e leai Sana agasala. E pei lava ona Ia faamalamalama atu i a Ioane le Papatiso, e manaomia ona papatiso o Ia ina ia “faataunuu ai mea tonu uma” (tagai Mataio 3:13–17).

O i latou uma e sailia le ola e faavavau, e tatau ona mulimuli atu i faataitaiga a le Faaola e ala i le papatisoina ma maua le meaalofa a le Agaga Paia. Na saunoa le perofeta o Nifae na faailoa mai e leAlii ia i tatou “le faitotoa [tatou] te ulu atu ai. Aua o le faitotoa [tatou] te ulu atu ai, o le salamo lea ma le papatisoga i le vai, ona oo mai ai lea le faamagaloina o a [tatou] agasala i le afi ma le Agaga Paia. Ona i ai lea o [tatou] i lenei ala sa’o ma le lauitiiti e tau atu i le ola faavavau” (2 Nifae 31:17–18). O le a tatou maua le ola faavavau pe afai tatou te tumau e oo i le iuga, tausia a tatou feagaiga ma maua isi sauniga o le faaolataga.

## Papatisoga i le Ala a le Alii

Na faaali mai e le Faaola le ala tonu o le faiga o le papatisoga i le Perofeta o Iosefa Samita, ma sa faamanino mai o le sauniga e tatau ona faatinoina e se tasi o umia le pule o le perisitua ma e tatau ona faia i le faatofuina:

“O lē ua valaauina i le Atua ma o i ai le pule mai ia Iesu Keriso e papatiso atu, o le a o ifo i le vai faatasi ma lē ua tuuina atu ia lava ia papatiso ia ta’u atu lona igoa ma fai atu: Ona ua tofia au e Iesu Keriso, ou te papatiso ia te oe i le suafa o le Tama, ma le Alo, ma le Agaga Paia Amene.

“Ona ia faatofuina lea o ia i le vai, ma toe o mai nai le vai” (MFF 20:73–74).

O le faatofu o se faatusa o le oti o se olaga agasala o se tagata ma toe fanau i se olaga faaleagaga, ua ofoina atu i le galuega a le Atua ma Lana fanau. O se faatusa foi o le oti ma le toetu (Tagai Roma 6:3–6.)

## O Tamaiti Laiti ma le Papatisoga

Mai faaaliga o aso e gata ai, ua tatou iloa ai o fanau laiti ua faaolaina e ala i le alofa tunoa o Iesu Keriso. Na fetalai mai le Faaola “e le mafai ona agasala i latou aua e le i tuuina atu le mana ia Satani e faaososoina ai tamaiti, vagana ona ua amata ona tatau ia te au ona sueina a latou amio i ou luma” (tagai MFF 29:46–47). E le tatau ona papatisoina i latou se ia oo i tausaga e sueina ai, lea na faailoa mai e le Alii pe afai e valu tausaga le matutua (tagai MFF 68:27; Faaliliuga Iosefa Samita, Kenese 17:11). Soo se tasi e faapea e ao ona papatisoina tamaiti ua “faafitia e ia le alofa o Keriso, ma faaleaogaina le togiola mai ia te ia ma le mana o lona togiola” (Moronae 8:20; tagai foi fuaiupu 8–19, 21–24).

## O Lau Feagaiga o le Papatisoga

Ina ua papatisoina oe, na e osia se feagaiga ma le Atua. Na e folafola atu e te tauaveina i ou luga le suafa o Iesu Keriso, tausi i Ana poloaiga, ma auauna ia te Ia e oo i le iuga



(tagai Mosaea 18:8–10; MFF 20:37). E te faafouina lenei feagaiga i taimi uma e te taumafa ai i le faamanatuga (tagai MFF 20:77, 79).

*Tauave i ou luga le Suafa o Iesu Keriso.* Pe a e tauave i ou luga le suafa o Iesu Keriso, e te vaai ia te oe o Sona. E te tuuina faamuamua o Ia ma Lana galuega i lou olaga. E te sailia mea Na te finagalo ai nai lo mea e te manao ai po o mea o loo aoaoina oe e le lalolagi e te manao i ai.

I totonu o le Tusi a Mamona, ua faamatala ai e le Tupu o Peniamina pe aisea e taua ai le tauave i o tatou luga le suafa o le Faaola:

“E leai lava foi se tasi igoa ua foaiina mai e oo mai ai le olagata, o le mea lea ua ou manao ai ina ia outou ave i luga ia te outou le suafa o Keriso, o outou uma ua osia le feagaiga ma le Atua, ina ia outou gauai i ai e oo i le iuga, o outou olaga.

“E oo mai foi, o lē na te faia nei mea, e maua o ia i le itu taumatau o le Atua, aua e iloa e ia le igoa e valaauina ai o ia, aua e valaauina o ia i le suafa o Keriso.

“O leni foi, e oo mai le aso, o i latou uma e le ave i luga ia te i latou le suafa o Keriso, e ao ina valaauina i latou i se tasi igoa, o lea e maua ai i latou i le itu tauagavale o le Atua” (Mosaea 5:8–10).

*Tausia poloaiga.* O lau feagaiga o le papatisoga o se tautinoga e te sau i le malo o le Atua, e tavavaeese ai oe mai le lalolagi ma tu atu o se molimau a le Atua “i aso uma, ma mea uma atoa ma nuu uma” (Mosaea 18:9). O au taumafaiga e tu atu o se molimau a le Atua e aofia ai mea uma e te faia ma tautala ai. Taumafai e le aunoa e manatua ma tausia poloaiga a le Alii. Ia tausia ou mafaufauga, lau gagana, ma au gaiouga ia mama. Pe a e saili atu mo faafiafiaga e pei o tifaga, televise, ma initoneti, musika, tusi, mekasini, ma nusipepa, ia faaeteete e matamata, faalogologo, ma faitau na o mea e faageetia ai. Fai laei talafeagai. Filifili uo e faamalolosa oe e ausia au sini e faavavau. Aloese mai le ola lē mama, o tusi ma ata

mataga, taaloga faitupe, tapaa, mainu oona, ma fualaa u faa-saina. Ia tausisia lou agavaa e ulu atu ai i le malumalu.

*Auauna atu i le Alii.* O le poloaiga e tuuese oe mai mea o le lalolagi e le faapea o lona uiga ia e faaesea oe mai isi. O se vaega o le feagaiga o le papatisoga le auaua atu i le Alii, ma o lau auaua sili ia te Ia, o lou auaua atu lea i ou uso a tagata. Ina ua aoao mai Alema e uiga i le feagaiga o le papatisoga, na ia faapea mai e ao ona tatou “loto ina fesui i a outou avega e ave ina ia mama ai” ma “loto ina faanoanoa faatasi ma e faanoanoa . . . ma faamafanafana i e ua tatau i ai le faamafanafana” (Mosaea 18:8–9). Ia agalelei ma faaaloalo i tagata uma, e ala i le mulimuli i faataitaiga a Iesu Keriso i le ala tatou te fegalegaleai ai ma isi.

### O Faamanuiaga Folafolaina o le Papatisoga

A e tausia feagaiga sa e osia i le taimi o le papatisoga, o le a faamanuiaina oe e le Alii mo lou faamaoni. O nisi o faamanuiaga ua e maua o le mafutaga faifaipea ma le Agaga Paia, o le faamagaloga o au agasala, ma le faamanuiaga o le fanaufouina faaleagaga.

*O Le Mafutaga Faifaipea ma le Agaga Paia.* Ina ua maea ona papatisoina oe, sa tuu e le toatasi pe sili atu o e umia le Perisitua Mekisateko o latou lima i luga o lou ulu ma tuuina atu ia te oe le meaalofo a le Agaga Paia. O lenei meaalofo e te maua ai le aia tatau mo le mafutaga faifaipea ma le Agaga Paia pe a tusa ai ma lou agavaa. O le tumau pea o le mafutaga ma le Agaga, o se tasi o faamanuiaga silisili e mafai ona e maua i le olaga motale po o le olaga faitino. O le a taitaiina oe e le Agaga i ala o le amiotonu ma le filemu, e te oo atu ai i le ola e faavavau.

*Faamagaloga o Agasala.* Talu ai ona ua e papatiso, ua mafai ona e maua le faamagaloga o au agasala. I se isi faaupuga, e mafai ona faamagaloina oe e ala i le alofa tunoa o le Faaola.

O lenei faamanuiaga, o le a le pine ai ae faatagaina oe e te ola ai i le afioaga o le Tama Faalelagi.

Ina ia maua le faamagaloga o au agasala, e ao ona e faa-ali atu lou faatuatua ia Iesu Keriso, salamo faamaoni, ma tau-mafai e le aunoa e tausia poloaiga. Sa aoao mai le perofeta o Mamona, “O le faapolopolo foi o le salamo, o le papatisoga lea, o le faatuatua foi e oo mai ai le papatisoga e faataunu-ina ai poloaiga, o le faataunuina o poloaiga e oo mai ai le faamagaloina o agasala” (Moronae 8:25). E “maua le faama-galoina o a outou agasala” pe a faaauau pea ona e faamaulalo i luma o le Atua, valaau atu ia te Ia i aso taitasi i le tatalo, tumau i le faatuatua ma auauna atu i e o manaomia le fesoa-soani (tagai Mosaea 4:11–12, 26).

*O Le Toefanaufouina.* E ala i le sauniga o le papatisoga ma le faamauga, ua e toe fanaufouina i totonu o se olaga fou. Sa fetalai atu le Faaola i a Nikotemo, “Afai e le fanau se tasi i le vai ma le Agaga e le mafai ona sao o ia i le malo o le Atua” (Ioane 3:5). E faapei o se tamaitiiti ua ulufale i se olaga fou i le taimi e fanau mai ai, e faapena foi lou amataina o se olaga fou ina ua e osia feagaiga o le papatisoga. E mafai ona e alu-alu i luma faaleagaga ma avea faapei o le Faaola e ala i le tau-sia o au feagaiga o le papatisoga, taumafa i le faamanatuga e faafouina au feagaiga, ma salamo i au agasala. Na aoao mai le Aposetolo o Paulo pe afai e papatisoina i tatou, ua tatou “savavali i le ola toefuataiina” (Roma 6:4).

Tumau e oo i le Iuga

O lea la ua e papatiso ma e mauaina le meaalofo a le Agaga Paia, e ao ona e faaauau pea i le amiotonu, aua o nei sauniga ua na o se faailoga o le amataga o lau malaga toe foi atu e mau faatasi ma lou Tama Faalelagi. Sa aoao mai le pero-feta o Nifae:

“Ona ua maua e outou lenei ala sa’o ma le lauitiiti, ou te fesili atu: Po ua faia mea uma ea? Faauta ou te fai atu ia te outou, e leai, aua ana le seanoa le afioga lava a Keriso, ma le

faatuatua e le mafaagaetia ia te ia, o loo faalagolago lava outou i le galuega a Lē malosi i faaola, po ua outou le o mai i nei mea.

“O le mea lea e tatau ai ona outou fetaomi atu i luma ma le faamaoni ia Keriso, ina ua i ai le faamoemoe atoatoa lelei, i le ma le alofa atu i le Atua, atoa ma tagata uma. O lea afai tou te fetaomi atu i luma, o fiasia i le afioga a Keriso, ma tumau lava e oo i le iuga, faauta, o loo faapea ona fetalai mai le Tama: Tou te maua le ola e faavavau” (2 Nifae 31:19–20).

Mau Faaopoopo: Galuega 2:37–38; 2 Nifae 31:4–13; Alema 7:14–16; 3 Nifae 11:18–41; 27:13–22; MFF 39:5–6, 10; 76:50–53

*Tagai foi* Faatuatua; Agaga Paia; Usiusitai; Perisitua; Salamo; Faamanatuga

## Parataiso

I totonu o tusitusiga paia, e eseese ni auala o loo faaaogaina ai le upu *parataiso*. Muamua, o loo ta’u mai ai o se nofoaga o le filemu ma le fiasia i le olaga i le lalolagi o agaga, pe a mavae le olaga faitino, lea e faaagaga mo i latou o e ua papatisoina ma ua tumau ma le faamaoni (tagai Alema 40:12; Moronae 10:34). O i latou i le falepuipui o agaga e maua le avanoa e aoao ai i le talalelei a Iesu Keriso, salamo i a latou agasala, ma maua sauniga o le papatisoga ma faamauga e ala i galuega tatou te faia i totonu o malumalu (tagai MFF 138:30–35). Pe a latou faia lena mea, o le a mafai ona latou ulufale atu i le parataiso.

O le faaaogaina lona lua o le upu *parataiso* o loo maua i le tala a Luka o le Faasatauroga o le Faaola. Ao iai Iesu i luga o le satauro, o se tagata gaoi sa faasatauroina foi na faapea atu, “Le Alii e, ia e manatua mai a’u, pe a e afio mai i lou malo” (Luka 23:42). E tusa ai ma le Luka 23:43, na tali atu le Alii, “E moni, ou te fai atu ia te oe, o le aso ta te faatasi ai ma oe i parataiso.” Sa faamalamalama mai e le perofeta o Iosefa Samita o se faaliliuga le sao lenei; o le fetalaiga moni lava a le Alii e faapea o le a faatasi le gaoi ma Ia i le lalolagi o agaga.

## Pau

O le upu *parataiso* o loo maua foi i le 2 Korinito 12:4, lea e faaono faatatau i le malo selesitila. I le mataupu faavae o le faatuatua e sefulu, o le upu *faa-Parataiso* o loo faamatalaina ai le mamalu o le lalolagi i le taimi o le Meleniuma.

*Tagai foi* Oti, Faaletino; Ata o le Faaolataga; Toetu

## Pau

I le faatoaga o Etena, na poloaiina ai e le Atua, “O laau uma lava o i le faatoaga e te ai saoloto ai. A o le laau e iloa ai le lelei ma le leaga, aua e te ai ai; ae ui i lea, ia faitalia oe ma lau filifiliga i ai, aua ua tuuina atu ia te oe; peitai ia e manatua ua ou faasaina; aua o le aso e te ai ai, e te oti ai lava” (Mose 3:16–17). Ona ua solia e Atamu ma Eva lenei poloaiga ma aai i le fua o le laau e iloa ai le lelei ma le leaga, o lea sa tulieseai ai i la’ua mai le afioaga o le Alii (tagai MFF 29:40–41). I se isi faaupuga, sa oo ia te i laua le oti faaleagaga. Sa avea foi i la’ua ma tagata faitino—ua oo i ai le oti faaletino. O lenei oti faaleagaga ma le oti faaletino ua ta’ua o le Pau.

## O Lo Tatou Tulaga Pau

O le avea ai ma fanau e tupuga mai ia Atamu ma Eva, ua tuufaasolo mai ai ia i tatou se tulaga pau i le olaga faaletino (tagai Alema 42:5–9, 14). Ua vavaeeseina i tatou mai le afioaga o le Alii ma ua oo ai i le oti faaletino. Ua tuuina i tatou i se tulaga o le faafeagai, lea ua susesueina ai i tatou e ala i faa-fitauli o le olaga ma faaosoosoga a le fili (tagai 2 Nifae 2:11–14; MFF 29:39; Mose 6:48–49).

I lenei tulaga pau ma le puapuagatia, ua i ai se feteenaiga i totonu o i tatou. O i tatou o fanau agaga a le Atua, o i ai ni malosiaga e avea ai ma “tofusia faatasi ai . . . i le amio Atua” (2 Peteru 1:4). Ae ui i lea, “ua faaletusa i matou i luma [o le Atua]; ona o le pau ua leaga pea i matou” (Eteru 3:2). E tatau ona tatou agai pea i luma e faatoilalo ai tuinanau ma manaoga leaga.

I le toe faaleoina o upu a le agelu, na faapea mai ai le Tupu o Peniamina, “Aua o le tagata o le lalolagi o lē ita lea i le Atua, ma ua faapea talu le pau o Atamu e faapea foi e oo i le faavavau, faavavau lava. A e afai e gauai o ia i galuega alofa a le Agaga Paia, ma ua tuu ese le tagata o le agasala, ma ua avea o ia ma tagata amiotonu ona o le togiola o Keriso le Alii; ma ua avea foi o ia e pei o le tama itiiti, ua fia usiusitai, ma agamalu, ma faamaulalo, ma onosai, ma ua tumu i le alofa ma le fia gauai i mea uma ua silafia e le Atua e tatau ona fatiga ai o ia, e pei lava ona gauai le tama itiiti i lona tama” (Mosaea 3:19).

### Faamanuiaga o le Pau

O le Pau o se vaega taua tele o le fuafuaga o le faaolataga a le Tama Faalelagi (tagai 2 Nifae 2:15–16; 9:6). E valalua le faasinoga—e faasino i lalo ae agai i luma. E le gata ina aumaia ai le oti faaletino ma le faaleagaga, ae ua aumaia ai foi ia i tatou le avanoa e fananau mai ai i le fogaeleele ma aoao ai e alualu i luma. O lo tatou faaogaina ma le amiotonu o lo tatou saolotoga ma lo tatou salamo faamaoni pe a tatou agasala, e mafai ai ona tatou o mai ia Keriso ma, o Lana Togiola, e saunia ai mo le mauaina o le meaalofo o le ola faavavau. Na aoao mai le perofeta o Liae:

“O lenei, faauta, ana le solitulafono Atamu, po ua le pau o ia, a e tumau pea o ia i le faatoaga o Etena. Ma ua tumau lava mea uma ua faia e pei ona i ai ina ua uma ona faia, a e faapea pea lava e faavavau, e leai lava se iuga.

“Ma ua le fanafanau foi [Atamu ma Eva], o lea e tumau ai i laua i le le agasala, ua leai se olioli, aua ua le iloa se malaia, ua le fai se lelei, aua ua le iloa se agasala.

“A e peitai, faauta, ua faia mea uma i le potu o Le ua silafia mea uma.

“Na pau Atamu ina ia i ai tagata, ua ola tagata ina ia latou maua le olioli.

“E afio mai foi le Mesia i le atoatoa o aso ina ia togiola e ia le fanauga a tagata ai le pau” (2 Nifae 2:22–26; tagai foi fuaiupu 19–21, 27).

Na faamatalaina e Atamu ma Eva lo laua agaga faafetai mo faamanuiaga na oo mai talu le pau:

“Ma sa viia e Atamu le Atua i lena aso ma sa faatumuina o ia i le Agaga Paia, ma sa amata ona ia perofeta ane e uiga i aiga uma o le lalolagi, ua faapea atu: Ia viia le suafa o le Atua, aua ua pupula o’u mata ona o la’u solitulafono, ma o le a ou maua le olioli i le olaga nei, ma o le a ou toe vaai i le Atua i le tino.

“Ma sa faalogo Eva, le ava a Atamu, i ia mea uma, ma sa ia fiafia, ma faapea atu: Ana le seanoa la ta solitulafono, semanu ta te le maua ni fanau, ma lē iloa le lelei mai le leaga, ma le olioli o le togiolaina o i taua ma le ola faavavau e tuuina mai e le Atua ia i latou uma o e usiuitai” (Mose 5:10–11).

### Faaolaina mai le Pau

Ona o lo tatou natura pau i le olaga nei ma a tatou agasala a le tagata lava ia, pau lava lo tatou faamoemoega ua i ai lea ia Iesu Keriso ma le ata o le faaolataga.

O le Togiola a Iesu Keriso, o le a toe faaolaina ai tagata uma mai aafiaga o le Pau. O le a tatou toetutu uma, ma o le a toe aumaia i tatou i luma o le afioaga o le Alii ina ia faamasinoina ai (tagai 2 Nifae 2:5–10; Alema 11:42–45; Helamana 14:15–17).

E le gata ina faaolaina i tatou mai aafiaga o le Pau, ae e mafai foi e le Faaola ona faaolaina i tatou mai a tatou agasala. I lo tatou tulaga pau, ua tatou agasala ma faamamao ese i tatou lava mai le Alii, ma aumaia ai e i tatou lava le oti faaleagaga i o tatou luga. E pei ona faapea mai le Aposetolo o Paulo, “Ua agasala tagata uma lava ma ua le oo i le viiga mai le Atua” (Roma 3:23). Afai tatou te tumau i a tatou agasala, e le mafai ona tatou mau i le afioaga o le Atua, aua “e le mafai ona i ai se mea lē mama . . . i le malo o le Atua” (Mose 6:57). Faafetai tele, ona o le Togiola “e faataunuaina ai le ala o le salamo” (Helamana 14:18), ua mafai ai e i tatou ona maua le

faamagaloina o a tatou agasala ma mau i le afioaga o le Atua e faavavau. Na aoao mai Alema, “Ua tuuina mai i le tagata aso e salamo ai o ia; o le mea lea ua avea ai lenei olaga ma olaga faataitai, o aso e sauniuni ai e fetai ai ma le Atua, o aso e sauniuni ai i le ola faavavau na talatalaina atu e i ma’ua, e mulimuli ane lea i le toe tu mai o e ua oti” (Alema 12:24).

Agaga Faafetai mo le Taulaga Togiola a le Faaola

E pei lava ona tatou le manaomia tele se meaai seia lagona lo tatou mole, o le a tatou le manaomia atoatoa foi le faaolataga faavavau seiloga tatou te iloa lo tatou manaomia o le Faaola. O lenei iloa e oo mai a o tatou tuputupu ae i lo tatou malamalama e uiga i le Pau. E pei ona aoao mai le perofeta o Liae, “O lenei ua sē ma pa’ūū tagata uma, e faapea pea lava foi, sei iloga latou te faalagolago i lenei Togiola” (1 Nifae 10:6).

Mau Faapoopo: Kenese 3; Mamona 9:12–14; Mose 4

*Tagai foi* Saolotoga; Togiola a Iesu Keriso; Uluai Agasala; Ata o le Faaolataga; Agasala

**Penina Tau Tele** (*Tagai* Tususiga Paia)

## Perisitua

O le perisitua o le mana ma le pule e faavavau a le Atua. O le perisitua na foafoaina ai ma pulea e le Atua le lagi ma le lalolagi. O lea foi mana ua la faaolaina ma faaeaina ai Lana fanau, i le aumaia lea o “le tino ola pea ma le ola faavavau” (Mose 1:39).

Ua Tuuina mai le Pule o le Perisitua i Alii i luga o le Fogaeleele

Ua tuuina mai e le Atua le pule o le perisitua i alii agavaa uma o le Ekalesia ina ia mafai ai ona latou galulue i Lona suafa mo le faaolataga o Lana fanau. E mafai ona tuuina atu le pule i e umia le perisitua e talai ai le talalelei, faia sauniga



o le faaolataga, ma taitaiina ai le malo o le Atua i luga o le fogaeleele.

E mafai e tama tane o le Ekalesia ona amata auauna atu i le perisitua pe a atoa le 12 tausaga o lo latou matutua. E amata i lo latou mauaina o le Perisitua Arona, ma mulimuli ane ai e mafai ona agavaa mo le tuuina atu i ai o le Perisitua Mekisateko. I vaitausaga eseese o o latou olaga, ma a o saunia foi i latou mo le mauaina o matafaioi eseese, e umia e i latou tofi eseese i le perisitua, e pei o le tiakono, aoao, po o le ositaulaga i le Perisitua Arona ma le toeaia po o le faitaulaga sili i le Perisitua Mekisateko. (Mo faamatalaga patino e uiga i le Perisitua Arona ma le Mekisateko, tagai itulau 138–140.)

Ina ia umia e se alii o le Ekalesia le perisitua, e tatau i se tasi ua i ai lena pule o le perisitua ona faaee atu i ona luga ma faauuina o ia i lena tofi o le perisitua (tagai Eperu 5:4; MFF 42:11; Mataupu Faavae o le Faatuatua 1:5).

E ui lava e na o alii agavaa o le Ekalesia ua tuuina atu i ai le pule o le perisitua, ae o faamanuiaga o le perisitua e avanoa mo tagata uma—alii, tamaitai, ma fanau. E faamanuiaina uma lava i tatou mai taitaiga a perisitua amiotonu, ma e i ai foi ia i tatou uma le avanoa e maua ai sauniga faaola o le perisitua.

## Perisitua ma le Aiga

O le faaaogaina sili ona taua o le perisitua e tupu i totonu o le aiga. O tama taitaiga uma i totonu o le Ekalesia e tatau ona taumafai atili ia agavaa e umia le Perisitua Mekisateko. Faatasi ai ma lana ava o se paaga tutusa, e pulefaamalumu o ia ma le amiotonu ma le alofa, e galue o se taitaiga faaleagaga i le aiga. E na te taitaiina e le aunoa le aiga i talalo, aoaoina o tusitusiga paia, ma afiafi faaleaiga. E galulue ma lana ava e aoao le fanau ma fesoasoani ia i latou e saunia mo le mauaina o sauniga o le faaolataga (tagai MFF 68:25–28). E na te tuuina atu faamanuiaga o le perisitua mo le taitaiga, faamanuiaina, ma le faamafanafanaina.

E toatele tagata o le Ekalesia e le o i ai nisi e faamaoni o umia le Perisitua Mekisateko i o latou aiga. Ae ui i lea, e ala atu i auaunaga a faiaoga o aiga ma taitai perisitua, e mafai ai e tagata uma o le Ekalesia ona olioli i faamanuiaga o le mana o le perisitua i o latou olaga.

### Korama o le Perisitua

O se korama o le perisitua o se vaega tuufaatasi o uso e tutusa tofi o le perisitua o loo latou umia. O le uluai faamoe-moega lava o korama o le auauna atu lea i isi, fausia le lotogatasi ma le lagona faaleusoga, ma aoaoina e le tasi le isi i mataupu ma aoaoga faavae ma tiutetauave.

O korama e i ai i vaega uma lava o le faatulagaga o le Ekalesia. O le Peresitene o le Ekalesia ma ona fesoasoani ua faatulagaina ai le Korama a le Au Peresitene Sili. O Aposetolo e Toasefululua o se tasi lena korama. O Fitugafulu, e le gata i Pulega Aoao ae faapea foi Fitugafulu Pule Eria ua faatulagaina foi i korama. O le peresitene o siteki taitasi e pulefaamalumu i se korama o faitaulaga sili, lea e aofia ai faitaulaga sili uma lava i totonu o le siteki. O uarota foi po o paranesi taitasi e masani foi ona i ai korama a le au toeaia, ositaulaga, aoao, ma tiakono. Ua faatulagaina foi faitaulaga sili i totonu o uarota e galulue i ni vaega o faitaulaga sili.

### Faiaoga o Aiga

Mai le taimi e faauuina ai e ua umia le perisitua i le tofi o le aoao, e latou te maua ai le avanoa ma matafaioi e auuina ai o ni faiaoga o aiga. O le ala lea latou te galulue ai agai i le faataunuuna o o latou tiute e “leoleo pea i le ekalesia, faatasi ai ma le faamalosia o i latou” (MFF 20:53).

O faiaoga o aiga o loo i ai se tiute paia o le avea ai ma fesoasoani muamua o le Ekalesia i tagata taitoatasi ma aiga. Latou te asiasi atu i aiga ua tofia i ai i latou ia lē itiiti ifo ma le ta’itasi i masina. O lo latou auauna atu ma asiasi i aiga ua tofia i ai, latou te lagolago atu ai i matua i o latou tiutetauave,

## *Perisitua*

aoao atu le talalelei i tagata taitoatasi o le aiga, atiina ae faigauo, ma fesoasoani i tagata ina ia saunia mo le mauaina o sauniga o le malumalu ma ola agavaa mo faamanuiaga o le talalelei.

Ia mautinoa e taitai i totonu o uarota ma paranesi ua tofia ni faiaoga o aiga i aiga taitasi po o tagata taitoatasi. Latou te taulogologo atu pea i faiaoga o aiga ina ia fesoasoani e tauilima manaoga faaleagaga ma faaletino o tagata taitoatasi.

### Ki o le Perisitua

O le faaaogaina o le pule o le perisitua i totonu o le Ekalesia e taitaiina e i latou o e umia ki o le perisitua (tagai MFF 65:2; 124:123). O i latou o e umia ki e ia i latou le aia tatau e pulefaamalumalu ai ma taitaia le Ekalesia e tusa ai ma faatonuga. Mo se faaitaiga, e umia e se epikopo ia ki o le perisitua e mafai ai e ia ona pulefaamalumalu i totonu o lana uarota. O le mea lea, pe a saunia se tamaitiiti i totonu o lena uarota e papatiso, o le tagata e faia le papatisoga e tatau ona ia maua mai le faatagaga mai le epikopo.

E umia e Iesu Keriso ki uma lava o le perisitua. Ua ia tuuina mai i Ana Aposetolo ia ki e manaomia mo le taitaiina o Lana Ekalesia. E na o le Aposetolo sinia, le Perisitene o le Ekalesia, e mafai ona faaaogaina (pe tuuina atu le faatagaga i se isi tagata e faaoga ai) nei ki mo le taitaiina o le Ekalesia atoa (tagai MFF 43:1–4; 81:2; 132:7).

O le Perisitene o le Ekalesia e tuuina atu ki o le perisitua i isi taitai perisitua ina ia mafai ai ona latou pulefaamalumalu i vaega o loo latou vaaia. O ki o le perisitua e tuuina atu i perisitene o malumalu, misiona, siteki, ma itu; epikopo; perisitene o paranesi ma perisitene o korama. O se tagata e galue ai i se tasi o nei tofiga, na te umia lava ki seia oo i le taimi e faamalolo ai. O fesoasoani e lē tuuina i ai ni ki, ae tuuina latou te maua le pule e ala i o latou valaauga ma tiute e faataunuuiina.

## Faaaogaina ma le Amiotonu o le Perisitua

Afai o e umia le perisitua, ia manatua o le perisitua e tatau ona avea ma se vaega o oe i taimi uma ma soo se tulaga lava. E le pei o se ofu talaloa e te ofuina ma toe tatala ese pe a e loto i ai. O soo se faauuga lava i le tofi o le perisitua, o se valaauga o le auaunaga i le olaga, faatasi ai ma se folafolaga e faapea o le a faaagavaaina oe e le Alii e faia Lana galuega e tusa ai ma lou faatuatua.

E tatau ona e agavaa ina ia mafai ai ona faaaogaina le mana o le perisitua. O upu e te tautala ai ma au amioga, e aafia ai le tulaga e te auauna atu ai. O lau amio i luma o tagata lautele e tatau ona leai se mea e pona ai. A o lau amio pe a na o oe lava, e sili atu lena ona taua. E ala mai i le perofeta o Iosefa Samita, na saunoa mai ai le Alii e faapea “o aia tatau a le Perisitua e faafesoota’iina e le mavavae’eseina ma mana o le lagi, e le mafai foi ona faatonuina pe faaaogaina ia mana o le lagi tau lava o mataupu faavae o le amiotonu” (MFF 121:36). Sa Ia lapataiina i latou e umia le perisitua:

“A e pe a tau ufiufi a tatou agasala, pe faamalie lo tatou loto maualuga, lo tatou fia sili lē aoga, pe faatonuina pe pulea pe faamalosi i agaga o le fanau a tagata i soo se faiga lava o le amioletonu, faauta, e punitia lava le lagi; e tiga le Agaga o le Alii; pe a aveeseina foi, Amene i le perisitua po o le pule a lena tagata” (MFF 121:37–38).

E le mafai ona e faatumauina soo se mana po o se uunaiiga o le perisitua se i vagana “i le tauanau atu, i le faapalepale, agalelei, ma le agamalu, ma le alofa faamaoni; i le agalelei, ma le malamalama mama, e matua faalauteleina ai le aga e aunoa ma le pepelo, e aunoa ma le faaoleole.” Pe afai ua “uunaiina e le Agaga Paia” oe e aoai atu i se tasi, ia faailoa atu ai mulimuli le “alofa faateleina i le ua e aoaoina, ina nei fai oe e ia mona fili; ina ia na iloa ai o lou faamaoni e sili atu ona malosi i lo noataga o le oti” (MFF 121:41–43).

Ao e faaogaina ma le amiotonu ma le alofa le perisitua, o le a e maua le olioli i le auauna ai o se meafaigaluega i aao o le Alii. Na Ia fetalai mai:

“Ia tumu foi lou loto i le alofa atu i tagata uma, ma le aiga o le faatuatua, ia teuteuina ou manatu i le mama e le aunoa; ona malosi ai lea o lou faatuatua fai ifo i luma o le Atua; ma toto ifo i lou agaga le mataupu faavae o le perisitua e pei o le sau mai le lagi.

“E avea le Agaga Paia ma au aumea tumau, a o lou tootoo ma tootoo le feliiuluai o le amiotonu ma le upu moni; o lou malo foi o le a faia ma malo faavavau, e aunoa foi ma faiga faamalosi o le a tafe ia te oe e faavavau faavavau lava” (MFF 121:45–46).

Faamatalaga Faaopoopo: Ioane 15:16; Galuega 8:14–20; Iakopo 5:14–15; MFF 13; 20; 84; 107; Iosefa Samita—Talafaasolopito 2:68–73

*Tagai foi* Perisitua Arona; Taitaiga o le Ekalesia; Perisitua Mekisateko; Sauniga; Toefuataiina o le Talalelei

## **Perisitua Arona**

Ao faaliliuina e le Perofeta o Iosefa Samita le Tusi a Mamona, sa ia iloa ai o loo ta’ua le papatisoga mo le faamagaloina o agasala. I le aso 15 o Me 1829, sa la o atu ai ma lana failautusi o Oliva Kaotui i le vao e fesili atu i le Alii e uiga i le papatisoga. Ao tatalo i la’ua, “sa oo ina oo ifo mai le lagi se avefeau i se ao malamalama tele.” O lenei avefeau o Ioane le Papatiso, o le perofeta sa papatisoina Iesu Keriso i seneturi ua mavae. O Ioane le Papatiso, ua avea nei ma tagata toetu, sa tuu ona lima i luga o Iosefa ma luga o Oliva ma faaee atu ia te i la’ua uma le Perisitua Arona, lea sa aveesea mai i le lalolagi i le taimi o le Liliuese Tele. O lenei pule, sa mafai ai e Iosefa ma Oliva ona papatiso e le tasi le isi (Tagai Iosefa Samita—Talafaasolopito 2:68–72.)

I totonu o le Ekalesia i aso nei, o alii agavaa o le Ekalesia e mafai ona maua le Perisitua Arona e amata mai i le 12 tausaga. Latou te maua le tele o avanoa e auai ai i sauniga paia

o le perisitua ma tuuina atu auaunaga. Ao latou faataunuuina ma le agavaa o latou tiute, latou te galulue i le suafa o le Alii e fesoasoani i isi ia maua faamanuiaga o le talalelei.

O tofi o le Perisitua Arona o le Epikopo, ositaulaga, aoao, ma le tiakono. O le faatagaga a le taitai perisitua pulefaamalumu (e masani lava o le epikopo po o le peresitene o le paranesi), o tiakono e tufaina le faamanatuga. Latou te fesoasoani i le epikopo po o le peresitene o le paranesi e vaavaai lelei tagata o le Ekalesia e ala i le tuuina atu o auaunaga, ma fesoasoani i tulaga faaletino e pei o le aoina o taulaga anapogi. E mafai e aoao ona faia tiute uma o le tiakono, ma latou te maua foi isi avanoa e auauna ai. Latou te saunia le areto ma le vai o le faamanatuga ma galulue o ni faiaoga o aiga. E mafai e ositaulaga ona faia tiute o tiakono ma aoao. A tuu atu i ai le faatagaga a le taitai perisitua pulefaamalumu, e mafai foi ona latou faamanuiaina le faamanatuga, papatiso, ma faauuina isi i le tofi o le ositaulaga, aoao ma le tiakono.

O le Perisitua Arona o se “lala i le Perisitua Sili po o le faaMekisateko” (MFF 107:14). E masani lava ona taua o le perisitua sauniuni. A o auauna atu se tasi o umia le perisitua i le Perisitua Arona, e saunia o ia e maua le Perisitua Mekisateko, e maua ai faamanuiaga o le malumu, e faia ai se misiona talai, e avea ma se tane ma se tamā alofa, ma faauau pea ona auauna i le Alii i le olaga atoa.

*Tagai foi Perisitua Mekisateko; Perisitua*

## **Perisitua Mekisateko**

“E i le ekalesia, perisitua e lua, o le Mekisateko ma le Arona” (MFF 107:1). O le Perisitua Mekisateko, lea “e tusa ma le faatulagaga a le Alo o le Atua” (MFF 107:3), e sili atu i nei perisitua. O loo “i ai le aia e fai ma peresitene, e i ai foi le mana ma le pule i tofiga uma i le ekalesia” (MFF 107:8). O loo umia foi e lea perisitua “ki o faamanuiaga faaleagaga uma o le ekalesia” (MFF 107:18). Ua faaigoa i se faitaulaga sili

maoae o le na soifua i le taimi o le perofeta o Aperaaamo (tagai MFF 107:2–4; Tagai foi i le Alema 13:14–19).

E ala mai i le pule o le Perisitua Mekisateko, o loo taitaina ai e taitai o le Ekalesia le Ekalesia ma taitaia ai le folafolaina atu o le talalelei i le lalolagi. I totonu o sauniga o le Perisitua Mekisateko, “ua faaalua ai le mana o le amioatua” (MFF 84:20).

O lenei perisitua sili na tuuina atu ia Atamu ma ua i ai i luga o le fogaeleele i soo se taimi lava na faailoa mai ai e le Alii Lana talalelei. Na aveesea mai le fogaeleele i le taimi o le Liliuese Tele, peitai na toefuataiina mai ia Me 1829, i le taimi na faaee atu ai e Aposetolo o Peteru, Iakopo, ma Ioane i luga o Iosefa Samita ma Oliva Kaotui.

O tofi o le Perisitua Mekisateko o Aposetolo, Fitugafulu, peteriaka, faitaulaga sili, ma toaina. O le Perisitene o le Perisitua Mauulaga o le Perisitene o le Ekalesia (tagai MFF 107:64–66).

O alii i le Ekalesia e tataua ona avea ma ni tagata agavaa e umia le Perisitua Mekisateko ina ia mafai ai ona maua faaeega paia i le malumalu ma faamauina i o latou aiga mo le faavavau. E ia i latou le pule e faamanuia ai i latou e mamai ma tuuina atu faamanuiaga faapitoa i tagata o aiga ma isi. Faatasi ai ma le faatagaga mai taitai perisitua pulefaamalumu, e mafai ona latou faaee atu le meaalofoa a le Agaga Paia ma faauuina isi alii agavaa i tofi o le Perisitua Arona ma le Perisitua Mekisateko.

Pe a maua e se alii le Perisitua Mekisateko ua ulu atu o ia i le tautoga ma le feagaiga o le perisitua. Ua osifeagaiga o ia e faamaoni, faalauteleina lona valaauga, “gauai ma le filiga i upu o le ola faavavau,” ma “ola i upu uma e oo atu mai le fofoga o le Atua.” O i latou e tausia lenei feagaiga o le a faamamaina e le Agaga ma maua “mea uma o i ai i [le] Tama.” (Tagai MFF 84:33–44.)

*Tagai foi Perisitua Arona; Perisitua*

## Perofeta

I le avea ai o i tatou ma tagata o le Ekalesia a Iesu Keriso o le Au Paia o Aso e Gata Ai, ua faamanuiaina i tatou aua ua ta'ita'i e perofeta soifua—o alii musuia ua tofia e saunoa e fai ma sui o le Alii, e pei lava o Mose, Isaia, Peteru, Paulo, Nifae, Mamona, ma isi perofeta o tusitusiga paia. Ua tatou lagolagoina le Peresitene o le Ekalesia o so tatou perofeta, tagata vaai, ma tali faaaliga—ua na o le pau lea o le tagata i le lalolagi e mauaina faaaliga e taitaiina ai le Ekalesia aoao. Tatou te lagolagoina foi fesoasoani i le Au Peresitene Sili ma sui o le Korama a le Toasefululua o ni perofeta, tagata vaai, ma tali faaaliga.

O perofeta o aso nei ua faapei lava o perofeta anamua e molimau ia Iesu Keriso ma aoao atu Lana talalelei. Latou te faailoa atu le finagalo ma uiga moni o le Atua. Latou te saunoa mai ma le lē fefefe ma le manino, e ta'utino mai le leaga o le agasala ma lapatai mai i ona taunuuga. E i ai foi taimi e musuia ai i latou e perofeta ane i mea o le a tutupu i le lumanai mo lo tatou manuia.

E mafai lava ona e faatuatuaina i taimi uma perofeta soifua. O a latou aoaoga e faaalua ai le finagalo o le Alii, o lē na folafola mai: “O le mea ua fai atu ai au le Alii ua ou fai atu ai lava, ma ou te le faatoese ai lava au; ma e ui ina mavae atu le lagi ma le lalolagi, a e le mavae atu lava la'u upu, a o le a faataunuaina lava, pe fai atu i lo'u lava leo po o le leo o au au-auna, ua tusa lava ia” (MFF 1:38).

O lou saogalemu silisili o loo taoto i lou mulimuli tonu lea i afioga a le Alii ua tuuina mai e ala mai i Ana perofeta, aemaise lava i le Peresitene o le Ekalesia o loo i ai nei. Na lapatai mai le Alii, o i latou o e le talia upu a perofeta soifua o le a pauu (tagai MFF 1:14–16). Ua Ia folafola mai faamanuiaga silisili ia i latou o e mulimuli i le Peresitene o le Ekalesia:

“Ia outou gauai i ana upu uma ma poloaiga o le a tuuina atu e ia ia te outou e pei ona ia maua, ma savavali i o'u luma i le paia atoatoa;



## *Puapuaga*

“Aua o lana upu o le a outou talia, e pei lava o loo alu atu mai ia te au, i le onosai uma ma le faatuatua.

“Aua o le faia o nei mea o le a le manumalo ai faitotoa o seoli ia te outou; ioe, a e tafieseina e le Alii le Atua le malosi o le pogisa mai o outou luma, ma luluina le lagi mo lo outou lelei, atoa ma le mamalu o lona suafa” (MFF 21:4–6).

Faamatalaga Faaopoopo: 2 Nofoaiga a Tupu 20:20; Amosa 3:7; Efeso 2:19–20; 1 Nifae 22:1–2; Mosaea 13:33–35; MFF 107:91–92; Mataupu Faavae o le Faatuatua 1:6

## **Puapuaga**

O se vaega o le ata o le faaolataga a le Tama Faalelagi, lou fetaii ma puapuaga i le taimi o le olaga faaletino. O tofotofoga, o mea e lē fialia ai, faanoanoaga, ma’i, ma le loto tiga, o ni vaega faigata o le olaga, ae peitai e mafai ona latou taitaiina atu i le tuputupu a’e faaleagaga, faaleleia atili, ma le alu alu i luma a o e liliu atu i le Alii.

O puapuaga e eseese mafuaaga e oo mai ai. E ono mafai i nisi taimi ona lua fetaii ma tofotofoga, o se taunuuga lea o lou faamaualuga ma le le usiusitai. O nei tofotofoga e mafai ona aloese mai ai e ala i le ola amiotonu. O isi tofotofoga o ni vaega faanatura o le olaga ma e ono oo mai i taimi o loo e ola amiotonu. Mo se faataitaiga, e mafai ona tupu ia te oe tofotofoga i taimi o ma’i, po o le lē mautonu, po o le oti foi o e pele. E oo mai puapuaga i nisi o taimi ona o filifiliga le lelei ma upu ma gaoioiga faatiga a isi.

### Tali atu ma le Faatuatua i Puapuaga

O lou manumalo ma le fialia, i le taimi nei ma le faavaavau, e faalagolago tele lea i lau tali atu i faigata o le olaga.

O se tala i totonu o le Tusi a Mamona ua faailoa mai ai tali eseese i puapuaga. Sa faimalaga le perofeta o Liae ma lona aiga i le vao mo le tele o aso, ma faaoga a latou aufana ma aū e saili ai meaai. Sa fetaii’i le aiga ma faigata ina ua le toe mafai ona faaoga aufana a atalii o Liae. Sa le toe malo-

losi aufana a Lamana ma Lemuelu, ma ua le toe aoga foi le aufana a Nifae. Sa fia aai ma vaivai, ma ua amata ona muimui Lamana ma Lemuelu i le Alii. E oo lava ia Liae na amata foi ona muimui. Ae o Nifae, sa le manao e faavaivai. Sa ia alu e galue. Na tomanatu: “Ua oo foi ina faia e au o Nifae le aufana laau, ma le u i le laau sagatonu. O lenei foi, ua ou fai aupega aū i le aufana ma le u, atoa ma le maata ma maa. Ua ou fai atu foi i lo’u tama: Po o fea le mea ou te alu i ai e maua ai mea e ai?” Na faamaualaloina Liae ona o upu a Nifae, ma sa fesili atu ai o ia i le Alii po o fea latou te o e maua mai ai ni meaai? Na tali mai le Alii i ana tatalo ma taitaiina Nifae i se nofoaga e mafai ona maua mai ai meaai. (Tagai 1 Nifae 16:15–31.)

O nisi tagata a fetaiiai ma faigata, e pei lava i latou o Lamana ma Lemuelu. Latou te faitai ma tomumumu. Latou te fesili i fesili nei, “Aisea ua tupu ai ia te au nei mea? E tatau ea i se a ona ou puapuagatia i lenei mea i lenei taimi? O le a se mea sa ou faia ua talafeagai ai ona oo mai lenei mea?” Ae o nei fesili e i ai le malosiaga e osofaia ai o latou mafaufauga. O fesili faapenei e faigata ai ona latou malamalama, e mitiia ai lo latou malosi, ma faoa mai ia i latou le malamalama e finagalo le Alii ia latou maua. Nai lo lou tali atu i ai faapena, e ao ona e mulimuli i le faataitaiga a Nifae. Mafaufau e fesili atu i fesili e pei o le, “O le a le mea e tatau ona ou faia? O le a se mea e tatau ona ou aoaoina mai lenei mea na tupu? O le a se mea e ao ona ou suia? O ai e tatau ona ou fesoasoani i ai? E faapefea ona ou manatuaina ou faamanuiaga e tele i taimi o faigata”

E manaomia tali eseese mo puapuaga eseese. Mo se faataitaiga, afai e aafia oe i se ma’i, atonu pau lava le mea e fai o lou onosai ma faatuatua. Afai e te mafatia ona o upu ma amioga faatiga a isi, e ao ona e galue agai i le faamagaloina o e sa faatuāupua oe. Afai sa aafia fua oe i se faiga sau po o le faatautala, e ao ona e sailia loa lava se fesoasoani. Afai e oo mai tofotofoga ona o lou lava le usitai, e ao ona faasa’o lau amio ma sailia ma le agaga maualalo le faamagaloga.

## *Puapuaga*

E ui lava ina eseese nisi o au tali i puapuaga, ae tasi le tali e tataua lava ona le suia—o lou faalagolago lea i le Tama Faalelagi ma Iesu Keriso. Sa aoao mai le perofeta o Alema, “O i latou uma o e faalagolago i le Atua, e lagolagoina i latou i o latou tofotofoga, ma o latou tiga, ma o latou puapuaga, e faaeaina foi i latou i le aso gataaga” (Alema 36:3).

### Faalagolago i le Tama Faalelagi ma Iesu Keriso

Pe a e faalagolago i le Tama ma le Alo, ua e mautinoa e alolofa faamaoni i La’ua ia te oe—ma e finagalo i La’ua ia e fiafia ma o le a La fesoasoani ia te oe ia faatupula’ia lou faaleagaga. Ia e tausii i poloaiga. Ia e saili ia iloa lo La’ua finagalo, ma faia mea La te finagalo ai e tusa lava pe o e manao i se isi mea. O au tatalo mo se fesoasoani, ia faia faatasi ma lou malamalama o le a le foia e le Tama Faalelagi mea uma i se taimi vave—anei Na te faatagaina oe e te faatali ina ia mafai ona faaauau pea ona e aoao ma faatupula’ia ai. O nei mea uma, o le a e maua ai le faamafanafanaga i le mautinoa lea e malamalama lelei le Faaola i ou tofotofoga. O se vaega o Lana Togiola le iu, na Ia tauaveina ai i Ona luga, “puapuaga ma ma’i o lona nuu.” Na Ia tauaveina i Ona luga “o latou vaivai, ina ia faatumuina lona alo i le alofa e tusa ma le faaletino, ina ia silafia e ia e tusa ma le tino le ala e tausii ai lona nuu e tusa ma o latou vaivai” (Alema 7:11–12). Ona sa ia tauaveina ou tiga, Na te silafia le ala e fesoasoani ai ia te oe. Afai e te tauilai atu ia te Ia i le faatuatua, o le a Ia faamalosia oe ina ia e lavātia soo se tofotofoga e oo atu ia te oe.

Ao e taumafai e faalagolago i le Alii i taimi o tofotofoga, ia e manatua le fautuaga lenei na tuuina atu i le Perofeta o Iosefa Samita:

“O lē faamaoni i puapuaga e sili atu lona tau i le malo o le lagi.

“Tou te le mafaia ona vaai i o outou mata faaletino, i lenei olaga le faatatauga a lo outou Atua e uiga i na mea o le a oo mai i aso lumanai, atoa ma le mamalu e mulimuli ai pe a mavae puapuaga e tele.

“Aua e oo mai faamanuiaga pe a mavae atu puapuaga e tele ” (MFF 58:2–4).

Mauaina o le Filemu ma le Olioli i taimi o Puapuaga

E mafai ona e maua le filemu ma le olioli e tusa lava pe te lua tauivi ma luitau ma faanoanoaga. O loo i ai i le Tusi a Mamona ni faamaumauga o ni tagata amiotonu o e na aoaoina lenei mea moni. A o puapuaga i le pologa i lalo o se pulega saua, sa sasaa atu o latou loto i le Atua (tagai Mosaea 24:8–12). Na tali mai le Alii:

“Ina faaea ia o outou ulu ma ia lototetele aua ua ou iloa le feagaiga ua outou osia ma au; Ou te faia foi le feagaiga ma lo’u nuu ma laveai ia te i latou ai le nofopologa.

“Ou te faamāmāina foi avega ua faaeina i o outou tauau ina ia outou le lagona ai lava i outou tua, manu lava o outou nofo pologa. Ou te faia foi lenei mea ina ia outou laulaututu e fai ma molimau ia te au i aso amuli ina ia outou mautinoa lava o au o le Alii le Atua, ua asiasi atu i lo’u nuu i o latou puapuaga” (Mosaea 24:13–14).

Sa tali atu tagata i le faatuatua, ma “faamamasagia ai avega na faaeina ia i [latou] ioe ua faamalolusia i latou e le Atua ina ia faigofie ona latou tauave a latou avega, ma ua latou gauai ma le loto fiafia ma le onosai i le finagalo atoa o le Atua” (Mosaea 24:15).

E faapei o nei tagata amiotonu, e mafai ona e “gauai ma le loto fiafia ma le onosai i le finagalo atoa o le Atua,” i le iloa o le a Ia faamalolusia oe i ou puapuaga. Ua Ia folafola mai, “O mea uma foi na puapuagatia ai outou o le a galulue faatasi mo lo outou lelei atoa ma le mamalu o lo’u igoa” (MFF 98:3).

Mau faaopoopo: Eperu 4:15–16; 2 Nifae 2:11–24; Mosaea 23:21–22; MFF 105:6; 121:7–9; 122

*Tagai foi* Faamagaloga; Faamoemoe; Filemu; Ata o le Faolataga; Salamo

**Pulega Aoao** (*Tagai* Taitaiga o le Ekalesia)

## **Salamo**

O le salamo o se tasi lea o uluai mataupu faavae o le tala-lelei (tagai Mataupu Faavae o le Faatuatua 1:4). E manaomia mo lou fiafia i lenei olaga seia oo atu lava i le faavavau. O le salamo e sili atu nai lo na o le faailoa atu o mea sese ua fai. O se suiga o le mafaufau ma le loto lea e aumaia ai ia te oe se vaaiga fou e uiga i le Atua, e uiga ia te oe, ma le lalolagi. E aofia ai le liliuese mai le agasala ma liliu atu i le Atua mo le faamagaloga. E uunaia e le alofa mo le Atua ma le manao moni e usitai i Ana poloaiga.

### **O Le Manaomia o le Salamo**

Ua folafola mai e le Alii e faapea “e le mafai ona fai le malo o le lagi ma tofi o se mea eleelea” (Alema 11:37). O au agasala e faapalapalaina ai oe—e te le agavaa ai e foi atu ma mau faatasi ma lou Tama Faalelagi. E aumaia ai foi le tiga i lou agaga i lenei olaga.

O le togiola a Iesu Keriso, ua saunia ai e le Tama Faalelagi le ala lenei e tasi mo oe e faamagaloina ai au agasala (tagai “Faamagaloga,” itulau 42–45). Na puapuagatia Iesu Keriso i le sala mo au agasala ina ia mafai ai ona faamagaloina oe pe afai e te salamo faamaoni. A e salamo ma faalagolago atu i Lona alofa tunoa e laveai ai, o le a faamamaina oe mai le agasala. Na ia fetalai mai:

“Ou te poloai atu ai ia te oe ia salamo—salamo, ne’i ou taia oe i la’u upu, i le tiga tele o lo’u loto ma lo’u ita, ma e faigata tele ou puapuaga—o le tiga e te le i iloa, ma o le uiga ese o le tiga e te le i iloa, ioe, o le faigata ona onosai e te le i iloa.

“Aua faauta, o au le Atua na puapuagatia i nei mea mo tagata uma, ina ia latou le puapuagatia i nei mea mo tagata uma, ina ia latou le puapuagatia pe afai latou te salamo;

“A e peitai, afai latou te le salamo, e ao ina latou tiga e pei o au;

“O le tiga lea na faagateteina ai au lava, o le Atua, le sili-sili ese i mea uma, ona o le tiga, ma na maligi ai le toto mai

pu laiti uma lava o le tino, ma na tiga le tino atoa ma le agaga—ma sa ou loto ou te le inu i le ipu oona, ae teena—

“A e ui i lea, ia i le Tama le viiga, ma na ou inu ma faa-umaina ai au sauniuniga i le fanau a tagata” (MFF 19:15–19).

### O Le Matautia o le Faatuai ona Salamo

Aua e te taumafai e taumamāina lau agasala ma faatuatuaui ona e salamo. Na lapatai mai Amoleka: “E tatau i tagata ona sauniuni i lenei olaga e fetaiai ma le Atua; ioe, faauta, o le aso o lenei olaga, o le aso lea e tatau ona fai ai e tagata a latou galuega. . . . o le mea lea ou te aioi atu ai ia te outou, aua tou te faatuai le aso o lo outou salamo e oo i le iuga; aua pe a mavae atu le aso nei o le ola ua tuuina mai e saunia ai i le ola faavavau, faauta, afai tatou te le faaaoga o tatou aso manu o i lenei olaga, ona oo mai ai lea le po o le pogisa, e le mafai ona fai ai se galuega e tasi” (Alema 34:32–33).

### Elemene o le Salamo

O le salamo o se faagasologa tiga, peitai e oo atu ai i le faamagaloga ma le filemu. Na fetalai mai le Alii e ala mai i le perofeta o Isaia, “e ui lava ina pei o ofu mumu a outou agasala, e sisina ia e pei o le kiona; e ui lava ina mumu ia e pei o le ie ulaula, e avea e pei o fulufulu mamoe” (Isaia 1:18). Ua folafola mai e le Alii i le augatupulaga lenei, “O le ua salamo i ana agasala, e faamagaloina o ia, ma o au, le Alii, ou te le toe manatua lava” (MFF 58:42). O le salamo e aofia ai elemene nei:

*Faatuatua i le Tama Faalelagi ma Iesu Keriso.* O le malosi o le agasala e matautia. Ina ia saoloto mai ai, e tatau ona e liliu atu i lou Tama Faalelagi ma tatalo i le faatuatua. E ono taumafai malosi Satani e faaseseina oe e faapea e te le o agavaa e tatalo—e le o fiafia foi le Tama Faalelagi ia te oe ma o le a le faafofoga mai o Ia i au tatalo. O se pepelo lena mea. E saunia pea e le aunoa lou Tama i le Lagi e fesoasoani ia te oe pe afai o le a e alu atu ia te Ia ma le loto salamo. O loo ia te Ia le mana

e faamalolo ai ia te oe ma fesoasoani ai ina ia e faatoilaloina le agasala.

O le salamo o se aga o le faatuatua ia Iesu Keriso—o se faailoga aloaia o le mana o Lana Togiola. Manatua e na o Lana lava faatulagaga e mafai ona faamagaloina ai oe. A outou malamalama ma le agaga faafetai i Lana Togiola ma Lona mana e faamamaina ai outou mai le agasala, ua mafai ona “faaoga lo outou faatuatua e oo i le salamo” (Alema 34:17).

*Faanoanoa mo le Agasala.* Ina ia mafai ona faamagaloina, e tatau ona muamua ona e iloa i lou loto ua e agasala. Afai o e taumafai malosi e ola i le talalelei, o lona iloa o le a taitaiina atu i le “tiga e tusa i le Atua,” lea e “tupu ai le salamo e oo i le ola” (2 Korinito 7:10). O le tiga e tusa i le Atua e le oo mai ona o le taunuuga faalenatura o le agasala pe ona o le fefe i se faasalaga, ae e oo mai mai lou iloa, ua e faatiga i lou Tama Faalelagi ma lou Faaola. Pe a e lagonaina le tiga e tusa i le Atua, ua ia te oe le manao faamaoni mo le suiga ma le nau-nautaiiga e te oo atu i tulaga uma e manaomia mo le faamagaloga.

*Ta’uta’u Atua.* “O le ua ufiufi lona solitulafono, e le manuia o ia; a o le ua faali ma lafoaiina, e alofagia o ia” (Faataoto 28:13). E taua mo le faamagaloga, se nau-nautaiiga e faailoa atu mea uma na e faia i lou Tama Faalelagi. Tootuli atu i Ona luma i le tatalo ma le faamaulalo, ta’uta’u atu au agasala. Ta’uta’u atu lou maasiasi ma lou ta’usalaina, ona e aioi atu ai lea mo se fesoasoani.

O solitulafono matuia, e pei o le solia o le tulafono o le legavia, e ono faaletonu lou avea ma se tagata o le Ekalesia. O le mea lea, e manaomia ai ona e ta’uta’u atu nei agasala i le Alii faapea foi ma Ona sui i totonu o le Ekalesia. E faia lenei mea i lalo o le fesoasoani a lou epikopo po o le peresitene o le paranesi, po o lou peresitene o le siteki po o le misiona foi, o e ua galulue o ni tagatavaai ma faamasino i totonu o le Ekalesia. E ui e na o le Alii e faamagaloina agasala, ae o nei

taitai perisitua latou te faia se galuega e matuai taua lava i le faagasologa o le salamo. O le a latou le faalaua'iteleina le ta'uta'uina atu o au agasala, ma o le a fesoasoani atu ia te oe i le faagasologa o lou salamo. Ia e matuai faamaoni ia i latou. Afai e te ta'uta'u atu na o se vaega o mea sese laiti, o le a lē mafai lava ona e foia se solitulafono matuia e te le'i faailoa atu. O le vave ona e amataina o lenei faagasologa, o le vave foi lena ona e maua le filemu ma le olioli lea e maua mai i le vavega o le faamagalo atu.

*Lafoaia o le Agasala.* E ui lava o le ta'uta'u atu o se vaega taua o le salamo, ae e le lava lena. Na fetalai mai le Alii, "Tou te iloa faapea se ua salamo i ana agasala—faauta, na te tautau atu ma lafoa'ia" (MFF 58:43).

Ia faia se tautinoga mausali ma tumau o lou le toe faia o le solitulafono. Afai o le a e ola ai i lea tautinoga, o le a e le toe lagonaina lava le tiga o le agasala.

Ia vave ona e sola ese mai soo se tulaga matuia lava. Afai o lea tulaga e mafua ai ona e agasala pe o le a mafua ai foi ona faia le agasala, alu ese. E le mafai ona faaauau ai pea ona e faalatalata i le faaososoga ma faamoemoe o le a mafai ona e teena le agasala.

*Toe Faaleleia.* E tatau lava ona e toe faaleleia i le mamao e mafai ai mea uma na faaleagaina i au amioga, pe o se meatotino a se tagata pe o se igoa tauleleia o se tagata. O le nau-nautai e toe faaleleia e faali atu ai i le Alii o le a e faia mea uma e te mafaia e te salamo ai.

*Ola Amiotonu.* E le lava le na o le taumafai e tetee atu i le leaga pe faagaogaoina foi lou olaga mai agasala. E tatau ona faatumuina lou olaga i le amiotonu ma auai i gaoioiga e aumaia ai le mana faaleagaga. Ia matuai tuuina atu oe lava i tusitusiga paia. Ia tatalo i aso uma ina ia tuuina mai e le Alii ia te oe le malosi e sili atu. Ia i ai foi ni taimi e te anapogi ai mo faamanuiaga faapitoa.

O le ususitai atoatoa e aumaia ai le mana atoatoa o le tala-lelei i lou olaga, e aofia ai le malosi faateleina e faatoilalo ai ou



*Samita, Iosefa Le Itiiti.*

vaivaiga. O lenei usiusitai e aofia ai gaoioiga atonu e te le i manatu i ai muamua o ni elemene o le salamo, e pei o le auai i sauniga, totogiina o le sefuluai, tuuina atu o auauunaga, ma le faamagalalo atu i isi. Ua folafola mai e le Alii, “O le salamo ma faia poloaiga a le Alii o le a faamagaloina” (MFF 1:32).

Faamatalaga Faaopoopo: Luka 15:11–32; 2 Nifae 9:19–24; Mosaea 4:1–3, 10–13; 26:30–31; MFF 18:10–16

*Tagai foi* Togiola a Iesu Keriso; Papatisoga; Fono Aoai faaleEkalesia; Faatuatua; Faamagaloga; Ata o le Faaolataga; Agasala; Faaosoosoga

**Samita, Iosefa Le Itiiti.** (*Tagai Iosefa Samita*)

## Saolotoga

Ua tuuina atu e lo’u Tama Faalelagi ia te oe le saolotoga, o le mana e filifili ma faatino ai mo oe lava ia. E taua tele le saolotoga i le ata o le faaolataga. A aunoa ma le saolotoga, o le a le mafai ona e aoao pe alualu i luma pe mulimuli i le Faaola. O le i ai o le saolotoga, ua e “saoloto e filifili le saolotoga ma le ola faavavau talu le Puluvaiga sili o tagata uma, pe filifili i le faatoilaloina ma le oti, e tusa ma le faatoilaloina ma le mana o le tiapolo” (2 Nifae 2:27).

Sa ia te oe le mana e filifili ai ae e te lei fanau mai. I le Fono i le Lagi i le muai olaga, sa faaali atu ai e le Tama Faalelagi Lana fuafuaga, lea e aofia ai ma le mataupu faavae o le saolotoga. Sa tetea Lusifelo ma “saili e faaumatia le saolotoga o le tagata” (Mose 4:3). O le taunuuga, sa teena le faamanuiaga o le mauaina o ni tino faitino o Lusifelo ma i latou uma sa filifili e mulimuli atu ia te ia. O lou i ai i luga o le fogaeleele o se faamaoniga lea sa e faaaogaina lou saolotoga e mulimuli ai i le fuafuaga a le Tama Faalelagi.

I le olaga faitino, e faaaauau pea ona e maua le saolotoga [e filifili ai]. O lou faaaogaina o lenei meaalofa e faalagolago i ai lou fiafia po o le faanoanoa i lenei olaga ma le olaga a sau. Ua e saoloto e filifili ma faatino, ae e te le saoloto e filifili taunuuga o au faatinoga. O taunuuga atonu e le vave oo mai, ae

e masani lava ona mulimuli mai. O filifiliga lelei ma amiotonu e taitai atu ai i le fiafia, filemu, ma le ola e faavavau, a o le filifilia o le agasala ma le tiapolo e le pine ae taitai atu ai i le loto tiga ma le faanoanoa.

O lau matafaioi le faia o au faaiuga. E le tatau ona e tuu-aifuaina lou siosiomaga, o lou aiga, ma au uo pe a e filifili e le usitai i poloaiga a le Atua. O oe o se atalii/afafine o le Atua o i ai ni malosiaga sili. O loo ia te oe le mana e filifili ai le amiotonu ma le fiafia, e tusa lava po o a tulaga o siomia ai oe.

O loo ia te oe foi le matafaioi mo le atinaeina o tomai ma taleni ua tuuina atu e le Tama Faalelagi ia te oe. E te tali atu ia te Ia mo mea sa e faia i ou tomai ma le ala na e faaaogaina ai ou taimi. Aua le faamaimauina ou taimi. Ia naunau e galue malosi. Filifili e faia mea e tele i lou lava loto malie.

Mau faaopopo: Teuteronome 11:26–28; 30:15–20; Iosua 24:14–15; 2 Nifae 2; Helamana 14:30–31; MFF 58:26–28; 101:78

*Tagai foi Usiusitai, Ata o le Faaolataga; Tofotofoga*

## Sapati

O le Sapati o le aso o le Alii, ua faapaiaina i vaiaso taitasi mo malologa ma tapuaiga. I taimi o le Feagaiga Tuai, sa faamamaluina e tagata o le feagaiga a le Atua ia le Sapati i le aso lona fitu o le vaiaso, aua na malolo ai le Atua i le aso lona fitu i le taimi na ia foafoaina ai le lalolagi. Na toe faamanatu mai e le Alii le taua o le faamamaluina o le Sapati i totonu o Poloaiga e Sefulu:

“Ia e manatua le aso sapati e te faapaiaina.

“O aso e ono e te galue ai, ma fai ai au galuega uma lava:

“A o le aso fitu, o le sapati lea ia Ieova lou Atua; aua e te fai ai se galuega e tasi, o oe, ma lou atalii, ma lou afafine, o lau auauna tane, ma lau auauna fafine, o au manu foi, ma le tagata ese o loo mau ma oe:

“Aua na faia e Ieova i aso e ono o le lagi ma le lalolagi, atoa ma le sami, ma mea uma lava o i ai, ona malolo ai lea o

## Satani

ia i le aso fitu; o le mea foi lea na faamanuia ai e Ieova le aso sapatu, ma na faapaiaina ai” (Esoto 20:8–11).

Ina ua mavae le Toetu mai o Iesu Keriso, lea na tupu i le aso muamua o le vaiaso, na amata ai loa e soo o le Alii ona faamamaluina le Sapati i le aso muamua o le vaiaso, Aso Sa (tagai Galuega 20:7).

I aso e gata ai, ua poloaiina ai e le Alii i tatou ina ia faaauau pea ona tatou faamamaluina le Sapati. Ua ia folafola mai pe afai tatou te usiusitai i lenei poloaiga, o le a tatou maua “le atoatoa o le lalolagi” (tagai MFF 59:16–20).

Ona o le Sapati o se aso paia, e tatau ai ona faaavanoaina mo na o gaioiga mama ma paia. O lou lē faigaluega ma lou lē auai i ni faafiafiaga [i le aso sapatu], ua lē lava lena. O le mea moni, afai o le a na ona tatou nofonono e leai se mea e faia i le Sapati, ua tatou lē tausia lava le aso ia paia. I se faaaliga na tuuina mai i le perofeta o Iosefa Samita i le 1831, na poloai mai ai le Alii: “Ina ia e tausii atili ai ia te oe lava ia mama nai le lalolagi, ia e ulu atu i le fale tatalo ma avatu ai au faamanatuga i lou aso paia; aua e moni o le aso lenei ua atofaina e te malolo ai i au galuega, ma avatu au viiga i Le Silisili” (MFF 59:9–10). Ina ia o gatasi ma lenei faaaliga, tatou te auai atu i sauniga faamanatuga i vaiaso taitasi. O isi gaioiga o le aso Sapati e mafai ona aofia ai talosaga, manatunatuga, suesueina o tusitusiga paia ma aoaoga a perofeta o aso e gata ai, tusiaina o tusi i tagata o aiga ma uo, faitau i tusitusiga lelei, asiasi atu i e mamai ma faanoanoa, ma auai atu i isi sauniga a le Ekalesia.

Faamatalaga Faaopoopo: Esoto 31:16–17; Mosaea 18:23; MFF 59:11–14; 68:29

*Tagai foi i le Migao; Faamanatuga; Tapuai*

## Satani

O Satani, lea e taua foi o le fili po o le tiapolo, o le fili o le amiotonu ma i latou o e o saili e mulimuli i le Atua. O ia o se atalii faaleagaga o le Atua o le sa avea ma agelu “sa i ai le pule i luma o le Atua ” (MFF 76:25; Tagai foi i le Isaia 14:12;

MFF 76:26–27). Peitai i le uluai Fono Sili i le Lagi, o Lusifelo, lea na faaigoa ai Satani i le taimi lena, sa tetee i le Tama Faalelagi ma le ata o le faaolataga. I lenei tetee atu i le Atua, sa “saili [ai Satani] e faaumatia le saolotoga o le tagata” (Mose 4:3). Sa ia faapea atu: “o le a ou togiolaina le fanauga uma a tagata ina ia le se ese se agaga e toatasi, ma e moni o le a faapea lava ona ou faia; o le mea lea, ia tuu mai ia te au lou mamalu” (Mose 4:1).

Sa faaososoina e Satani le “tasi vae tolu o au a le lagi” e o ese mai le Tama (MFF 29:36). O le taunuuga o lea liliuese na vavaeeseina mai ai Satani ma e na mulimuli ia te ia mai le afioaga o le Atua ma aveesea ai le faamanuiaga o le mauaina o se tino faitino (tagai Faaaliga 12:9). Na aveesea ai foi mai ia i latou le avanoa e maua ai se nofoaga i se malo o le mamalu.

Sa faatagaina e le Tama Faalelagi ia Satani ma e ua mulimuli ia Satani e faaososoina i tatou o se vaega o lo tatou aafiaga i le olaga faitino (tagai 2 Nifae 2:11–14; MFF 29:39). E talu ai ona o Satani o loo “saili ina ia malaia tagata uma e pei o ia lava” (2 Nifae 2:27), o le mea lena o loo tauivi ai o ia ma e ua mulimuli atu ia te ia ina ia taitaieseina i tatou mai le amiotonu. O loo agai atu lana faatuiese ma le malosi i le vaega sili ona taua o le fuafuaga a le Tama Faalelagi mo le fiafia. Mo se faataitaiga, e taumafai malosi o ia e taufaatauvaaina le Faaola ma le perisitua, e faaoso le le talitonu i le mana o le Togiola, e ta’u faaseseina faaaliga, e faatosina ese i tatou mai le upu moni, ma faia feteenaiga e uiga i tiute tau le tagata lava ia. E taumafai malosi o ia e taufaatauvaaina le aiga e ala i le faafenumiai o ituaiga, lagolagoina fesoootaiga faalefeusu-aiga i fafo atu o le faaipoipoga, fai ma ulaga le faaipoipoga, ma le fautuaina o ni tagata matutua ua faaipoipo e aua nei faia ni fanau, ae semanu e mafai ona latou tausua ni fanau i le amiotonu.

E leai se mea o le a e gauai ai i faaososoga a Satani. O loo i totonu ia te oe le mana e te filifili ai le lelei mai le leaga, ma e mafai ona e saili atu e le aunoa i le fesoasoani a le Alii e ala i le tatalo. (Tagai “Faaososoga,” itulau 57–60.)

## *Satauro*

Faamatalaga Faaopoopo: Isaia 14:12–17; 1 Nifae 15:23–24; 2 Nifae 2:16–18; Moronae 7:12; MFF 10:5; 29:36–40, 46–47; 76:25–29

*Tagai foi i le Saolotoga; Agasala; Faaosoosoga*

## **Satauro**

O le satauro po o le koluse o loo faaaogaina e le tele o ekalesia Kerisiano o se faailoga o le maliu o le Faaola ma le Toetu ma o se faaaliga faamaoni o le faatuatua. I le aveia ai ma tagata o le Ekalesia a Iesu Keriso o le Au Paia o Aso e Gata Ai, tatou te manatua foi ma le faaaloalo le puapuagatia o le Faaola. Ae talu ai ona o loo soifua pea le Faaola, o lea tatou te le faaaogaina ai le faailoga o Lona maliu o se faailoga o lo tatou faatuatua.

O lou olaga e tatau ona aveia ma faaaliga o lou faatuatua. Manatua ina ua uma ona papatisoina ma faamauina oe, na e osi feagaiga e te tauave i ou luga le suafa o Iesu Keriso. Ao matauina oe e tagata o loo outou faifai mea faatasi, e ao ona mafai ona latou iloina lou alofa i le Faaola ma Lana galuega.

Na o le pau tagata o le Ekalesia latou te faaaogaina le faailoga o le satauro, o tagata o le Au Paia o Aso e Gata Ai ua tofia e failotu i vaegaau, e tuu i luga o a latou togiga faamiliteli e faailoa ai o i latou o ni failotu Kerisiano.

*Tagai foi Togiola a Iesu Keriso; Iesu Keriso; Toetu*

## **Sauniga**

I totonu o le Ekalesia, o se sauniga o se galuega e paia ma mamalu e faatinoina e ala i le pule o le perisitua. O nisi sauniga e tatau mo lo tatou faaeaga. O nei sauniga e ta'ua o sauniga faaola. E aofia ai le papatisoga, faamauga, faauuina i le Perisitua Mekisateko (mo alii), o le faaeega paia o le malumu, ma le faamauga o le faaipoipoga. O nei sauniga taitasi tatou te ulu atu ai i feagaiga paia ma le Alii.

O isi sauniga, e pei o le faaigoaina ma le faamanuiaina o tamaiti, faapaiaina o le suauu, ma le faauuina o e mamai ma

puapuagatia, e faia foi e ala i le pule o le perisitua. E ui e le manaomia mo lo tatou faaolataga, ae taua i latou mo lo tatou faamafanafanaga, taitaiga, ma faamalosianga.

O sauniga ma feagaiga e fesoasoani ina ia tatou manatua ai pe o ai i tatou. E faamanatu mai ai ia i tatou lo tatou tiute i le Atua. Ua saunia e le Alii ia sauniga ma feagaiga e fesoasoani ina ia tatou foi atu ai ia te Ia ma maua le ola e faavavau. Pe afai tatou te faamamaluina, o le a Ia faamalolosia i tatou.

E mafai ona e mauaina le tele o avanoa e faataunuuina ai sauniga o le perisitua. O le taimi lava e te mauaina ai lena avanoa, ia faia mea uma lava e te mafaia e saunia ai oe, e tusa pe o e tuuina atu le sauniga pe o e mauaina foi. E mafai ona e saunia e ala i le tatalo, anapogi, saili fautuaga mai taitai perisitua, ma suesue i tusitusiga paia ma saunoaga a perofeta o aso e gata ai. Afai o e umia le perisitua, e ao ona e saunia faaleagaga i taimi uma e faia se sauniga. Ia ola i se olaga mama ma agavaa, ma taumafai atili ina ia e maua le mafutaga faifai pea ma le Agaga Paia.

Faamatalaga Faaopoopo: MFF 84:19–21; Mataupu Faavae o le Faatuatua 1:3–5

*Tagai foi* Feagaiga; Talalelei; Perisitua

**Sauniga Faamanatuga** (*Tagai Sapati; Faamanatuga; Taulaga*)

## Sefuluai

O le isi faamanuiaga o le avea ai ma tagata o le Ekalesia a Iesu Keriso o le Au Paia o Aso e Gata Ai o le avanoa lea e totogi ai sefuluai. O lou ola ai i le tulafono o le sefuluai, ua e auai i le fausiaina o le malo o le Atua i luga o le fogaeleele.

Uiga ma le Faamoemoega o le Sefuluai

O se sefuluai totogi atoa, e te tuuina atu le tasi-vaesefulu o tupe e te maua i le Alii e ala atu i Lana Ekalesia. E te tuuina

## Sefuluai

atu lau sefuluai i se tasi o le au epikopo po o se tasi o le au peresitene o le paranesi.

O taitai o le lotoifale latou te auina atu tupe o sefuluai i le laumua o le Ekalesia, lea o loo i ai se aufono latou te fua-fuaina auala faapitoa e faaaogaina ai foai paia. O lenei aufono e aofia ai le Au Peresitene Sili, le Korama a le Toasefululua, ma le Epikopo Pulefaamalumalu. I le galulue ai e tusa ai ma faaaliga, latou te faia faaiuga ao taitaiina ai i latou e le Alii. (Tagai MFF 120:1.)

O foai o le sefuluai e faaaogaina lava mo faamoemoega a le Alii—e fausia ma faaleleia ai malumalu ma falelotu, e lagoonagoina ai le galuega faafaifeautalai, ma faagaoioia ai galuega a le Ekalesia i le lalolagi.

### Faamanuiaga o le Totogiina Atoa o le Sefuluai

O le tulafono o le sefuluai e manaomia ai le ositaulaga, ae o lou usiusitai i le tulafono e aumaia ai faamanuiaga e matua sili atu i soo se mea lava ua e tuuina atu. Na aoa mai le perofeta o Malaki:

“Ina aumaia mea e sefulu a’i a outou mea uma lava i le fale e tuu ai mea; ina ia i ai mea e ‘ai i lo’u fale; ma ia outou tofotofo mai ai ia te au i lenei mea, ua fetalai mai ai leova o ‘au; pe ou te le toina pupuni o le lagi mo outou, ma sasaa atu le manuia mo outou ina seia silisili ona tele” (Malaki 3:10).

O nei faamanuiaga e maua e i latou uma o e totogiina atoa le sefulu pasene o tupe latou te maua, e tusa lava pe o lena aofaiga e matua laitiiti lava. A e usiusitai i lenei tulafono, o le a faamanuiaina oe faaleagaga ma faaletino e le Alii.

### Faia o le Tautinoga e Totogi le Sefuluai

Pe afai e te lei faia se masani o le totogiina pea lava pea o le sefuluai, o le a oo ina faigata ona e talitonu e te mafai ona e tuuina atu le tasi vaesefulu o au tupe maua. Peitai o tagata faamaoni i le totogiina o le sefuluai ua latou aoaoina e le mafai ona latou *le* totogiina le sefuluai. I se auala moni ma

le matagofie, ua tatalaina pupuni o le lagi ma ua sasaa mai faamanuiaga i o latou luga.

Ia manatua o le totogiina o le sefuluai e le o tupe ae o se vaega o le faatuatua. Faatuatua i le Alii. Na Ia tuuina mai le poloaiga mo lo tatou manuia, ma na Ia tuuina mai foi le faamanuiaga o loo auina mai faatasi. Saili atu le malosi i le faatuatua o Nifae, o le na faapea mai, “Ia tatou faamaoni i le tausiga o poloaiga a le Atua, aua faauta, e silisili lona malosi i le malosi o le lalolagi uma” (1 Nifae 4:1).

*Tagai foi Anapogi ma Taulaga Anapogi*

## Seoli

E lua ni itu o loo ta’ua ai Seoli i faaaliga o aso e gata ai. Muamua, o se tasi lea o igoa mo le falepuipui o agaga, o se nofoaga i le lalolagi o agaga pe a mavae le olaga faaletino mo i latou o e na “oti i le solitulafono, e aunoa ma se malamalama i le upumoni pe ona o agasala, na latou teena ai perofeta” (MFF 138:32). O se nofoaga le tumau lea o le a aoaina ai agaga i le talalelei ma maua ai le avanoa e salamo ai ma talia sauniga o le faaolataga, ia o loo faatinoina mo i latou i totonu o malumalu (tagai MFF 138:30–35). O i latou o e talia le talalelei e mafai ona nonofo i le parataiso seia oo i le Toetutu. Pe a uma ona toefaatuina i latou ma faamasinoina, o le a latou maua le tikeri o mamalu ia ua latou agavaa ai. O i latou ua filifili e lē salamo ae e lē o i latou o ni atalii o le malaia, o le a nonofo pea i le falepuipui o agaga seia oo i le faaiuga o le Meleniuma, pe afai o le a faasaolotoina i latou mai seoli ma le faasalaga ma toetutu i le mamalu telesitila (tagai MFF 76:81–85).

Lona lua, o le upu *seoli* o loo faasino i fafo i le pogisa, o se nofoaga e nofo ai le tiapolo, o ana agelu, ma atalii o le malaia (tagai MFF 29:36–38; 76:28–33). O atalii o le malaia o i latou ia ua “leai se faamagaloga i lenei lalolagi po o le lalolagi a sau—ina ua faafitia le Agaga Paia ina ua uma ona maua, ma faafitia le Atalii e Toatasi na Fanaua e le Tama, ma faasatauroina o ia



## *Siona*

ia te i latou lava ma faalumaina o ia i luma o tagata” (MFF 76:34–35; tagai foi fuaiupu 31–33, 36–37). O i latou ia o le a le maua se nofoaga i soo se malo o mamalu; mo i latou, o le a tumau ai tulaga o seoli (tagai MFF 76:38; 88:24, 32).

*Tagai foi* Malo o Mamalu; Satani

## **Siona**

O loo i le Mataupu Faavae ma Feagaiga ia le tele o fuaitau lea o loo poloaiina ai e le Alii le Au Paia e “tausisi e au-maia ma faatuina tuutuuga fuafuaina o Siona” (MFF 6:6; tagai foi i le MFF 11:6; 12:6; 14:6).

O le upu *Siona* e tele ona uiga i totonu o tusitusiga paia. O le uiga taatele lava o loo faaaogaina o le upu “o e loto mama” (MFF 97:21). E masani lava ona faaaogaina le upu *Siona* e faasino i tagata o le Alii po o le Ekalesia foi ma ona siteki (tagai MFF 82:14).

I ona popofou o lenei tisipenisione, na fautuaina ai e taitai o le Ekalesia ia tagata ina ia fausia Siona e ala lea i le malaga atu e nonofo mau i se nofoaga tutotonu. Ua poloaiina i tatou i aso nei e o tatou taitai ina ia fausia Siona i soo se mea lava o tatou nonofo ai. Ua fautuaina tagata o le Ekalesia ia nonofo i o latou lava laueleele na soifua ai, ma fesoasoani e faatuina le Ekalesia iina. Ua tele malumalu ua fausia ina ia mafai ai e tagata uma o le Au Paia o Aso e Gata Ai i le lalolagi atoa ona maua faamanuiaga o le malumalu.

O le upu *Siona* e mafai foi ona faatatau i nofoaga patino e pei o nei:

- O le nuu o Enoka (tagai Mose 7:18–21).
- O le aai anamua o Ierusalema (tagai 2 Samuelu 5:6–7; 1 Tupu 8:1; 2 Tupu 9:28).
- O le Ierusalema Fou, lea o le a fausiaina i le aai o Jackson County, Misuri (tagai MFF 45:66–67; 57:1–3; Mataupu Faavae o le Faatuatua 1:10).

Faamatalaga Faaopoopo: Isaia 2:2–3; 1 Nifae 13:37; MFF 35:24; 39:13; 45:68–71; 59:3–4; 64:41–43; 90:36–37; 97:18–28; 101:16–18; 105:5; 115:5–6; 136:31

**Siteki** (*Tagai* Taitaiga o le Ekalesia)

## **Taaloga Faitupe**

O Le Ekalesia a Iesu Keriso o le Au Paia o Aso e Gata Ai e tete e i taaloga tupe, e aofia ai lulu po o loto [lotteries] o loo lagolagoina e malo.

O taaloga tupe e faaosofia e le manao, ia maua mai se mea i le leai o se mea. O lenei manao o se faatafunaga faale-agaga. E taitaiina ese ai tagata o loo auai, mai aoaoga a le Alii e uiga i le alofa ma le auauna atu ma agai ifo ai i le manatu faapito o le fili. E faamamasagia ai le paia o le galue ma le ola faasoasoalelei, ma le manao e tuuina atu se taumafaiga faamaoni i mea uma tatou te faia.

O i latou o e auai i taaloga tupe o le a le pine ae o latou iloa le faaseseina o le manatu e mafai ona latou tuuina atu se mea itiiti pe leai foi, ma maua mai ai se mea e i ai sona tau. Latou te iloa ai ua latou faaaluina se aofaiga tele o tupe, o lo latou lava mamalu, ma le faaaloaloga e tagata o aiga ma uo. I le faaseseina ma le le mafai ona teteina, e masani lava ona latou taaalo i tupe na tatau ona latou faaogaina mo isi faamoemoega, e pei o le faia ai o mea o loo matua manaomia e o latou aiga. O tagata taaalo tupe o nisi taimi e matuai faapologaina ai ma matuai tuliloaina ai lava e totogi aitalafu o le taalo tupe, lea latou te liliu atu ai i le gaoui, ma aveesea ai o latou igoa ta'ulelei.

Ua fautuaina malosi e le Au Peresitene Sili i tatou e tutu faatasi ma isi e tete atu i le aloaia faaetulafono e le malo ma le lagolagoina o soo se ituaiga o taaloga faitupe i o tatou atunuu.

*Tagai foi* Faaosoosoga

## **Taina o Pe'a**

Ua matua fautua mai lava perofeta o aso e gata ai e lē tatau ona taina ni pe'a i le tino. O i latou o e le mulimuli i lenei fautuaga ua faaalua ai le leai o se faaaloalo mo i latou lava faapea ma le Atua. Ua aoao mai e le Aposetolo o Paulo le taua o o tatou tino ma le matautia o le faaleagaina o [o tatou tino] ma le loto i ai: "Tou te le o iloa ea o le malumalu outou o le Atua, o loo nofo foi le Agaga o le Atua i totonu ia te outou? Afai e faaleaga e se tasi le malumalu o le Atua, e faaleagaina lena tagata e le Atua; aua e paia le malumalu o le Atua, o outou lava ia" (1 Korinito 3:16–17).

Pe afai o i ai sau pe'a, o le a avea pea lena ma se faamanatu ia te oe o le mea sese ua e faia. E tatau ona e mafaufau ina ia aveesea.

*Tagai foi* Faapupuina o le Tino

## **Taitaiga o le Ekalesia**

O Iesu Keriso o loo tu i le ulu o le Ekalesia. O le misiona a le Ekalesia a Iesu Keriso o le Au Paia o Aso e Gata Ai o le fesoasoani lea i tagata uma ia o mai ia te Ia (tagai Moronae 10:32). Ina ia faataunuaina lenei misiona, ua faatulagaina ai le Ekalesia e tusa ma le taiala na faaalua mai e le Alii "mo le faaatoatoaina o le au paia, . . . seia tatou oo atu o i tatou uma lava ma le lotogatasi i le faatuatua ma le iloa lelei o le Alo o le Atua" (Efeso 4:12–13; tagai foi fuaiupu 11). O le auivi lenei e aotele ai le faatulagaga o le Ekalesia.

Fale ma le Aiga

O le aiga o le iunite faavae lea i totonu o le Ekalesia, ma o le fale o le nofoaga sili lea ona taua mo le aoaoina o le tala-lelei. E leai se isi faatulagaga e mafai ona suitulaga i le aiga. E tusa lava pe faaauau pea ona tuputupu a'e le Ekalesia, o le a tumau pea lona faamoemoega e lagolagoina ma faamalolo-

sia aiga ma tagata taitoatasi i a latou taumafaiga e ola i le talalelei.

### Taitaiga Lautele

E taitaiina e le Alii Ona tagata o le feagaiga i nei aso e ala lea i le Peresitene o le Ekalesia, o le ua tatou lagolagoina o se perofeta, tagata vaai, ma tali faaaliga. O le Peresitene o le Ekalesia e pulefaamalumalu i le Ekalesia aoao. O ia ma ona fesoasoani, o ni perofeta foi, tagata vaai, ma tali faaaliga, ua fausia ai le Korama a le Au Peresitene Sili.

O sui o le Korama a Aposetolo e Toasefululua o i latou foi o ni Perofeta, tagata vaai, ma tali faaaliga. O i latou, faatasi ai ma le Au Peresitene Sili, o ni “molimau faapitoa i le igoa o Keriso i le lalolagi atoa” (MFF 107:23). Latou te galulue i lalo o le faatonuga a le Au Peresitene Sili “e atiina ae le ekalesia, ma faatonuina ana galuega e tau i ai i atunuu uma” (MFF 107:33). Latou te “tatala ai le faitotoa [i atunuu] o le folafolaga o le tala lelei ia Iesu Keriso” (MFF 107:35).

O uso o le Korama a le Fitugafulu ua tofia e folafola le talalelei ma atiina ae le Ekalesia. Latou te galulue i lalo o faatonuga a le Au Aposetolo e Toasefululua ma le taitaiga a uso e toafitu, o ē ua tofia e galulue o le Au Peresitene o Fitugafulu. O Korama Muamua ma le Lona Lua a Fitugafulu e ta’ua i latou o Au Pulega Aoao, ma e mafai ona tofia i latou e galulue i soo se mea lava o le lalolagi.

O le Au Epikopo Pulefaamalumalu o le au peresitene o le Perisitua Arona i le Ekalesia aoao. O le Epikopo Pulefaamalumalu ma ona fesoasoani e galulue i lalo o faatonuga a le Au Peresitene Sili e faafoeina tulaga faaletino o le Ekalesia.

O le faatulagaga o Alii Talavou, Aualofa, Tamaitai Talavou, Peraimeri ma le Aoga Sa e tofu ma au peresitene i le tulaga aoao o le Ekalesia e tuuina atu aoaoga ma faatonuga.

### Taitaiga Faa-Eria

O le eria, o le vaevaega faalelaueleele pito sili lea ona tele o le Ekalesia. Ua tofia e le Au Peresitene Sili le Au Peresitene o Fitugafulu latou te vaaia eria ua filifilia o le Ekalesia, i lalo o faatonuga a le Korama a Aposetolo e Toasefululua. O isi eria o le Ekalesia, ua tofia e le Au Peresitene Sili ia Au Peresitene o Eria latou te pulefaamalumalu ai. O se Au Peresitene o le Eria e aofia ai se peresitene, lea e masani ona tofia mai le Korama Muamua po o le Korama Lua o le Korama a Fitugafulu, ma o fesoasoani e toalua, e mafai ona tofi mai i soo se Korama a Fitugafulu. O Au Peresitene o Eria, e galulue i lalo o faatonuga a le Au Peresitene Sili, o le Korama a le Toasefululua, ma le Au Peresitene o le Au Fitugafulu.

O nisi uso e faauuina i le tofi o le Fitugafulu ae le galulue o ni Pulega Aoao. E ta'ua i latou o ni Fitugafulu Pule Eria, ma ua tofia i latou i ni korama e ese mai le Korama Muamua po o le Lona Lua a Fitugafulu, e tusa ai ma nofoaga faaitulagi. O eria latou te vaaia, e gata lava i itulagi e nonofo ai i latou. O nisi Fitugafulu Pule Eria e galulue i totonu o Au Peresitene o Eria.

### Taitaiga Faale-Lotoifale

*Uarota ma Paranesi.* Ua faatulagaina tagata o le Ekalesia i totonu o ni faapotopotoga ia e potopoto soo faatasi mo le faa-tamaoigaina faaleagaga ma le vafealoaloai. O faapotopotoga toatele ua ta'ua o uarota. O uarota taitasi e pulefaamalumalu ai se epikopo, e lagolagoina e fesoasoani e toalua.

O aulotu toalaiti e ta'ua o paranesi. O paranesi taitasi e pulefaamalumalu ai se peresitene o le paranesi, e lagolagoina e fesoasoani e toalua. E mafai ona faatuina se paranesi pe afai e lua ni aiga lotu e nonofo i totonu o se eria ma o se tasi o tagata lotu o se uso agavaa e umia le Perisitua Mekisateko po o se ositaulaga agavaa i totonu o le Perisitua Arona. O le au

peresitene o se siteki, misiona, po o le itu e faatulagaina ma vaaia le paranesi. O se paranesi e mafai ona faatupulaia ma aveva o se uarota pe afai o i ai i totonu o se siteki.

O uarota po o paranesi taitasi e aofia ai se eria ua maioio lelei ona faatuaoui. O faalapotopotoga eseese i totonu o le uarota po o le paranesi, e tofua sa'o uma i le galuega a le Alii: o vaega a faitaulaga sili; korama a toeaia; o le Aualofa, mo tamaitai e 18 tausaga ma luga atu; korama a le Perisitua Arona, mo alii talavou e 12 i le 17 tausaga; o le polokalama a Tamaitai Talavou mai le 12 i le 17 tausaga; Peraimeri, mo tamaiti e 18 masina e oo i le 11 tausaga; ma le Aoga Sa, mo tagata uma o le Ekalesia mai le 12 tausaga ma luga atu. O nei faalapotopotoga taitasi e faataunuuina ni matafaioi taua i le aoaoina o le talalelei, tuuina atu o auaunaga, ma le lagolagoina o matua i o latou tiute paia e fesoasoani ai i a latou fanau ia liua i le talalelei a Iesu Keriso. O nei foi faalapotopotoga e galulue faatasi e fesoasoani i tagata o le au paia e fetufaai atu le talalelei i isi.

*Siteki, Misiona, ma Itu.* O le tele o eria ua faatulagaina tuaoui lea e faatu ai le Ekalesia, e vaevaeina i ni siteki. O le upu *siteki* e sau mai le perofeta o Isaia, o le na valoiaina o le Ekalesia o aso e gata ai o le a faapei o se fale ie, e faamauiina e ni siteki (fao) (tagai Isaia 33:20; 54:2). E masani lava e 5 i le 12 uarota ma paranesi i totonu o se siteki. O siteki taitasi e pulefaamalumalu ai se peresitene, e lagolagoina e fesoasoani e toalua. O peresitene o siteki latou te lipoti atu ma maua mai o latou faatonuga mai le Au Peresitene o le Au Fitugafulu po o le Au Peresitene o Eria.

O se misiona o se iunite o le Ekalesia e masani lava ona aofia ai se eria e tele atu nai lo se eria o se siteki. O misiona taitasi e pulefaamalumalu ai se peresitene o le misiona, e lagolagoina e fesoasoani e toalua. O peresitene o Misiona e lipoti sa'o lava i le Au Pulega Aoao.

O se paranesi o se vaega toaititi o se uarota, e pei foi o se itu o se vaega ititi lea o se siteki. O se itu e faatulagaina pe afai e lava le aofai o ni paranesi i totonu o se eria, e faigofie

## Talalelei

ai fesootaiga ma femalagaiga i fonotaga faaleitu. E tofia se peresitene o le itu e pulefaamalumalu ai, faatasi ai ma le lago-lago a fesoasoani e toalua. O le peresitene o le itu e lipoti i le au peresitene o le misiona. E mafai ona faasolo ina avea se itu ma siteki.

*Polokalama mo Tagata Nofofua.* E toatele tagata o le Ekalesia e lei faaipoipo pe ua tetea foi ma taitoalua, pe nofo toatasi foi ona ua maliu lona toalua. O nei tagata o le au paia, e lua ni vaega e i ai: talavou nofofua matutua (18 tausaga i le 30) ma tagata matutua nofofua (31 tausaga ma luga atu).

E leai se polokalama a le Ekalesia aoao mo talavou matutua nofofua ma tagata matutua nofofua. Ae peitai, a lava le fuainumera o tagata matutua nofofua e nonofo i totonu o se eria, ua faamalosia taitai perisitua o le alalafaga e tofia ni sui o tagata nofofua, e galulue i lalo o la latou taitaiga. O sui o tagata nofofua e fuafuaina gaoioiga e pei o siva, galuega fesoasoani, ma faeasaite. O nei gaoioiga e maua ai e tagata nofofua avanoa e feiloai ma fefaamalosia'i ai le tasi i le isi. O tagata nofofua foi ua fautuaina e fono soo ma o latou taitai perisitua e talanoaina ai o latou manaoga ma o latou avanoa mo le alualu i luma faaleagaga ma auaunaga.

Mau faaopoopo: MFF 107

*Tagai foi Perisitua; Aualofa*

## Talalelei

O le Talalelei o le fuafuaga o le fiafia a le Tama Faalelagi. O le mataupu autu o le talalelei o le Togiola a Iesu Keriso.

Na saunoa mai le Perofeta o Iosefa Samita, "O muai mataupu faavae ma sauniga o le talalelei e faapea: muamua, Faatuatua i le Alii o Iesu Keriso; lona lua, Salamo, lona tolu, Papatisoina i le faatofuina mo le faamagaloina o agasala; lona fa, Faaee atu o lima e maua ai le mea foaifua, o le Agaga Paia lea" (Mataupu Faavae o le Faatuatua 1:4). I lona atoatoaga, o le talalelei e aofia ai mataupu autu uma, mataupu faavae,

tulafono, sauniga, ma feagaiga e tatau mo lo tatou faaeaga i le malo selesitila. Na folafola mai e le Faaola, afai tatou te tumau e oo i le gataaga, faamaoni i le ola ai i le talalelei, o le a Ia tauamitonuina i tatou i luma o le Tama i le Aso o le Faamasinoga Mulimuli (tagai 3 Nifae 27:16).

Ua talaiina atu le atoatoaga o le Talalelei i augatupulaga uma pe afai e saunia fanau uma a le Atua e talia le talalelei. I aso e gata ai, po o le tisipenisione o le atoaga o taimi, ua toefuataiina mai ai le talalelei e ala i le Perofeta o Iosefa Samita.

Mau Faaopopo: Roma 1:16–17; 3 Nifae 27:13–22; MFF 11:24; 39:5–6

*Tagai foi* Togiola a Iesu Keriso; Papatísoga; Faatuatua; Agaga Paia; Iesu Keriso; Ata o le Faaolataga; Salamo; Toefuataiga o le Talalelei

## **Tama Faalelagi** (*Tagai* Atua le Tama)

### **Taofiofi o le Fanau Mai**

Pe afai e gafataulimaina faaletino e le ulugalii faaipoipo, ua ia te i la’ua le avanoa o le faia o tino faitino mo fanau agaga a le Tama Faalelagi. E i ai la la’ua vaega e fai i le fua-fuaga tele o le fiafia, lea e faatagaina ai fanau a le Atua e maua tino faaletino ma ola ai i le olaga nei.

Afai ua e faaipoipo, o oe ma lou toalua e ao ona oulua talanoaina a oulua matafaioi paia o le aumaia o fanau i le lalolagi ma faafaiileleina i latou i le amiotonu. Ao faia lea matafaioi, ia mafaufau i le paia ma le uiga o le ola. Mafaufau loloto i le olioli lea e oo mai pe a i ai le fanau i le aiga. Mafaufau i faamanuiaga faavavau e oo i le i ai o se fanau lelei. Faatasi ai ma se molimau e uiga i nei mataupu faavae, o le a oulua saunia ai e filifili ma le agaga tatalo le aofai o tamaiti ma le taimi e fananau mai ai i latou. O nei filifiliga e i ai lea i le va o oulua ma le Alii.

Ao oulua talanoaina lena mataupu paia, ia manatua o fesootaiga taufeusuaiga i totonu o le faaipoipoga ua faatagaina faalelagi. A o le tasi o faamoemoega o nei fesootaiga o le mauaina lea o tino faaletino mo fanau a le Atua, o le isi o le faaalai



## Tapaa

lea o le alofa o le tasi i le isi—e fusia faatasi ai tane ma ava i le loto faamaoni, mama, feavatai, ma le tasi o le faamoemoe.

**Tapaa** (*Tagai Upu o le Poto*)

## Tapuai

O le tapuai atu i le Atua o le tuuina atu lea ia te Ia o lou alofa, faaaloalo, auaunaga, ma le loto atoa. Na poloaiina e le Alii Mose, “Ifo atu i le Atua, aua ua na o ia lava e te auauna atu i ai” (Mose 1:15). Ua Ia poloai mai i lenei augatupulaga, “Ia e alofa atu i le Alii lou Atua ma lou loto atoa, ma lou manatu, mafaufau, ma lou malosi atoa; a o le igoa o Iesu Keriso ia e auauna atu ai ia te ia” (MFF 59:5). Afai e te ave le faamuamua i se isi tagata po o se isi mea nai lo le alofa i le Atua, o loo e faatinoina le tapuaiga sese, po o le ifo i tupua (*tagai Esoto 20:3–6*).

O le tatalo o se tasi lea auala e te tapuai atu ai i le Tama. Na aoaoina e Alema lona atalii o Helamana, “Tagi atu foi i le Atua ina ia fesoasoani o ia ia te oe i mea uma, ioe, ia faia au mea uma ona o le Atua; o mea uma e te alu i ai, ia alu i ai ona o le Atua. Ioe, ia liliu atu ou manatu i le Atua, ioe, ia e tuuina e faavavau le alofa o lou loto i le Atua” (*Alema 37:36*).

E tatau ona e auai atu i sauniga a le Ekalesia i le agaga o le tapuaiga. Ua poloai mai le Alii: “Ina ia e tausii atili ai ia te oe lava ia mama nai le lalolagi, ia e ulu atu i le fale tatalo ma avatu ai au faamanatuga i lo’u aso paia; aua e moni o le aso lenei ua atofaina e te malolo ai i au galuega, ma avatu au viiga i Le Silisili” (MFF 59:9–10).

O le auai atu i sauniga perisitua o se vaega foi o lau tapuaiga. A o e ‘ai ma inu ma le migao i le faamanatuga ma ulu atu i le malumalu, ia e manatua ma tapuai atu i lou Tama Faalelagi ma faailoa atu lau faafetai mo Lona Alo o Iesu Keriso.

E le gata i le faaali atu o le tapua’i i foliga vaaia, ae e tatau foi ona i ai ia te oe se uiga tapua’i i soo se mea lava e te alu i

ai ma mea uma lava e te faia. Na aoao atu e Alema lenei mataupu faavae i se vaega o tagata o e na tulia i fafo mai o latou fale tapuai. Sa ia fesoasoani atu ina ia latou iloa, o le tapuaiga moni e le faatuaioia i le na o se tasi se aso o le vaiaso (tagai Alema 32:11). I lana lauga atu i lenei lava vaega o tagata, na faamalosiau atu ai foi le soa a Alema o Amoleka ina ia “tapuai atu i le Atua i le agaga ma le faamaoni i mea uma tou te i ai” (Alema 34:38).

Faamatalaga Faaopoopo: Salamo 95:6–7; Mosaea 18:25; Alema 33:2–11; MFF 20:17–19, 29; Mataupu Faavae o le Faatuatua 1:11

*Tagai foi* Anapogi ma Taulaga Anapogi; Le Atua le Tama; Alofa; Tatalo; Sapati

## Tatalo

O oe o se alo o le Atua. E alofa lou Tama Faalelagi ia te oe ma silafia ou manaoga, ma e manao o Ia ia te oe e te fesootai ma Ia e ala i le tatalo. Tatalo atu ia te Ia ae le o se isi. Na poloi mai le Alii o Iesu Keriso, “E tatau ai ona outou tatalo e le aunoa i le Tama i lo’u igoa” (3 Nifae 18:19).

Ao e faia se masani o le faalatalata atu i le Atua i le tatalo, o le a oo ina e iloa o Ia ma silisili ona latalata atu ai ia te Ia. O ou manao o le a avea e pei lava o Ona [manao]. O le a mafai ona e mautinoa mo oe lava ma isi le mauaina o faamanuiaga ua Ia sauni e aumai pe a e ole atu i le faatuatua.

### Aoaoga Faavae o le Tatalo

E saunia e le aunoa lou Tama Faalelagi e faafofoga ma tali mai i au tatalo. O le mana o au tatalo e faalagolago lea i ou luga. Ao e taumafai atili e avea le tatalo ma vaega o lou olaga, ia manatua le fautuaga lenei:

*Ia i ai se uiga o au tatalo.* Na lapatai mai le perofeta o Mamona e faapea afai e iai se isi e “tatalo ma le le loto faamaoni i ai. . . e le aoga lava ia te ia, aua e le talia e le Atua se ua faapena” (Moronae 7:9). Ina ia iai se uiga o au tatalo, e tatau ona e tatalo ma le faamaoni ma le “malosi\_uma o le

loto" (Moronae 7:48). Ia faaeteete ina ia aloese mai le "tautu i a outou upu" pe a e tatalo (tagai Mataio 6:7). Ia tuuina atu manatunatuga moni i lau amio ma upu e te faaaogaina.

*Faaaoga le gagana e faaalua ai le alofa, faaaloalo, migao, ma lagona vavalalata.* O le faatatauga o lenei aoaoga faavae o le a iai sona eseese e faatatau i lau gagana. E tusa lava pe eseese gagana, e tumau pea le aoaoga faavae: Pe a e tatalo, e ao ona e faaaogaina upu e talafeagai ona faailoa atu ai le alofa, sootaga tapuai vavalalata ma le Atua. E ono iai ni faigata ia te oe i le aoaoina o le gagana o le tatalo, peitai o le a faasolosolo lava ona oo ina e maua le lagona mafanafana e uiga iai ao e tatalo ma faitauina tusitusiga paia.

*Ia faafetai atu i le Tama Faalelagi e le aunoa.* E tatau ona "nonofo ma le faafetai i aso fai soo, ona o le alofa ma manuia e tele ua foaiina mai e ia ia te outou" (Alema 34:38). A e faaaluina se taimi e manatunatu ai i ou faamanuiaga, o le a e iloaina ai le tele o mea ua faia e lou Tama Faalelagi mo oe. Avatu au faafetai ia te Ia.

*Saili le taitaiga ma le malosi mai le Tama Faalelagi i mea uma e te faia.* Sa fautuaina e Alema lona atalii o Helamana: "Tagi atu foi i le Atua ina ia fesoasoani o ia ia te oe i mea uma, ioe, ia faia au mea uma ona o le Atua; o mea uma e te alu i ai, ia alu i ai ona o le Atua. Ioe, ia liliu atu ou manatu i le Atua, ioe, ia e tuuina e faavavau le alofa o lou loto i le Atua. Ia oulua filifili ma le Atua i au mea uma e te faia, na te faatonu foi ia te oe i mea lelei. Ioe, pe a e taoto i le po, ia taoto ona o le Atua, ina ia leoleo o ia ia te oe i lou moe. Pe a e ala i le taeao, ia tumu lou loto i le faafetai i le Atua. Afai foi e te faia ia mea, e faaeaina oe i le aso gataaga" (Alema 37:36–37; Tagai foi i le Alema 34:17–26).

*Manatua manaoga o isi pe a e tatalo.* Tuuina atu tatalo "ina ia manuia outou, ina ia manuia foi i latou o e faatasi ma outou" (Alema 34:27). Ole atu i lou Tama Faalelagi e faamanuia ma faamafanafana i e o loo manaomia le fesoasoani. Ole atu ia te ia ina ia musuia ma foai atu le malosi i le Peresitene o le Ekalesia, o isi Pulega Aoa, ma ou taitai o le Ekalesia i le

lotoifale. Tatalo mo le manuia o tagata o le aiga ma uo. Tatalo mo taitai o le malo. Ole atu i le Alii ina ia musuia ma puipuia faifeautalai ma tagata o loo latou aoaoina.

*Saili le taitaiga a le Agaga Paia ina ia e iloa pe o a mea e ao ona ta'ua i au tatalo.* E mafai e le Agaga Paia ona aoao oe e tatalo ma taitai oe i upu e te faia (tagai Roma 8:26; 2 Nifae 32:8). E mafai ona Ia fesoasonai ia te oe e tatalo “e tusa ma le finagalo o le Atua” (MFF 46:30).

*Pe a e talosaga atu e ala i le tatalo, ia faia mea uma e te mafai e fesoasoani ai ina ia maua.* E faamoemoeina oe e le Tama Faalelagi e te faia mea sili atu nai lo o lou ole atu ia te Ia mo faamanuiaga. Pe a i ai se filifiliga taua e te faia, e masani lava ona finagalo o Ia ina ia e “filifili mae’a ai i lou mafaufau” ao lei tuuina mai e Ia ia te oe se tali (tagai MFF 9:7–8). O au tatalo mo le taitaiga o le a i ai sona taua pe a faia taumafaiga uma e talia ai musumusuga a le Agaga Paia. O au tatalo mo lou lava manuia ma le manuia o isi o le a leai se aoga pe afai e te “aauina fua atu o e matitiva, ma e le lavalava, a e le asi-asi atu i e mama’i, ma e puapuagatia, pe fofai atu ni a outou mea i e matitiva, afai ua ia te outou” (Alema 34:28).

Afai o loo i ai se galuega faigata i ou luma, o le a fiafia le Tama Faalelagi pe a tootuli ou tulivae ma ole atu mo le fesoasoani ma faapena ona e tu i luga i ou vae ma alu atu ma galue. O le a fesoasoani o Ia i au taumafaiga amiotonu uma, ae seāseā ona Ia faia lea mo oe o se mea e mafai e oe lava ia ona fai.

Tatalo a le Tagata Lava ia

I Lana lauga i luga o le Mauga, na apoapoai atu ai Iesu Keriso: “ina ulu atu ia i lou afeafe, ma pupuni lona puipui, i le e tatalo ai i lou Tama o i le mea lilo; o lou Tama foi o le silasila i le mea lilo, na te avatu faaaliali se tau i te oe” (Mataio 6:6). O tatalo patino faaletagata lava ia o se vaega taua o lou atiina ae faaleagaga.

A itiiti, po o taeao taitasi ma po taitasi, vaai se nofoaga e leai se mea e faalavelave atu ai. Tootuli ifo i le lotomauualalo

## *Tatalo*

ma talanoa atu i lou Tama Faalelagi. E ui lava o nisi taimi e te manaomia ai lou tatalo le leoa, ia e faia se taumafaiga faaopoopo i nisi taimi e faaleo ai au tatalo (tagai MFF 19:28; 20:51).

Manatua o le tatalo o se fesoootaiga e lua-itu. A faaiu au tatalo, ia i ai se taimi e te faatali ai ma faalogo. E i ai taimi, e fautua, taitai, pe faamafanafanaina ai oe e le Tama Faalelagi ao e i ai pea i ou tulivae.

Aua nei faaseseina oe i le manatu e faapea e te lē o agavaa e tatalo. O lenei manatu e sau mai ia Satani, o le o loo manao e faatalitonu oe e le tatau ona e tatalo (tagai 2 Nifae 32:8). Pe afai e te le o lagonaina le fia tatalo, tatalo seia e lagonaina lou fia tatalo.

Sa poloai mai le Faaola, “Ia tatalo pea, ina ia mafai ona e manumalo, ioe, ina ia mafai ona e manumalo ia Satani, ina ia mafai ona e sao mai lima o auuuna a Satani o e fesoasoani i lana galuega” (MFF 10:5). E ui lava o le a i ai taimi e le mafai ai ona faaauau pea ona e tootuli, a ia faia pea tatalo patino, faaletagata lava ia, e mafai e lou loto ona “tumu, faalatalata i [le Atua] i le tatalo e le aunoa” (Alema 34:27; tagai foi i le 3 Nifae 20:1). I le gasologa o aso taitasi, o le a mafai pea ona e faatumauiina se lagona o le alofa mo lou Tama Faalelagi ma Lona Alo Pele. E mafai ona e faailoa atu ma le le leoa le faafetai i lou Tama ma ole atu ia te Ia ina ia faamalosi ia te oe i ou tiutetauave. I taimi o tofotofoga ma faigata faaletino, e mafai ona e ole atu ma le le leoa mo Lana fesoasoani.

## Tatalo Faaleaiga

E le gata ua poloaiina i tatou e tatalo i le mea lilo, ae ua faapea foi ona fautuaina i tatou e le Faaola e tatalo faatasi ma o tatou aiga. Na ia fetalai mai, “Tatalo i o outou aiga i le Tama i lo’u igoa, ina ia manuia a outou ava, ma a outou fanau” (3 Nifae 18:21).

Pe afai ua e faaipoipo, ia aveia ia tatalo faaleaiga ma vaega tumau o le olaga o lou aiga. Ia tootutuli faatasi i le lotomaualalo, i taeao uma ma afiafi uma. Ia tuuina atu i tagata tai-

toatasi uma o le aiga le avanoa e tatalo ai. Ia aufaatasi i le faa-fetai mo faamanuiaga ua tuuina mai ia te outou e le Tama Faalelagi. Ia aufaatasi i le faatuatua e aioi atu mo faamanuiaga tou te manaomia, ma tatalo foi mo isi tagata.

O tatalo faifai pea faaleaiga, o le a latalata atu ai oe ma tagata o lou aiga i le Atua faapea foi le tasi i le isi. O le a iloa ai e lau fanau ona talanoa ma lo latou Tama i le Lagi. O le a sili ona saunia lelei outou uma e auauna atu i isi ma tetee atu i faaosoosoga. O le a avea lou aiga ma nofoaga o le malosiaga faaleaiga, o se malutaga mai uunaiga leaga a le lalolagi.

### Tatalo mo le Lautele

E i ai taimi e valaauina ai oe e tuuina atu se tatalo mo le lautele, atonu o se sauniga a le Ekalesia po o se vasega. Pe a e maua lenei avanoa, ia manatua o loo e talanoa ma le Tama Faalelagi, ae le o le tuuina atu o se lauga. Aua le popole pe o a manatu o tagata i upu e te faia. Ae, ia tuuina atu se tatalo faigofie e sau mai lou loto.

### Mauaina o Tali i Tatalo

Sa aoao mai le Faaola, “Ia outou ole atu, ona foaiina mai ai lea ia te outou; ia outou saili, ona outou maua ai lea; ia outou tu’itu’i atu, ona toina mai ai lea ia te outou” (Mataio 7:7–8). Na Ia fetalai atu i Sa Nifae, “O mea uma e tatau tou te ole atu ai i le Tama i lo’u igoa ma le faatuatua tou te maua ai, faauta, e foaiina mai ai ia te outou” (3 Nifae 18:20).

E faafofoga mai le Tama Faalelagi i au tatalo. Atonu o le a le tali mai o Ia i le auala o loo e manao i ai, peitai e tali mai o Ia—i Lana lava taimi ma le ala e tusa ai ma Lona finagalo. Ona e talu ai e silafia e Ia le mea e sili mo oe, o nisi taimi e ono tali mai ai o Ia e *leai*, e tusa lava pe faamaoni au aioiga.

E tele auala e oo mai ai tali i tatalo. E masani ona oo mai i le leo filemu ma le itiiti o le Agaga Paia (tagai “Faaaliga,” itulau 32–37). E mafai ona oo mai i mea e tutupu i lou olaga pe ala mai foi i galuega alofa a i latou o loo siomia

## *Tatalo Faaleaiga*

oe. A faaaauu pea ona e faalatalata atili atu i lou Tama Faalelagi i le tatalo, o le a e lava saunia e iloa Ana tali alofa ma le atamai i au aioiga. O le a e iloa o Ia o lou “malu ma lo tatou malosi; e fai o ia ma fesoasoani silisili i puapuaga” (Salamo 46:1).

Faamatalaga Faaopopo: Mataio 6:5–15; Iakopo 1:5–6; Enosa 1:1–17; Mosaea 4:11–12; 3 Nifae 13:6–7; 14:7–8; MFF 19:38; 88:63–65; Iosefa Samita—Talafaasolopito 2:9–19

*Tagai foi* Faatuatua; Anapogi ma Taulaga Anapogi; Tapuai

## **Tatalo Faaleaiga** (*Tagai Tatalo*)

### **Taua**

Ua fetalai mai le Alii o aso e gata ai o le a i ai “taua ma tala o taua, o le a vavao le lalolagi atoa, ma e matatau ma loto vaivai tagata” (MFF 45:26).

I le avea ai ma tagata o le Ekalesia a Iesu Keriso o le Au Paia o Aso e Gata Ai, o i tatou o ni tagata o le filemu. Tatou te mulimuli i le Faaola, o Ia o le Alii o le Filemu. O loo tatou tulai atu i Lana nofoaiga faatupu i le meleniuma, lea o le a faamutaina ai taua ma o le a toe oo mai ai le filemu i le lalolagi (tagai Isaia 2:4). Ae ui i lea, i lenei lalolagi ua tatou matauina i nisi taimi ua auina atu e taitai o malo ia vaegaau i taua ina ia puipuia o latou malo ma o latou tulaga.

O le Au Paia o Aso e Gata Ai i totonu o le vaegaau e leai se mea o le a latou lagona ai le popole i le va i lo latou atunuu ma lo latou Atua. I totonu o le Ekalesia, “matou te talitonu i le usiusitai i tupu, ma peresitene, ma faamasino, i le usiusitai ma faamamalu ma lagolagoina le tulafono” (Mataupu Faavae o le Faatuatua 1:12). O le auuanga i le vaegaau ua faailoa ai le faamamaluina o lenei mataupu faavae.

Pe a valaauina tagata o le Au Paia o Aso e Gata Ai e o atu e tau, e mafai ona latou manatu i le faataitaiga a Kapeteni Moronae, le taitaiu sili i totonu o le Tusi a Mamona. E ui o ia o se tagata tau malosi, peitai o se tagata “ua le fiafia i le faa-

masaaina o le toto” (Alema 48:11). O ia o se tagata sa “mausali i le faatuatua ia Keriso,” ma na o le pau le mafuaaga na tau ai o ia o le “leoleo i ona tagata, ma lana pule, ma lona nuu, ma lana ekalesia” (Alema 48:13). Pe afai e tatau ona o atu tagata o le Au Paia o Aso e Gata Ai e tau, e tatau ona o atu i latou i le agaga o le upumoni ma le amiotonu, ma le manao e faia le lelei. E tatau ona o atu i latou ma le alofa i o latou loto mo fanau uma a le Atua, e aofia ai ma i latou o loo i le itu tete. Ma afai ua tatau ai ona latou faamaligiina le toto o se tasi, o la latou gaoioiga o le a le faitauina o se agasala.

*Tagai foi* Faigamalo Faalauaitete ma Tulafono; Filemu

## **Tauagafau/Tausaafia**

O le tausaaafia o se uiga o le lotomauualalo ma le faaaloalo e ala i laei, teuga, gagana, ma amioga. Afai e te tauagafau, e te le manao e tosina mai ni manatu e lē talafeagai. Nai lo o lena, e te saili e “vivii atu i le Atua i o outou tino ma o outou agaga” (1 Korinito 6:20; Tagai foi i le fuaiupu 19).

Afai e te le o mautinoa pe o talafeagai ou laei ma au teuga, ia fesili ifo ia te oe lava, “Pe ou te faalogoina ea ni lagona lelei i o’u foliga pe afai ma te faatasi ai ma le Alii?” E mafai ona e fesiligia oe i lea lava foi fesili e uiga i lau gagana ma lau amio: “Pe o le a ou tautala i nei upu pe auai i nei gaoioiga pe ana faapea o loo faatasi ai le Alii?” O au tali faamaoni i nei fesili e mafai ai ona taitaiina oe e faia suiga taua i lou olaga. O faamatalaga o loo mulimuli mai o le a fesoasoani ia te oe i au taumafaiga ina ia e tauagafau pe tausaaafia foi.

### **Laei ma Teuga**

Ua apoapoai mai e le aunoa ia perofeta ia i tatou, ina ia faaaogaina laei talafeagai. O lenei fautuaga o loo faavae i luga o le upumoni o le tino o le tagata o le foafoaga paia lea a le Atua. Ia e faaaloalo i lou tino o se meaalofa mai le Atua.



O ou laei ma ou foliga vaaia, e mafai ai ona e faaali atu i le Alii e te iloina le taua o lou tino.

O ou laei e faailoa atu ai po o ai oe. E auina atu ai ni savali e uiga ia te oe, ma e uunaia ai au amioga ma amioga foi a isi. A fai faalelei au teuga ma talafeagai ou lavalava, e mafai ona e valaaulia le Agaga e mafuta mai ma avefa ai foi ma ni faatosinaga lelei mo i latou o loo siomia oe.

I le totonugalemu o le poloaiga ina ia tauagafau ma tausaaafia, o loo i ai se malamalamaaga i le mana paia o le foafoaga, o le mana lea e aumaia ai fanau i le lalolagi. O lenei mana e na o le va lava o le tane ma le ava e faaaogaina ai. O laei e vavala mai ai itutino ma faatosina ai lagona feusuai, e aofia ai ofuvae ma laulavalava ua matua pupuu tele, o ofu fufusi, ma ofu e le ufiufia ai le puimanava, e faaosofia ai manaoga ma amioga e solia ai le tulafono o le legavia a le Alii.

E le gata i le aloese mai laei e vavala mai ai itutino, ae e tatau foi ona e aloese mai le soona faapapanu o au teuga, laei, ma foliga vaaia. Ia tumama e le aunoa i laei, teuga, ma amioga, ma aua nei fa'inaelo pe manatu faatalalē i ai. Aua le faalaleagaina lou tino i le taina ai o pe'a po le faapupuina e tatui ai meateutino. Afai o oe o se tamaitai ma ua e manao e tui ou taliga, ia fai na o se tasi se pea tautaliga laiti.

Ia faatumauiua tulaga maualuluga o uiga tauagafau po o le tausaaafia i soo se mea lava. Aua le tuuina i lalo ou tulaga faatonuina ina ia faatosina mai ai isi i lou tino pe maua mai ai foi se faatagana mai isi. O soo moni lava o Iesu Keriso e faatumauiua tulaga faatonuina a le Alii e tusa lava po o a suiga fou ua i ai o teuga po o uunaiga mai isi tagata.

### Gagana ma Amio

E pei lava o ou laei ma teuga, o lau gagana ma lau amio e faailoa atu ai le ituaiga tagata e i ai oe. O au upu ma gaioiga e mafai ona faia se aafiaga silisili mo oe ma isi. Ia faailoa atu oe lava i gagana mama, lelei, ma faagaetia ma gaioiga e aumaia ai le fiafia i e o loo siomia oe. O au taumafaiga ia

tauagafau ma tusaafia i upu ma galuega, e faateleina ai le taitaiga ma le faamafanafanaga mai le Agaga Paia.

Ia aloese mai gagana le mama ma faiga masani o loo faa-aogaina ai ma le le faaaloalo e le lalolagi le suafa o le Alii. Ia tetee atu i soo se faaosoosoga e auai i ni amioga matuia po o le lē talafeagai. O le natura lē faaaloalo o na gagana ma amioga, e faataumaonia ai lou mauaina o musumusuga filemu a le Agaga Paia.

Faamatalaga Faaopoopo: MFF 42:40–41; Mataupu Faavae o le Faatuatua 1:13  
*Tagai foi* Faapupuina o le Tino; Legavia; Gagana Masoa; Taina o Pe’a

**Tiakono** (*Tagai* Perisitua Arona; Perisitua)

**Tiapolo** (*Tagai* Satani)

## **Toefuataiina o le Talalelei**

Ao i ai Iesu Keriso i le lalolagi, na Ia faatuina ai Lana Ekalesia i e na mulimuli atu ia te Ia. Ina ua mavae Lona Faasatauroga ma le fasiotia o Ona Aposetolo, na aveesea ai le atoatoa o le talalelei mai le fogaeleele ona o le faateleina o le liliuese (tagai “Liliuese,” itulau 92–93). E toatele alii ma tamaitai na sailia le atoatoa o le upumoni i le taimi o le senituri o le Liliuese Tele, peitai sa le mafai ona latou mauaina. E ui lava sa toatele e na talai atu ma le faamaoni e uiga i le Faaola ma Ana aoaoga, ae leai se isi na i ai le atoatoaga o le upumoni po o le pule o le perisitua mai le Atua.

O le Liliuese Sili o se taimi o le pogisa faaleagaga, ao leni ua tatou ola ai i se taimi ua mafai ai ona tatou mauaina “le malamalama o le talalelei i le mamalu o Keriso” (2 Korinito 4:4; tagai foi i le MFF 45:28). O le atoatoaga o le talalelei ua toefuataiina mai, ma o le Ekalesia moni a Iesu Keriso ua toe i ai nei i luga o le fogaeleele. E leai se isi faalapotopotoga e mafai ona faatusatusa i ai. E le o se taunuuga o le toefaatulagaina, lea e i ai alii ma tamaitai na i ai ni uiga lelei ma

taumafaiga e fai mea uma i lo latou malosi e faaoo mai ai suiga. O le Toefuataiina o le Ekalesia na faavaeina e Iesu Keriso. O le galuega a le Tama Faalelagi ma Lona Alo Pele.

I le avea ai ma se tagata o le Ekalesia a Iesu Keriso o le Au Paia o Aso e Gata Ai, e mafai ona e mauaina faamanuiaga sa le i ai i le fogaeleele mo le latalata atu i le 2,000 tausaga. E ala mai i le sauniga o le papatisoga ma le faamauga, e mafai ai ona e maua le faamagaloga o au agasala ma maua ai le olioli ma le mafutaga faifai pea ma le Agaga Paia. E mafai ona e ola i le talalelei i lona atoatoa ma lona manino. E mafai ona e mauaina se malamalamaaga o le natura o le Aiga Atua, o le Togiola a Iesu Keriso, o le faamoemoega o le olaga i luga o le fogaeleele, ma le moni o le olaga pe a mavae le oti. Ua e maua le avanoa e taialaina ai e se perofeta soifua, o lē o loo aoaoina mai le finagalo o le Atua i o tatou aso. O sauniga o le malu-malu ua mafai ai ona e mauaina le taitaiga ma le filemu, saunia ai mo le ola e faavavau, faamau atu ai i lou aiga mo le faavavau, ma faia sauniga faaola mo ou tuua ua maliliu.

### O Mea na Tutupu i le Toefuataiga

O le ata faataatia o loo mulimuli mai o se aotelega lea o ni nai vaega laiti taua na tutupu i le Toefuataiga o le talalelei ma le faatuina o le Ekalesia a Iesu Keriso o le Au Paia o Aso e Gata Ai, lea na folafola mai e le Alii o “le ekalesia ola e tasi ma le faamaoni i luga o le fogaeleele atoa” (MFF 1:30).

*Amataga o le Tautotogo, 1820.* I le sailiga o le Ekalesia moni a Iesu Keriso, sa tatalo atu ai Iosefa Samita e na o le 14-tausaga le matua, i le togalaau e latalata ane i lona aiga i Palamaira, Niu Ioka. I le tali atu i lana tatalo faamaualalo, na asiasi ane ai le Tama Faalelagi ma Iesu Keriso ma ta’u atu ia te ia e aua lava nei auai atu i se tasi o ekalesia sa i ai i luga o le fogaeleele i lena taimi. (Tagai Iosefa Samita—Talafaasolopito 2:11–19.) I totonu o le Ekalesia, tatou te ta’ua lenei aafiaga o le Uluai Faaaliga a Iosefa Samita.

21—22 *Setema, 1823*. Sa asiasi mai ai se agelu e igoa ia Moronae ia Iosefa Samita. Sa mua'i ta'u atu e Moronae le tele o mea o le a tutupu, ma sa ta'u atu foi ia Iosefa le tala tusia o le Tusi a Mamona, na tusia i luga o papatusi auro. Sa faatagaina e le agelu ia Iosefa e vaai i papatusi auro, lea na tanumia i le Mauga latalata ane o Kumora. (Tagai Iosefa Samita—Talafaasolopito 2:27–53.)

22 *Setema, 1827*. Na maua ai e Iosefa Samita ia papatusi auro mai ia Moronae i le Mauga o Kumora ina ua mavae ona la feiloai ma Moronae i le aso 22 o Setema o tausaga taitasi uma e fa na sosoo ai. (Tagai Iosefa Samita—Talafaasolopito 2:53, 59.)

15 *Me, 1829*. Ao la galulue ai i le faaliliuina o papatusi auro ma la faitau ai e uiga i le papatisoga mo le faamagaloina o agasala, sa o atu ai Iosefa Samita ma lana tusiupu o Oliva Kaotui i se nofoaga toafilemu ma fesili atu i le Alii e uiga i le mataupu. O iina, i luga o auvai o le Vaitafe o Sasikuana e latalata i Haramoni, Penisilvania, na maua ai e i laua le tali i a la'ua tatalo. O Ioane le Papatiso, o se tagata toetu mai, sa oo ifo ia i laua mai le lagi o se "avefeau . . . i se ao malamalama tele." Sa ia faaeeina atu i o la'ua luga le Perisitua Arona. Ma i lo la usiusitai ai i ana faatonuga, sa papatisoina ai loa e Iosefa ma Oliva le tasi ma faauuina e le tasi le isi i le Perisitua Arona. (Tagai Iosefa Samita—Talafaasolopito 2:68–72; tagai foi i le MFF 13.)

*Me 1829*. O Aposetolo anamua o Peteru, Iakopo, ma Ioane na faaeeina atu le Perisitua Mekisateko i luga o Iosefa Samita ma Oliva Kaotui. (Tagai MFF 128:20.)

*Iuni 1829*. Ao taitaiina ai e le "mea foai fua ma le mana o le Atua" (MFF 135:3), na faamaeaina ai e le perofeta o Iosefa Samita le faaliliuina o le Tusi a Mamona.

26 *Mati*, 1830. Na maua ai le uluai kopi o le Tusi a Mamona i totonu o Palamaira, Niu Ioka.

6 *Aperila*, 1830. Na faavaeina ai le Ekalesia i totonu o le taulaga o Feiete, Niu Ioka, amataina e tagata e toaono.

27 *Mati*, 1836. Na faapaiaina ai le Malumalu o Katelani, le malumalu muamua na fausia i lenei auga-tupulaga. Na faia e le perofeta o Iosefa Samita le tatalo o le faapaiaga, lea na tuuina atu ia te ia i se faaaliga. (Tagai MFF 109.)

3 *Aperila*, 1836. Na faaali mai ai le Faaola ia Iosefa Samita ma Oliva Kaotui i totonu o le malumalu o Katelani. Na faaali mai foi Mose, Elaia ma Elia ma tuuina atu ki o le perisitua ia Iosefa ma Oliva. Na aumaia e Elia ki o mana o le faamauga, lea ua mafai ai e aiga ona faamauina faatasi e faavavau. (Tagai MFF 110.)

### O Le Taunuuga o le Ekalesia

Na vavalo le perofeta o le Feagaiga Tuai o Tanielu e faapea o le a “faatuina ai le malo” e le Atua lea o le a “le faaumatia” ae o le a “tumau lava e faavavau” (Tanielu 2:44). I lona faia ai o lea valoaga, na ia talanoa e faatatau i le Ekalesia a Iesu Keriso o le Au Paia o Aso e Gata Ai, le malo o le Atua i luga o le fogaelele i nei aso. Mai le aso na faavaeina ai le Ekalesia i le na o le toaono tagata, ua tupu ma ua fua mai, ma o le a faaauau pea ona ola seia oo ina “tumu ai le lalolagi uma” (Tanielu 2:35; tagai foi i le MFF 65:2). E faitauselau afe tagata o loo papatisoina i tausaga taitasi. Ua faaliliuina le Tusi a Mamona i le tele o gagana. Ua fausia malumalu i le lalolagi atoa. Faatasi ai ma Iesu Keriso i le ulu o le Ekalesia, o le a taitaiina pea e perofeta soifua le manuia o le Ekalesia seia oo ina saunia le lalolagi mo le Afio Faalua mai o le Faaola.

Na saunoa mai le perofeta o Iosefa Samita e faatatau i faamanuiga o le Toefuataiiga: “O lenei, se a se mea ua tatou

faalogo i ai i le tala lelei ua tatou maua? O le leo o le fiafia! O le leo o le alofa mutimutivale mai le lagi; ma le leo ole upu moni mai le eleele; o tala fiafia mo e ua oti; o le leo fiafia mo e ola ma e ua oti; o tala fiafia o le olioli sili” (MFF 128:19).

Faamatalaga Faaopoopo: Isaia 2:1–3; 29:13–14; Galuega 3:19–21; Faaaliga 14:6–7; 2 Nifae 3:3–15; MFF 128:19–21; 133:36–39, 57–58; Iosefa Samita—Talafaasolopito

*Tagai foi i le Liliuese; Iosefa Samita; Faaaliga; Afio Mai Faalua o Iesu Keriso*

**Toe Fanaufouina** (*Tagai Papatisoga; Feagaiga; Faaolataga*)

**Toeaina** (*Tagai Perisitua Mekisateko; Perisitua*)

## Toetu

Ona o le Pau o Atamu ma Eva, ua tatou oti faaletino ai, o le tuueselea lea o le agaga mai le tino. O le Togiola a Iesu Keriso, o le a toetutu ai tagata uma lava—laveai mai le oti faaletino (tagai 1 Korinito 15:22). O le Toetu o le toe tuufaatasia lea o le agaga ma le tino i se tulaga atoatoa, e ola pea, e le toe oo i ai ni faama’i ma le oti (tagai Alema 11:42–45).

O le Faaola o le tagata muamua lea i luga o leni foga-eleele na toetu mai. O loo i le Feagaiga Fou le tele o tusitusiga e molimau mai ai na toetu mai o Ia mai le tuugamau (tagai Mataio 28:1–8; Mareko 16:1–14; Luka 24:1–48; Ioane 20:1–29; 1 Korinito 15:1–8; 2 Peteru 1:16–17).

Ina ua faaali atu le Alii toetu i Ona Aposetolo, Sa fesoasoani atu o Ia ia i latou ina ia latou malamalama na ia te Ia se tino o aano ma ivi. Na Ia fetalai atu, “Ia outou vaavaai mai i o’u lima ma o’u vae, aua o a’u lava leni; ia outou tagotago mai ia te au, ma ia vaavaai mai; aua o le agaga e leai sona aano ma ni ivi, pei o a’u nei ua outou vaavaai i ai” (Luka 24:39). Sa faaali atu foi o Ia i Sa Nifae ina ua mavae Lona Toetu mai (tagai 3 Nifae 11:10–17).

I le taimi o le toetu, o le a “faamasinoina [ai i tatou] e tusa ma a [tatou] galuega. . . . E aumaia foi i tatou e laulaututu i

luma o le Atua, o loo iloa e pei ona tatou iloa nei, e i ai foi le manatu pupula i la tatou agasala uma” (Alema 11:41, 43). O le mamalu e faavavau tatou te maua, o le a faalagolago lea i lo tatou faamaoni. E ui lava o tagata uma o le a toetutu, e na o i latou o e ua o mai ia Keriso ma taumamafa i le atoatoa o Lana talalelei o le a ulu atu i le faaeaga i le malo selesitila.

O se malamalama ma se molimau i le toetu, e mafai ai ona aumaia ia te oe le faamoemoe ma se vaai mamao ao e feagai ma luitau, tofotofoga, ma mea ua ausia o le olaga. E mafai ona e maua le faamafanafanaga i le folafolaga, o loo soifua le Faaola ma e ala mai i Lana Togiola, “ua motusia foi e ia noanoataga o le oti ina ia leai se manumalo o le tuugamau, ina ia faaumatia foi le tui o le oti i le faamoemoe i le mamalu” (Alema 22:14).

Faamatalaga Faaopopo: Isaia 25:8; 26:19; Ioane 5:25–29; 11:25–26; 1 Korinito 15; Enosa 1:27; Alema 40:23–26; 41; Mamona 9:12–14; MFF 88:15–16; 93:33–34; Mose 1:39

*Tagai foi i le Togiola a Iesu Keriso; Oti, Faaletino; Malo o le Mamalu; Ata o le Faaolataga; Faaolataga; Agaga*

## **Togiola a Iesu Keriso**

O le upu *togiola* o lona uiga ia fai se faaleleiga, po o le laveai. O le Togiola a Iesu Keriso, e mafai ai ona toe faalelei i tatou ma lo tatou Tama Faalelagi (tagai Roma 5:10–11; 2 Nifae 25:23; Iakopo 4:11). E mafai ona tatou mau faatasi i Lona malo e faavavau, ina ua “faaatoatoaina e ala i a Iesu” (tagai MFF 76:62, 69).

O Iesu Keriso “na saunia talu le faavaeina o le lalolagi e togiolaina [Lona] nuu” (Eteru 3:14). I le muai olaga i le lalolagi o agaga, sa faaali mai ai e le Tama Faalelagi le ata e faavavau o le faaolataga, lea e moomia ai se Togiola faavavau e le iu. O Iesu a o lei faitino, sa lauiloa i lena taimi o Ieova, na faaalua ma le faamaualalo o le a Ia faia le finagalo o le Tama i le faataunuaina o le fuafuaga (tagai Mose 4:2). O lea na muai faauuina ai o Ia e tauave le Togiola—ia sau i le lalolagi, e pua-

puaga i le faasalaga mo a tatou agasala, ia malii i luga o le satauro, ma toe tu. Na avea o Ia "o le Tamai mamoe na fasia talu ona faavaeina o le lalolagi" (Faaaliga 13:8; tagai foi 1 Peteru 1:19–20; Mose 7:47).

O le Togiola o le faaaliga silisili lea o le alofa o le Tama Faalelagi mo i tatou (tagai Ioane 3:16). O le faaaliga silisili foi o le alofa o le Faaola mo le Tama ma i tatou foi (tagai Ioane 14:28–31; 15:9–13; 1 Ioane 3:16; MFF 34:3; 138:1–4).

### O Lo Tatou Manaomia o le Togiola

O le avea ai o i tatou ma suli mai ia Atamu ma Eva, o lea ua aofia ai tagata uma i aafiaga o le Pau. E oti faaleagaga tagata uma, e ala i le tulieseaa mai i le afioaga o le Atua, ma e tatou ona oti i tatou uma i la le tino, o le oti lea o le tino faaletino (tagai Alema 42:6–9; MFF 29:41–42).

I lo tatou tulaga pagatia, o le a tatou fetaia'i ma mea faafeagai ma faaososoga. Pe a tatou gauai atu i faaososoga, ua tatou faamamaoeseina i tatou lava mai le Atua ma tatou le maua ai Lona mamalu (tagai Roma 3:23).

E manaomia e le faamasinoga tonu e faavavau le faatu-mauina o aafiaga o le Pau ma ia faasalaina i tatou mo a tatou lava mea sese. A leai le Togiola, o le a faataatia e le oti faaletino ma le oti faaleagaga se papupuni e lē masopo'iaina i lo tatou va ma le Atua. Ona e le mafai ona tatou laveaiina i tatou lava mai le Pau pe mai a tatou lava agasala, o le a faavavau pea ona tuueseeseina i tatou mai lo tatou Tama Faalelagi, aua "e leai se mea eleelea e mafai ona sao atu . . . i lona afioaga" (Mose 6:57).

Na pau lava le ala e faaolaina ai i tatou, o le i ai lea o se tasi na te laveaiina i tatou. Tatou te manaomia se tasi e mafai ona ia faamalieina tuutuuga o le faamasinoga tonu—e tu i o tatou tulaga e tauavea le avega o le Pau ma totogiina le tau mo a tatou agasala. Ua na o Iesu Keriso lava e agavaa mo le faia o lea taulaga.



O Iesu Keriso, Na o Le Pau Lea o Lo Tatou Faamoemoega

Mai lava i le amataga ao lei Faavaeina le lalolagi, ua na o le Faaola lava lo tatou faamoemoe mo le “filemu i lenei lalolagi, ma le ola e faavavau i le olaga a sau” (MFF 59:23).

Ua na o Ia lava na i ai le mana e tuuina atu ai Lona soifua ma toe aumaia ai. Mai i Lona tina motale o Maria, na ia maua mai ai le mana e oti ai. Mai Lona tama imotale, na ia maua mai ai le mana e faatoilaloina ai le oti. Sa ia fetalai, “Aua faapei o le Tama e i totonu ia te ia lava le ola, e faapea foi ona foai mai e ia i le Atalii ia i totonu ia te ia lava le ola” (Ioane 5:26).

Ua na o Ia lava e mafai ona faaolaina i tatou mai a tatou agasala. Na tuuina atu e le Tama ia te Ia lenei mana (tagai Helamana 5:11). Na mafai e le Faaola ona ia mauaina lenei mana ma faataunuu le Togiola aua sa Ia le gauai atu i le agasala: “Na oo foi ia te ia tofotofoga a e peitai na te le i gauai ai” (MFF 20:22). Ona o lona soifua ai i se olaga atoatoa ma le leai o se agasala, na faasaolotoina ai o Ia mai tuutuuga o le faamasinoga tonu. Talu ai ona sa ia te Ia le mana e faaolaina ai ma ona sa leai Sana aitalafu i le faamasinoga tonu, o lea e mafai ai ona ia totogiina aitalafu mo i latou o e ua salamo. E mafai ona Ia faapea atu:

“Tama e, faauta i le puapuaga ma le oti o lē na le faia se agasala, o le na e fiala lava i ai, faauta i le toto o lou atalii na faamaliigiina, o le toto o le na e tuuina atu ina ia faamamaluina oe lava;

“O le mea lea, Tama e, ia faasaoina ai ou uso nei o e tali-tonu i lou igoa ina ia latou o mai ia te au ma maua le ola faavavau” (MFF 45:4–5).

E moni, “e leai se tasi igoa e foaiina mai, po o se tasi ala e oo mai ai le olataga i le fanauga a tagata, ua na o le suafa lava o Keriso le Alii e pule aoao” (Mosaea 3:17).

## O Le Taulaga Togiola

Na faia le taulaga togiola a Iesu i le Faatoaga o Ketesemane ma luga o le satauro i Kalevaria. O Ketesemane sa gauai atu ai o Ia i le finagalo o le Tama ma amata ai ona Ia tauave i Ona Lava luga agasala a tagata uma. Sa Ia faaalai mai nisi o mea sa oo ia te Ia a o Ia totogiina le tau mo a tatou agasala:

“Aua faauta, o au le Atua na puapuagatia i nei mea mo tagata uma ina ia latou le puapuagatia pe afai latou te salamo;

“Ae peitai, afai latou te le salamo, e ao ina latou tiga e pei o au;

“O le tiga lea na faagateteina ai au lava, o le Atua, le sili-sili ese i mea uma, ona o le tiga ma na maligi ai le toto mai pu laiti uma lava o le tino, ma na tiga le tino atoa ma le agaga ma sa ou loto ou te le inu i le ipu oona ae teena —

“Ae ui i lea, ia i le Tama le viiga, ma na ou inu ma faaumaina ai au sauniuniga i le fanau a tagata” (MFF 19:16–19; tagai foi Luka 22:44; Mosaea 3:7).

Na faaauau pea ona puapuaga le Faaola mo a tatou agasala ina ua Ia faatagaina Ia lava ina ia faasatauroina—“na siitia o ia i luga i le satauro ma ua fasiotia mo agasala a le lalolagi” (1 Nifae 11:33).

I luga o le satauro, sa Ia faatagaina Ia lava e maliu. Ona tuuina lea o Lona tino i totonu o se tuugamau seia Ia toetu ma avea “ma faapolopolo o e ua momoe” (1 Korinito 15:20). O Lona maliu ma le Toetu, na Ia faatoilaloina ai le oti faaletino mo i tatou uma. Mulimuli ane, na Ia fetalai:

“Na ou sau i le lalolagi e fai le finagalo o lo’u Tama, aua na auina mai au e le Tama.

“Na auina mai au e le Tama ina ia siitia au i luga o le satauro ina ua uma ona siitia au i luga o le satauro, ia tosina mai ai tagata uma ia te au e pei ona siitia au e tagata e faapea ona siitia tagata e le Tama ina ia laulaututu i ou luma ia faamasinoina ai i a latou galuega, pe lelei, pe leaga.

“Ona o lenei lava mea ua siitia ai au, o lea foi, e tusa ma le mana o le Tama ou te tosina mai ai tagata uma ia te au ina ia faamasinoina i latou e tusa ma a latou lava galuega.

“E oo foi ina faatumuina lē salamo ma papatisoina i lo’u igoa, afai foi e tumau o ia seia oo i le gataaga, faauta ou te tauamiotonuina o ia i luma o lo’u Tama i le aso ou te tu ai e faamasino i le lalolagi” (3 Nifae 27:13–16).

### Faaolataga Lautele mai le Pau

O le Togiola, ua faaolaina ai e Iesu Keriso tagata uma mai aafiaga o le Pau. O tagata uma sa ola i luga o le fogaeleele ma i latou o e o le a ola i luga o le fogaeleele, o le a toetutu ma toe aumaia i le afioaga o le Atua ina ia faamasinoina (tagai 2 Nifae 2:5–10; Helamana 14:15–17). E ala mai foi i le meaalofa a le Faaola o le alofa mutimutivale ma le alofa tunoa togiola, o le a tatou maua uma ai le meaalofa o le imotale po o le tino ola pea ma le ola e faavavau i ni tino mamalu toetutu.

### Faaolataga mai a Tatou Agasala

E ui lava ina ua faaolaina e aunoa ma ni tuutuuga i tatou mai aafiaga lautele o le Pau, ae tatou te tali atu mo a tatou lava agasala. Ae peitai e mafai ona faamagaloina ma faamamaina i tatou mai pisipisia o le agasala pe afai tatou te “faa-aoga le toto o Keriso” (Mosaea 4:2). E tatau ona tatou faatinoina le faatuatua i a Iesu Keriso, salamo, ma papatisoina mo le faamagaloina o agasala, ma maua le meaalofa a le Agaga Paia. Na fautua mai Alema:

“E ao ina outou salamo ma ia toe fanauina, aua ua fetalai mai le Agaga: Afai e le toe fanauina outou, e le mafai ona fai mo outou tofi le malo o le lagi. O lenei, ina o mai ia ma ia papatisoina i le salamo, ina ia faamamaina outou ai a outou agasala ina ia outou faatuatua i le Tamai Mamoe a le Atua, o Lē aveese agasala a le lalolagi, o Lē malosi e faaola ma faamama amioletonu uma” (Alema 7:14).

## O Le Meaalofa o le Ola Faavavau

Ua faaali mai e le Faaola o le ola e faavavau o le “meaalofa sili lea i lo meaalofa uma a le Atua” (MFF 14:7). Ina ia maua le ola e faavavau, e tatau ona agavaa e mau ai i le afioaga o le Atua, e maua ai se nofoaga i le tikeri pito i luga o le malo selesitila. E na o le pau le ala e avanoa ai lenei meaalofa, o le Togiola a Iesu Keriso. Na faapea mai Mamona: “Po o le a le mea tou te faamoemoe i ai? Faauta, ou te fai atu ia te outou, e ia te outou le faamoemoe ona o le togiola a Keriso, ma le mana o lona toe tu mai, ina ia faatuina i le ola faavavau, o lenei foi ona o lo outou faatuatua ia te ia e tusa ma le mea ua folafolaina” (Moronae 7:41).

Ina ia maua lenei meaalofa, e tatau ona tatou faamalieina ni tuutuuga faapitoa. E tatau ona tatou faaaogaina le faatuatua ia Iesu Keriso, salamo i a tatou agasala, ma tumau i le faatuatua seia oo i le iuga. E tatau ona tatou maua sauniga o le faaolataga: papatisoga, o le meaalofa a le Agaga Paia, faauuga i le Perisitua Mekisateko (mo alii), ma faaeega o le malumalu ma faamauga o le faaipoipoga. O le mauaina o nei sauniga ma tausia feagaiga e o faatasi ma nei sauniga, tatou te o mai ai ia Keriso ma maua le meaalofa sili o le ola e faavavau (tagai Mataupu Faavae o le Faatuatua 1:3).

I Lana faamasinoga tonu e lē iu ma le alofa tunoa, ua tuuina mai ai e le Alii le ola e faavavau “o i latou uma o e ua oti e aunoa ma le malamalama i lenei talalelei, o e semanu latou te talia pe ana faatagaina e ola pea i le lalolagi,” ma “tamaiti uma lava o e oti a o lei taunuu atu i tausaga e malamalama ai” (MFF 137:7, 10).

Ua valaaulia e le Faaola i tatou uma ia maua le ola e faavavau: “Faauta, ua valaau o ia i tagata uma, aua ua faaloaloina mai ia te i latou aao o le alofa ma ua fetalai mai o ia: Ina salamo ia, ona ou talia lea outou. Ioe, o loo faapea ona fetalai mai o ia: O mai ia ia te au ma ia outou aai i le fua o le laau o le ola; ioe, tou te aai ma feinu fua i le areto ma le vai o le ola” (Alema 5:33–34).

Mauaina o le Filemu ma le Faamalologa e ala i le Togiola

O faamanuiaga o le Togiola a le Faaola e oo atu i le faavavau, ae e oo mai foi i le olaga nei. A e sau ia Keriso, o le a e iloa ai le olioli i le mama i luma o le Alii. O le a mafai ona e lagonaina upu a Alema, o lē, ina ua mavae le tele o le agasala ma le tetee, sa lagonaina e ia le tiga ae o se faagasologa o le faamalologa o le salamo. Ina ua uma ona faamagaloina o ia, sa ia molimau mai:

“Ua le toe mafai ona ou manatua ou tiga; ioe, ua ou le toe atuatuvaile i le manatu i au agasala.

“Ioe, ua maeu lava, le olioli, ma le malamalama ofoofogia na au vaaia, ioe, sa faatumuina lo’u agaga i le olioli matua tele e tusa ma le tele o lo’u tiga!

“. . . sa le mafai se tasi mea ona silisili ma oona tusa ma ou tiga. . . . O le tasi mea, e le mafai ona silisili ma malie se tasi mea e tusa ma lou olioli” (Alema 36:19–21).

E faaopoopo atu i le ofoina o le faaolataga mai le tiga o le agasala, ua ofoina mai foi e le Faaola le filemu i taimi o tofofofoga. O se vaega o Lana Togiola, sa tauaveina e Iesu i Ona Lava luga tiga, ma’i, ma puapuaga o tagata uma (tagai Alema 7:11–12). Na te malamalama i ou puapuaga aua sa oo foi ia te Ia. Faatasi ai ma lenei malamalamaaga atoatoa, Na te silafia le ala e fesoasoani mai ai ia te oe. E mafai ona e lafoina “mea uma tou te popole ai; aua o loo manatu mai o ia ia te outou” (1 Peteru 5:7).

O lou faatuatua ma le amiotonu ma Lana taulaga togiola, e mafai ai ona toe faaleleia atoa ma faasa’oina mea uma e le paleni, o manu’a, ma tiga o lenei olaga. O faamanuiaga e le i tuuina atu i lenei olaga, o le a toe tuuina atu i le faavavau. Ma e ui lava Na te le aveesea uma ou tiga i le taimi nei, ae o le a Ia faamanuia ia te oe i le faamafanafanaga ma le malamalama ma le malosiaga e “tauavae ai [au] avega” (Mosaea 24:15).

“Ia outou o mai ia te au, o outou uma o e tigaina ma mafatia i avega,” le fetalaiga a le Faaola, “o au foi e malolo ai outou” (Mataio 11:28). I se tasi mea na tupu na Ia toe folafola

mai ai foi Lona filemu, ina ua faapea mai, “e maua foi outou e le puapuaga i le lalolagi, a ia outou loto tetele, ua ou manumalo i le lalolagi” (Ioane 16:33). O folafolaga nei o le Togiola, i le olaga nei ma le faavavau atoa.

Mau Faaopoopo: Isaia 49:13–16; 53; Mataio 26–28; Mareko 14–16; Luka 22–24; Ioane 10:14–15; 11:25–26; 14:6; 15:13; 19–20; 1 Korinito 15:20–22; Eperu 4:14–16; 1 Ioane 1:7; 1 Nifae 10:6; 2 Nifae 2:1–10; 9; 25:23–26; Iakopo 4:12; Mosaea 3:1–19; Alema 22:14; 34:5–18; 42; Helamana 5:9–12; 14:13–19; 3 Nifae 9:14–22; 27:13–22; Mamona 9:10–14; Eteru 12:27, 41; Moronae 8:5–26; 10:32–33; MFF 18:10–12; 19:15–24; 20:17–34; 45:3–5; 76:40–43; Mose 1:39

*Tagai foi* Papisoga; Oti, Faaleagaga; Ola faavavau; Faatuatua; Pau; Faamagaloga; Le Atua le Tama; Talalelei; Faamasinoga tonu; Malo o le Mamalu; Alofa tunoa; Sauniga; Ata o le Faaolataga; Salamo; Toetu; Faaolataga

## **Tulafono e Sefulu**

O Tulafono e Sefulu o mataupu faavae e faavavau ia o le talalelei e tatau mo lo tatou faaeaga. Na faaali atu e le Alii ia Mose i aso anamua (tagai Esoto 20:1–17), ma Ia toe taua foi i latou i faaaliga o aso e gata ai (tagai MFF 42:18–29; 59:5–13; 63:61–62). O Tulafono e Sefulu o se vaega taua o le talalelei. O le usitaia o nei poloaiga e faataatia ai le ala e usiuitai ai i isi mataupu faavae o le talalelei.

O vaiga nei i Tulafono e Sefulu o loo aofia ai faamatalaga ootooto i le ala e faaauau ai pea ona faatatau i o tatou olaga i aso nei:

1. “Aua nei e fai mo oe ni atua ese i ou luma” (Esoto 20:3). E tatau ona tatou faia “mea uma i le manatu tasi i le mamalu o le Atua” (MFF 82:19). E ao ona tatou alolofa i le Alii ma o tatou loto atoa, ma o tatou manatu, mafaufau, ma o tatou malosi atoa (tagai Teuteronomie 6:5; MFF 59:5).
2. “Aua e te fai mo oe se tupua ua ta” (Esoto 20:4). I lenei poloaiga, ua tausalaina ai e le Alii le tapuai atu i

- tupua. O le ifo i tupua e ono tele ni ona vaega. O nisi tagata latou te le ifo i ni tupua ua ta ma ni faatagata peitai ua latou suitulaga le Atua soifua i isi tupua, e pei o tupe, ma meatotino, manatu, po o latou tulaga. I o latou olaga, “o latou oa o atua ia te i latou”—ma o atua e “fano faatasi ma i latou” (2 Nifae 9:30).
3. “Aua e te tau fua le suafa o Ieova lou Atua” (Esoto 20:7). Mo se faamatalaga i lenei tulafono, tagai “Gagana Masoa,” itulau 75.
  4. “Ia e manatua le aso sapatu e te faapaiaina” (Esoto 20:8). Mo se faamatalaga i lenei tulafono, tagai “Sapatu,” itulau 151–152.
  5. “Ia e ava i lou tama ma lou tina” (Esoto 20:12). O le poloaiga lenei e faatumaia pea e tusa lava pe ua tatou matutua. E tatau lava ona tatou sailia e le aunoa auala e faamamaluina ai o tatou matua.
  6. “Aua e te fasioti tagata” (Esoto 20:13). Mo se faamatalaga pe faapefea ona faatatau lenei tulafono ia i latou o e tatau ona o atu i taua, tagai “Tauga,” itulau 172–173.
  7. “Aua e te mulilua” (Esoto 20:14). I se faaaliga o aso e gata ai, na tausalaina ai e le Alii e le gata i le mulilua, ae o “soo se mea lava faapena” (MFF 59:6). O sootaga feusuai ae lei faaiipoipo, faiga faatauatane ma faataua-fafine, ma isi agasala tau feusuai o le solia na o le tulafono e fitu. Mo nisi faamatalaga faaopoopo, tagai “Legavia,” itulau 87–92.
  8. “Aua e te gaioi” (Esoto 20:15). O le gaioi o se tulaga o le le faamaoni. Mo se faamatalaga i le faamaoni, tagai itulau 49–50.
  9. “Aua e te molimau pepelo i le lua te tuaioi” (Esoto 20:16). O le tuuina atu o se molimau pepelo o se tasi foi lea tulaga o le le faamaoni. Mo se faamatalaga i le faamaoni, tagai itulau 49–50.

10. “Aua e te manao” (Esoto 20:17). O le manao, po o le matapeapea foi i se mea e patino i le isi tagata, e faaleagaina ai le agaga. E mafai ona faaleagaina ai o tatou mafaufau ma fetuuina ai i tatou i lagona faifai pea o le le fiafia ma le le faamalieina. E masani ona tau atu i isi agasala ma nofo aitalafu ai i mea tau tupe.

E ui o le tele o Tulafono e Sefulu o loo lisi mai ai mea e *le tatau* ona tatou faia, o loo faapena foi ona faaalua ai mea e *tatau* ona tatou faia. Na aoteleina e le Faaola ia Tulafono e Sefulu i mataupu faavae e lua—alofa mo le Alii ma le alofa mo tatou uso a tagata:

“E te alofa atu i le Alii lou Atua ma lou loto atoa, ma lou agaga atoa, ma lou manatu atoa.

“O le poloaiga muamua lena ma le sili.

“E faapena foi lona lua, E te alofa atu i le lua te tuaoi, ia pei o oe lava ia te oe” (Mataio 22:37–39).

Faamatalaga Faaopopo: Mosaea 12:33–36; 13:11–24

*Tagai foi* Saolotoga; Legavia; Faamaoni; Usiusitai; Gagana Masoa; Migao; Sapati; Taua; Tapuai

## **Tusi ma Ata Mataga**

O tusi ma ata mataga, o soo se tusitusiga lava e faaalua ai pe faamatalaina ai le tino o le tagata ma uiga faafeusua i se auala e faaosofia ai lagona feusua. E faasalalauina i le tele o ala tau faasalalauga, e aofia ai mekasini, tusi, televise, ata tifaga, musika, ma le Initoneti. E leaga tele mo le agaga e pei lava o le leaga o le tapaa, ava malosi, ma fualaa oona mo le tino. O le faaaogaina o tusi ma ata mataga i soo se auala lava, o le solia lena o le poloaiga a le Atua: “Aua e te. . . pe mulilua. . . pe faia foi soo se mea faapena” (MFF 59:6). E mafai ona taunuu atu ai i isi agasala matuia. E tatau i tagata o le Ekalesia ona aloese mai soo se ituaiga o tusi ma ata mataga, ma e tatau foi ona tetee atu i lona gaosiga, faasalalauina, ma lona faaaogaina.



Ua matua matuia lava faatosinaga a tusi ma ata mataga. E pei foi o isi faatosinaga, e ta'a'ina atu ai tagata e faataitai ma sailia nisi lagona malolosi faaosofia. Afai e te faata'ita'ia ma e faatagaina oe lava e utia ai i lana mailei, o le a faatama'ia oe, e faaseseina ai lou mafaufau, loto, ma le agaga. O le a aveesea ai lou mamalu ma lou iloa o le matagofie o le olaga. O le a saeia oe ma toso atu ai oe i mafaufauga leaga ma ono oo atu ai i faatinoga faatiapolo. O le a matua'ia ai se faatama'iga matautia i fegalegaleaiga a lou aiga.

Ona o le natura faatosina o tusi ma ata mataga ma le afaina e mafai ona oo i le tino ma le agaga, ua lapataiina ai pea e le aunoa i tatou e auaina a le Atua ina ia aloese mai ai. Afai ua utia oe i mailei a tusi ma ata mataga, ia tuu nei loa ae saili se fesoasoani. O le salamo, e mafai ona e maua ai le faamagaloga ma maua le faamoemoe i totonu o le talalelei. Alu i lou epikopo po o lou peresitene o le paranesi mo se fautuaga i auala e mafai ai ona e manumalo ai mai lou faafitauli, ma saili atu mo se faamalologa e ala i le Togiola a Iesu Keriso. Ole atu i le Alii e avatu ia te oe le malosia e te faatoilaloina ai lenei faatosinaga matautia.

Faamatalaga Faaopoopo: Mataio 5:27–28; Roma 6:12; Alema 39:9; MFF 42:23

*Tagai foi* Legavia; Faaosoosoga

## **Tusi a Mamona** (*Tagai* Tusitusiga Paia)

### **Tusi Paia** (*Tagai* Tusitusiga Paia)

### **Tusitusiga Faavae** (*Tagai* Tusitusiga Paia)

### **Tusitusiga Paia**

Pe a tusitusi pe saunoa mai tagata paia o le Atua e ala mai i le mana o le Agaga Paia, o a latou upu “o le a faia ma tusitusiga paia, ma loto o le Alii, ma mafaufauga o le Alii, ma upu a le Alii, ma leo o le Alii, atoa ma le mana o le Atua i le faaolataga” (MFF 68:4). O tusitusiga paia ua faatagaina e le

Ekalesia, lea e masani ona taua o tusitusiga faavae, o le Tusi Paia, le Tusi a Mamona, le Mataupu Faavae ma Feagaiga, ma le Penina Tau Tele. O nei tusitusiga paia o loo faamatalaina i le itulau 190–194.

Taua o le Suesue i Tusitusiga Paia i Aso Taitasi.

O le faamoemoega autu lava o tusitusiga paia o le moli-mau lea ia Iesu Keriso, fesoasoani ia i tatou e o atu ia te Ia ma maua le ola e faavavau (tagai Ioane 5:39; 20:31; 1 Nifae 6:4; Mosaea 13:33–35). Na molimau mai le perofeta o Mamona:

“Ai se tago i le afioga a le Atua, ua telelise ai ma ua mamana e vavaeeseina le atamai uma ma mailei a le tiapolo, a e taitai atu le tagata o Keriso i le ala sa’o ma le vaapiapi, i tala atu o le vanu faavavau o le puapuaga ua saunia e tofatu-moanaina ai e amioleaga—

“E faataunuaina atu o latou agaga, ioe, o latou agaga e le oti, i le itu taumatau o le Atua i le malo o le lagi, e nonofo faatasi ma Aperamo, ma Isaako, ma Iakopo, atoia ma o tatou tama paia uma, e le toe ulufafo ai” (Helamana 3:29–30).

Ua fautuaina i tatou e perofeta o Aso e Gata Ai e suesue i tusitusiga paia i aso uma, e le gata i le tagata lava ia ae ia faapea foi ma o tatou aiga. Ua latou fautuaina i tatou, e pei ona fautua atu Nifae i ona uso, ina ia faatatau tusi paia uma ia i tatou, saili auala e faatatau ai faamaumauga paia o anamua i o tatou olaga i aso nei (tagai 1 Nifae 19:23–24). Ua latou fautuaina i tatou e “suesue i Tusi” (Ioane 5:39) ma “fiafia i le afioga a Keriso (2 Nifae 32:3).

O le a matua sili ona faamanuiaina oe pe a e mulimuli i lenei fautuaga. O le suesueina o tusitusiga paia i aso taitasi e fesoasoani e saunia ai oe e maua musumusuga a le Agaga Paia. E fausia ai lou faatuatua, faamalositia ai oe e tetea atu i faaososoga, ma fesoasoani e te latalata atu ai i lou Tama Faalelagi ma Lona Alo Pele.

Ia faia se fuafuaga mo au suesuega o tusitusiga paia. Mafaufau e faaavanoaina se taimi i aso taitasi e suesueina ai tusitusiga paia. I lenei taimi, faitau ma le faateete, ma ia faa-

## *Tusitusiga Paia*

logo atu i musumusuga a le Agaga. Ole atu i lou Tama Faalelagi e fesoasoani mai ina ia e iloa le mea o loo Ia finagalo e te aoaoina ma faia.

Ia faaauau pea le faitauina o tusitusiga paia, aemaise lava le Tusi a Mamona, i le gasologa o lou olaga. O le a e toe mauaina pea lava pea ia oa taua o tusitusiga paia, mauaina isi uiga fou ma ona faatatauga o loo i ai ao e suesueina i latou i vaega eseese o le olaga.

Afai ua e faaiipoipo, ia faaavanoaina se taimi i aso taitasi e faitau ai o se aiga ia tusitusiga paia. O lenei taumafaiga e faaono faigata, peitai o le a tutupu mai ai ni taunuuga matagofie e faavavau. I lalo o le taitaiga a le Agaga, ia fuafua le suesueina o tusitusiga paia ina ia talafeagai ma mea o manao-mia e lou aiga. Aua le fefe i le faitauina atu o tusitusiga paia i tamaiti laiti. O le gagana a na faamaumauga paia o loo i ai se mana e pa'i atu ai, e oo lava i tamaiti laiti.

### O Le Tusi Paia

Ua vaevaeina le Tusi Paia i vaega e lua: o le Feagaiga Tuai ma le Feagaiga Fou. O le Feagaiga Tuai o se faamaumauga paia o fesootaiga a le Atua ma Ona tagata o le feagaiga i le Laueleele Paia. O loo aofia ai aoaoga a na perofeta e pei o Mose, Iosua, Isaia, Ieremia, ma Tanielu. O le Feagaiga Fou o loo faamaumau ai le fanau mai ma galuega i le tino, ma le Togiola a le Faaola. O loo faaiuina i le galuega a soo o le Faaola.

Ona o le tele o faaliliuga o le Tusi Paia, o lea foi ua tele ai ituaiga lomiga eseese.

I le Ekalesia a Iesu Keriso o le Au Paia o Aso e Gata Ai, tatou te faatauaina le Tusi Paia ma ana aoaoga paia. E mafai ona tatou maua le malosiaga ma le faamafanafanaga mai tala o loo i tusitusiga paia o fesootaiga a le Atua ma Ona tagata.

O Le Tusi a Mamona: O se Tasi Molimau ia Iesu Keriso

Na oo mai le Tusi a Mamona i lenei augatupulaga ona o le finagalo o le Alii. O se talafaamaumau o fesootaiga a le Atua ma tagata na ola i Amerika anamua. Na tusia e perofeta a le Alii ia uluai talafaamaumau autu i luga o papatusi auro. Na folafola mai e le Alii e faapea o le Tusi a Mamona o loo i ai “le atoatoa o le talalelei a Iesu Keriso” (MFF 20:9; Tagai foi i le MFF 42:12).

I le aso 22 o Setema 1827, na tuuina mai ai e se agelu e igoa ia Moronae—o le perofeta mulimuli o le Tusi a Mamona—nei talafaamaumau i le perofeta o Iosefa Samita. O le meaalofo ma le mana o le Atua, na faaliliuina ai e le perofeta o Iosefa nei talafaamaumau i le gagana Peretania. Talu mai lava na taimi, ua faaliliuina le Tusi a Mamona i le tele o isi gagana.

O le faamoemoega autu lava o le Tusi a Mamona o le faalitonuina lea o tagata uma o “Iesu o le Keriso, o le Atua e Faavavau, ua faaali mai o ia lava i atunuu uma” (Itulau Tomua o le Tusi a Mamona). O loo aoao mai e faapea o tagata uma “e tatau ona o mai ia te ia, a leai o le a le faaolaina i latou” (1 Nifae 13:40). Na saunoa mai Iosefa Samita e faapea o le Tusi a Mamona “o le maa auau lea o la tatou ekalesia, ma [o le a] latalata atu se tagata i le Atua e ala i le ola ai i ona mataupu, nai lo se isi lava tusi” (faatomuaga i le Tusi a Mamona).

O le Tusi a Mamona o se tasi lea molimau mo upumoni o loo aoaoina i totonu o le Tusi Paia. Ua faapea ona ia toefuatai mai upumoni “malamalama ma le taua” ua aveesea mai le Tusi Paia ona o le sese o le faaliliuga po ua “aveeseina” i tau-mafaiga e “faapiopio ai ala tonu o le Atua” (tagai 1 Nifae 13:24–27, 38–41). O le Tusi Paia ma le Tusi a Mamona “e tutupu faatasi e faatoilaloina ai mataupu pepelo, e faaiuina foi finauga, ma faatuina le filemu” (2 Nifae 3:12).

I le latalata lava i le faaiuga o le Tusi a Mamona, o loo aoao mai ai le perofeta o Moronae ia i tatou i le ala tatou te

## *Tusitusiga Paia*

iloa ai e moni le tusi: “Pe a maua e outou nei mea, ou te apoapoi atu ia te outou, ia outou ole atu i le Atua, le Tama Faavavau, i le suafa o Iesu Keriso, pe le moni ea nei mea; afai tou te ole atu ai ma le loto faamaoni, ma le manatu tonu i ai, ma le faatuatua ia Keriso, na te faaalua le tonu ia te outou i le mana o le Agaga Paia” (Moronae 10:4; tagai foi i le fuaiupu e 3 ma le 5).

### O Le Mataupu Faavae ma Feagaiga

O le Mataupu Faavae ma Feagaiga o loo i ai faaaliga na tuuina atu i le perofeta o Iosefa Samita. O loo i ai foi nai faaaliga laiti na tuuina atu i isi perofeta o aso e gata ai. O leni tusi o tusitusiga paia e tulaga ese aua e le o se faaliliuga o ni faamaumauga anamua. O se aotelega o faaaliga na tuuina mai e le Alii i Ana perofeta filifilia i aso e gata ai.

Na saunoa mai le perofeta o Iosefa Samita e faapea o le Mataupu Faavae ma Feagaiga o “le faavae lava lea o le Ekalesia i nei aso e gata ai, o se mea aoga foi i le lalolagi, o loo faailoa mai ai ki o mea lilo o le malo o lo tatou Faola ua toe tuuina mai i tagata” (faaulutala o le MFF 70).

### O Le Penina Tau Tele

O le Penina Tau Tele o loo i ai tusi a Mose, le tusi a Aperaamo, le faaliliuga musuia a le perofeta o Iosefa Samita o le mataupu e 24 o le Mataio, ma nisi tusitusiga a le perofeta o Iosefa.

O le tusi a Mose o se vaega laitiiti mai le faaliliuga musuia a le perofeta o Iosefa Samita o le Tusi Paia. O se tala-faamaumau atoatoa o tusitusiga a Mose i le amataga o le tusi o le Kenese i totonu o le Feagaiga Tuai. O loo i ai le tele o aoaoga faavae ma aoaoga na leiloloa mai le Tusi Paia ma au-maia ai foi faamatalaga faaopoopo e uiga i le Ata o le Faaolataga, o le foafoaga o le lalolagi, ma fesootaiga a le Alii ma Atamu ma Enoka.

O le tusi a Aperaaamo o se faaliliuga o talafaamaumau anamua na tusia i pepa pa’u laau, lea na oo mai i le Ekalesia i le 1835. Na faaliliuina e le Perofeta o Iosefa Samita ia talafaamaumau e ala i faaaliga. O lenei tusi o loo aofia ai upumoni e uiga i le Fono Sili i le muai olaga i le lagi, le foafoaina o le lalolagi, o le natura o le Atua, ma le perisitua.

Iosefa Samita—Mataio ua faaopoopo mai ai lo tatou malamalama i aoaoga a le Faaola e uiga i Lona Afio Mai Faalua.

O tusitusiga a Iosefa Samita i totonu o le Penina Tau Tele o loo aofia ai:

- Iosefa Samita—Talafaasolopito, o se vaega na sii mai le talafaasolopito a le perofeta o le Ekalesia. O se tala i mea na tutupu na oo atu ai i le Toefuataiina o le Ekalesia, e aofia ai le Uluai Faaliga, o asiasiga a Moronae i le perofeta o Iosefa, o le mauaina o papatusi auro, ma le Toefuataiina mai o le Perisitua Arona.
- O le Mataupu Faavae o le Faatuatua, lea na tusia e le Perofeta o Iosefa Samita o ni faamatalaga autu o talitonuga ma mataupu faavae.

Faamatalaga Faaopoopo: Roma 15:4; 2 Timoteo 3:15–17; 2 Nifae 25:26; Alema 17:2–3; 3 Nifae 23:1–5; MFF 18:33–36; Mataupu Faavae o le Faatuatua 1:8

*Tagai foi i le perofeta; Toefuataiina o le Talalelei; Faaliga*

**Uarota** (*Tagai Taitaiga o le Ekalesia*)

## Uelefea

O tagata uma lava taitoatasi o le Ekalesia o loo i ai ni matafaioi autu se lua tau le uelefea: ia avea ma se tagata e faalagolago ia te ia lava ma tausia e matitiva ma e le tagolima.

O loo i ai i matua le tiutetauave paia o le tausiiaina o le uelefea faaletino ma le faaleagaga o a latou fanau. Pe a matu-

tua le fanau, o le a ia i latou lava le matafaiioi mo lo latou lelei. E tatau i matua ona aoaoina i latou i mataupu faavae o le uelefea, e fesoasoani ai ia i latou e ola faalagolago ia i latou lava ma tausia o latou lava aiga i le lumanai. E mafai foi e matua ona tuuina atu avanoa e fesoasoani ai e tausia e matitiva ma e le tagolima.

Pe afai o oe o se tagata matua o le Ekalesia, o nei fautuaga uma e mulimuli mai e faatatau tonu lava ia te oe. Pe afai o oe o se alii po o se tamaitai talavou, o le tele foi o nei fautuaga e faatatau foi ia te oe, e tusa lava foi pe o e matua faalagolago atu lava i ou matua.

Avea ma se Tagata Ola Faalagolago ia te oe lava

O le matafaiioi patino lava mo lou manuia lautele, i lagona, faaleagaga, faaletino, ma le tamaoaiga e muamua lava pau atu ia te oe, lona lua i luga o lou aiga, ma lona tolu ai luga o le Ekalesia. I lalo o musumusuga a le Alii ma ala mai i au lava galuega, e tatau ona e saunia mea uma lava e manaomia mo le manuia faaleagaga ma faaletino o oe ma lou aiga.

O le a sili atu ona lelei ona e tausia oe lava ma lou aiga pe afai ua e ola faalagolago oe lava ia te oe. Ua e saunia e feagai ma taimi o faafitauli e aunoa ma lou faalagolago atu i isi.

E mafai ona e ola faalagolago ia te oe lava e ala lea i lou (1) faaaogaina tatau o avanoa e aoga ai; (2) faaaogaina o mataupu faavae lelei o meataumafa ma le soifua maloloina; (3) saunia ma le mauaina o galuega talafeagai; (4) teuina o se sapolai o meaai ma lavalava i le mea e faatagaina e le tulafono; (5) puleaina lelei o au punaoa, e aofia ai le totogiina o le sefuluai ma taulaga ma aloese mai le aitalafu; ma (6) atinaeina le malosi i le faaleagaga, lagona, ma mea e masani ai.

Ina ia mafai ona ola faalagolago ia te oe lava, e tatau ona e naunau e galue. Ua poloai mai le Alii ia tatou galulue (tagai Kenese 3:19; MFF 42:42). O galuega faamamaluina o se sosia faavae lea o le fiafia, taua o le tagata lava ia, ma le faamanuiaina.

Pe afai lava ua le mafai mo se taimi le tumau ona e ausia ou manaoga e ala i au lava taumafaiga po o le lagolago mai

foi o lou aiga, e mafai e le Ekalesia ona fesoasoani ia te oe. I lea tulaga, e masani ona saunia e le Ekalesia ia punaoa e tausia ai le ola e fesoasoani ia te oe ma lou aiga ina ia mafai ai ona e toe ola faalagolago ia te oe lava.

### Tausiga o e Matitiva ma e le Tagolima

E poloaiina pea e le aunoa e le Alii Ona tagata ina ia tausia e matitiva ma e le tagolima. Na Ia fetalai mai, “Ia manatua foi i mea uma, e matitiva, ma e le tagolima, o e mama’i ma e puapuagatia, aua o le na te le faia ia mea, e lē o so’u soo o ia” (MFF 52:40).

E tele auala e mafai ai ona e tausia e matitiva ma e le tagolima. O se tasi auala taua e ala lea i le anapogi ma totogi taulaga anapogi, lea e faaaoga e le epikopo po o le peresitene o le paranesi e fesoasoani atu ai i tagata o le uarota po o le paranesi o loo pagatia i le matitiva, o ma’i, po o isi foi tulaga faigata. E mafai foi ona e tuuina atu ou taimi ma fetufaai atu au taleni. E mafai ona e auuina atu i e ua leai ni mea e nonofo ai, o i latou e le atoatoa le malosi i o latou tino po o mafaufau, tina ua oti a latou tane, ma isi i ou tuaoi ma totonu o lou nuu.

E le gata i le tuuina atu o fesoasoani i le lotoifale ma tagata taitoatasi o e le tagolima, ae ua aapa atu foi le Ekalesia i tagata i le lalolagi atoa, e tusa lava pe o le a le tapuaiga e auai, o e ua aafia i taunuuga o faalavelave faalenatura, oge, o faama’i, ma isi faigata. Ua saunia e le Ekalesia punaoa e tausia ai ma fesoasoani ai i aiga ma tagata taitoatasi ina ia toe faaleleia ma galulue agai atu i le toe ola faalagolago o le tagata ia te ia lava. O foai i le Tupe Faaagaga mo Aoga a le Ekalesia ua tuuina atu ai fesoasoani mo tagata lima vaivai o le Au Paia o Aso e Gata Ai, e faalauteleina ai a latou aoaoga. Ua ofoina atu foi e tagata tautua faamisiona o le Ekalesia o latou taimi ma punaoa e faaleleia ai le faitautusi ma le tusitusi, siitia ai tulaga tau le soifua maloloina, ma tuuina atu ai foi aoaoga.



## *Uluai Agasala*

Faamatalaga Faaopoopo: Iakopo 1:27; Iakopo 2:17–19; MFF 42:31; 104:15–18

*Tagai foi* Anapogi ma Taulaga Anapogi; Auaunaga

## **Uluai Agasala**

Ona o le Pau o Atamu ma Eva, ua ola ai tagata uma i se tulaga pau, ua vavaeeseina ai mai le Atua ma ua tataui ai ona oo i ai le oti faaletino. Ae ui i lea, e lē o tausalaina i tatou i le mea ua ta’ua e le toatele o le “uluai agasala.” I se isi faaupuga, e le faamasinoina i tatou i le solitulafono a Atamu i le Faatoaga o Etena. Na saunua mai le perofeta o Iosefa Samita, “Matou te talitonu e faasalaina tagata ona o a latou lava agasala, ae le o le agasala a Atamu” (Mataupu Faavae o le Faatuatua 1:2).

Ua totagiina e le Faaola le tau mo le solitulafono i le Faatoaga o Etena e ala mai i le Togiola (tagai Mose 6:53). Ua la aumaia mo i tatou le lagona mautinoa moni o le toetutu ma le folafolaga e faapea, e faalagolago i luga o lo tatou faatuatua, e mafai ai ona tatou toe foi atu ma mau faatasi i le afioga o lo tatou Tama Faalelagi e faavavau.

*Tagai foi* Pau

## **Ulugalii Tetea**

I le “Aiga: O se Folafolaga i le Lalolagi,” o le Au Peresitene Sili ma le Korama a Aposetolo e Toasefululua ua “ta’utino atu ma le faamaoni, o le faaiipoipoga i le va o se alii ma se tamaitai ua faauuina e le Atua, ma o le aiga o le ogatonugalemu lea o fuafuaga a Lē Foafua, mo le taunuuga e faavavau o Lana fanau” (tagai itulau 10–12 o le tusi leni). E ui lava i nei upu moni, o loo avea pea le tetea o ulugalii ma vaega taatele i le tele o sosaiete ma ua faateleina pea i tagata o le Ekalesia. O leni faafitauli faifai pea e lē mai le Atua, ae o le galuega a le fili.

O ulugalii faaipoipo taitasi e ao ona galulue faatasi ina ia agavaa mo faamanuiaga o le faaipoipoga e faavavau. Afai ua e faaipoipo ma o loo oulua feagai ma lou toalua ma ni faafitauli, ia manatua o le fofo mo le tele o faafitauli o faaipoipoga e lē o le tetea po o le nonofo eseese. O le fofo o loo maua i totonu o le Talalelei a Iesu Keriso—i le salamo, loto faamagalalo, amiosa’o, ma le alofa. E maua i le tausia o lou toalua i le ala e te mana’o e tausia mai ai oe (tagai Mataio 7:12). A o oulua galulue e foia ni faafitauli, e ono manaomia lo oulua o faatasi e saili se fautuaga mai lo oulua epikopo po o le perezitene o le paranesi.

*Tagai foi Alofa Mama; Aiga; Alofa; Faaipoipoga; Malumalu*

## **Upu Masoa**(*Tagai Gagana Masoa*)

### **Upu o le Poto**

O le Upu o le Poto o se tulafono o le soifua maloloina na faaali mai e le Alii mo lo tatou manuia faaletino ma le faaleagaga. I lenei faaaliga, lea o loo tusia i le vaega e 89 o le Mataupu Faavae ma Feagaiga, o loo ta’u mai ai e le Alii meaai e lelei tatou te aai ai, ma mea foi e lē lelei mo o tatou tino. Ua Ia folafola mai faamanuiaga faaleagaga ma faaletino pe a tausia le Upu o le Poto.

I le Upu o le Poto, ua poloaiina ai i tatou e le Alii ina ia aua nei o tatou tuuina mea nei i totonu o o tatou tino:

- Meainu malolosi (tagai MFF 89:5–7).
- Tapa’a (tagai MFF 89:8).
- Lauti ma le kofe (tagai MFF 89:9; ua aoa mai i tatou e perofeta o aso e gata ai o le faaupuga “mea inu vevela” e faatatau lea i le lautitama ma le kofe).

Soo se mea faatama’i e tuuina ma le loto i ai e tagata i totonu o o latou tino, ua le tusa lea ma le Upu o le Poto. E matua moni lava leni mea i fualaau faasaina, lea e mafai ona

## *Upu o le Poto*

faataumaogia ai i latou ua amioa'i. Ia matua taumamao mai ai lava i nei mea. Aua lava ne'i e faata'ita'ia na mea. O le faaaogaina ma le lē tatau o fualaau mai talavai, e oo atu ai foi i tulaga matautia o lou ola faalagolago atu i ai.

Ua ta'utino mai e le Alii o meaai nei e lelei mo o tatou tino:

- Fualaau faisua ma fualaau aina suamalie, e ao ona faaaogaina “ma le faautauta ma le loto faafetai” (tagai MFF 89:10–11).
- O aano o “manu ma manu felelei i le vanimonimo,” e tatau ona “faaaogaina faatatau” (tagai MFF 89:12–13).
- O fatu e pei o saito, araisa, ma sana, ia ua avea ma “mataiai o le ola” (tagai MFF 89:14–17).

## Faamanuiaga mai le tausia o le Upu o le Poto

Mo i latou o e tausia le Upu o le Poto, ua folafola mai e le Alii:

“O le au paia uma lava foi o e manatua e tausia ma faia nei mea uma, ma savavali i le usiusitai i poloaiga, o le a maua le malosi i o latou pute ma le ga'o i o latou ivi;

“O le a maua foi le poto ma oa sili o le malamalama e oo lava i oa natia;

“Latou te taufetuli foi ae le vaivai, ma savavali a e lē matapogia.

“A au foi le Alii, ou te avatua ia i latou le folafolaga, o le a laaloa ia i latou le agelu o le faafanoga, e pei o le fanauga a Isaraelu, a e lē fasia i latou” (MFF 89:18–21).

## Faatoilaloina o Mause

O le ala sili lava o le matua aloese lea mai mea ua faasaina mai le Alii i totonu o le Upu o le Poto. Ae pe afai ua e aafia ma ua e amioa'i i le faaaogaina o nei mea, e mafai ona faasaolotoina mai oe mai lena mausa. E mafai ona e faatoilaloina lea mausa e ala ia oe lava taumafaiga, o le mana o le

alofa tunoa o le Alii, o fesoasoani mai tagata o le aiga ma uo, ma le taitaiga mai taitai o le Ekalesia.

Tatalo mo se fesoasoani, ma faia mea uma i lou malosi e tetee atu ai i faaososoga lea e oo mai ona ua fai ma au mausa. E finagalo lou Tama Faalelagi ina ia e mauaina faamanuiaga e maua mai lou tausiana o le Upu o le Poto, ma o le a Ia tuuina atu ia te oe le malosi e ala i au taumafaiga faamaoni ina ia faia.

Faamatalaga Faaopoopo: MFF 49:19–21; 59:15–20; 88:124; 89:1–4

*Tagai foi Usiusitai; Faaososoga*

## Usiusitai

I le muai olaga, sa pulefaamalumalu ai le Tama Faalelagi i se Fono sili i le Lagi. O iina sa tatou iloa ai Lana fuafuaga mo lo tatou faaolataga, lea e aofia ai se taimi o tofotofoga i luga o le fogaeleele: “Ma tatou faia ai se lalolagi e nonofo ai i latou nei; ma o le a tatou faataitai ai i latou, ia iloa ai, pe latou te faia mea uma e poloaiina ai i latou e le Alii lo latou Atua” (Aperaamo 3:24–25). O se tasi o mafuaaga ua e i ai iinei i le lalolagi o le faailoa atu lea o lou naunautaiga e usiusitai i poloaiga a le Tama Faalelagi.

E toatele tagata e lagona e faapea o se avega mamafa ia poloaiga ma ua faatapulaa ai le saolotoga ma le tuputupu ae faaletagata lava ia. Ae peitai na aoao mai le Faaola e faapea o le saolotoga moni e sau mai le mulimuli atu lea ia te Ia: “Afaifou te tumau pea i la’u mataupu, o o’u soo moni outou. E iloa foi e outou le mea moni, e tuu sa’oloto foi outou e le upu moni” (Ioane 8:31–32). Ua tuuina mai e le Atua ia poloaiga mo lou lelei. O faatonuga alofa mo lou fiafia ma lou lelei faaletino ma faaleagaga.

Na aoao mai perofeta Iosefa Samita e faapea o le usiusitai i poloaiga e maua ai faamanuiaga mai le Atua. Na ia sauoa mai: “O loo i ai le tulafono, na faavaeina e le matatalaina i le lagi a o le’i faavaeina lenei lalolagi, e autu ai faamanuiaga uma lava—pe a tatou maua fo’i so o se faamanuiaga mai le

## *Valoaga*

Atua, e maua ai i le usiusita'i i le tulafono lea e autu ai" (MFF 130:20–21). Na aoao mai foi e le Tupu o Peniamina lenei mataupu faavae. "O lo'u manao, ia outou mafaufau i le manuia ma le fiafia o i latou o e tausii i poloaiga a le Atua," na ia apoapoai mai ai. "Aua, faauta, ua manuia i latou i mea uma, i le faaletino, atoa ma le faaleagaga, afai foi ua latou tutumau e oo i le iuga, e talia i latou i le lagi, ina ia latou mau faatasi ma le Atua i le fiafia e le iu. E! ia manatua, ia manatua lava, ua moni lava nei mea, aua na fetalai mai e le Alii le Atua" (Mosaea 2:41).

O lo tatou usiusitai i poloaiga o se faailoga lea o lo tatou alolofa mo le Tama Faalelagi ma Iesu Keriso. Na fetalai mai le Faaola, "Afai tou te alofa mai ia te au, ia outou tausii mai i a'u poloaiga" (Ioane 14:15). Na ia toe fetalai mulimuli mai: "Afai tou te tausii a'u poloaiga, ona tumau lea o outou i lo'u alofa, pei ona ou tausii poloaiga a lo'u Tama, ma ou tumau i lona alofa" (Ioane 15:10).

Faamatalaga Faaopopo: Iosua 24:14–15; Failauga 12:13; Mataio 7:21; Ioane 7:17; 1 Nifae 3:7; MFF 58:21–22; 82:8–10

*Tagai foi Saolotoga; Ata o le Faaolataga*

**Valoaga** (*Tagai Faaaliga; Meaalofa Faaleagaga*)

*Ia iloa a'u, ma faalogo i a'u upu;  
savali i le agamalu o lo'u Agaga,  
ma o le a e maua le filemu ia te a'u.*

*Mataupu Faavae ma Feagaiga 19:23*

O LE EKALLESIA A  
**IESU KERISO**  
O LE AU PAIA O ASO  
E GATA AI

SAMOAN

